






14-16: 6. 9

1
1
29



PHILOSOPHIA PERIPATETICA

Tomis Quatuor comprehensa,

AUTHORE.

JO: BAPTISTA
DE BENEDICTIS

E. SOCIETATE JESU.

TOMUS TERTIUS.

• Qui est PHYSICÆ Pars altera.



VENETIIS, MDCCXXIII.

Ex Typographia Balleoniana.

Superiorum Permissu, ac Privilegiis.

Bibliotheculæ R. P. Lectoris Sac. Theol.

1822

111

111

111

111

111

111

111

111

111

111

I N D E X

TITULORUM.

TOMI TERTII.

LIBER V. *De Mundo , & Cælo.*

QUÆSTIO I. De Mundi duratione .

Cap. I. An fuerit Mundus in tempore creatus . *pag. 1*

Cap. II. An potuerit Mundus ab æterno fuisse saltem secundum permanentia. &

Cap. III. An potuerit Mundus ab æterno fuisse secundum entia successiva , motum , & tempus. *12*

Cap. IV. An potuerit Mundus ab æterno fuisse secundum successivas rerum generationes , quales de facto sunt . *22*

Cap. V. An Mundus secundum successivas generationes petat , ac possit naturaliter in æternum durare . *36*

QUÆSTIO II. De Mundo secundum se .

Cap. I. Sit ne unus , an multiplex Mundus . *39*

I. N D E X

Cap.II. <i>An Mundus sit perfectus, & optimus.</i>	43
Cap.III. <i>Quæ sit Mundi figura.</i>	45
Cap.IV. <i>Quod sit Mundi systema.</i>	48

QUÆSTIO III. De Cælo.

Cap. I. <i>An Cælum sit corpus simplex.</i>	56.
Cap. II. <i>An Cæli incorruptibilitas, si qua est, petat compositionem ex materia alterius rationis à materia sublunarium.</i>	60
Cap.III. <i>An cælestia corpora sint ab intrinseco incorruptibilia.</i>	64
Cap. IV. <i>Sint ne Cæli solidi, an fluidi.</i>	71.
Cap.V. <i>Utrum Cæli moveantur à propria forma, an verò ab Intelligentia assistente, aut informante.</i>	74

QUÆSTIO IV. De cælestibus corporibus in particulari, eorumque proprietatibus, luce, & influentiis.

Cap.I. <i>De Sole.</i>	79
Cap.II. <i>De reliquis Planetis, ac Stellis fixis.</i>	82
Cap.III. <i>De Luce.</i>	85
Cap.IV. <i>De influentiis.</i>	96

TITULORUM.

LIBER VI. *De Elementis.*

QUAESTIO I. *De primis Elementorum qualitatibus.*

Cap. I. Numerus, & definitio qualitatum primarum.	100
Cap. II. De Calore.	103
Cap. III. De Frigore.	113
Cap. IV. De Raritate, & Densitate, praecipuis caloris, & frigoris effectibus.	116
Cap. V. De Humiditate, seu Fluiditate.	128.
Cap. VI. De Siccitate, seu soliditate.	136.
Cap. VII. De Glacie, potissimo frigoris effectu.	139

QUAESTIO II. *De Substantia, & Mixtione elementorum.*

Cap. I. Natura, & numerus Elementorum.	144
Cap. II. An vulgata elementa sint inter se substantialiter diversa.	148
Cap. III. De Igne.	152
Cap. IV. De Ignis loco, & sphaera.	156
Cap. V. De Aere.	159
A 3	Cap. VI.

I N D E X

Cap. VI. <i>De Aqua, & Terra.</i>	163
Cap. VII. <i>De mutua transmutabilitate elementorum.</i>	164
Cap. VIII. <i>De mixtione: ubi, an elementa sint formaliter in mixto.</i>	168

Q U A E S T I O III. *De Virtutibus elementorum motivis.*

Cap. I. <i>Utrum elementa moveantur motu recto.</i>	173
Cap. II. <i>An gravia moveantur ab intrinseco per virtutem accidentalem ipsis inherentem.</i>	176
Cap. III. <i>De motu gravium accelerato.</i>	186.
Cap. IV. <i>An levitas sit specialis qualitas, & in quo subiecto reperiatur.</i>	192.
Cap. V. <i>Utrum elementa gravitent in propriis locis.</i>	198
Cap. VI. <i>De vi elastica, & an ab ea contingat motus reflexus.</i>	209
Cap. VII. <i>An sit quies in puncto reflexionis.</i>	214
Cap. VIII. <i>De motu projectorum.</i>	218.

TITULORUM.

LIBER VII. *De Mixtis imperfectis.*

QUAESTIO I. *De communi Meteororum materia, & causis.*

Cap. I. *Quid, & quatuorplex sit halitus.*
229.

Cap. II. *De causa halituum effectiva ubi. De Ignibus subterraneis.* 231

Cap. III. *Causa terrae motuum ex dictis elicitur.* 235.

Cap. IV. *Thermarum causae ex dictis eruntur.* 239.

QUAESTIO II. *De Igneis Meteoris.*

Cap. I. *De fulmine, fulgure, & contru.* 242.

Cap. II. *De reliquis impressionibus ignitis.* 247.

Cap. III. *De Cometis praesertim elementaribus.* 249.

QUAESTIO III. *De Meteoris Aeriis.*

Cap. I. *De Nubibus, ac Nebulis.* 254.

Cap. II. *De Pluvia, Rore, & Aura Serotina.* 256.

I N D E X

Cap.III. De Nive , Grandine , & Prui- ne	259
Cap.IV. De Ventis	262
Cap. V. De Numero , & qualitatibus ventorum	265
Cap. IV. De Iride , cæterisque impressio- nibus apparentibus	269

QVABTIO IV. De Meteoris Aqueis .

Cap.I. De Maris falsedine	274
Cap.II. Reliquæ Maris qualitates , & ef- fecta considerantur	277
Cap.III. De motibus Maris , præsertim à Septentrione in Austrum , & ab Orien- te in Occidentem	281
Cap.IV. De reciproco Maris aestu , cujus primò narratur historia	285
Cap.V. Minus probabiles de causa aestus sententiæ prolatæ , ac rejectæ	287
Cap.VI. Aliæ de aestus causa proferun- tur opiniones , & nulla hætenus suf- ficiens inventa concluditur	292
Cap. VII. An , & quo pacto Mare fon- tium , ac fluminum est origo	295

QVABSTIO V. De Fossilibus .

Cap.I. De generatione fossilium in univër- sum	302
Cap.	

TITULORUM.

Cap.II. *Præcipua quædam fossilia expoununtur.* 309

Cap.III. *De vi electrica.* 309

Cap.IV. *De vi Magnetica.* 313

LIBER VIII. *De Mixtis Animatis.*

QVÆSTIO I. *De Animæ substantia, ejusque potentiis in communi.*

Cap. I. *An, & quid sit Anima, & utrum sit corporis forma.* 327

Cap.II. *Quid sit Vita.* 330

Cap. III. *Num vita in actu secundo sit accidens distinctum à vita in actu primo.* 337

Cap. IV. *De distinctione Animarum.* 343.

Cap.V. *Sit ne una in omnibus, aut multiplex in uno vivente anima.* 346

Cap.VI. *Num omnis anima sit integraliter indivisibilis.* 355

Cap. VII. *An, & quas corporis partes anima informet.* 365

Cap. VIII. *Num anima rationalis sit à corpore independens, & immortalis.* 369.

Cap.IX. *Num sit, & quid sit in brutis anima sensitiva.* 381

Cap. X. *Sitne animarum intra speciem*

I N D E X

<i>eandem entitativa inæqualitas .</i>	391
Cap.XI. <i>Sitne animæ facultates ab anima ipsa secundum rem distinctæ .</i>	394

QVABSTIO II. De animæ vegetativæ facultatibus .

Cap.I. <i>Vegetativæ facultates numerantur, earumque materialis objecti alimenti, natura discutitur .</i>	397
Cap.II. <i>De vitali nutritione .</i>	402
Cap.III. <i>Sitne nutritio motus in vivente nunquam interruptus .</i>	408
Cap.IV. <i>De motu cordis, & respiratione ad nutritionem necessariis .</i>	411
Cap.V. <i>De vitali generatione .</i>	416

QVABSTIO III. De Speciebus, & Habitibus .

Cap.I. <i>Quid sit, & an sit species intentionalis impressa .</i>	426
Cap.II. <i>Quod sit proprium minus impressæ speciei .</i>	432
Cap.III. <i>De productione, Conservatione, & corruptione specierum .</i>	435
Cap.IV. <i>An sit, quid sit, & in quo subiecto sit Habitus .</i>	441
Cap.V. <i>Num Habitus sit Qualitas specialis à speciebus distincta .</i>	448

Cap.

TITULORUM.

Cap. VI. *Infertur ex dictis, habitum non esse unam simplicem qualitatem.*
453.

QVAESTIO IV. *De Facultatibus Animæ sensitivæ.*

Cap. I. *An sensus omnis tacto uno absolvatur, & an omnis sensatio in cerebro fiat.* 456

Cap. II. *De objecto, & organo visus.* 463.

Cap. III. *De objecto, & organo auditus.* 479

Cap. IV. *De objecto, & organo olfactus.* 487

Cap. V. *De objecto, & organo gustus.* 491.

Cap. VI. *De objecto, & organo tactus.* 494.

Cap. VII. *Alia nonnulla ad sensus externos universim pertinentia expediuntur.* 496

Cap. VIII. *De sensu interiori, & appetitu.* 500

QVAESTIO V. *De facultatibus Animæ intellectivæ.*

Cap. I. *Sitne intellectus nihil aliud, quàm*
A G res

INDEX TITULORUM :

<i>res intelligens .</i>	513
<i>Cap.II. Intellectus possibilis ab agente distinctio , ejusque à phantasmate dependentia declaratur .</i>	517
<i>Cap.III. Quid sit formaliter intellectio , quid verbum mentis .</i>	521
<i>Cap.IV. Cognitionum genera varia afferuntur , & explicantur .</i>	526
<i>Cap. V. De memoria , & reminiscencia .</i>	536





LIBER QUINTUS

PHYSICORUM

DE MUNDO, ET COELO.

QUÆSTIO PRIMA.

De Mundi duratione.

CAPUT I.

An fuerit Mundus in tempore creatus.



Aristoteles 8. phys. 2. de Gen. 1. De Cælo, & 12. Met. Mundum æternum censuit, sequutus ex parte Xenophanem, paucosque alios Pythagoricos, quos tamen emendavit in eo, quod ingenitum crederent: ipse verò productum quidem voluit, sed à Deo per naturæ necessitatem operante, adeoque operationem naturæ cogvam habente. Ità verò visus est Alexandro in hac sententia firmus Aristoteles, ut nulla, inquit, quæstione magis sibi constet, nulla illi arrideat magis, quàm Mundi æternitas. Oppositum tamen de Philosophi mente sensit ex vero D. Thomas 1. p. qu. 46. art. 1. ubi ostendit, quod *Rationes, quas ad*

hoc

hoc Arist. inducit, non sunt demonstrativa simpliciter, sed secundum quid, scilicet ad contradicendum rationibus antiquorum ponentium, Mundum incipere secundum quosdam modos in veritate impossibiles. Et hoc apparet ex tribus. Primo quidem, quia tam in 8. phys. quam in 1. de Cælo præmittit quasdam opiniones, ut Anax. Emp. & Plat. contra quas rationes contradictorias inducit. Secundo, quia ubicunque de hac materia loquitur, inducit testimonia antiquorum: quod non est demonstratoris, sed probabiliter persuadentis. Tertiò, quia expressè dicit in lib. Top. quod quedam sunt problemata dialectica, de quibus rationes non habemus, ut, utrum Mundus sit æternus. Ex quibus apparet, non solum Aristotelem non demonstrasse Mundi æternitatem (quod certum est) sed nec visum sibi esse, quod demonstraverit adeoque falsum est, omnino firmum in ea opinione fuisse.

Cæterum quocumque demum pacto hanc sibi sententiam Philosophus persuaserit, de eius falsitate satis nobis ex Fide constat, docente Mundum in tempore creatum, imò & ejus Chronologiam non obscure à prima ejus ætate usque ad Noemicum diluvium insinuante in quo consentiunt non solum Scripturæ, sed etiam Concilia, & Patres apud Suarez lib. 1. de Op. sex dierum c. 2. adeoque veritas de Mundi initio indubitanter de Fide est, & ita de Fide, ut nemo hactenus hæreticus, si credimus eidem Suario. circa eam ex toto erraverit; quamvis enim ex iis aliqui materiam increatam, adeoque æternam statuerint; Aliquid tamen esse à Deo creatum, quod sit etiam æternum, nullus hæreticus asseruit.

Difficultas est una, an Mundi initium possit naturali demonstratione evinci. In qua censeo distinguendum; aut enim quæstio est, an Mundus potuerit habere initium; & de hac quæritur, utrum possit demonstrari; aut quæ-
stio

Nunc est mera de facto, an; dato, quod Mundus potuerit esse in tempore, & potuerit non esse, fuerit potius in tempore, quam non fuerit.

Ad primam dicendum, Mundum potuisse habere initium, esse veritatem demonstrabilem ex contingentia Mundi, & libertate Dei. Ex primo sic arguo. Quod potest esse, & non ab aeterno, potest esse in tempore. Omne contingens potest esse, & non ab aeterno. Ergo omne contingens potest esse in tempore. Minor probatur ex ipso conceptu contingentiae, quae cum sit antecedens non repugnantia ad non esse, ita & ad non esse hoc, vel illo tempore, & per consequens ab aeterno, cum sit etiam antecedens non repugnantia ad nunquam esse; eadem enim ratio, quae facit rem posse anteceder non esse nunc, facit rem posse nunquam esse. Subsumo. sed Mundus est contingens. Ergo potest esse in tempore. Subsumpta probatur, quia non possunt singulae Mundi partes esse contingentes, quin totus ipse Mundus contingens sit, ut constabit partim ex dicendis infra de Mundi aeternitate, partim in Met. ubi de existentia, & perfectionibus Dei.

Ex secundo sic. Prima causa est summe libera, adeoque est actionis suae summe domina. Ad summum autem antecedens actionis dominium non solum pertinet, posse illam hic & nunc non ponere, sed posse illam nunquam ponere; si enim necessarium esset aliquando eam ponere, esset, ut constat, libertas, ac dominium diminutum. Accedit, quod Deitas est summe sibi sufficiens, neque ulla tenus indiga creaturarum ad complementum felicitatis. Quod cumque ergo extra se ponit, non ex indigentia, aut ex necessitate; sed ex mera liberalitate, ac libertate ponit; & per consequens, quodcumque ponit, cum antecedenti potentia non ponendi id efficit. Quare etiam dato, quod Mundus ab aeterno

fuerit, fatendum potuisse ab æterno non esse.

Quæ verò contrà hoc dictum ab Aristotele, & Averroë congeruntur, nullius sunt momenti. Primum est; quia si Mundus esset productus in tempore, Deus ex non creante fieret creans: quod eius immutabilitati repugnat. Secundum. vel Deus habuit voluntatem creandi æternam, vel temporaneam. Secundum dici non potest, quin Deus asseratur mutabilis, non solum extrinsecè per actionem novam, sed etiam intrinsecè per novam voluntatem. Primum probat, semper produxisse: quia semper voluit, & efficaciter voluit producere; infinita autem Dei efficacia impedimentum non habet. Tertium. si Mundus haberet initiū, Deus esset ante Mundum. Sed *antè* est temporis adverbium. Ergo esset tempus ante Mundum. Hoc autem est impossibile; quia tempus non est sine motu Cæli, neque hic sine Cælo, neque Cælum sine Mundo. Ad primum. immutabilitas Divina solum concludit intrinsecam, non verò extrinsecam mutationem: Mutatio enim extrinseca non est mutatio Dei, sed creaturæ Deū denominans. Ex non creante autem Deus fit creans per creationem à se de novo, non in se positam. Hoc ipsum argumentū exemplo ab anima rationali de novo creata petito fortiter exagitat Aug. lib. 11. de Civ. c. 4. Ad secundum. voluntas Dei efficax æterna non est, nisi producendi effectum in tempore; & per consequens in hoc uno impedimentum habere non potest. Huc etiam facit exemplum adductum ab Aug. cit. c. 5. quod scilicet si contendatur Deum debuisse producere semper, probatur simul Deum debuisse producere ubique. Ad tertium dico, quod licet *ante* sumptum in rigore pertineat ad tempus, arque adeò in hoc sensu nihil est antè Mundum: potest tamen sumi minùs rigorosè, & extendi ad ipsam æternitatem divinam, quæ tēpus omne præcessit. Ita sumitur Prob. 9. *Antequam*
quid.

quidquam faceret à principio, &c. Accedit, quod ante potest etiã appellare tempus non reale, sed imaginarium explicatũ proportionaliter ad ea, quæ dicta sunt in *De Loco* de spatiis imaginariis.

Ad secundam verò, quæ est, ut dixi, mera quæstio de facto, dicendum puto, neutram partem demonstrari posse. Non enim est demonstrabile nunc, Mundum fuisse ab æterno, cum sit propositio certò falsa, adeòq; evadere non possit evidenter vera. Non est demonstrabile Mundum non fuisse ab æterno; neque enim metaphysicè, ostendendo impossibilitatem creaturæ cuiuslibet, aut Mundi ab æterno producti, ut patebit ex dicendis; neque physicè, quia nullus est sensibilis effectus, qui Mundi initium poscat, atque ità ostendat.

Cæterum, ut benè ait Suarez loc. cit. n. 22, potest efficaciter ostendi, Mundi initium convenientius esse, tum ex parte Dei, tum ex parte Mundi. atq; etiam per extrinseca testimonia, seu indicia credibilis. Nam & ita evidentius constat dependentia creaturarum à Deo, & Dei in operando libertas, & eiusdem in essendo sufficientia. Huc etiam conspirant omnes ante Aristotelem Philosophi, imò & omnes gentes, si credimus Aristoteli ipsi 1. de Cælo t. 102. ubi loquens de Cælo (eadem est autem ratio de Mundo.) Omnes, inquit, genitum esse dicunt: Quod quidem contingere non potuit, nisi perpetua patrum ad filios traditione, hæreditario jure veluti per manus transmissa veritate. Atq; hoc aptius est argumentum, quàm negativum illud, quo usus est Lucretius, quod scilicet suprà bellum Thebanum, & Trojæ excidium nulla extent historiarum monumenta; poterit enim facilè Aristoteles respondere, memorias ejusmodi diluviis, conflagrationibus, aliavè id genus vastitate interiisse; atque ita æternitatis Mundi Authores respondent apud Augustinum 12. de Civ. cap. 10.

CAPUT II.

*An potuerit Mundus ab aeterno fuisse saltem
secundum permanentiam.*

MUndi anterior æternitas, quæ mihi possibilibus omnino videtur, asserenda per partes est. Incipio à faciliores; & cum in Mûndo alia sint entia permanentia, quæ partes sibi mutuò succedentes non habent, alia successiva, ut motus locales, & rerum generationes, de permanentibus, dumtaxat statuendû in præsentî. Quamvis enim ista secundû nem separari non possint; quia permanens, sine sua quodq; duratione essentialiter prius, ac posterius involuente esse non potest; possunt tamen separari secundum considerationem.

Mundum porro potuisse æternum esse, asserit D. Th. 1. p. q. 46. art. 2. & opusc. 27. per totum, cui ad stipulatur non solum tota ejus Schola, sed etiam Durandus, Gregorius, Occam, Argentina, Ægidius, alique plurimi, quos laudat, & quoad hanc partem de permanentibus sequitur Suarez in Met. disp. 20. sect. 6. Cum his equidem.

Dico, nihil repugnare, quo minùs permanens creatura sit ab æterno producta. Probatur ratione, qua utitur D. Th. opusc. cit. Ex duplici capite nasci potest repugnantia creaturæ æternæ. Primò ex parte causæ exigentis præcedentiâ non naturæ solum, sed etiam temporis relatè ad effectum suum. Secundò ex parte effectus contingentis exigentis esse post non esse, adeoq; non potentis esse, nisi per transitum à non esse, qui repugnat in re æterna. Sed non urget primum, quod est unicè verum de causa agente per motum, non verò agente per subitam mutationem, in qua effectus potest esse coævus causæ; ut videre est in Sole, & Luce. Ad.
de,

de, quod dilatio actionis provenit in causis naturalibus ex imperfectione agentis, cui aliquid deest de virtutis complemento. Hoc autem dici de Deo non potest, qui ab aeterno completissimam habuit potentiam activam, adeoque non quia non potuit, sed quia noluit, nihil ab aeterno produxit. Neque arguet secundum; nam contingens non dicitur ex genere creatum ex nihilo, quia habet esse post nihil. Sed quia habet esse, quod sine creatione nihil esset; & quia habet esse ex nullo subiecto, ut ait Anselmus, in Monol.

Obiicies primò Patres tum Latinos, tum Græcos expressè negantes possibilem creaturam aeternam. Disputantes enim contra Arium, ex eo arguunt Verbum creaturam non esse, quia fuit ab aeterno. Adedò igitur putarunt durationem aeternam propriam Dei esse, ut sit bona consequentia: *Hac res fuit ab aeterno, ergo est Deus.*

His omnibus opponit D. Th. in eo opusculo. Augustinum: qui quidem impugnaturus Mundi aeternitatem 11. & 12. de Civit. numquam Peripateticis repugnantiam, & contradictionem opponit: quæ sanè fuisset expeditissima via. Qualis autem est illa repugnantia, quam Augustinus non vidit? Accedit, quod c. 15. l. 12. de Civit. solvit argumentum desumptum à contingentia creaturarum, & aeternitate propria Creatoris; loquens enim de Angelis, *Per hoc, inquit, & si semper fuerunt, creati sunt: nec si semper fuerunt, idedò Creatori coaeterni sunt; illi enim semper fuit aeternitate immutabili; isti autem facti sunt, &c.* Ex quibus apparent duo. Primum perperam Augustinum citari à Toletò & aliis in hoc ipso loco, quasi negantem possibilem creaturam ab aeterno. Secundum, quanti faciendum sit argumentum ductum ab aeternitate Dei propria, & incommunicabili creaturae, de qua multa ibi præclare Sanctus Doctor, & nos

& nos alibi, ubi æternitatem propriè dictam à duratione successiva distinximus.

Sed quidquid de hoc sit, tres sunt faciles Patrum expositiones. Prima, quod loquantur de æternitate rigorosa, quæ est incommutabilis vitæ tota simul, & perfecta possessio: quæque ita evidenter est Dei propria, ut creaturæ nulli possit competere. Secunda, quod loquantur de duratione successiva æterna non competente creaturæ ex solo Dei arbitrio, sed etiam ex propria exigentia. adversus quem dicendi modum plura congerit ingeniosè Recupitus tom. 1. de Deo lib. 4. quæst. 19. Tertia, quod loquantur de facto, & supposita Fide, juxta quam optimum erat argumentum adversus Arianos; Si enim nulla de facto fuit ab æterno, creatura, & Verbum fuit ab æterno, Verbum non est creatura.

Obiicies secundo, quod alteri dat esse per electionem, necessario illud supponit sub non esse; Ut enim dicitur 3. Eth. electio non est respectu præsentis, sed futuri. At Deus creaturæ per electionem esse cõmunicat. Ergo illam sub non esse aliquandò supponit. Quod autem necessario fuit aliquandò sub non esse antè esse, non potuit ab æterno esse.

Electio dupliciter stat. Primò strictè, ut est scilicet conclusio consilii, seu deliberationis, ut habetur ex Philos. cit. atque ita non cadit electio in Deum, in quo non præcedit deliberatio. Secundo communiter, & largè, ut est libera volitio medii contingentis, atque ita electio Deo competit: Jam si sumatur electio primo modo, falsa est minor. Si sumatur secundo modo, falsa est maior; quia ad hoc genus electionis satis est, si res, cui esse per eam communicatur, intelligatur sub oppositi possibilitate.

Obiiciestertiò. contingentia importat, ut quod est, possit non esse. At quod est ab æterno, non potest non esse. Ergo quod est ab æter-

no, contingens non est. Minor probatur, quod est ab æterno, vel potest non esse antè sui productionem, vel dum producitur, vel postquam productum est; Non primum; quia non est possibile ante per habitudinem ad æternitatem. Non secundum; quia quod producitur, dum producitur, non potest non produci. Non tertium; tum quia per posse non esse post productionem non salyatur posse non esse ab æterno; tum quia res ab æterno producta, necessario durat per æternitatem. Ergò nunquam res æterna potest non esse.

Arguens primò moneatur, nè sibi ex prava imaginatione fingat rem ab æterno non in certo aliquo, ac determinato instanti creatam: de quo instanti quærat, utrum antè, vel post, vel in ipso potuerit creatura non poni. Quæ sanè imaginatio est in terminis repugnans; hoc enim est produci ab æterno, produci antè quodlibet determinatè signabile instans, adeòque per productionem, quæ pura productio nunquam sit, sed simul sit conservatio.

Dico nunc ad argumentum, creaturam ab æterno productam & potuisse non produci, cum produceretur, per potentiam non consequentem, & sensus compositi, sed antecedentem, & sensus divisi: quemadmodum voluntas tunc, cum amat, dicitur posse antecedenter, & in sensu diviso non amare. & potuisse non produci antequam produceretur, sumendo productionem, ut singulis instantibus determinatis coram respondentem. Sicuti enim nullum est instans, antè quod non sit instans, ità & in nullo creatura ità producitur [productione, ut dixi, conservativa, quia nullam aliam æterna creatura habuit] ut antè illud non potuerit non produci. Quod si sumas totam æternam creaturæ durationem, & petas, utrum antè eam potuerit Deus non producere; Respondetur, potuisse antè non tempore, sed natura: quod satis est ad effectus contingentiam.

Quod

Quod autem ultimo loco additur, quod creatura scilicet æterna, utcumque possit in quolibet instanti determinato non produci, & non esse, si tamen in quovis determinato non produceretur, & non esset, adhuc tamen ab æterno fuisset; verissimum est: sed hoc non tollit creaturæ contingentiam; quia est necessitas orta ex suppositione liberæ Dei voluntatis, quæ ab æterno decrevit creaturam producere. Itaque duplex indifferentia in Divina voluntate, & duplex contingentia in effectu creato considerari potest. Prima est pro quolibet instanti æternitatis distributive: Secunda est pro omnibus collectivè. Ex prima habet effectus æternus, ut quandocumque non productus, ab æterno tamen fuerit: à secunda habet, ut non productus, ab æterno non fuerit; si enim Deus consideratus in *nunc* æternitatis suæ, in quo est natura prior tota duratione creaturæ, non decrevisset creaturam producere, creatura non solum non in hoc, vel illo, sed in nullo æternitatis instanti, & per consequens nunquam fuisset.

Instabis. De ratione contingentis est subditi Divino dominio quoad posse destrui. At creatura ab æterno producta non posset ita destrui, quin durasset per totam æternitatem. Ergo non potest ab æterno produci.

Respondetur, argui per fallaciam à simpliciter ad secundum quid. In maiori enim dicitur esse de ratione contingentis, ut possit simpliciter destrui. Hoc verum est, & habetur in creatura ab æterno producta, quæ in quolibet æternitatis instanti destrui à Deo posset. In minori per productionem æternam non dicitur tolli à creatura, quod possit destrui, sed quod possit destrui ita, ut per æternitatem non duraverit: quod est destrui secundum quid: neque hoc est opus ad divinum plenissimum dominium; quemadmodum ad hoc non est opus, ut ita possit destruere creaturam, ut ea nunquam fuerit,

fuerit, vel ut non fuerit per infinitas partes temporis proportionales: ita eo ipso, quod voluit creaturam æternam, debet posse illam destruere post æternitatem; si negetur, ut negari debet, ad præteritum potentia.

Obiicies quartò. sit ignis ab æterno productus iuxta passum capax recipiendi formam caloris, & ignis. Vel ergò tunc ignis produceret in passu ignem, vel non. Si primum; ignis productus esset ab æterno; & non esset: Esset, quia coævus igni producenti, non esset; quia supponeret antè se passi dispositionem, quæ naturaliter præit introductionem formæ. Secundum dici non potest; quia causa naturalis, cum omnibus requisitis ad agendum ex naturæ necessitate producit.

Respondetur, in casu dato non posse ignem ab æterno in suum effectum, si prius debeant passum alterare, ac disponere; quia æterno nihil est prius, nisi natura. Quod si velis, Deum in hac naturali ordinatione dispensare, tunc ignis ignem ab æterno produceret. Atque hinc patet responsio ad plures eiusmodi casus, qui solent adversus positam conclusionem obiici. Si enim Angelus ab æterno produceret, & ab æterno cognitionem aliquam, aut amorem eliceret, cum iisdem necessariò per æternitatem perseverasset, nec eos abiicere, nisi post æternitatem potuisset. Si Sol ab æterno productus aerem ab æterno illuminasset, eadem lux in aere æternum mansisset. Idem dicitur de muliere, quæ poneretur ab æterno prægnans, quod deberet scilicet sic persistere integram æternitatem: idem de puero, qui puer ab æterno creatus, h. e. cum tanta magnitudine, his organis, &c. eodem pacto invariatus perpetuum fuisset. Ratio istorum, aliorumque huiusmodi est evidens: quidquid enim ponitur sine suæ positionis initio, est eo ipso à parte antè æternam. Sed omnia dicta cum sua operatione, & statu

statu ponerentur sine initio suæ positionis. Ergo cum sua operatione, & statu æterna essent.

Obiicies quintò. Æternitas, ut est infinita duratio, seu duratio quodlibet finitum tempus excedens, est ita Dei propria, ut est Dei propria sapientia, bonitas, potentia infinita. Atqui istæ non possunt creaturis communicari. Ergo neque illa.

Hujus argumenti solutio patet ex dictis ad primum de mente Augustini. Instantiæ nullæ sunt; nam sapientia, bonitas, & potentia secundum infinitatem essentia non possunt creaturis communicari; & ita est iisdem incommunicabilis æternitas. Cæterum infinita secundum quid possunt. Sic defendimus alibi potentiam creatam motivam, v.g. gravitatem infinitam: sic asserunt Theologi primæ notæ scientiam in Christo creatam, quæ ad omnia possible se extendat, adeoque aliquatenus infinitam, infinitam gratiam sanctificantem, &c.

Accedit, argumentum pati instantiam in æternitate à parte post, quæ quidem, & infinita ipsa est, & creaturæ communicabilis. Addo, quod in linea valoris, & æstimabilitatis moralis plurius est æternitas à parte post, quàm æternitas à parte ante; quia nemo est, qui oblata optione, non præligat felicitàtem nunc incipientem, quæ daret in æternum quàm felicitàtem nunc desinentem, quæ duraverit ab æterno. Si ergo hæc secunda maior potest creaturæ communicari; cur non prima minor?

C A P U T III.

An potuerit Mundus ab aeterno fuisse secundum mentis successiva, motum, & tempus.

HUic etiam quæsitio respondet affirmative D. Thom. loc. cit. Scio aliquos Thomistas,

mistas, ut Sorum; Joann. à Sancto Thoma, & alios de mente D. Thom. dubitasse, imò & in oppositam illam sententiam traxisse. Sed re ipsa dubitari non potest, si legantur, quæ habet in 2. d. 1. q. 1. ar. 5. in resp. ad 3. & 5. pro secunda sententia, ubi admittit possibile infinitum successivè, & possibilem seriem in causis per accidens ordinatis. Idem habet 1. p. qu. 46. ar. 2. ad 6. & 7. Hanc equidem sententiam reputo omninò veram.

Dico igitur, successiva etiam potuisse sine repugnantia ab æterno fuisse. Probatur. possunt successiva in æternum fore. Ergo eadem possunt ab æterno fuisse. Antecedens conceditur. Conf. prob. quia vix, & ne vix quidem est argumentum, quod impugnet æternitatem in ante, quod æquali vi non improbet æternitatem in post; duæ enim istæ æternitates quoad successionem, & infinitatem omninò conveniunt, & solum differunt, quia una dicit partes infinitas successivè præteritas, altera successivè futuras: quod non est, nisi materiale discrimen; quia neq; successionem, neq; infinitatem æqualem tollit, aut minuit. Quod enim quidam dicunt, in æternitate præterita esse categorematicam, in futura syncategorematicam infinitatem, nulliter est dictum; tum quia hoc est satis improbatum, ubi de infinito. Tum quia vel syncategorema in æternitate futura est ratione successionis, & partium non coexistentiam: atq; hoc totum habetur pariter in præterita, vel est ratione indeterminationis, ac potentialitatis; atq; hæc non habetur in partibus futuritionis æternæ, quæ singulæ sunt in sua mensura determinatè futuræ, ut singulæ partes prioris æternitatis sunt determinatè præteritæ; adeoque utraque, vel neutra sunt acceptibiles collectivè, & categorematicè.

Obiicitur primò. Æternitas dierum à parte ante involvit infinitatem eorundem. Sed ta-

lis infinitas est impossibilis. Ergo & æternitas. Min. prob. primò nullum infinitum est pertransibile: talis infinitas esset pertransibilis; quia de facto pertransita. Ergo talis infinitas non est infinitas. Secundò nullum infinitum potest habere terminum, ut patet ex terminis. Atqui talis infinitas haberet terminum, diem v. g. hodiernum, ultra quem non extenditur. Ergo.

Nego min. ad primam prob. dictum est satis, ubi de infinito; ibi enim ostendi, transitum non esse contra rationem infiniti, nisi qui ponit in eo primum, & ultimum, qualis transitus est numeratio. Cæterum sicuti continuum, infinitis licet partibus constans, pertransiri tamen potest sine primo proportionali pertransito: ita & potest pertransiri infinitum simpliciter sine primo pertransito æquali. Ad secundam. infinito repugnat claudi hinc inde intra duos terminos. Cæterum habere terminum ex una parte; & excurrere sine termino ex altera infinito non repugnat, ut patet in infinitate æternitatis à parte post, quæ clauditur à primo, sed excurrit in post sine ultimo. Item proportionaliter dicimus de æternitatis infinitate à parte ante, quæ clauditur ab ultimo, sed excurrit in ante sine primo.

Obiicitur secundò tot dies potest Deus ponisse in æternitate à parte ante, quot potest. ponere in æternitate à parte post. Sed in hoc non potest ponere dies infinitos, itaut dici aliquando possit, nunc positi sunt infiniti. Ergo neque in æternitate à parte ante. Sicuti ergo à parte post solum potest dici, quod sint possibiles plures, & plures dies in infinitum, sed itaut positi semper sint finiti, & remaneant ponendi alii, & alii sine termino: ita & in æternitate à parte ante potuerunt poni dies plures, & plures, sed itaut positi semper sint finiti, quamvis alii, & alii potuerint antea poni.

Paritas æternitatis à parte post, ut prius in-
 quì, efficacissima est, & acriter adversarios tor-
 quet; qui proinde eam nonnisi detortam in
 nos retorquent. Sed quatenus ea in nos videtur
 esse, habet, nisi fallor, evidentem solutionem.
 quatenus in adversarios, manet adhuc insolu-
 ta. Paritas ergo est à futuro ad præteritum, ser-
 vando semper istos terminos futuri, & præteri-
 ti; quod scilicet, ut in æternitate à parte post
 dies determinatè, & absolute futuri sunt infi-
 niti, & sine ultimorità & in æternitate à parte
 ante dies determinatè, & absolute præteriti
 potuerunt esse infiniti, & sine primo & ut in il-
 la, dies non solum poterunt esse, sed erunt: ita
 & poterit de hac verificari, quod eius dies non
 solum potuerunt fuisse, sed fuerunt. Quod si
 in æternitate à parte post futurum veritas in
 præteritum, ut sit in argumento, paritas evi-
 denter est nulla: ut evidenter est nulla, si in
 æternitate à parte ante præteritum veritas in
 futurum. Quemadmodum igitur in æterno per
 ante, nunquam potest dici, *infiniti erunt*: ita
 in æterno per post nunquam potest dici, *infini-
 ti fuerunt*; vel *infiniti sunt positi*. Ratio utrius-
 que est evidens; quia cum illud careat primo,
 & habeat ultimum; hoc careat ultimo, &
 habeat primum: si ea dicta de his verificaren-
 tur, clauderentur intra duos certos dies; adeo-
 que utrumque haberet primum, & ultimum.

Obiicitur tertio. Rebus ab æterno duranti-
 bus, licet admitti possit aliquid natura prius,
 non tamen prius tempore, ac duratione, ut
 per se patet. Atqui omnis motus dicitur prius, &
 posterius secundum durationem. Ergo nullus
 motus potuit esse ab æterno.

Dist. maj. non potest admitti prius, si suma-
 tur motus secundum se totum collectivè, secun-
 dum quam unam rationem est æternus: conce-
 do. Si sumatur motus secundum partes distri-
 butivè, secundum quam rationem nec est, nec

potest esse æternus: nego maiorem. Distinguo pariter minorem: omnis motus dicit prius, & posterius in partibus, ex quibus constat: conc. in se toto collectivè stante, nego min. & conf. Responsio est per se clara; & clarior adhuc fit exemplo æternitatis à parte post, quæ licet collectivè stans nihil habeat posterius, distributivè tamen sumpta, & per partes semper posterius, & posterius habet.

Instabis. quælibet pars motus est posterior. Ergo totus motus est posterior. Conf. prob. quod enim est essetiale cuilibet parti est essetiale toti collectioni. quod principium probat Goudinus primò, quia tota collectio non habet essentiam diversam à singulis partibus. Ergo necesse est, quæ sunt essentialia singulis, esse essentialia toti collectioni. Secundò inductione; quia enim quilibet homo est rationalis, substantia, &c. quia quilibet Angelus est incorporeus, tota collectio hominum est rationalis, substantia, &c. tota collectio Angelorum est incorporea.

Nego conf. & probationis assumptum. quod instatur primò in æternitate à parte post. Secundò da productum, & simul motum Cælum, itaut alia creatura non sit producta; daretque Cælum, eiusque motus per horam: tum designat moveri simul; & esse. Sanè nulla pars motus non supponeret aliam existentem ante se; nulla non haberet aliam post se existentem, posito motu peripateticè constituto; & tamen totus motus nihil haberet ante se, nihil post se existens.

Ad 1. prob. assumpti, transmittito totum, quod non aliud probat, nisi quod sicuti essentialiale est singulis partibus habere aliam ante se, ita essentialiale est toti hoc ipsum prædicatum, ut habeat partes supponentes aliam ante se. Ad 2. inductio non est sufficiens, ut constet per allatas instantias. Accedit, quod neque hæc est bona, quilibet homo est substantia; ergo tota
col.

collectio hominum est substantia. Antecedens enim est verum, & consequens falsum; quia collectio cum sit aggregatum, non est unum per se, nec proinde substantia. A distributivo autem ad collectivum quando valeat, dicitur capite sequenti.

Obiic. 4. Negationes, seu futurationes cuiusvis determinatae durationis, & motus necessario fuerunt ab aeterno. Ergo simul omnes fuerunt ab aeterno, & simul omnes durarunt tempore infinito. Ant. est certum; quod vis enim temporaneum ab aeterno non fuit, & per consequens aeterna fuit eius negatio, ac fututio. Conf. etiam constat; quia si A, & B. sunt ambo ab aeterno, infinito tempore sunt simul; secus erit una aeternitas ante aliam: quod fieri non potest, quin secunda aeternitas posterior sit clausa utrimque. Ergo idem dicendum de omnibus iis durationum negationibus aeternis. Hinc autem evidenter sequitur repugnantia temporis, ac motus aeterni; quod enim habuit omnem suarum partium negationem simul in aeternitate existentem, secundum se totum in aeternitate non fuit. Adeoque si supponitur aeternum, fuit & non fuit aeternum.

Conf. si creatura necessario carere deberet simul qualibet duratione per tempus infinitum in aeternitate futura, certe non posset esse aeterna à parte post, quamvis posset diuturnius, & diuturnius durare in futurum. Ergo si necessario carere simul debet qualibet determinata duratione per infinitum tempus praeteritum, non potuit esse aeterna à parte ante, sed ad summum potuit diutius, & diutius durare in praeteritum.

Hoc argumentum primò non differt à praecedenti secundum rem, sed secundum alium loquendi modum; hoc enim arguit ab aeternitate negationum, illud à temporaneitate durationum. Atqui durationem esse temporaneam,

eiusque negationem esse æternam formaliter est idem. Secundò habet instantiam mea quidem sententia ineluctabilem in æternitate à parte post, cuius paritate perperam utitur in confirmatione. Sic enim arguo. Negationes, seu præteritiones cuiusvis determinatæ durationis, & motus necessariò erunt in æternum. Ergo simul omnes erunt in æternum, & simul omnes durabunt tempore infinito; aliter erit una æternitas post aliam, &c. & hinc vides, quàm malè sit hæc paritas in confirmatione proposita; si enim creatura debet carere simul per æternitatem futuram qualibet sua duratione, non solum nunquam erit completè æterna à parte post, sed simpliciter aliquando, imò & per integram æternitatem non erit. Quandoquæque enim existunt simul negationes cuiusvis durationis rei, necesse est, ut nulla rei duratio existat, adeoque, ut res ipsa, à sua duratione inseparabilis, non existat. Atqui per integram æternitatem existent eiusmodi negationes simul, ut probat argumentum factum. Ergo per integram æternitatem res non existet; adeoque de Angelis, & de animabus nostris verum quandoque, imò & æternum erit, quod non existant: quod est Fidei, & rationi repugnans.

Responsio directa est primò in æternitate à parte post, quæ nullo deinde negotio applicabitur æternitati à parte ante. Quot sunt negationes illæ, & præteritiones, tot sunt æternitates successivè incipientes; nam æternitas, qua durabit negatio durationis hodiernæ, incipit cras; crastinæ, incipit perendiè; & sic de aliis in infinitum. Ex hoc fit, ut quæcumque negationes finitæ sumantur, simul aliquando sint duraturæ, post omnium scilicet inæceptionem. At si sumantur infinitæ cum ordine successivæ inæceptionis, nunquam simul omnes durabunt; quia semper aliqua, imò infinita

ne supererunt deinceps incepturæ. Neque hinc sequitur una æternitas post aliam, nisi secundum partem, qua æternitas incipit, & est finite: in quo nulla repugnantia. Idem dic de æternitatibus successivè desinentibus infinitarum negationum à parte ante, quod nunquam scilicet, h. e. in nulla æternitatis antecedentis parte simul omnes conduravunt; quia ante quamlibet infinitæ negationes successivè desierunt. Quod si in utraque æternitate post, & ante sumantur infinitæ illæ negationes collectim, sumuntur non solæ negationes, sed etiam termini earum successivè existentes; quia ex sumuntur successivè incipientes, ac desinentes iuxta suppositum; adeoque sumitur non solum esse, sed etiam non esse eorundem negationum, ut patet; & hoc ipsum est, quod constituit verissimam æternitatem successivam in post, & in ante; quia sicuti hoc est, motum esse æternum in post, habere infinitas partes sibi succedentes in post, ita ut nulla sit, quæ non habeat post se infinitas, adeoque, ut nulla sit, quæ non habeat sui negationem post se in æternum durantem; ita, hoc est motum esse æternum in ante, habere infinitas partes se præcedentes in ante; ita ut nulla sit, quæ ante se non habeat infinitas, adeoque ut nulla sit, quæ non habeat sui negationem ab æterno durantem. Ex quibus manifestum mihi est, tantum abesse, ut argumentum improbet æternitatem motus, ut potius eam confirmet, explicando naturam, & essentiam successivæ æternitatis.

Ad formam nunc argumenti conc. ant. nego consequ. ad cuius probationem dico, nihil effici paritate finitorum ab æterno durantium, sicut nihil efficitur eadem paritate in futuris. Solo enim æternitatis systemate considerato, evidens eo ipso disparitas occurrit; & dum urgetur, sequi inde unam æternitatem futuram ante aliam, & per consequens clausam; iam est dis-

Etiam, quod una æternitas potest esse ante aliam quoad inceptionem; sicut potest una esse post aliam quoad defitionem.

Oblic. 5. cum Toletio, Suariorum, Rubio, & aliis. Cælum ab æterno creatum debuit in certa dispositione, situque creari; & oppositum est intelligibile; quia, ut creatur res certa, ita & certum locum, dispositionemque debet accipere. Ergo debet in illis per totam æternitatem durare; nihil enim ab æterno acceptum amitti potest, nisi post æternitatem. non potuit ergo Cælum ab æterno moveri; quia ad motum requiritur derelictio unius loci; & alterius acquisitio.

Resp. quod si antecedens inquirat de Cælo primùm creato, laborat supposito. Si inquirat de Cælo creato simul, & conservato, dicendum, quod certam semper habuit dispositionem, ac situm, non unum tamen, sed infinitos se præcedentes. Ut enim, licet certa sit rei ab æterno productæ entitas, nullam tamen habuit certam durationem sive realem, sive imaginariam, antequam non habuerit aliam item determinatam, & certam; ita & nullum habuit certum locum, ante quem non habuerit alium determinatum, & certum.


Oblic. 6. si posset motus esse æternus, possent dari duo mobilia inæqualis velocitatis, v.g. secundum proportionem duplam, quæ fuissent ab æterno mota supra spatium infinitum, ex parte, qua est infinitum, versus partem, qua est finitum; ita ut sicut spatium caret fine; ita motus careat initio. Jam hoc dato, fieret, ut mobile duplò velocius, quod fuisset motum usque ad hanc diem, acquisivisset spatium duplò majus, quam mobile minus velox motum & ipsum ad hanc diem, sed utrumque tamen infinitum. Hinc rursus sequeretur, quod distantia inter utrumque mobile esset hodie infinita, ut constet, quia distarent per dimidium spatii à velocio.

lociore decursi: dimidium autem infiniti necessarium est infinitum. & simul non esset infinita; quia clausa inter duo certa loca à mobilibus hodie quiescenter occupata. Repugnat ergo motus æternus.

Hoc argumento premuntur, qui in infinito admittunt majus, & minus: non ego, qui istæ longè ab infinito ablegavi. Ut ergo æqualem magnitudinem conficiunt, aut conficere possunt pro varia dispositione infiniti palmi, & infiniti semipalmi, imò ulnæ, & palmi, &c. sic possunt æquale spatium percurrisse infinitæ acquisitiones successivæ semipalmarum, & palmarum, imò ulnarum: ut possunt æqualem durationem conficere infinitæ horæ, & semihoræ. Argumenta, quæ contra hoc dictum inferuntur, & petunt præsertim ab admiratione, satis sunt loco citato depulsa. Quod autem ex adversariis nonnulli volunt in præsentem nos premere argumento calculatorio, mirabiles planè sunt, qui credant posse infinitum ad calculos revocari.

Accedit, quod eodem argumento premuntur & ipsi in æternitate à parte post, positis duobus pariter inæqualibus mobilibus versus Orientem in æternum rectà motis, quorum nullam partem motus non videt Deus. Et tunc redeunt contra ipsos, quæ ipsi congerunt contra nos. Quod autem dicunt primò, non posse omnem partem motus futuri simul à Deo videri, æquivocationem habet citato loco detectam, & quæ potest à nobis in præsentem pariter adhiberi ad similem fugam in æternitate à parte ante. Quod dicunt secundò, in æternitate à parte post semper spatium confectum esse finitum: secus à parte ante; hoc illud est, quod in his authoribus vehementer displicet, dum huic paritati respondent, quod semper scilicet ad imperitiam divertunt, & dum inquitur de futuro, respondent per præteritum: ut monui in resp. ad 2.

In.



Instabis. Valet hic modus arguendi : mobile una hora conficit unum milliare. Ergo infinitis horis conficit infinita milliaria. Valebit igitur hicalius : mobile duplo velocius in fine horæ distat à minus veloci per semimilliare. Ergo. in fine infinitarum horarum ab æterno existentium distabit ab eodem per infinita semimilliaria; adeoque erit infinita distantia clausa.

Nego valere hunc alium arguendi modum ; quia non valet sic inferre ; milliare est duplo majus semimilliaribus. ergo spatium constans ex infinitis milliariis est duplo maius spatio constante ex infinitis semimilliaribus : cum ista duo ex probatis in loco sint æqualia : quod si æqualia sunt , quantumcumque duo illa mobilia fingantur inæqualia relatè ad spatium finitum , non tamen sunt inæqualia relatè ad infinitum . quare possunt in fine æternitatis vel nihil , vel finitè distare , imò itaut mobile suppositum minus velox præcedat velocius , juxta variam dispositionem partium motus cum partibus spatii. Quod si quis ista mirabilia , & inintelligibilia dicant ; meminerit eius. quod ibi monui , ne illico & impossibilia dicat ; sed concedat posse Deum aliquid facere , quod ipse non possit intelligere .

C A P U T IV.

An potuerit Mundus ab æterno fuisse secundum successivam rerum generationes, quales de facto sunt .

Specialissima est pro re præsentì difficultas orta ex causalitate . Quare Doctores nonnulli , inter quos est Oviedus in phys. contrav. 19. punct. 2. qui nobis in superioribus consentiunt , hic discordant . Imò P. Suarez , vir cæteroqui modestissimus , lib. 1. de opere sex die.

dierum cap. 2. num. 13. & 14. *evidenter*, inquit, *concluditur seriem generationum unius individui ab alio eiusdem speciei non posse esse aeternam*. Ego verò censeo cum D. Thoma ejusmodi evidentiam evidenter nullam esse. Sed quia in solvendo communi argumento adhibetur à Recentioribus quibusdam responsio insubstans, & juxta quam puto rationem Suarezii evidentem esse, proponam prius utramque, & discutiam: tum quod sentio, duplici conclusione complectar.

§. I.

Proponitur argumentum, quo improbatursuccessiva generationum aeternitas, & Recentiorum ad illud responsio.

Omnis sufficientia essendi, quæ est actu in creaturis, debet adæquatè ultimè resolvi necessariò in solum Deum. Atqui data serie generationum, v. g. humanarum ab æterno, sufficientia essendi, quam habet quilibet homo nò in Deum tali modo resolveretur. Ergo repugnât ejusmodi series. Minor est certa, quia Deus cuiuslibet individui esset causa solum in- adæquata tum immediata, quia ageret simul cum causa secunda; tum mediata; quia nulla esset in serie causa à Deo adæquatè pendens, & ratione cujus sufficientia effectus in ipsum aliquando tota resolveretur.

Maior aut prob. 1. quia oppositum est contrà essentialem dependentiam omnium creaturarum à Deo, ad quam pertinet, ut omne esse tandem ad ipsum tanquam ad primam, & ultimam causam referatur. Secundò series hominum, quæ est species humana, debet, ut sit, recipere ab alio esse: & cum sit contingens, debet recipere esse ab alio adæquatè distincto. Rursus cum species fieri non possit,

nisi in individuis, debet consequenter in aliquibus, vel in aliquo individuo esse. à causa contradistincta accipere. hoc autem individuum sic productum, non amplius constat series generationum ab æterno, ut patet.

Tertiò si tota essendi sufficientia non sit reducenda in Deum, dabitur causarum, & effectuum series, cujus non sit Deus adæquata causa. Hoc autem est impossibile. Ergo. Prob. min. singuli effectus petunt causam distinctam, à qua adæquatè accipiant esse. Ergo tota etiam series petit causam, à qua adæquatè esse accipiat. Conf. prob. tenet enim à distributivo ad collectivum in prædicatis, quæ competunt singulis, non ut partes, sed ut entitates sunt: quæ regula ab aliis aliter proponitur, ut videre est apud Haunoldum lib. 1. de Deo tract. 1. contr. 2. §. 1. esse autem ab alio adæquatè competit homini, non ut pars est collectionis, & seriei, sed ut entitas est. Ergo etiam tota collectivè series debet esse ab alio adæquatè. Conf. quia hoc argumento solet probari existentia Dei: quòd si scilicet quilibet creatus effectus est ab alio, tota collectio effectuum contingentium debet esse ab alio, quod proinde contingens esse non potest: atqui eodem pacto proceditur à singulis productis ad collectionem productam, ac à singulis productis adæquatè ad collectionem productam adæquatè. Ergo.

Respondent negando maiorem. Ad cuius 1. prob. negant, id exigi ab essentiali dependentia creaturarum à Deo, ad quam solum pertinet, ut creatura ab eius nutu, & actione pendeat: quod haberetur omnino in casu. Ceterum sicuti Deus ex suo arbitrio facit, ut effectus, qui posset ab ipso solo produci, producat ab ipso simul cum causa secunda, ita ex eodem arbitrio potuit efficere, ut infiniti effectus penderent à se pariformiter coagente, absque dis-

dispendio essentialis dependentiæ creaturarum ab ipso.

Ad 2. dicunt, speciem recipere esse in suis individuis, adeoque per illam ipsam actionem, quæ esse recipiunt sua individua, Et quia quodlibet individuum pendet à causa adæquatè distincta, quæ est Deus simul; & aliud individuum; similiter species pendet non à causa, sed à causis adæquatè distinctis; quia species non est individuum, sed individua. Quod si petas, à quo sit producta tota series, seu collectio individuum, quæ & contingens est, adeoque debet habere causam; Respondent, committi fallaciam plurium, imò infinitarum interrogationum per modum unius; quærere enim, à quo sit collectio, est quærere, à quo sint singulæ ejus partes; cum collectio non fiat, nisi per productionem singularum partium. Et sic respondendum responsioni multiplici, quod A sit à B, & Deo, B à C, & Deo, & sic de aliis. Quod si instes, & quæras originem, ac fontem totius esse in collectione reperti; si nomine originis veniat causa, dicunt committi eandem fallaciam; non enim est una, sed infinitæ causæ adæquatæ, à quibus effectus item infiniti sui esse recognoscunt.

Ad 3. negant min. ad prob. negant conf. quia series non poscit causam, sed causas adæquatas singulorum effectuum. Ad prob. conf. mordicus negant, valere per illas regulas à distributivo ad collectivum. Nam primò si tales regulæ valent, non solum probatur debere dari causam adæquatam extra totam seriem producentium, & productorum in ante, sed etiam effectum adæquatam extra seriem infinitam in post. Utenim arguis hæc pars habet causam adæquatam, à qua est, & illa, & illa; ergo tota collectio habet causam adæquatam, à qua est: item si sit series infinita producentium, & productorum in post, licebit ita arguere a hæc

hæc pars seriei habet effectum à se productum, & illa, & illa; ergo tota series habet effectum à se productum. Quod est apertè falsum, & tamen utrobique habetur prædicatum competens parti, qua parte est; neque enim aliter habet causa non produçens.

Præterea Petrus Hispanus in suis summulis tract. 5. §. De toto integrali, & ejus parte (totum autem collectivum est totum integrale, & ejus partes sunt partes integrantes) non aliam regulam tradit præter hanc unam, quod à toto ad partem tenet constructivè in propositione de secundo adjacentè; & in eadem à parte ad totum destructivè; sic: *Domus est; ergo paries est*. Et: *Paries non est; ergo domus non est*. Et quamquam aliquando videatur tenere consequentia à partibus ad totum in propositionibus de tertio adjacentè; non tamen tenet propriè ex loco à *partibus ad totum*, sed aliunde. Quandoque enim valet per locum à minori ad majus, ut, *Singula partes domus valent 100. aureis*. Ergo 100. aureis valet tota domus. Quandoque valet per locum à partibus subiectivis ad totum potestativum; ut, *Singula partes aqua sunt aqua; ergo totum ex iis constans est aqua*. Quandoque demum valet à distributivo ad collectivum, cum verificari de colectivo non est aliud, quam verificari de singulis. Hinc tenet, *Singula partes sunt producta, ergo tota collectio est producta*: Si nihil aliud sit collectionem esse factam, quam esse factas singulas ejus partes; nec alia sit collectionis productio, quam collectio productionum, qua singula sunt producta. Quod tamen, si benè attendatur, non est argumentum à distributivo ad collectivum; quia prædicatum à singulis non transfertur in collectionem qua talem, ac indivisibiliter venientem,

§. I I.

*Proposita responsio reiicitur, & verior
exhibetur.*

E Quidem istum dicendi modum probare nunquam potui. Puto enim, quod illa propositio, *Omnis sufficientia essendi debet ultimè adæquatè resolvi in solum Deum*, verissima sit, & fortasse demonstrabilis; adeoque alia via tentanda est argumenti solutio. Sic igitur pro ea propositione ostendenda.

Arguo à priori. Nulla res contingens habet in se, ut sit, sufficientiam ullam, sed eam omninò expectat ab alio adæquatè distincto. Ergo omnis essendi sufficientia debet ultimò adæquatè resolvi in ens necessarium, ac sibi sufficiens. Ant. conceditur, & est per se evidens. Hinc enim est, ut communiter notatur, naturalis illa curiositas, visoeffectu de novo, inquirendi causam distinctam: in quam si quis afferat vel ex parte effectum ipsum, irridetur. Prob. conf. sumo effectum hodie productum, & inquirō, à quo ille habeat adæquatè sufficientiam essendi? non à solo Deo, ut conceditur. Ergo saltem partialiter eam habet à serie contingentium. Rursus hæc partialis sufficientia, vel & ipsa in Deum reiicitur: & hoc non: aliter Deus erit causa effectus adæquata, vel est originaliter (sumo *originaliter* negativè, non positivè; in serie enim infinita non est primum) à serie qua tali, & collectivè sumpta. Et hoc est impossibile; quia sicuti quilibet effectus contingens est sibi adæquatè insufficientis, ita & tota effectuum series; quia non potest vel ex infinitis adæquatis insufficientiis una vel partialis sufficientia constitui. Est porro per se notum, quod ab omninò insufficienti ad esse nulla potest descendere sufficientia ad esse ne partialis

tialis quidem; nemo enim ne partialiter quidem dat, quod ne partialiter quidem habet. Debet ergo intelligi series adequatè accipiens, ut intelligatur potens partialiter dare.

Explicatur magis argumenti vis. Effectus hodie productus respicit in hoc dicendi modo totam seriem per modum unius causæ, unde accipit essendi sufficientiam. In hac ego causa distinguo & *proximam*, quæ est una pars determinata seriei immediatè antecedens effectum hodiernum, & *remotam*, sub quo nomine venit tota reliqua series infinita. Jam comparo causam proximam cum remota, & ex eodem capite, quo proxima non potest intelligi dans effectui esse, nisi esse ab alio adequatè ipsa accipiat, invenio, nec posse remotam, nisi forte velis, collectionem rerum adequatè sibi insufficientium per hoc, quod infinita sit, evadere sibi aliquatenus sufficientem: quod repugnat lumini naturæ dictanti non tolli ne ex parte quidem defectum per additionem omnimodi in ea ratione defectus etiam infinitam. Ut cum, quæ ergo dicatur, insufficientia collectionis non esse, nisi insufficientia singularum partium, quæ tollitur per singulas partes; hoc certè non est, nisi implicare terminos; quia ex terminis est absolum, quod insufficientia omnimoda singularum partium tollatur, aut minuatur per insufficientiam omnimodam singularum; h. e. tollatur, aut minuatur per illud ipsum, quod auger,

Conf. I. imperfectio, quæ per additionem non minuitur, non potest tolli per additionem infinitam ejusdem rationis. At quilibet effectus extra seriem infinitam consideratus habet essentialem indigentiam Dei, ut causæ ultimæ adequatæ: neque ista sit ullatenus minor additione aliorum, aliarumque causarum in infinitum. Ergo non potest tolli per additionem seriei causarum actu infinitæ. Major, quæ

quæ una indiget probatione, ostenditur exemplariter in quantitate palmari; cujus intra palmum terminatio quia non tollitur, nec minuitur per additionem punctorum plurium, & plurium in infinitum, nec potest tolli per additionem punctorum actu infinitam. Ratio à priori est; quia ubi additio nihil variat, addita non sunt nata, variare: quæ autem variare non sunt nata, nec variabunt, quantumvis infinita sint; quia infinitas naturam additorum non mutat, sed solam eorum multitudinem augeat.

Conf. 2. tenentur omnes cujuscumque effectus de novo confurgentis assignare causam, quæ tollat omnino inquirentis admirationem. At inquirenti, cur effectus, qui potest esse, & non esse, sit potius, quàm non sit, nunquàm repones causam contingentem ità, ut admirationem extinguas. Redit enim inquisitio de causa; neque ea est terminabilis, nisi deveniendo ad causam necessariam, quæ in se habeat sui esse rationem, quandoquidem si multiplicas contingentia, multiplicas admirandi rationes; estque per se manifestum, non posse admirationem tolli per ea, quæ admirationem faciunt, quantumcumque multiplicata.

Hinc habeo, quam sit fallax illud adversariorum argumentum: *Contingens per se non petit, nisi causam sui adequatam à se distinctam*. sed hoc salvatur in serie illa contingentium, cujus qualibet pars habet causam sui adequatam à se distinctam, partem scilicet antecedentem unà cum Deo. Ergo in ea salvatur, quid quid per se fert effectuum contingentia. Fallacia est in hoc, quod non distinguunt, quod potissimum causæ adequatæ genus petat contingens. Est enim causa adequata secundum quid, & est causa adequata simpliciter. Prima est, quæ immediatè reponitur interroganti, sed admirationem, naturalemque curiositatem non explet, cum semper maneat ulterius in,

inquirendum: quod est evidens signum sufficientiæ effectus contingentis nondum inventæ. Altera est, quæ omnem admirationem, & curiositatem explet; & hæc est, quam quærit impetu suo intellectus à natura incitatus, ut ad Deum aliquando perveniat. Jam in illa serie, ut ab adversariis disposita, primum genus causæ adæquatæ haberetur, non secundum; cum enim in qualibet causa adæquata sit contingentia, in qualibet est causa admirationis; atque adeò nulla est causa, in qua possit inquisitio sistere, & expleri.

Atqui à contingente per se, & essentialiter peti causam adæquatam simpliciter, videtur per se manifestum ex ipsa inquisitione, quæ si naturalis est, petit expleri; aliter frustra inquireret, quod consequi non posset. Non est autem explebilis in casu adversariorum, non modò, quia ibi in infinitum proceditur, sed quia semper habetur causa involvens aliquid contingens, ut dictum est. Quod ipsum declaratur tum exemplo voluntatis, quæ juxta Philosophos, ceterosque post ipsam progredi in infinitum in finibus non potest; eo ipso enim jus appetitus naturalis inexplebilis esset; tum exemplo intellectus, qui sine principiis primis, in quibus sistat, scire nihil re ipsa valet. manifestum est igitur requiri in progressu intentionali terminum, ne irritus sit naturæ conatus; nec requiri solum naturaliter, sed etiam essentialiter, ut constat in datis exemplis, & rursus ex dictis: quia inquisitio non expleta in casu est signum evidens sufficientiæ non inventæ. At sine sufficientia simpliciter effectus nec naturaliter, nec supernaturaliter existere potest.

Arguo 2. si quodlibet esse ultimè adæquatè in solum Deum, tanquam in primam completam omnium contingentium sufficientiam resolveri necessario non deberet, posset extra casum æternitatis fingi de facto series infinita

creaturarum in hoc instanti de novo existentium, cuius esset Deus causa dumtaxat universalis, itaut ex iis una existeret ab alia per particularem concursum sine prima, quæ à Deo adæquatè produceretur. Quare poterit v. g. calor infinitis partibus proportionalibus constans in hoc instanti ita de novo consurgere, ut una pars producat ab alia, & hæc ab alia sine termino, adeoque ut non habeat extra se causam adæquatam particularem, sed solo Dei generali concursu una cum collectione actionum infinitarum intra se sufficienter adesse determinetur. Hæc sequela negari ab adversario non potest; coincidit enim evidenter cum systemate, quod hic impugno. Esse verò sequelam absurdam, patebit consideranti hoc unum, quod sicuti si existat de novo Angelus; ex ipsa ejus contingentia unicuique est evidens, dari causam adæquatam ab eo contradistinctam; ita ex caloris secundum se totum accepti contingentia non minus evidens esse debet, requiri pariter causam contradistinctam adæquatè eiusdem productivam, quæ sufficienter in priori determinet eius contingentiam ad esse potius, quam non esse. Ex eodem quippe capite, quo Angeli novitas essendi petit contradistinctam causam, petit eandem novitas essendi caloris; Sicuti enim quia Angeli nunc creati inquirimus naturaliter causam, & ridemus. si quis in causæ partem Angelum ipsum adducat; ita & ridebimus, si quis, inquirenti caloris causam, calorem ipsum vel ex parte reponat.

Dices, esse manifestam disparitatem inter Angeli, & caloris productionem; cum enim Angelus sit ens carens partibus, si causam solum in adæquatam haberet, ipse sibi aliquatenus esse daret: quod non est verum in calore habente partes, quarum singulis datur causa adæquatè distincta.

Contra 1. quia hoc contendit argumentum,

tum, si calor secundum totum de novo confurgens non habet causam adæquatam, nullam esse rationem, cur effectus etiam indivisibilis confurgere de novo sine causa adæquata non possit; Jam enim evidens amplius per se non est, contingens de novo existens causam extra se adæquatam essentialiter postulare.

Secundò hinc fieret, si Deus per impossibile non haberet vim productivam caloris adæquatam, adhuc posse vi Dei calorem de novo confurgere, quatenus potest juvari à calore ipso partibiliter veniente, & idem dicendum de quolibet alio ente materiali habente partes infinitas. Universim igitur ad hoc, ut effectus confurgat de novo, non esset opus intelligere in priori natura ad ipsum virtutem adæquatam ipsius productivam. Cur ergo id ipsam dici de Angelo non poterit: qui quidem si sibi partialiter solum det esse, non idcirco contingens non erit?

Arguo 3. equè Deo repugnat esse causam non adæquatam creaturarum, ac esse earundem causam non immediatam. Atqui hoc sine dubio repugnat Deo, ut alibi est probatum ex communissima sententia contra Durandum. Ergo & illud. Maior. prob. quia utrumque æquè pertinet ad Dei dominium, ac creaturæ subordinationem; ut enim in sententia Durandi Deus non est immediatè Dominus effectuum creatorum, ita & in adversariorum sententia Deus non est ultima, & adæquata origo, in quam omnis existentia reducat: quod tamen non minus, ac illud ad divinæ potentie perfectionem maximam pertinet; ut scilicet nulla sit creatura, quæ ab ipsa, quidquid est, adæquatè non recognoscat. Propterea D. Thom. quæst. 3. de pot. artic. 7. & alibi sæpè contendit creaturam non agere, nisi ut Dei instrumentum, prout instrumentum idem sonat, accausam, quæ non agit, nisi in quantum agendi
vir,

virtutem recipit à principali. Hinc Deus unus est agens in hoc sensu principale, adeoque primum cuiuslibet actionis principium. Hanc verò primitatem putant adversarii dividi posse inter Deum, & collectionem causarum. Si enim Deus actionis. A causa adæquata nec immediata, nec remota est; primum actionis principium adæquatum non est; adeoque primitas inadæquatè saltem conveniet contingentium collectioni: quod tamen fieri non posse, divinæ potestatis perfectio abundè clamat.

Arguo demum 4. quamvis à distributivo ad collectivum juxta regulas ab Haunoldo, Fasolo, & aliis traditas re ipsa non teneat, ut rectè concludunt adversarii §. superiore relati: certum mihi tamen est tenere destructivè à partibus ad totum, non solum in propositionibus, de secundo, sed etiam de tertio adiacente, cum sumus in prædicamentis importantibus perfectionem puram. Neque enim poterunt singulæ partes collectionis esse contingentes, & collectio necessaria; partes esse accidentia, & collectio substantia, partes esse corporeæ, & collectio spiritualis, &c. Neque adversus hanc regulam ulla occurrit instantia. Accedit & ratio; cum enim collectio nihil sit præter singulas partes, ex quibus constat, adeoque quidquid est in ea perfectionis, ab his formaliter derivetur, non est intelligibile, quod perfectio in collectione reperiat, quæ singulis partibus desit, imo & repugnet; aliter defectus in aliqua linea evaderet in eadem linea perfectio per meram additionem defectus: quod ex terminis est falsum. Atque hinc primò fit, ut si singulæ partes sint ab alio simpliciter, tota etiam collectio debeat simpliciter esse ab alio; aliter collectio erit à se. quod est prædicatum puræ perfectionis in toto reperiuntur per necessitatem, & in partibus singulis per repugnantiam. Fit secundo ex eadem ratione, ut si singulæ partes
sint

sint ab alio adæquatè, tota etiam collectio debeat esse adæquatè ab alio; esse enim quomodo-
cumque à se perfectionem importat contingenti repugnantem, adeoque puram re ipsa, & simpliciter simplicem. Hinc corrui instantia adversariorum superius allata, dum urgebant non tenere sic arguendo in causis ordinatis per post; *Hac causa habet effectum à se productum, & illa, & illa; ergo tota causarum collectio habet effectum à se productum*; habere enim effectum non est, nisi accidentalis perfectio, si tamen productio perfectio est causæ, & non potius effectus; adeoque instantia nulla est contra regulam datam. Hoc totum confirmabitur magis in Metaphys. ubi de Dei existentia.

Superest, ut juxta propriam viam faciam satis argumento Suarii, & tandem ostendam possibilitatem generationum æternarum eo prorsus modo, quo sunt de facto. Hoc ut præstem, noto, causam per se dici illam, cujus actualis influxus, siue mediatus, siue immediatus omnino facit ad positionem effectus, ita ut hic non esset, nisi illa actu ageret siue in ipsum, siue in causam ipsius. Hinc in physicis dixi, causam remotam quandoque esse causam per se & quandoque causam per accidens. Ignis actu influens in calorem in se receptum est causa per se non solum ejus caloris, sed etiam caloris ab eo in mea manu producti; est enim hic calor ab illo actu ab igne genito, adeoque hic non fieret ab illo, nisi ille ab igne produceretur. Contra Petri avus est Petri causa remota per accidens; licet enim Petri parens ab avo sit genitus, quis tamen avus non influebat in Patrem, dum hic Petrum generaret, avi existentia. & virtus per accidens hic & nunc se habet ad Petrum.

Jam verò mea sententia duobus dictis continetur. Primo repugnat series generationum æternarum.

æterno in causis per se. Hoc satis patet ex hæcenus probatis; in talibus enim causis haberetur series à Deo solum inadæquatè producta; nec verificaretur, Deum esse primam, ultimam, adæquatamque sufficientiam omnium contingentium; quod ostensum est impossibile.

Secundò non repugnat series generationum ab æterno in causis per accidens. Talis est generationum series temporanea, quæ de facto datur; dum enim Pater generat, actu non pendet ab avo, & idem contingit in aliis substantiis; quæ quidem in fieri à causa secunda intra suam, alienamvè speciem pendent; non item in conservari, in quo non pendent, nisi à Deo. Jam quod sic accepta generationum series cum æternitate non pugnet, ex eo constat, quod in hac perfectè salvatur, omnem sufficientiam essendi ultimè adæquatè resolvi in solum Deum. Et quidem ut in sententia Patris Suarii stat de facto huius principii veritas, quia licet quilibet homo post primum sit à Deo simul, & homine, primus tamen homo adæquatè producitur à solo Deo; ita & stat non minus manifestè per hoc, quod homo dum producitur ab homine, & Deo, homo producens à solo Deo est per conservationem. Quare si inquiras; à quo accipit esse Petrus, v.g. qui hodie generatur? Resp. à Paulo, & Deo. Rursus inquire; Paulus à quo accipit esse? Resp. à solo Deo. Vides jam, qua ratione à solo Deo ultimè Petrus accipiat esse, adeoque in solum Deum tota, quam Petrus habet, essendi sufficientia refundatur. Hoc totum evidenter constat, etiam si generationes hoc eodem pacto statuantur sine prima. Ergo in generationum eiusmodi æterna serie constat veritas eius principii, quod quicquid contingens est, à Deo uno ultimè accipit esse.

Dices. Petrus generatur à Paulo, ut conservato.

servato. Sed Paulus ut conservatus non est à solo Deo; conservatio enim qua talis involvit, ac supponit primam Pauli productionem, quæ à solo Deo non fuit. Ergo Petri existentia non satis hac ratione descendit adæquatè à Deo.

Nego maiorem. Petrus enim generatur à Paulo, ut habente nunc esse, quod dat: ad quod impertinens sanè est, quod esse olim habuerit, vel non habuerit. Finge enim, quod prius non fuerit, sed nunc primum, cum generat, esse incipiat perfectus homo, nunquid in hoc ipso instanti (præscindendo nunc à modo generationis humanæ, quæ tempus requirit) non posset filium generare?

C A P U T V.

An Mundus secundum successivas generationes petat, ac possit naturaliter in æternum durare.

ARistoteles ex iisdem principiis, ex quibus Mundum æternum fuisse, æternum patiter futurum decernit. Contrà Democritus, Mundum ex fortuito atomorum concursu aliquando coaluisse asseverans, ex earundem separatione dissolvendum censet: cui subscribit Epicurus, eiusque interpretes Lucretius l. 5. de rerum natur. Stoici igne conflagraturum autumant: quam sententiam videntur ab Hebræis hausisse; extremam enim terrarum per ignem consumptionem Sacre sæpius Literæ testantur. Quid sit autem de Mundi termino simpliciter futurum, est extra præsentem indaginem, ad quam solum spectat statuere, num ex natura rei Mundus hic aliquando sit desiturus.

Huic dubitationi sunt, qui negativè respondent. Arguunt autem primò à priori per causam finalem. Generationes humanæ non possunt

sunt ex natura rei sine fine multiplicari. Ergo nec reliquæ. Conf. prob. quia deficiente fine, deficiunt media. Atqui homo est finis hujus visibilis Universi. Ergo homine deficiente, deficit Universum saltem secundum mutationes, secundum quas successivæ hominum generationi subservit. Prob. jam primum ant. Numerus animarum rationalium finitus sit, ac certus oportet; est enim in eas, ut in finem natura intentæ; quod autem terminò caret, & semper ultra procedit, finis rationem obtinere non potest, ut dicitur 2. Met. t. 8. generationes igitur humanæ, per quas, rejecta, ut debet, Pythagorica metempsychosi, animæ multiplicantur, æternæ esse non possunt.

Arguunt 2. à posteriori. Quod contingit in homine, qui quia sensim per ætatem senescit, virtus tandem generativa in eo languescit, ac deficit; hoc idem Mundo accidit, in quo animalium vires magis, ac magis deteriores fiunt; adeoque, vertentibus annis, eò tandem deveniendum, ut sibi similia generare non possint. Accedit, quod eluvionibus non solum montes decrescunt, sed terræ multum quotannis in mare convehitur: ex quo consequens est, ut aliquandò, assurgente ad terræ æqualitatem maris fundo, inhabitabilis fiat, præterquam à piscibus; orbis, & isti etiam desinant oportet, homine desinente; ut priori argumento conclusum est:

Equidem, quamquam ista non omninò improbabiliter dicantur, in oppositum inclinor magis, ut censeam, nihil esse ex natura rei, quod generationum terminum petat, quasi miraculum sit futurum, si istæ non desinant. Et primum id probo à posteriori; falsum enim est, quod in secundo argumento assumitur, Mundum in deterius semper abire, ac senescere. Nam quod attinet ad elementa, eorumque qualitates, constat, nec mole quidquam ea, nec vir-

tute degenerasse; neque enim plus olim, ac modo caloris in igne, nec plus frigoris in aqua, nec plus gravitatis in terra, &c. Ex istorum autem mixtione attemperata, & concordia plurima, si minus omnia, generantur; ex discordia, & divisione corrumpuntur. Remanet ergo integra in his, quæ prius fuerat, virtus generationes propagandi; adeoque nihil est, cur ex hac parte Mundi sensum, mortemque timeamus.

Quod spectat deinde ad animalia præsertim homines, quorum præcipue in Universo vita, ac propagatio respicitur; si eos excipias, qui ante diluvium plura secula vixerunt, & post diluvium etiam diutissime, donec repararetur Orbis, atque historiz consulantur trigesimali ab hinc seculi; par hominum in his omnibus ætas, par ferme numerus, pares vires reperientur: ut latè, & eruditè ostendit Isaacus Cardosus Philos. Iberæ lib. 3. q. 5.

Neque ad rei summam alicujus est momenti, quod montes aliqui, terræque videantur imminutæ; nam præterquam quod non in omnibus notatum id est, sed in paucissimis; quod una ex parte detrahitur, in aliam convehitur: & si alicubi, ubi terra fuerat, mare est; terra est alibi, ubi fuerat mare. Quare non minus hodie terrarum, quam olim, habitatoribus pater.

Denique ad argumentum ex fine Universi desumptum resp. negando antec. ad prob. dico, quod si finis perpetuus de sua natura non esset, frustra providisset natura de medio naturaliter perpetuo. Atqui rerum omnium reliquarum generationes, quæ sunt media comparatè ad humanas, à natura habent, ut non desinant. Ergo idem dicendum de humanis. Dum ergo urgetur, finem ex Philos. non posse semper ultra procedere, primò habet instantiam in ipsa nostra felicitate sumpta non quidem essentialiter, sed durativè, secundum quam rationem nunquam simul est, aut erit tota, sed prog-

greditur ulterius sine termino, Deinde quid-
quid sit, an possit voluntas humana tendere in
finem sine termino progredientem, divina cer-
tè, quæ regulatur à cognitione infinitum com-
prehendente, ad quam comparatum se habet
infinitum perandè, ut finitum, ut ait D. Tho.
1, contra gent. cap. 69. potest infinitum ipsum
pro fine respicere; sic enim infinitum totum
actu possidetur, nec tam futuri rationem ha-
bet, quàm præsentis. Natura verò, quæ in
finem tendit regulata non à propria, qua caret,
sed à divina Authoris sui cognitione, ex quo
propter finem non agere, sed agi dicitur; con-
sequens est, ut ad generationes humanas æter-
nas possit sine scrupulo ordinari. Demum nego
infinitas generationes esse finem naturæ; cum
fiat potius medium ad conservandum semper
finitum hominum in hoc Mundo numerum,
unicè à natura intentum, & propterea perpe-
tuò reparante individua, quæ illi per mortem
subtrahuntur.

Q U Æ S T I O S E C U N D A

De Mundo secundum se.

C A P U T R I M U M.

Sine unus, an multiplex Mundus.

Dico, 1. Mundum esse vel unum, vel multi-
plicem naturali ratione evidenter ostendi
non potest. Ratio est facilis; sumus enim in
re, quæ pendet omninò à libera Dei volun-
tate, nec possumus ullam de ea experientiam
habere, ut constat. Quare per solem potest
revelationem innotescere. Quæ autem sic
præcisè innotescunt, evidenter sciri non pos-
sunt.

Dico 2. Absolutè tamen tenendum, non multiplicem, sed unicum esse Mundum. Prob. quia ex una parte non est asserendum, quod nullo ne probabili quidem argumento probari potest; talis enim assertio sine dubio est temeraria. Atqui esse alium Mundum ab hoc distinctum nullo argumento, aut indicio constat. Ergo. Ex altera parte Mundi unitas Divinæ Fidei conformior est: quod probat D. Thom. 1. par. qu. 47. art. 3. §. sed contra ex illo Jo. 1. *Mundus per ipsum factus est: Ubi singulariter, inquit, Mundum nominavit, quasi uno solo Mundo existente.* Hinc Mundorum pluralitas numeratur inter errores Origenis.

Dico 3. Mandus potuit esse multiplex. Hoc mihi dictum videtur certum ex iis, quæ probavi in materia De Infinito. ubi ostendi, nec in numero, nec in perfectione creaturarum statim ad certum terminum: ex quo consequens est possibilitas alterius Cæli numero, imò etiam specie distincti ab eo, quod est de facto; & similiter aliorum elementorum, mixtorumque, ex quibus constet non aliud modo, sed etiam perfectius Univerſum. Adde alium Mundum non solum possibilem de extraordinaria, sed etiam de ordinaria potentia; ut enim major sit aliqua congruitas pro Mundi unitate, non tamen est tanti. quæ multiplicatè reddat omninò miraculosam.

Adversus hanc conclusionem est Aristoteles 1. 1. de Cælo à t. 81. ubi multis probare nititur, ità esse unum Univerſum, ut multiplex esse non possit.

Primò, quia data Mundi pluralitate, non potest amplius investigari unus primus Motor, cujus scilicet unitas ex Mundi unitate dignoscitur.

Secundò si essent duo Mundi v. g. in utroque esset terra. Vel ergo terra alterius Mundi moveretur ad hujus centrum naturaliter, vel

violenter. Si naturaliter: ergo in alterius centro violenter detineretur: & cum non sit maior ratio de hac, quam de illa terra, hæc etiam stabit nunc in centro suo violenter. Si violenter; ergo illa terra violenter in huius Mundi centro quiesceret; non enim ista duo sibi constant, ut mobile moveatur violenter ad locum, in quo quiescat naturaliter. Et cum terra, quæ hic est, sit eiusdem rationis cum ea, quæ est alibi, violenter hæc etiam in suo centro quiescet.

Tertio ordo corporum postulat, ut grave sit infimum: leve sit medium: Cælum verò supremum. Corpora igitur omnia, quæ essent in alio Mundo, vel essent supra hunc; atque corpus grave, quod petit infimum locum, & leve, quod medium, essent supra Cælum, quod debet esse supremum; & per consequens innaturaliter esset. Vel essent infra: & idem proportionaliter absurdum evincitur.

Quarto si dicatur, eiusmodi Mundos ordinem ad se invicem non habere, contra est ex D. Thom. cit. Quæcumque sunt à Deo, non solum dicunt ordinem ad Deum; ut est certum, sed etiam inter se. Quæcumque igitur à Deo fiunt, unum sunt unitate ordinis. Plures ergo Mundi, qui hoc pacto unum non essent, esse non possunt.

Ad 1. resp. quod licet Mundi unitate supposita, rectè ostendatur unitas Dei, quod præstat D. Thom. 1. p. q. 11. art. 3. non tamen ex pluralitate potest probari pluralitas. Imò verò ex pluralitate demonstrabitur non minus unitas: nam ex rerum contingentia evidenter probatur existentia primæ causæ: ex hac verò eiusdem unitas, ut patebit in Metaphysicis. Ad summum ergo, data Mundi pluralitate, non suppleret amplius hoc argumentum ad Dei unitatem demonstrandam: quod tamen evidentiam simpliciter non facit, sed solum secundum

quid, & ex suppositione; quia non est simpliciter evidens Mundum esse unum.

Ad 2. terra alterius Universi in eo naturaliter quiesceret, ut naturaliter quiescit hæc terra in huius centro. Terra enim non appetit hoc centrum individuum, neque ad ipsum inclinatur propter centri ipsius sympathiam, aut magnetismum. Tum quia centrum est punctum merè imaginarium nulla prorsus virtute præditum. Tum quia antecedenter ad corporum existentiam nullum est centrum, cum ita non sint, nisi spatia imaginaria, quæ cum sint infinita, medium, adeoque centrum non habent. Est ergo in hoc centro hæc terra propter ordinem, quem servare inter se secundum situm debent eiusdem Mundi partes. Quare si plures sint Mundi, hæc terra non deberet cum alterius Mundi corporibus ordinari, nec proinde peteret, aut posset illuc moveri. Quod si ab extrinseco agente versus illud Universum moveretur, quousque Cælos istos penetraret, ascenderet, quin moveretur à medio contra ordinem, quem hic petit, dum hic est. Dum verò alios Cælos ingrederetur, descenderet: quia moveretur ad medium juxta ordinem, quem ibi petit, dum ibi est.

Ad 3. responsio patet ex modo dictis. Connaturalitas partium eiusdem Universi postulat, ut in iis sit talis ordo, quo grave occupet infimum locum: leve medium, &c. Sed partes alterius Mundi non essent cum partibus huius coordinandæ, cum quibus scilicet non component; adeoque nec possunt dici supra, nec infra hunc Mundum.

Ad 4. nego maiorem, quæ scilicet vera solum est de iis, quæ sunt de facto. posset etiam dici, quod utrumque Universum in hoc uno conspiraret, ut Dei gloriam manifestam efficeret. Atque ita admitti potest, quod aliquatenus unum ordine esset: sed
non

non ita, ut dici possent unum simpliciter Universum.

C A P U T II.

An Mundus sit perfectus, & optimus.

Perfectum, & optimum est, quod ultimum debitæ perfectionis attingit, adeò meliorari ultra non potest. Jam verò potest id de Mundo quæri, siue de perfectione secundum substantiam, siue de perfectione secundum ordinem partium. Rursus inquiri potest, an Mundus sit ita perfectus, ut non possit simpliciter evadere perfectior: &, an sit ita perfectus, ut nequeat esse perfectior secundum quid, relatè nimirum ad talem finem ipsi de facto à Deo præstitutum.

Dico nunc 1. Mundus secundum substantiam partium in specie, sed non in genere potest esse simpliciter perfectior. Prob. primum, quia species sunt possibiles aliæ, & aliæ in infinitum perfectiores: quibus additis, aut suffectis, Universum perfectius resultaret; adeoq; quod est de facto, non est in summo absolutæ perfectionis gradu. Prob. alterum, quia continet hic Mundus summa omnia rerum genera, in quæ primò ens dividitur.

Dico 2. Mundus consideratus secundum ordinem partium ad finem est ita perfectus, ut perfectior evadere non possit. Prob. potest considerari ordo ad finem *cui*, & ordo ad finem *qui*. non potest perfici ratione primi ordinis; quia non potest meliorari ordo, nisi meliorando finem: finis autem *cui* Universi est Deus, quo nihil esse melius potest. Sed neque potest perfici ratione alterius ordinis, quia licet finis *qui* possit esse maior, & melior, major scilicet, & melior Divinæ Bonitatis manifestatio, hæc tamen si esset, non perficeret ordinem ad hunc finem,

de facto eſt intentus, ſed poneret alium ordinem ad alium finem. Cæterum, qui nunc eſt Mundus, ad tantam Dei gloriam eſt ita aptus, ut ſi ipſe perficeretur, magis divinas perfectiones oſtenderet; adeoque perfici ultra non poteſt, ſi hæc, & non major Dei gloria ſit intenta.

Dico 3. Mundus acceptus ſecundum ordinem partium in toto, in quo ordine Mundi pulchritudo, ac perfectio conſiſtit, eſt in ſummo naturalis, ac debitæ perfectionis. Ita *Ægyd. in 1. d. 44. q. 2. Richard. ib. q. 2. D. T. 1. p. q. 25. ar. 6. ad 3. ubi ait, quod Univerſum, ſuppoſitis iſtis rebus, non poteſt eſſe melius: propter decentiſſimum ordinem hiſ rebus attributum à Deo, in quo bonum Univerſa conſiſtit: quorum ſi unum aliquid eſſet melius, corrumpereſtur proportio ordinis: ſicuti ſi una chorda plus debito intenderetur, corrumpereſtur giſthara melodia.*

Prob. concl. ordo dupliciter poteſt meliorari, vel extenſivè, vel intenſivè. Neutro autem modo poteſt ordo rerum, qui eſt de facto, perfici. Non extenſivè; quia extenſiva ordinis melioratio habetur per hoc, quod ordo ſe extendat ad alias partes, quæ prius ſupponebantur inordinatæ. Atqui hoc fieri non poteſt; quia in hoc Vniverſo ut ſæpè ait Auguſt. nihil eſt inordinatum. Et quidem vel loquimur de ordine naturali; atque in hoc patet omnia eſſe ſecundum ordinem, ſeu exigentiam naturæ ſuæ: & ſi quid accidit monſtroſum, id ipſum ſequitur totam cauſarum ſuarum complexionem. Vel loquimur de ordine morali; atq; in hoc licet culpa ſit maximè inordinata, imo ſit ipſa inordinatio, ſi tamen ſumatur complexio cum bonis ab ea occasionatis, facit & ipſa ordinem, conducitque ad Vniverſi pulchritudinem. Sic licet color niger ſecundum ſe ſit imperfectus, & ſubtriſtis; ſi tamen à pictura omnem nigrum colorem amoveas, & in alium vertas, picturæ ſymmetriam non perficis, ſed tollis, quæ ſcilicet reſul-

tat tota ex mixtione proportionata lucis, & umbræ. Proportionaliter culpa quamvis recti ipsa ordinis inimica, fuit à provido Numine permiffa, ut occasio inde esset qua iustitiæ suæ ostendendæ, qua pietatis, atque ita umbrarum vice in hac Vniversitatis tabula fungeretur, vi cuius operum divinorum fulgor elucesceret magis; hoc enim divinißimum est, in ordinationes ipsas in ordinem redigere, & rerum pulchritudini ipsam flagitiorum turpitudinem mancipare.

Sed neque potest ordo meliorari intensivè; Neque enim contingere id potest, nisi meliorando accidentaliter singulas partes. Sed neque sic ordo melior evadit; quia ordo attenditur non penes ordinatâ, sed penes habitudinem proportionis, quam ponit in rebus. Exemplum a fterit Ægid. cit. in cithara, in qua chordarum consonantia spectatur præcisè secundum excessum vibrationum, & soni inde resultantis; quare si chordæ perficiantur, non fit maior earundem proportio, quæ semper eadem manet, siue dupla, si sit diapason, siue sesquialtera, si sit diapente; & sic de aliis. Idem dic de partibus Vniversi.

C A P U T III.

Quæ sit Mundi figura.

UT totius Vniversi figura statuatur, de Cæli dumtaxat, ac terræ figuris statuendum, quæ duo sunt scilicet solida corpora, quibus fluida media sese accommodant.

Cælum esse sphericæ figuræ multipliciter probant Astronomi. Primo à priori: quia Cælo perfectissimo corporum debetur perfectissima figurarū, & maximè apta ad finem, ad quem est ordinatum. Atqui ut inter planas circularis ita inter solidas spherica figura est perfectissima. Tum quia maximè accedit ad unitatem, eo

quod unica superficie nusquam terminata continetur. Tum quia accedit quodammodo ad infinitatem; caret enim principio, & fine, non quidem in potentia, sed in actum. Tum quia summam servat partium suarum secundum locum, ac situm proportionem propter æqualem omnium à centro distantiam. Rursus eadem est aptissima ad Cæli fines, qui sunt, ut moveatur, ut contineat reliqua corpora, ut influat in inferiora. Atqui ad motum nihil est aptius sphaera, cuius partes dum circa commune centrum agitantur, debitum semper occupant locum; ac proinde facillimum motum habent. Figura autem ad continendum aptissima ea est, quæ est omnium capacissima. Sphærica verò est eiusmodi; ut enim demonstrant Geometræ, ex figuris Isoperimetris, seu æqualem ambitum habentibus, si planæ sint, circulus est capacissimus; si solidæ, sphaera. Demum eadem est ad Cælestes influxus maximè accomodata; ut. n. inferiora foveantur, debuit Cælum secundum omnes sui partes æqualiter à terra distare, ut omnes æqualiter influerent. Sola autem sphærica figura reddere potest Cæli partes æqualiter à terra distantes.

Accedit sensuum experientia, quæ nobis Cælum in Sphæra specie objectat. Et quamvis hoc unum rem omninò evidenter non convincat propter maximam distantiam, quæ non finit immensi corporis figuram ad amissim distinguere; standum tamen est pro figura sphærica à sensibus exhibita, dum nihil assertur ad alias figuras vel demonstrandas, vel suadendas; maximè, cum sphæricam probe allata à priori congruentia. Huc etiam facit, quod Astronomi sua instrumenta Cælum referentia elaborarunt ex suppositione sphærici Cæli, ut astrolabia, &c. Et ex eadem hypothese horologia construunt. & ista omnia optimè congruunt. Cælum ergo sphæricum est.

Deinde

Deinde quod terra sit rotunda, non plana, ostenditur primò, procedendo ab Ortu in Occasum. Sol enim prius nascitur, & occidit Orientalibus, quam Occidentalibus regionibus. at si terra globosa non esset, id non contingeret, sed eodem omnibus tempore appareret, ut constat. Terra igitur ab Oriente in Occidentem rotunda, non plana est. major constat ex Lunæ defectu, qui si nobis incipit post tertiam noctis horam, in extrema Hispania incipit prima. Utrobique autem simul incipit. ergo dum nobis est tertia, Hispanis est prima noctis hora. ergo Sol prius occidit, adeoque prius etiam oritur nobis, quam Hispanis. Idem secundò ostenditur, procedendo à Septentrione in Austrum: compertissimum. n. est, quod sic procedendo Stellæ, quæ circa polum Arcticum prius erant sempiternæ apparentiæ, occultari tandem incipiunt. quæ verò circa Antarcticum constitutæ videri non poterant, paulatim se supra horizontem attollunt, & sub aspectum veniunt. quod non contingeret, nisi terra globosa esset. est ergo hinc etiam, adeoque undequaque sphærica terra.

Aqua etiam sphæricam habet figuram. quod constat primò; quia versus littora, navigantibus prius apparent montium, turriumque cacumina deinde propiora terræ. hoc autem sine aquæ tumore non constat. 2. Id probat natura ipsa gravitatis. nisi enim aqua sphæricam figuram assumeret, una ipsius pars magis distaret à centro gravitatis, quàm alia; & consequenter quæ magis distaret, penderet supra aliam; adeoque in aliam vi nativa debet effluere, & cum ea se in orbem componere.

Postremò aqua simul, & terra unum globum faciunt, qui terraqueus appellatur. Patet id primò à posteriori ex umbra, quam terra simul, & aqua proiicit, perfectè, si minus mathematicè, saltem physice rotunda, ut de-

prehenditur in eclypsi Lunari. umbra autem rotunda indicat rotundum corpus, à quo proicitur. Patet secundò ex natura gravium, quæ habent omnia idem commune centrum gravitatis, quod simul est centrum Vniversi, ut mox probabitur; ut enim ostendit certa experientia, quæcumque gravia per eandem rectam lineam descendunt: quod non fieret, nisi esset idem omnibus commune centrum. omnia ergo debent circa idem centrum conglobari, adeoque non distinctam, sed eandem spheram conficere.

Sic arguunt communiter, & rectè quoad omnia præter illud, quod aquam volunt omnino, ac perfectè globosam. mihi enim valdè probabilis est sententia, quam non modo plurimi ex Patribus sacrarum litterarum autoritate freti, sed etiam Theologi non pauci cum D. Th. 1. p. q. 69. ar. 1. ad 1. ad 2. & 4. ac naturales Philosophi, inter quos est novissimè P. Gaspar Schottus in sua Anatome PhysicoHydrostatica fontium, ac fluminum. Docet hæc sententia, aquam aliquid tumoris in alto admiscere, quo à perfecta rotunditate discedit, ut terra per montes atq; hunc tumorem ipsorum montium editissima quamvis cacumina æquare, quo apta sit a qua ad eadem pertingere, & fontium, fluviorumque perennes scaturigines generare. Sed hanc in præsentì innuisse sit satis, quæ lib. 3. latius explicabitur,

C A P U T IV.

Quod sit Mundi Systema.

Mundi Systema est coordinatio magnarum mundi partium, elementorum scilicet, ac planetarum secundum locum. In qua re celeberrima est veterum Philosophorum Philolai, Aristarchi, ac plerorumque Pythagoricorum sententia, quam ab Aristotele, Ptolemæo,

Ptolemæo, Archimede, omnibusque tum Philosophis, tum Mathematicis explosam, longaque oblivione jam obrutam, iterum seculo superiore in lucem revocavit Nicolaus Copernicus, quem sequuti deinceps sunt Keplerus, Galileus, Cartesius. & Astronomi huius temporis non pauci. Hæc sententia universum ita constituit. Firmamentum, seu Cælum Stellatum immobile ponit, in cuius centro Solem item immotum, nisi in quantum juxta Cartesium & alios in se ipsum circumagitur. Circa Solem voluuntur omnia corpora universum integrantia, hoc ordine. Mercurius proxime spatio ferme trimestri circulationem suam perficiat, quanto remotior Venus intra octimestre circulum, absolvit. Tertium à Sole locum terra, ipsa quoque sideris orbibus annumerata, obtinet; & integrum annum, ut plenè circumeat solem, impendit. Quartum locum Marti, quintum Jovi, sextum Saturno tribuunt; ita ut prior intra duos, alter intra 12. tertius intra 30. annos orbem suum solidè gyrent. Luna movetur circa terram unius penè mensis intervallò. Sed in terra duos motus agnoscunt, unum circa Solem, qui est annuus, & parit temporum vicissitudines; alterum circa proprios polos, qui est diurnus, & facit noctium, dierumque alternationes.

Alterum est Systema Ptolemæi, in quo terra immobilis in universi totius centro statuitur. circa terram planetæ omnes hoc ordine vertuntur. proximum terræ locum Luna obtinet; Lunam Mercurius; hunc Venus excipit. medius inter erroneos est Sol. Suprà Solem primò Mars. tum Juppiter, postremò Saturnus. hæc omnia corpora suis sphaeris affixa primum mobile, seu firmamentum claudit, & continet.

Tertium est Tychonis, qui, quòd animadverteret Ptolemæico systemati phænomena non omnino consentire, terram quidem immobilem

lem statuit, sed eam centrum motus Lunarum tantum, ac Solaris voluit. reliquos quinque planetas non circa terram, sed circa Solem agitari putavit: Atque hoc demum systema est, quod Astronomis omnibus, ac Philosophis, qui terræ stabilitatem tuentur, arrisit, utpote experientis maximè congruum. In præsentem missis iis, quæ diligentius tractare ad Astronomum pertinet, de sola terræ immobilitate, quæ communis est Ptolemaico, ac Tychoniano systemati, nonnihil dicam.

Audiendi primo loco sunt Copernicani, qui pro terræ motu arguunt. 1. Per motum terræ salvantur omnes sensibiles apparentiæ, ut probant communiter Astronomi. 2. Quod indiget alio, congruum est, ut moveatur ad acquirendum ab illo bonum, quo indiget. terra autem Cælo, & Sole indiget. ergo terram moveri congruum est. 3. Motus Cæli si est tam velox, & rapidus est, ut omnem fidem, & imaginationem superet; quælibet enim Stella fixa intra unum horæ minutum, si ad æquinoctialem sita sit, passuum penè sexcenties centena millia percurreret: quod quidem asserendum non est, nisi ad id ab evidentia aliqua cogamur, quæ adversus Copernicum nulla est. 4. Lex est naturæ, ut per plura non præstet, quæ potest per pauciora. at iidem effectus habentur, si, terra mota, reliqua corpora quiescant. Ergo dicendum, terram unam moveri, alia omnia quiescere. 5. In hac sententia redditur facilis ratio marini æstus, quæ in aliis sententiis difficillima est, nec datur sine recursum ad machinam. 6. demum, quia hunc ipsum terræ motum videtur insinuare Scriptura, Psal. 113. *A facie Domini mota est terra.* Job cap. 9. *Qui commovet terram de loco suo, & columna ejus concutuntur.*

Hæc opinio damnata est adversus Galileum ejus promotorem à Sacre. Congregat. Cardin. sub Paulo V. & meritò; nam repugnat apertis Sa-

Sacrarum Literarum testimoniis. Motus quidem Solis habetur expressum Josue 10. tum Isaie 28. tum clarius Eccles. 1. *Oritur Sol, & occidit; & ad locum suum revertitur; ibique renascens, gyrat per Meridiem, & flectitur ad Aquilonem. Lustrans universa in circuitu pergit spiritus, & in circulos suos revertitur.* Ibidem praedicatur terrae immobilitas iis verbis, *Terra in aeternum stat.* Quod idem habetur Job 38. Psal. 93. 95. & alibi saepe.

Respondent 1. Scripturam loqui accommodatè ad sensum vulgi, qui vocat immotam, quod moveri non animadvertit. Sed obstat 1. regula communis Interpretum desumpta ex Augusti, quod ubi verba Scripturae possunt intelligi, ut sonant, ita debent, & non aliter intelligi. Sumere autem quietem pro motu, & motum pro quiete, propterea, quod motus appareat quies, & quies motus; est abusus vocum, qui non debet in Dei Verbum intrudi sine magna, aut etiam evidenti necessitate. 2. ut Scriptura se accommodet aliquando usui vulgi, penes quem arbitrium est loquendi; non tamen ubi loquutio vulgi fundatur in errore mentis, non in mera acceptione vocabuli; aliter divinus sermo foveret ignorantiam, & errare diceretur cum vulgò Deus. Jam verò cum homines negant terram moveri, & Solem stare, non hoc dicunt per tropum; sed quia si vera est Copernici sententia, falluntur ita existimando. Impium ergò est asserere, quod huic loquendi modo velit se Deus accommodare, cujus est potius, dum ad ista, descendit, si quid erratur, dedocere. Quid enim, si pariter concedatur potuisse Deum negare Antipodes, quod istos vulgus negat, quia non capit?

Respondet 2. Cartesius, in sententia Copernici, & sua terram re ipsa non moveri. Ad quod mirabile paradoxum pro virili confirmandum motum sumi bifariam vult, aut ex sensu vulgi,

aut ex rei veritate. Primo modo est *actio*, quam corpus aliquod ex uno loco in alium migrat. Ità habet 2. par. princ. Philos. num. 24. hinc aut fieri posse, ut eadem res dici possit moveri, & non moveri; ut qui sedet in navi, dum ea solvit è portu, putat se moveri; si respiciat ad littora, sed non, si respiciat ipsam navim, inter cæjus partes eundem semper situm servat. Secundò modo est *translatio unius corporis ex vicinia eorum corporum, quæ illud immediatè contingunt, & tanquam quiescentia spectantur, in viciniam aliorum*. Ità ibid. n. 25. Tum par. 3. à n. 29. pergit ostendere terræ circa Solem gyrantis quietem, atque ità auferri censet omnem scrupulum de terræ motu.

Hæc sanè responsio eam sine partium studio consideranti mirabilis videbitur; quid enim mirabilius, quàm corpus gyrare, & non moveri, h. e. moveri circulariter tum in se, tum circa Solem, & non moveri simpliciter? Si motus ex vulgi sensu est actio translativa de loco in locum: locus autem sumitur non solum juxta Aristotelem, sed ipsum Cartesium, ut quid immobile; nunquid non ità movetur terra, dum ex uno Zodiaci signo ad aliud transit? Quod verò attinet ad illam motus propriè dicti notionem, quam appellat *ex rei veritate*, ea non est, nisi arbitrarius vocabuli abusus, cum in vocibus non sit alia rei veritas, quam usus vulgi, aut doctiorum. Quis autem unquam motum à sola corporum vicinia sumendum, ac regulandum censuit? aquam in vase moto quis neget moveri, propterea, quod eandem cum vasis partibus viciniam servet? merces intrà navim conclusas quis immotas absolutè pronunciet, quia semper iisdem pluteis conditæ, quamvis velis, remisque actum magno impetu feratur navigium? In has absurditates devenitur ex Logicæ defectu: nec loquor abstrusiores ejus regulas; loquor eas, quæ vulgo etiam sunt obviæ.

an non enim contra has peccaret, qui negaret esse animal, quod non est Bos, aut Leo? quæ appellatur à Summulistis fallacia consequentis, dum à specie ad genus arguitur negativè? In hoc ipso offendit apertè Cartesius. Relinquere corporis unius viciniam, & alterius acquirere, motus quandoque est (quandoque etiam non est, ut cum circa turrim immotam aer agitur) quod est videre in eo, qui in navi mota è puppi transit ad proram. Jam ex hoc ita videtur arguere; Qui ex unius corporis vicinia transit ad viciniam alterius, movetur. Sed terra non transit hoc pacto, quia cum ea gyrat totus aer propinquus. Ergo terra non movetur. Vis scire, quæ consequentia sit ista? Vide hanc aliam omninò geminam: Qui rugit, sentit; Bos non rugit; ergo Bos non sentit.

Improbo iterum Copernicanum systema iisdem proportionaliter argumentis, quibus probatum est. Primò in systemate Tychonis terram statuentis immotam omnes sensibiles apparentiæ salvantur, ut pariter Astronomi demonstrant. Secundò congruum est, ut media moveantur ad finem, non finis ad media. Atqui in terra est homo reliquarum omnium creaturarum finis, ac dominus. Ergo congruum est, ut circa terram reliqua omnia corpora moveantur, ut hominis indigentia serviant. Tertiò; quia Cæli vertigo tam rapida est, ut fidem superet, neganda est, Atqui Cæli magnitudo, seu verius immensitas fidem etiam superat juxta Copernicum, qui totum ambitum à terra gyratum puncti instar relatè ad firmamentum habere cogitur. Ergo neganda est. Quod si nostra fides Cæli vastitati non obstat, neque obstat rapiditati. Nam quoad rem ipsam, ut quantitas potest esse maior, & maior, ita motus velocior, & velocior sine termino. Quartò, lex est naturæ, ut sequatur corporum, & materiæ inclinationem. Atqui inter corpora omnia

terra

terra est lentissima, quare, quæ terrea magis sunt; minus sunt ad motum apta: quæ ignea, vel aëria, mobilia, juxta naturam ergo est, ut terra quiescat; planetae verò, & Cælum, quæ ad ignem, vel aërem magis accedunt, moveantur. Ad hæc motus est perfectio naturæ; quod enim animantibus vita; hoc inanimis motus. Ubi ergo major motus, maior perfectio. Non est autem lex naturæ, ut quod maiori perfectione potest, minori id peragat. Ergo juxta legem naturæ est, ut terra una quiescat; reliqua moveantur. Quintò, ex fluxu, & refluxu maris terram motu Copernicano non agitari contendit. latè Cabeus: quæ est apud ipsum physica demonstratio. Si enim terra sic moveretur, contingeret quidem maris æstus, sed longè alius ab eo, qui de facto contingit. De qua re non nihil infra. Sexto, quæ ex Jobi 9. & Ps. 133. afferuntur de terræ motu probant apertissimè terram stare. Ea enim inducuntur ad ostendendam Dei vel potentiam, vel iram, cuius terra vel per se immota aspectum non sustinet, quin tota contremiscat. Quod ipsum aliis miraculosis effectibus declaratur.

Alia solent præterea afferri ad hoc ipsum systema impugnandum. Nam primò, vel terra movetur simul cum aëre circa ipsam, vel aëre immoto. Si secundum, deberemus continenter ventum vehementissimum sentire; ut enim qui equo citissimè fertur, & aërem quietum frangit, ventum validum sentit: ita dum maiori incomparabiliter velocitate ab occasu rapimur in ortum, validissimum aeris impulsu sentire deberemus. Si primum; eundem aeris motum sentire deberet, qui ab ortu fertur in occasum propter aeris in contrarium fluentis resistantiam. utrumque autem experientia repugnat. Secundò affertur celebre experimentum de bombarda ad perpendiculum constituta, quæ si explodatur, pila sursum

lata in os eiusdem bombardæ recidit. Hoc autem non contingeret, si terra moveretur; dum enim pila descendit, terra interim simulcum bombardâ longius provecta esset. Scio, quid Gassendus, & alii adversus hoc experimentum meditantur; ajunt enim pilam ipsam, quæ ascendit, non rectam lineam, sed parabolicam signare, idque ex duplici impetu, quem concipit, altero rectâ ab igne bombardæ, altero circulariter à terra ipsa: quæ & bombardæ, & pilæ communem impetum imprimit. Et ad hoc confirmandum afferunt exemplum navis celerrimè motæ, in qua si quis consistens pilam rectâ sursum proiciat, eodem, unde fuerat emissa, decidere deprehendit. Hæc quidem non sine apparenti veritatis dicuntur. Sed est tamen adhuc difficultas in eo, quod pila ascendens, ut eodem recidat, debet motum circularem velociorem semper, & velociorem perficere: descendens verò contrâ; quo enim recedit magis à terra maior est circulatio, adeoque velocior motus: contrâ verò, dum ad terram accedit. Talis autem diversitas velocitatis ab eodem simplici impetu à terra accepto oriri certè non potest. Nisi velis ad aerem recurrere, à quo tamen tantæ gravitatis pilam, vel minimum impelli probabile non est: Tertiò demum si terra rebus omnibus in ipsa consistentibus impetum versus occasum, quo fertur, imprimeret; jam quotquot sumus, faciliùs versus occasum, quàm aliorum ferri deberemus, resistente scilicet in aliam quamvis partem communi illo impetu: Quis autem eiusmodi facilitatem maiorem deprehendisse testabitur?

Atque hæc de orbis systemate in medium attulisse sit satis; in quo potius, quid non tenendum, quam quid tenendum, decretum est. Sed quia plura dicere, mediumque inter

Pto.

Ptolemæum, & Tychonem federe; iudicium
est exasse Astronomicum, terræ stabilitatem
huic communem vindicasse sufficiat. Cætera
Astronomis permitto.

Q U Æ S T I O T E R T I A.

De Cælo.

C A P U T I.

An Cælum sit corpus simplex.

Duplex est simplicitas, de qua potest præ-
sens quæstio procedere. Prima est per
exclusionem compositionis ex materia, &
forma. Secunda est per exclusionem mixtionis
ex elementis. De tertia enim, quæ fit per
exclusionem compositionis integralis, ne-
mo dubitat, quin Cælo sit deneganda; est
enim substantia materialis, de cuius conceptu
est integralis divisibilitas, ut in Metaphysi-
cis ostendetur. Hanc tamen controversiam
in primò solum sensu agitabo, an scilicet Cæ-
lo insit ex materia, & forma compositio.
Sed priùs nonnulla de possibilitate corpo-
ris eiusmodi compositionem excludentis præ-
mittam.

Dico r. corpus simplex per exclusionem
compositionis essentialis ex materia, & for-
ma impossibile non apparet. Hæc conclusio
non aliter probari potest, quàm solvenda
obiectiones; hinc enim apparebit, hos ter-
minos *corpus*, & *simplex* non esse incom-
possibiles. Nec est omnino inepta ad id con-
firmandum ea congruentia, quod sicuti in or-
dine spiritali datur substantia completa sim-
plex.

plex, ut Angelus, & incompleta, ut anima : ita in ordine corporeo dabilis est substantia simplex completa, ut datur incompleta, materia nimirum, & forma.

Quæ huius corporis impossibilitatem probant, hæc ferme sunt. Primò, eiusmodi corpus non haberet materiam. ergo esset immateriale. Repugnat autem in terminis corpus immateriale. Secundò, omne exigens quantitatem est compositum ex materia ; materia enim est radix extensionis, & quantitatis. Sed omne corpus est exigens quantitatem. ergo omne corpus est compositum ex materia. Tertiò, nullum est possibile corpus, quod non sit capax formæ accidentalis, aut compositionis cum ea. ergo nullum est possibile, quod non sit capax formæ substantialis, aut saltem compositionis ex ea. Quartò, non potest substantia spiritualis componi ex materia, & forma. ergo non potest substantia materialis non componi ex materia, & forma. Quintò, corpus simplex esset perfectius, & imperfectius simpliciter anima rationali. ergo repugnat. probant. quod esset imperfectius, patet ; quia esse spiritum, & esse intellectivum sunt perfectiones toto genere meliores, quam esse corpus utraq; illa perfectione essentialiter carens. quod esset perfectius, constat ex eo, quod esset actus subsistens, completus, & simplex, nullamque compositionem substantialem respiciens : quæ etiam perfectiones sunt toto genere meliores. Sextò, corpus simplex, & esset incorruptibile, perinde ut materia prima : & esset exigens quantitatem : quæ duo prædicata sunt impossibilia : quantitas enim, seu impenetrabilitas datur, ut munimen à contrario corruptente. frustra ergo datur enti incorruptibili. Septimò, esse corpus, & esse intellectivum repugnant. at omnis substantia simplex est intellectiva ; intellectivitas enim habetur per

recessum à materia . ergo nulla substantia simplex est corpus .

Resp. ad 1. illud corpus carens materia partis futurum simpliciter materiale , prout materiale idem sonat , ac habens molem , quantitatem , & extensionem . Ad 2. nego maiorem . non tamen nego , materiam primam in compositis ex ea esse primam radicem quantitatis : sed hoc habet , non ut pars est , & subiectum , sed ut habens extensionem , & partes integrales : quas ipsas cum haberet corpus simplex , haberet etiam quantitatis exigentiam . Ad 3. illud habet instantiam evidentem in substantiis spiritualibus completis , nimirum Angelis , qui capaces sunt accidentis , non formæ . Nego igitur conf. disparitas est ; quia illud primum pertinet ad rationem finitatis , ut sic , quæ necessario affert mutabilitatem accidentalem : non item hoc secundum . Ad 4. negatur conseq. cum habeatur aliunde sufficiens , & necessarium distinctivum corporis à spiritu , de quo in Met. non est necesse hoc aliud admittere . Ad 5. nego corpus simplex futurum simpliciter perfectius anima intellectiva . quamquam enim hæc excederetur secundum quid ab illo in ratione actus completi subsistentis ; excederet tamen illud simpliciter per rationem intellectivi , cuius defectus ab alia quacunque perfectione compensari non potest . Ad 7. quamvis quantitas adhibeatur à natura , ut munimen adversus corruptionem , nego tamen , aut unicum hunc esse , aut primarium finem quantitatis , quæ principalius corpori datur , ut debitæ extensionis tutela , adeoque ut munimen adversus penetrationem . Ad 8. si verum est , intellectivitatem haberi per recessum à materia , materia sumenda est formaliter secundum imperfectiones potentialitatis , molis , & homogeneitatis , à quibus recedens substantia evadit intellectiva . Jam

corpus simplex licet recederet à materia prima, quam à sui compositione excluderet, non tamen recederet à materiæ imperfectionibus, moleſcilicet, & homogeneitate partium distinctarum, quæ omninò cum intellectivitate repugnant, ut probabitur in Metaphys.

Dico 2. si Cælum supponatur corpus essentialiter incorruptibile, quale illud statuunt nonnulli apud Ruvium l. 1. de Cælo cap. 3. qu. 1. non potest aliter poni, quam corpus simplex.

Prob. essentialis incorruptibilitas stare non potest cum compositione ex materia, & forma. quod prob. quia omne compositum, cujus partes sunt invicem separabiles, est corruptibile; hoc enim satis esse ad corruptibilitatem, constat evidenter in homine. atqui omne compositum ex materia, & forma habet partes invicem separabiles. ergo omne eiusmodi compositum est corruptibile. Min. prob. 1. quia posset Deus destruere vel formam, servata materia, vel materiam, servata forma, vel unionem, servata utraque; neque enim apparet, in quo prædicato fundaretur essentialis ista connexio; adeoque standum pro divina potentia. Secundò, quia tom. 2. l. 1. quæst. 2. cap. 5. est probatum, quamlibet materiam cujuslibet formæ esse capacem; adeoque posset formæ cælesti sublunari succedere. Tertiò, licet supponamus in Cælo materiam diversæ rationis à sublunari, unique dumtaxat cælesti formæ addictam, adhuc posset Deus unam partem eiusdem formæ cælestis in alia parte eiusdem materiæ collocare, & si hoc negatur possibile, accidatur illa materia non solum addicta essentialiter illi formæ, sed etiam hæc pars materiæ huic parti formæ, & præterea supponatur, ne divinitus quidem esse posse materiam sine omni forma; adhuc posset Deus servare formam, annihilata materia. Neque enim

enim credendum faciliè est, formam cælestem esse in hoc imperfectiorem forma elementari. quare si hæc potest divinitus creari extra materiam, à fortiori forma cælestis. Totum autem corrumpitur, sublata altera eius parte.

Dico 3. Cælum non est corpus simplex, sed ex materia, & forma compositum. Conclusio patebit ex dicendis infra de Cæli corruptibilitate, quæ sane cum ejusdem simplicitate stare non potest.

C A P U T II.

An Cæli incorruptibilitas; si qua est, petat compositionem ex materia alterius rationis à materia sublunarium.

Materiam diversæ rationis ab ea, quam in sublunaribus agnoscimus ad omnes omnino formas indifferentem, i. cit. ut impossibilem exclusi. Remanet ergo, ut Cælum, si compositum est, materiam habeat cum sublunaribus communem. Sed quia multi contendunt, cum hac materiæ communitate non stare Cæli incorruptibilitatem ab Aristotele assertam, & hinc inferunt, Aristotelem fuisse materiæ diversæ rationis authorem, quod equidem i. cit. negavi; id mihi breviter in præfenti examinandum.

Censeo igitur, quod etiam data incorruptibilitate Cæli, quam Aristotelici tuentur, nihil opus est, ut astruatur in Cælo materia alterius rationis à sublunaribus.

Ratio est prima: quia posset in ea hypothesi Cælum statui corpus simplex. Unicum enim principium, unde dari primam materiam in his inferioribus arguimus, est. quia videmus in his substantiales transmutationes accidere, quæ sine materia haberi non possunt. Si ergo
nul,

nulla in Cælo contingit, aut contingere potest eiusmodi mutatio, probabilius dicendum materiam ibi primam non esse. Conf. prob. quia ubi principia distinctionis non deprehendimus, pro identitate stamus. Hinc quia modorum distinctionem à separabilitate, & indifferentia cognoscimus, ubi nullam indifferentiam, nullamque separabilitatem invenimus, nullum modum distinguimus. Hinc qui in Deo absoluta à relativis virtualiter intrinsecè distinguunt propter prædicata contradictoria de iisdem verificata: essentiam tamen, & attributa, in quibus talia prædicata non vident, mutuò virtualiter non distinguunt. Qui ergo separabilitatem negant inter Cæli partes, consequentius negare debent inter easdem distinctionem, & compositionem.

Neque valet; quod dicunt 1. naturam operari uniformiter; adeòque eandem transmutabilitatem, quæ arguit materiam primam in sublunaribus corruptibilibus, augere eandem in cælestibus incorruptibilibus. Nam si ratio operandi non est eadem, sed opposita, non potest operatio esse eadem, sed opposita. Sicuti ergo natura non operatur uniformiter in cælestibus, & sublunaribus quoad corruptibilitatem, & incorruptibilitatem, ità nec debuit uniformiter operari quoad compositionem; si hæc fundatur in illis, tanquam in ratione finali.

Minus valet, quod dicunt 2. in Cælo esse accidentia alia ordinata ad agendum, qualis est lux, alia ad recipiendum, qualis est quantitas: atque illis indicari formam, hac materiam. Etenim hoc solum probatur esse in corpore Cælesti vim activam, & passivam, sed non passivam substantialem; quantitas enim potest solum ordinare cælestia, ut in se mutuò agant actione accidentali merè perfectiva. Accedit, quod quantitas non debet ex genere præstare corpori, nisi mûsimum extensionis, ut cap. superiori dictum est.

Ratio est secunda, quia etiam dato, quod Cælum componeretur ex materia eiusdem rationis cum nostra, adhuc salvatur eiusdem naturalis incorruptibilitas. incorruptibilitas enim non est, nisi repugnantia ad corruptionem; atqui universim ut res dicatur habere simpliciter aliquam repugnantiam, non est opus, ut hæc illi competat ratione omnis partis, aut prædicati ipsius constitutivi. Sic homini repugnat esse equum, non ratione generis, aut materiæ, sed ratione differentię, ac formę. Sic igni repugnat frigus, aquę calor, & cuivis essentię qualitas opposita suę proprietati, sed non nisi ratione proprię formę. Potest ergo Cælum repugnare corruptioni ratione formę, quamvis habeat materiā, quantum est de se, remotè transmutabilem ad formas etiam sublunares. Et sanè corruptibilitas simpliciter dicta compositi cuiuslibet desumi ex hoc debet, quod forma ipsius separari aliquando à materia naturaliter possit. Si enim hæc, posito, quod semel in materia sit, non potest amplius per vires naturalis agentis ab eo seiungi, compositum per easdem vires corrumpi non potest. Jam verò ea statuitur Cæli forma, quę accidentia exigat contrarium non habentia, quod si est, actioni agentis naturalis corruptivę non subest. neque enim aliter corrumpit naturale agens, quàm per introductionem contrarii.

Conf. quia non debet absolutè negari materiā Cælestem esse eandem cum sublunari. utcumque ergo supponatur Cælum incorruptibile, non est eius incorruptibilitas à materię diversitate petenda. antec. prob. ex eo, quod materiā Cæli non aliam esse à materiā aquę, quatenus Cælum nihil sit aliud præter aquam & puram, & chryalli in mortem solidatam, ex quo firmamenti nomen acceperit, communiter censent, eruntque ex Scripturis Patres apud Sa.

Salisum in Annalibus ann. 1. die Mundi 2. idemque ex Recentioribus Scripturæ Interpretibus sentiunt apud eundem Cornelius, Serarius, Martinengus, &c.

Dices. Si materia Cælestis eiusdem esset rationis cum sublunari, sublunarium etiam formarum capax, & appetens foret. quod si est, jam est in Cælo corruptibilitas, cuius origo est hæc ipsa capacitas, & appetitus materię. Si enim materia, dum est sub una forma, appetit alias, talis appetitus debet esse naturaliter explebilis; adeoque debet posse alias etiam recipere.

Conf. 1. in natura nullum prædicatum est frustra. at in materia Cæli, data huius incorruptibilitate, frustra esset capacitas formarum sublunarium. ergo.

Conf. 2. omni potentię passivę naturali debet sua correspondere potentia naturalis activa, quę possit illam reducere in actum suum. Atqui potentię passivę Cælestis materię relatę ad formas sublunares nulla correspondet activa potentia; aliter Cælum esset corruptibile contra suppositum. ergo.

Resp. materiam non appetere formas, quas non habet, nec esse earum naturaliter capax, nisi ex suppositione, quod careat ea, quam habet. & hoc est, quod dicimus, materiam respicere omnes formas indifferenter. Et quidem si dum est sub una, alias positivè exigeret, violenter esset sub illa; & exigeret illam excutere, utpotè à fine consequendo impredientem. Non debet ergo materia, dum est sub quavis forma, posse alias naturaliter recipere, nisi ex suppositione, quod, quam habet, amittat. quę suppositio licet in Cælo incorruptibili sit naturaliter impossibilis, hoc ipsum tamen est juxta naturam materię formarum amissibilem, & inamissibilem capaxem.

Ad 1. conf. frustra est illa capacitas naturalis, quæ in nullo casu naturali reducibilis est in actum, at capacitas materię cælestis reducibilis fuisset in actum, si fuisset creata sub materia sublunari: qui casus naturaliter etiam possibilis fuit, quod autem de facto sit irreducibilis in actum, importat irreducibilitatem non antecedentem ex parte materię, sed consequentem ex parte formę. Sic retinet materia capacitatem antecedentem, & quantum est ex parte sua formarum etiam corruptarum; quamvis ex non sint amplius naturaliter reproducibiles.

Ad 2. dist. mai. debet omni potentię passivę naturali consideratę antecederet, secundum se, & nulla facta suppositione, correspondere activas concedo: aliter; nego maiorem, similiter dist. min. & nego conf. responsio satis patet ex dictis.

C A P U T III.

An Cælestia corpora sint ab intrinseco incorruptibilia.

ARistoteles 1. de Cælo à tex. 10. & in lib. de Mundo ad Alex. Cælos esse per se incorruptibiles asserit. Magistro suo adheret tota Peripateticorum Schola. Rationes pro hac sententia sunt: Primò authoritas ipsius Philosophi, quæ apud nos esse magni ponderis debet. Secundò authoritas Dion. 4. de D. N. cap. 4. dicentis, corpora Cælestia esse eius essentię, ac naturę, quæ nec crescere, nec minui potest; nec ulla ex parte mutari. Tertiò, si Luna capax esset corruptionis, ingens damnum à vicino igne accepisset: quin etiam in ignem abiisset omnino. Quarto, experientia tot seculorum docet, Cælos nunquam fuisse vel auctos, vel imminutos, vel aliam substantialem mu.

mutationem passos . Ex quo deduci debet ,
nec generationi ipsos , nec corruptioni obno-
xios esse .

Quintò arguitur à priori . Substantia per se
ordinata ad dandam rebus corruptibilibus per-
petuitatem secundum speciem debet ipsa esse
in corruptibilis in individuo ; aliter daret , quod
ipsa non haberet . at corpus Cæleste motu suo
circulari dat inferioribus perpetuitatem secun-
dum speciem , quatenus reddit generationes ,
corruptionesque sese mutuo per circulum exci-
pientes ut probat Philos. 8. phys. ergo Cæleste
corpus est ipsum in individuo incorruptibile .

Sextò arguit Aristot. Corpus habens proprie-
tatem , quæ naturaliter desinere non potest ,
est corpus , quod naturaliter desinere non po-
test . Sed motus circularis , qui est Cæli pro-
prietas , naturaliter non potest desinere ; ces-
satio enim motus per naturam non est , nisi in
termino motus . hinc motus rectus , qui est ad
medium , desinit naturaliter in medio : qui est
à medio , in circumferentia . circularis autem
motus terminum non habet .

Consonne corruptibile moveri potest à con-
trario in contrarium , à forma scilicet ad priva-
tionem . ergo motus proprius entis corruptibilis
debet esse à contrario in contrarium . Sed solus
rectus motus est huiusmodi , cum circularis sit
ab eodem in idem . ergo solus rectus motus
competere potest corpori corruptibili . At Cæ-
lo rectus motus non competit . ergo non est
Cælum corruptibile .

Contrariam sententiam tenuere omnes fer-
mè ante Aristotelem Philosophi , ut videre est
apud Conimbric. 1. de Calo cap. 3. qu. 1. ar. 1. cum
his sentiunt Sancti Patres , ac recentes Astro-
nomi penè omnes post Tychonem lib. 1. de Mun-
di aetherei recentibus phænomenis accedunt Are-
sius , Tellez , Martinengus , Der Kennis ,
Cabeus , & alii .

Dico 1. pro Cæli incorruptibilitate nullum est sufficiens argumentum. Non enim probat 1. autoritas Philosophi; quia hic debet esse in hac parte suspectus, cum argumentis iisdem, & finem, & principium Cælo negaverit. Dionisius porro vel loquitur ex Aristotelis sensu, vel totam intelligit Cæli substantiam, quæ quidem integra corrumpi non potest, non quod ab intrinseco corruptibilis non est, sed quia non est vis in natura potens eam corrumpere; quo pacto elementa quoque incorruptibilia sunt.

Ad 3. falsum primò est, dari sphaeram illam ignis, à quo possit Luna pati: de qua re libro sequenti. deindè ea transmissa, aut ignis in sphaera propter tenuitatem non est satis vorax: aut Luna corpus est ad eò compactum, quemadmodum nonnulla etiam cernimus sublunaria, ut minimum pati ab igne possit.

Ad 4. eadem experientia adduci posset ab homine existente in Cælo ad probandum elementa, & elementaria incorruptibilia omninò esse; ut enim nos de facto nullam in Cælestibus corruptionem deprehendimus; ita prorsus nullam in terra. Ratio est; quia hic disputatur de corruptibilitate secundum partes; nam secundum totum tam Cælum, quàm elementa corruptioni obnoxia non sunt: at corruptio secundum partes, easque parvas deprehendi in tanta distantia non potest. ut ergo argumentum aliquam haberet probabilitatis apparentiam, deberet hoc principium assumere. Nulla in Cælo deprehenditur à nobis corruptio, cum tamen, si qua est, possit, ac debeat deprehendi. quod si hoc additum omittitur; & adhuc putatur solidum argumentum, negari non poterit optimum futurum cæci discursum qui arguat nullam esse lucem, quia nullam animadvertit. Adde, non paucas mutationes esse in Cælo ab Astronomis perspectas, de quibus mox dicam.

Ad 3. Caeli non debet major incorruptibilitas dari, quam ea, quam tribuunt. non debent ergo esse incorruptibiles, nisi secundum speciem, aut secundum individuum sumpti totaliter. Accedit, quod juxta probabilem sententiam Caeli sunt instrumenta motricis Intelligentiae, in cuius virtute possunt incorruptibilitatem dare, qua carent, ut constat ex dictis tomo superiore de causa instrumentali.

Ad 6. idem argumentum probat Caelum esse sine principio; quia in sensu, quo motus circularis finem, principium etiam excludit; quidquid igitur sit de maiori, de qua mox ad conf. nego minoris suppositum, quod sit scilicet motus circularis Caeli proprietas. Vide, quae de hac re dixi tom. 2. l. 3. qu. 7. c. 3. concl. 3. quod confirmatur ad hominem; nam Caeli motus juxta Philos. provenit efficienter non à natura Caeli, sed ab impulsu assistentis Intelligentiae. at si talis motus sit Caeli proprietas, opus extrinseco impellente non esset; omnis enim natura est satis per se instructa ad suos naturales motus, & operationes sine ope extrinsecae assistentis ut constat generali inductione.

Ad conf. primum resp. ex modo dictis. deinde arguitur à secundum quid ad simpliciter. ad hoc, ut corpus sit incorruptibile, non satis est, si una ipsius proprietas contrarium non habeat; sed insuper oportet, ut nulla. sic multa corpora corruptibilia lucida sunt, & omnia sunt quantata, quamvis luci, & quantitati nihil sit contrarium.

Dico 2. Caeli corruptibilitas conformior est dictis Scripturarum, & Patrum; inter quos Ambrosius mox citandus aperte invehitur in sententiam Peripateticam de quinta Caeli, & incorruptibili substantia, tanquam in dogma perniciosum, inventumque ad astringendam Mundi aeternitatem. Idem sentiunt Basilus, Damascenus, Augustinus, Hieronymus, Ter-

tullianus, & alii communiter, quare longum
exuditumq; catalogum texit Martinengus Glos.
magna tom. 1.

Dico 3. hæc eadem Cæli corruptibilitas con-
formior est phænomenis, quæ à recentibus A-
stronomis in Cælo sunt deprehensa. Et quidem
Solis, qui principem inter Cælestia locum ob-
tinet, igneam, adeoque elementarem, & cor-
ruptibilem naturam ex maculis in ipso depre-
hensis satis videtur demonstrasse Scheinerus
noster in sua Rosa Ursina: de qua re iterum
nonnihil quæst. sequenti. Præter hæc nova si-
dera subinde in Cælo visa. Hipparchus, teste
Plinio l. 2. hist. nat. cap. 26. *Novam Stellam de-
prehendit, eiusque motu, qua die fulsit, in dis-
tributionem est adductus, anne hoc sapius fieret,*
¶ *Qc.* Alia proxime superiori seculo apparuit in
Cathedra Cassiopeæ: alia ipso seculo ineunte
in Cycni gutture: alia non multo post in Ser-
pentario; ut omittam non ita celebres in cin-
gulo Andromedæ, in Antinoo, in Pisce, in
Ceto ab aliis alias observatas. Accedunt Co-
metæ non pauci denuò in æthere geniti, ut,
frustra reclamante Claromontio, peritissimis
Astronomis ostendit eorum parallaxis. & hi
quidem tum ob magnitudinem suam, tum ob
distantiam à terra non potuere ex terrestri-
bus spiritibus coalescere. superest igitur,
ut ex cælesti materia generati de novo
sint.

Tripliciter potest huic argumento responde-
ri. primò, eiusmodi Stellas, & Cometas Cæ-
lestes non oriri noviter, sed latitantes prius
in æthere profundissimo, & ob immensam di-
stantiam inconspicuos, per descensum ad nos
factos fuisse visibiles, & iterum per ascensum
sefe nostris oculis subduxisse. secundo, non
esse, nisi globos ex concursu præexistentium
Stellarum invisibilium, veluti ex apibus exa-
men conflatos. Tertiò, oriri, non per generatio-
nem,

nem, sed per meram condensationem ætheris, ratione cujus sit aptus ad lucem reflectendam, nobisque proinde evadit conspicuus.

Sed non subsistit prima responsio; tum quia Cælum stellatum longè probabilium solidum statuitur. novæ autem Stellæ visæ sunt per modum fixarum sine ulla parallaxi primo mobili hærentes. non ergo earum conspicuitas à descensu orta est. tum quia si verum id foret, debuissent minores prius apparere, tum crescere paulatim usque ad summam, quam obtinuerunt, apparentiam. quod de Stella præsertim anni 1600. falsum est. Accedit, quod hac ratione Cælesti corpori tribuitur motus irregularis; quod adversatur universali in reliquis inductioni.

Sed neque subsistit altera. tum quia debuisset aliquando concursus iste deprehendi. saltem dum corpora ista imminuta sunt, recessus Stellarum observatus aliquando fuisset; quod nunquam contingit. quare concursus huiusmodi nonni si divinando astringitur. tum quia hinc fieret, ut Stellulæ istæ deberent statui verè errantes, h. e. vagantes, per ætherem sine lege: quod prohibet, ut dixi, inductio reliquorum Cælestium corporum. prob. sequela. da enim unamquamque suomotu præditam, jam ut quandoque coalescant, deberent statim deindè dissolvi, ut videre est in conjunctione planetarum, quæ minimum proindè durat. Stellæ autem novæ per multos annos, Cometæ per multos dies, aut menses eandem magnitudinem servavere.

Postremo nec valet tertia. tum quia non est facile assignabilis causa condensationis in æthere; non enim frigus, nisi vellet in Cælo qualitatem corruptionis causam, & indicem statuere, totamque Cælestis incorruptibilitatis machinam diruere. non motus planetarum; æther enim ab his impulsus antrosus in

gyrum agi potest, non item constipari, nisi habeatur motus impedimentum, quod nullum est. accedit, quod ut aer, ita & à fortiori æther semel densatus, se statim restituit; adeoque Stellæ novæ semel visæ deberent illico evanescere: quod experimento non congruit. tum quia æthereæ substantia pellucida per se est, lucemque transmittit. quo igitur pacto ita densetur, ut lucem reflectat? Demum quia si sola densitate Stellæ istæ concrecant, nihil prohibet, quo minus totam Cælestium varietatem ad solam densitatem revocemus: quod falsissimum esse, communis sensus, variaque singulorum natura ab effectis diversis, influentisque comperta abundè demonstrat.

Dico 4. Ut ex istis phænomenis nihil certi eruatur, adeoque sistendo in naturali ratione dubia omninò sit Cæli corruptibilitas, probabilior tamen ea mihi longe est propter auctoritatem Sanctorum Patrum: quos sanè dum nominamus, non simplices quosdam de plebe homines, & sola sacrarum rerum meditatione illustres, sed doctissimos viros dicimus, & humanæ etiam sapientiæ apices. Et verò à sententiam suam à Scripturis Sanctis hauserunt, h. e. à prima regula veritatis, cuius germana intelligentia post Ecclesiam apud ipsos in primis fuit.

Neque urget Oviedus, dum ait, quod in naturali ratione destituta mavult ire cum Doctoribus Cælos incorruptibiles asserentibus, quia istorum auctoritas majoris est ponderis, quatenus de eorum mente dubitare non licet; de mente autem eorum, qui Cælos volunt corruptibiles, dubitari non leviter potest: multi enim solum hoc loquendi modo contendunt; Cælos à Deo corrumpi posse in eo sensu, quo Angelos etiam corruptibiles dicunt.

Sed principio, istorum auctoritas, cui tantopere fides Oviedus, levissima mihi est; nititur enim

enim integra in ratione naturali, quæ quam sit levis, jam est ostensum. non potest autem esse gravis autoritas, cuius totum fundamentum, ratio, nutat. Deinde Patres nonnulli, qui Cælum incorruptibile asserunt, suscipiunt & ipsi interpretationem de incorruptibilitate secundum totum. Denique falsissimum est, Patres Cæli corruptibilis ex Scripturis assertores dubiè mentem suam expoluisse; contendunt enim Cælum esse substantiæ elementaris, & quintam Aristotelis naturam evertunt: quod disto strictam illi corruptibilitatem appingunt, Ita expressè Ambrosius Hexam. lib. 1. cap. 6. de Abr. Patr. lib. 2. cap. 8. ubi Philosophos reprehendit, quod *Superiorem Mundi huius substantiam, quam æthera vocant, non ex cæterorum mixtione elementorum constare volunt, sed ex quinta quadam usia esse asserunt*, alibi Peripateticum vocat dogma perniciosum ad astruendum Mundi æternitatem inventum. Idem habet Basil. Hexam. homil. 1. aliique apud Martinonem citatum,

C A P U T IV.

Sint nè Celi solidi, an fluidi.

CÆlos omnes, etiam planetarios, esse solidos, antiquorum fuit opinio, in qua Patres quoque non pauci consentiunt; videturque id ipsum Scriptura testari. Nam Job 34. dicuntur Cæli solidissimi, & quasi ære fusi. Accedit & ratio. Nam primò si Cælum flueret perindè, ut iste aer, planetæ dum illud scindunt, ingentem sonitum ederent; si enim tantum fragorem ciet pila bombardæ, dum aerem scindit, quantum ciebit immèsa rapidissimi Solis vastitas? ex quo præterea fieret, ut corpus Cæleste perpetuò scissum continenter violentiam pateretur. Id ipsum deindè probat gemitus

nus motus, quem habent planetæ, diurnus alter, & alienus ab ortu in occasum, alter proprius, & varius ab occasu in ortum. id autem non potest contingere, nisi altero moveatur planeta per se, altero per accidens ad motum primi mobilis, à quo tamen rari non potest, nisi Cælo solido sit affixus. Demùm omnia sidera eandem semper inter se, & in suis motibus proportionem, & ordinem servant. ad hoc autem aptius erat, si, ut nodus tabulæ, Cælo ita solido adhererent.

Dico tamen 1. Cælum planetarium statuum est omnino fluidum. Prob. 1. ex Cometis in Cælo planetario deprehensis, qui quidem præter motum diurnum ab ortu in occasum, proprium, plerumque habuere per rectam lineam, quam vocant trajectionis. ita se habuit Cometa, qui anno 1608. juxta Tychonis observationes visus est in Libra prope Æquatorem: tum Æquatorem, Tropicoque pertransito, pervenit ad polum Arcticum, prope quem extinctus est. Talis autem motus impossibilis fuisset, data soliditate Cæli planetarii. Quod si contendas cum antiquis, Cometas nullos supra Lunam esse, adhuc ex hoc capite urgeris, quod Cometæ, libero licet aere vagantes, duplicem motum habent, diurnum, & proprium. quare idem poterit in planetis contingere. Quamquam revera Cometas supralunares inficiari, non jam sit, nisi ingenii adversus veritatem contumacis, cum credendum sit tot Astronomis, tamque accuratis, qui tubi optici ope exiguam in iis parallaxim invenere.

Deinde id ipsum suadet motus ipse planetarum. si quid enim probat soliditatem, distinctionemque Cælorum, maximè illud, ut singulis planetis suum Cælum tribuatur, quo ferente, suos, suisque motus peragat. Sed quatuor planetæ Sol, Venus, Mercurius, & Mars per

per idem spatium moventur, cum tres posteriores modo suprà, modo intrà Solem existant, ergò non possunt iis singuli Cæli correspondere, hinc fit, ut Cæli solidi assertores teneantur tot scissuras, tot excentricos, tot concentricos canales fluida materia plenos, maioremque Cæli partem occupantes constituere, ut satius placere sit totum Cælum liberum, ac pervium admittere. Accedit, quod vix intelligi potest, quo pacto tot canalium interfectione non se planetæ mutuò in propriis motibus impedianr. Illud etiam non exiguum est difficultatis, quod radii Stellarum per tot modò fluida, modò solida media ad nos transmissi magnam, & variam refractionem paterentur: & per consequens incertissimæ omnino evaderent omnes Astronomorum observationes; quod tamen falsum esse nemo ignorat.

Dico 2. Cælum stellatum probabilius est solidum. Prob. quia nullum in eo fluiditatis vestigium. nam Stellæ, quas fixas dicimus, eundem semper inter se ordinem, tenoremque in suis motibus servant. Signum ergò est, quod non libero Cælo vagantur, sed affixæ sunt solidi corpori, ad cuius motum uniformiter circumaguntur. Præter hæc naturæ ordo postulat, ut fluida solidis contineantur. Cælum autem stellatum debet intrà se reliqua corpora continere. probabilius ergo est solidum, Accedit Scripturæ autoritas, quæ Cælum stellatum firmamentum appellat. quo nomine soliditas exprimitur. quod tanto magis est verum, quia dicitur firmamentum dividere aquas ab aquis: quod non posset, nisi solidum esset. Demum huc trahunt Patres non pauci dictum Apostoli de raptu ad tertium Cælum, h. e. Emphyreum, quod tertium est in hac sententia post planetarium, & stellatum.

Jam ad Scripturæ autoritatem, quæ primo loco opponebatur, dico eam satis salvari per

Cæli

Cæli stellati; atque etiam Empyreï soliditatem. Ad 1. rationem resp. ex motu planetarum aliquem sonum edi, non tamen ingentem illum à Pythagoræ somnium, idque propter summam ætheris tenuitatem, facilitatemque ad scindi. quæ etiam est ratio, cur violentiam in scissione non patiatur, præsertim cum ad hoc ipsum sit à natura institutum, quod tenentur fateri etiam adversarii, qui excentricos, & epicyclos suos fluido corpore repleant, continentes aberrationibus interscissos.

Ad 2. resp. non esse in planetis duplicem illum motum, sed unum simplicem spiralem, quo perpetuo moventur ab Oriente in Occidentem, ita tamen, ut 24. horarum spatio ad idem punctum nunquam regrediantur, sed paulò superius consistant, cum tendunt ad Tropicum Cancræ; paulò inferius, cum vergunt ad Capricornum. quare motus, qui assumitur in planetis ab Occidente in Orientem, non est motus, sed retardatio circulationis diurnæ, ut latius declarant Astronomi.

Ad 3. motus planetarum regularissimus est, non quia Cælo alicui sunt affixi, per quod ipsum oporteret liberè eos commovere, cum certum in illo locum nunquam teneant. sed quia moventur perpetim ab Intelligentia non errante.

C A P U T V.

*Utrum Cæli moveantur à propria forma,
an verò ab Intelligentia assistente,
aut informante.*

Dico 1. Cælum movetur ab aliquo intellectu. Ità Philosophi cum Aristotele 2. phys. t. 5. & 12. Met. t. 4. Theologi cum D. Thoma opus. 10. art. 3. & Patres cum Augustino 5. de Trinitate, ubi Cæli motum tribuit Virtutibus,

utibus, quæ propterea in Scripturis *Calorum Virtutes* appellantur.

Prob. ex jam probatis tom. 2. ubi de motu locali, quod scilicet circularis latio nullius corporis potest esse proprietas; cum enim indifferenter respiciat spatia, per quæ ferri debet, neque melius in uno, quàm in alio se habeat, non potest à propria inclinatione sortiri, ut unum relinquat, & aliud acquirat. Neque valet, quod quidam dicunt, falsum esse, quod motus sit propter locum, cum possit esse propter se. Cum enim motus non sit, nisi acquisitio loci, si cæteræ acquisitiones sunt propter terminum acquisitum, non video, cur idem dicendum non sit de acquisitione loci. Rediit deinde argumentum de ipsis acquisitionibus, ex quibus constat motus, quod si omnes respicit Cælum indifferenter, non potest ab una ad aliam ex naturali inclinatione transire. ita ergo se habebit Cælum ad motum, ut materia ad varias formas, quas ut successivè suscipiat, indiget extrinseco agente. Similiter ergo Cælum opus habet Motore; quem quidem debere esse præterea intellectivum ex eo constat, quod motus Cælestium corporum valde difformis est, & implicatus, sed ita ut in ipsa difformitate uniformitatem maximam servet. Eiusmodi autem motus, per se est notum, quod non est motus procedens, nisi ab intellectu. Sic est per se manifestum, quod motus calami, quo una linea animantis cuiuspiam figura ducitur, procedit ab artifice intellectivo, non verò ab agente inanimato. Neque valet, quod quidam ajunt, Cælos ab Intelligentia primò accepisse impetum, qui quod non habet contrarium, perpetuum duret, pergatque eos per tot secula circumagere. Nam primò nullus impetus ab extrinseco impressus potest esse perpetuus, ut est probatum loc. cit. deinde redit, quod simplex impetus satis esse

non potest ad motus adeo uniformiter diffor-
mes; quemadmodum idem impetus penicillo
impressus satis esse non potest, ut hominem in
tabula integrum exprimat.

Dices 1. elementa per suas se formas movent,
sine ope extrinseci assistentis. à fortiori ergo
Cælestia, quæ perfectiora sunt, & activiora.

Sed satis patet ex dictis disparitas. Motus
elementorum rectus est, qui provenire à pro-
pria forma potest, & debet; atque ex eodem
capite non potest circularis. Maior perfectio
Cælestium aliunde constat; neque enim perfe-
ctius quoad omnia superare debet imperfectius.

Dices 2. motus vitæ tum vegetantis, tum sen-
tientis perfectior est motu Cælorum, magisque
illo & uniformis, & implicatus: nec tamen ad
istos motus opus est Intelligentia. Similiter
ergo ad motus Cælorum Intelligentia opus non
erit. Conf. vivens habet, ut possit ab uno se
actu, & motu ad alium impellere, quamvis sc-
pè non melius in uno, quàm in alio se habeat,
idem ergo dici de Cælo potest relatè ad motum
circularem.

Resp. ad motum Cæli non esse opus Intelli-
gentiæ præcisè, quia perfectus est, & implica-
tus, sed quia ab intrinseco esse non potest, ut
probatum est; adeoque indiget movente extrin-
seco. Rursus hoc movens debet esse intellectu-
vum, imò & emersum à materia, ut mox pro-
babitur, cum sit agens totius Universi guberna-
tivum; & debet præterea esse agens incapax
lassitudinis: quod competere non potest, nisi
agenti omnino immateriali. Accedit, quod non
solum opera vitæ, sed etiam naturæ sunt ab ali-
qua Intelligentia omnia dirigente in suos fines;
est autem discrimen viventium à Cælo, quod
illa possunt se quoque ad suas operationes mo-
vere: non sic Cælum, ut ex dictis patet; adeo-
que in hoc Intelligentia statui debet motrix
adæquatè.

Ad conf. primò videtur esse disparitas ab ipsa ratione vitæ, cuius est se movere ad suam ulteriorem perfectionem etiam, dum vivens est in statu maximè naturali. quare si Cæli ita se moverent, viverent. Sed hæc disparitas videtur petitio principii, & circulus; cum enim negemus Cælo vitam ex hoc, quod nullum in eo deprehendimus vitæ indicium; non possumus ab eo excludere motum ab intrinseco in statu naturali, si vita is est, nisi excludamus ab eo vitam. propterea, quod excludimus vitam; cum tamen qui motum in eo ab intrinseco statuit, posset contendere, quod Cælum vivat vita locomotiva.

Dico igitur, disparitatem esse; nam vita vegetativa indiget alimento semper novo propter veteris per partes consumptionem: non sic potest Cælum indigere loco semper novo, cum sic moveatur ex indigentia non sua, sed inferiorum. Vita verò sensitiva movetur ad aliud, & aliud, quia movetur ab alio, & alio, prout enim successivè sese dant objecta; ad alias, & alias sensationes determinatur. at Cælum non potest determinari à loco, nihil proflus agente. Potest præterea sustineri disparitas prius data, & non improbata sufficienter; si quæ enim vita Cælo tribuenda, certè locomotiva. at si non sit alia Cælo vita, non est illi tribuenda locomotiva, quæ, ut dicitur 4. lib. est sensitivæ appendix, nec cuiuscumque, sed perfectæ.

Dico 2. Cæli animati non sunt, adeoque Intellectus ipsorum Motor forma est non informans, sed assistens, ut currui auriga, & navi gubernator. Hæc est communis, & certa penè omnium sententia, & opposita numeratur inter errores Origenis. qui Stellas non modò animatas, sed virtutis, vitiique capaces fecit: quod fuit damnatum in altera Synodo Constantinopolina, quæ est inter Oecuménicas sexta. Prob. ex modo dictis; quia nullum in Cælis est

est vitæ nullius vestigium. Ad hæc Intellectus Cælorum Motor, cum sit Mundi totius gubernativus, debet esse perfectissimus, adeoque totaliter emersus à materia, & phantasmatis: quare non potest corpori, ut forma uniri, quo scilicet nullatenus indigere potest ad intelligendum. Denique anima omnis utitur corpore, ut instrumento coniuncto. Sed Cæli Motor, cuius est immensa perpetuò corpora agitare, & à lege semel designata nunquam vel latum unguem deflectere, non potest uti instrumento corporeo; aliter lassesceret, & erraret: intellectus; ergo Cæli Motor animæ vice non fungitur.

Dices. si Cælum non vivit, superiora erunt imperfectiora inferioribus, inter quæ multa numerantur viventia, quæ sanè ex toto genere perfectiora sunt non viventibus. hoc autem esse absurdum, & patet ex terminis; & præterea ex eo, quod superiora sunt causæ inferiorum: omnis autem causa est perfectior effectu.

Sed si Cælestia sumantur coniunctim cum Motricibus Intelligentiis, certum est, quod perfectione superent inferiora: si verò sumantur seorsim, non est absurdum, quod superentur, cum hoc petat perfectio intellectus moventis. Dum additur, quod Cælestia sunt causæ sublunarium, nulla inde probatur perfectio maior; nam sunt causæ inadæquatæ, quæ possunt esse effectibus suis imperfectiores; & juxta probabilem sententiam sunt instrumenta Intelligentiarum: causa autem instrumentalis patitur minorem effectu perfectionem.

Q U Æ S T I O Q U A R T A

De Caloribus corporibus in particulari,
 eorumque proprietatibus, luce, &
 influentiis.

C A P U T I.

De Sole.

DE Solis natura illud primum est valdè
 controversum, sit ne formaliter ignis,
 seu flamma, an vero solum eminenter, ut
 volunt communiter Peripatetici, qui cum
 elementa omnia corruptibilia, Cælestia ve-
 rò incorruptibilia, statuunt, Solem ab igne
 coguntur plusquam specie separare, & for-
 mam illi elementaribus nobiliorem asse-
 rere.

Sed veteres Philosophi, inter quos Plato,
 & Pythagoras, Solem ab igne non distinxere.
 quibus Sacra Littera non mediocriter favent,
 præsertim Eccl. 43. ubi Sol dicitur, *Fornacem
 custodiens in operibus ardoris*, &c. ad quem lo-
 cum præclare Cornelius, post rationes, ac
 testimonia SS. Patrum, ita concludit: *Fa-
 ret etymon Hebraum; Sol enim Hebræis voca-
 tur Schames, quasi dicitur, Scham et, id est ibi
 ignis*. Innumeros in hanc ipsam sententiam
 Patres adducit Scheinerus Rosa Ursina l. 4. à
 cap. 17.

Atque hæc ipsa mihi opinio arridet, quam
 probat à manifesta, & obvia experientia dedu-
 cta ratio. Non enim potest in natura non con-
 venire cum igne, quod cum igne convenit in
 proprietatibus, atqui omnes ignis proprietates
 conveniunt Soli. Sol ergo convenit in natu-
 ra cum igne, maior est certa; tum quia ut
 naturam à proprietatibus, ita & naturæ iden-
 tita,

titatem à proprietatum identitate dignoscimus. neque alia est ratio, cur ignem Europæ cum igne Afiz eiusdem esse naturæ asseramus. tum quia complexum qualitatum propriarum est proprium in quarto modo, adeoque dicitur convertibiliter de natura, seu essentia, idque merito, nulla enim est specialis natura, quæ non in aliquo sui specialiter se intellectui probet. hinc naturam per principium proprietatum, & specialem naturam per principium specialium proprietatum definimus. Min. autem constat; quia ignis duæ sunt notissimæ proprietates, lux, calor: adde his siccitatem; & illas quidem in summo, hanc in gradu eminenti, & propè summum. has verò competere Soli omnes ex eodem capite arguere debemus; ex quo arguimus, competere eas igni; quia enim flamma illuminat, calefacit, & exsiccatur, inferimus, eam esse lucidam, calidam, & siccam, non eminenter, sed formaliter. at iidem effectus à Sole manant. Ergo. Accedunt accuratissimæ Scheineri nostri, & aliorum observationes, quibus Sol per helioscopium apparet flammis undantibus asper, ac veluti fornax ignea; imò & Vesævus aliquis, aut Aethna flammarum ingentes vortices continenter eructans. Nihil ergo est, cur ad abditas substantias recurramus, ubi sensibus experimenta notam flammæ naturam inculcant.

Dices 1. Sol duplici motu agitur, & vertiginis in se, & annuo circà terram. Neuter autem ex his igni nostro convenit. ab eo igitur differt in potissima proprietate.

Quid ad hoc sit dicendum, patet ex superioribus, in quibus ostensum est satis, circularem motum non esse in Cælestibus ab intrinseco, adeoque non esse proprium, sed accidens, quod perindè ut Soli, item & nostro signi potest ab impulsu Intelligentiæ convenire.

Dices 2. densitas Solaris corporis maior est, quam quæ competat puro ignis elemento, qui sanè solutus ab extraneis corporibus rarissimus est. at Sol densior est; aliter tantum luminis, & caloris producere non posset: flamma enim, ut videre est in vini spiritu accenso, exiguam habet à raritate activitatem. Quod si dicas, materiam, & pabulum Solaris flammæ densum esse; urgeris dupliciter. primo, quia ignis continenter attenuat materiam, quam depascitur; adeoque non posset Solaris flamma diu in materia densa subsistere: secundò, quia sic cogis Solem non simplex corpus, sed geminum, constansque ex igne raro, ignisque materia densa constituere.

Resp. P. Dechales, qui usus est hoc argumento Astron. lib. 2. prop. 1. maluisse supponere, quàm probare, absurdum id esse, si Sol constitutur corpus mixtum ex flamma, & materia; cum tamen eiusmodi compositio assumatur à Scheinero, & aliis tanquam ad amissim congruens apparentiis in Sole per helioscopium animadversis, Ut ergo multi sunt in terra Vulcani, qui per materiæ inflammabilis circumvolutionem quandam continenter ardent; ita & Authores isti Solem considerant ut globum Aethneo more perpetuò ardentem, cui pabulum sufficiat materia versus centrum aggesta, indèque ad superficiem per accensionemeducta, tum iterum in materiam inflammabilem revoluta, ne unquam aut ignis pabulo, aut igni pabulum desit. Neque urget, quod ignis attenuat materiam, quam inflammat; ut enim hoc sit verum, non tamen sequitur, debere extingui, aut maximè rarefieri; tum quia id ipsum solvi debet in nostris Vulcanis; tum quia pabulum, & ignis circumvoluntur, & in se mutuò sensim redeunt; tum quia ex ætheris circumiecti levitate ignis non evolat, ut accidit inter nos, quæ est ratio, qua Peripatetici non

non pauci putant, ignem in sphaera pabulo non indigere, ut libro sequenti dicetur.

Dices. Sol est rotundus, flamma est conica, ergo Sol non est flamma.

Consequ. nulla est, quæ ut bona esset, probari deberet eonum competere flammæ per se, non verò ab extrinseca aeris incumbentis pressione: quod esse falsum, infra declarabitur. Accedit, quòd Peripatetici multi auctores ignem supra aerem, & infra Lunam sphaeræ ignis propriam figuram globosam volunt.

C A P U T II.

De reliquis Planetis, ac Stellis fixis.

QUæ de his occurrunt, pauca sunt, & incerta. De Luna illud primum habemus, quod ignis non sit, nec ignis naturæ; aliter lucida item esset; cuius oppositum ostendunt eiusdem variae phasæ & eclipses, in quibus aut ex parte, aut ex toto obscuratur: quod sanè habenti per se lucem, eandemque nobis faciem usque obvertenti, impossibile foret. Quamvis autem, dum deficit, modicum adhuc lucis ostendat, ut & ostendit in parte nobis, non Soli obversa, dum à Sole recedit; non illud tamen nativum est lumen, sed à Sole mutatum, vel per refractionem à terrestri atmosphæra, vel per reflexionem à terra.

Rursus Luna ad aqueam naturam accedit, quod constat ex eiusdem influentiis omnino humidis, ut videre est in plantis, & animalibus, præsertim testaceis in mari non paucis, quæ tempore plenilunii ex maiori humoris vi magis intumescunt: quod tunc scilicet excitatus à pleniori Solis luce Lunæ humor sese terræ uberius communicat, Sed tamen Luna non tota aquea est; tum quia constantem habet

in sua figura firmitatem, semperque eodem pacto sese intuentibus exhibet: quod corporis non fluidi, sed solidi est; tum quia aspera apparet per telescopium, & scabra, montibusque, & vallibus distincta: quæ in liquidum corpus non cadunt.

Ut ergo aquea Luna sit, non tamen aqua; non enim video, quo pacto in liquido Cælo possit aqua consistere, dato, quod centrum Universi sit centrum commune omnium gravium, ut infra probabitur. Censeo igitur, ex aqua in vaporem attenuata conflare, qui quidem aptissimus est ad lucem reflectendam, ut est videre in nubibus: qua autem ratione vapor ille per motum non dissipetur, facile est intelligere, si regimen Intelligentiæ consideretur. agitatur tamen, & fluctuat, atque in humorem fortasse aliquando concrevit: unde & in terram defluit; atque hinc rursus à Sole attenuatus ascendit, & ad fontem regreditur. Nisi mavis à parte Lunæ interiori continenter vaporem attenuari, rursusque concretum introrsus se recipere perinde, ut dictum est de Solis flamma. Hæc autem coniectando potius, quam asserendo sint dicta.

De reliquis planetis illud universim dici potest, diversæ omnino inter se esse naturæ: quod ex eorum varia luminis reflexione, & influxu colligi facile potest. Mercurium porro, Venerem, & Martem lumine non nativo, sed à Sole mutuato fulgere, satis ostendunt eorundem variz phases perinde in iis, ut in Luna, ope telescopii deprehensæ, ex quo constat, igneæ ipsos naturæ non esse, atque idem ex paritate rationis dicendum videtur de Jove, & Saturno. Cæterum quam potissimum naturam habeant, quidquid scire se jactent ex vano Astrologi, incertissimum est.

De Stellis fixis controversum est, utrum natura luce, an à Sole accepta resplendeant. Pro

nativa stant Galileus, & Cartesius: pro adventitia Scheinerus, & Blancanus: quibus alii accedunt. Pro luce adventitia stant conjecturae, nihil n. ab experimento confici potest propter distantiam fixarum à Sole, ratione cuius defectum non possunt pati ex planetarum interpositione, imò nec phasēs varias propter loci superioritatem. Sol tamen, qui unicus fons lucis ab omnibus ferè agnoscitur, argumento esse potest, Stellas etiam lucem ipsi debere. Urgeri etiam potest paritas Jovis, & Saturni, qui licet phasēs sensibiles non habeant, nec deficiant, adhuc tamen pollere dicuntur solo lumine adventitio; cur ergo non idem de fixis asseramus?

Sed pro luce nativa maius est argumentum à Keplero, Cartesio, aliisque inculcatum; quod scilicet in immensa illa distantia non satis ita possent Stellæ illuminari, ut intensum ad nos, ac vividum earum lumen descenderet. Solis enim à Stellis spectati diameter apparens vix est vigesima pars diametri nobis apparentis, qui cum sit 30. minutorum, Sol ad Stellæ se habebit, quasi esset unius minuti cum dimidio. quo posito, non apparet, qua ratione possit tantum luminis Stellis communicare, cum Saturnus minùs multò à Sole distans, minùs tamen, quàm multæ fixæ, resplendeat. Hoc totum si verum est, concedendum, igneæ naturæ Stellæ esse: quin etiam considerari posse, ut lucis flumina, quæ in Solem veluti in lucis Oceanum continenter influant, ab eoque vicissim substantiæ suæ perpetuò attenuatæ reparati nem, ac fomentum repetant.

C A P U T III.

De Luce:

Lucem esse nemo ambigat, nisi cæcus. sed quàm in aperto eius existentia, tam in abdito natura, Cartesiani eam non distinguunt à motu: Atomistæ plerique volunt eam esse flammam locali tantùm motu diffusam, Peripatetici flammæ qualitatem physica actione productam.

§. I.

Lux non est motus materia subtilis à corpore luminoso rectè à propulsa.

NOta est jam hoc tempore Cartesii sententia lucis naturam sic explicantis. Statuit duo, de quibus alibi dictum est. primò, omnia corpora eò tendere, ut per lineam rectam semper moveantur. secundò, quæ circulariter moventur à centro sui motus recedere conari: Ex his fit, ut materia primi elementi, qua constat Solare, & quodvis aliud lucidum corpus, dùm in gyrum moyetur, & ab eò recedere conatur, in alias, & alias lucidi partes usque ad superficiem impingat; atque ità materiam subtilem, seu globulos secundi elementi, quibus omnia spatia, quæ inter partes aeris, aquæ ac terræ sunt; replentur, rectè propellat. Huiusmodi motuum rectæ lineæ radii sunt lucis, qui modò directi, modò reflexi ex durorū corporum occurso, ad oculum usque feruntur: Quod verò mirere magis: sunt ex eius asseclis, qui hunc dicendi modum Aristoteli audent tribuere, lumen definienti *ἄκτῳ* perspicui, hoc est (addunt ipsi de suo) *motum mediæ διαφανείας*. proinde quasi nihil aliud esset Aristoteli

actus . nisi *motus* , adeoque dum animam *actum* corporis definiuit , motum corporis intellexit . hæc si pergent ita exponere Cartesiani , verior , ne breui Cartesii elementa ex Aristotelis mente exhibeant .

Hinc pergit explicare Cartesius subitam , ac penè momentaneam lucis diffusionem . ut enim qui noctu baculo iter prætentat , impulsus , qui fit ad extremam baculi partem , momento à manu sentitur , & eadem est ratio , ut momento eodem sentiatur , utcumque baculus longissimus sit : ita opus est , ut eodem momento radius luminosus , & per modicam , & per immensam distantiam propagetur .

Hæc sententia non aliter à suo autore probatur , nisi quia hoc pacto satis explicatur actio luminosi ; quare non oportet ad aliam vel substantiam , vel qualitatem de novo seu diffusam , seu productam confugere . Accedit experientia , nam si quis percutiatur in oculo , plures videt scintillas luminis fulgurantes . quod idem sæpe contingit , dum oculum digito perfricat . his autem nihil intervenit , præter motum . solus ergo motus lux est . quo eodem argumento utitur Thomas Cornelius .

Incipio ab hac experientia , quam quidem perperam adduci , ex eo evidenter constat , quod certò falsum est , in ea oculi perfrictione nil præter motum intercedere . Cum enim in oculo sint spiritus ignei , qui percussione , aut perfrictione , vi possunt facile coadunari , & lucere , non est , cur his potius , quàm motui vis lucendi tribuatur .

Non posse autem in unum impulsam actionem luminosam refundi multipliciter ostendo . primò , quia sic non solùm oculus , sed quævis alia corporis nostri pars deberet luci existentiam percipere . Cum enim actio ista non sit , nisi impulsus , & hujus sensatio ad tactum pertineat , qui toto corpore diffusus est , ad totum

totum corpus pertinebit perceptio lucis. quod admittere, hominis sani non est. Nec juvat respondere impulsus luminosi esse adeò tenuem ut sentiri, nisi à delicatissimis retinae fibris, non possit. Omnes enim fibrae, ut & nervi, à quibus proveniunt, ejusdem ferme sunt quoad tactum rationis. ad summum differunt secundum magis, & minus. quare deberet lux ab oculo magis, à reliquis partibus minus percipi, sed tamen percipi. Præterea licet non posset à manu sentiri objectorum differentia secundum figuras, &c. at certè deberet sola lucis existentia, quod hic unum contendo, sentiri; quæ scilicet solus est impulsus per rectam lineam subtilis materiae propagatus.

Secundò. Ejusmodi globulorum impulsus, non solum potest per rectam, sed etiam per curvam lineam propagari. argumento sit exemplum baculi Cartesiani, qui sive rectus sit, sive curvus, si ab uno extremo impellatur; impetum per aliud extremum in manu facit. Neque verò globuli isti continenter juxta Cartesium agitati, ne quiescentibus quidem aliis circa ipsos elementis, possunt ita recti perseverare, ut non aliquando obliquentur: & tunc pergent nihilò minus impulsus suum in oculum propagare; adeoque lux non per rectam tantum, sed etiam per curvam lineam diffundetur: quod est evidens absurdum.

Tertiò non benè intelligo, qua ratione possit juxta Cartesianam hypothèsim Solaris vortex rectas ejusmodi lineas propagare. Mitto enim ea, quæ impetunt ipsam hypothèsim, qua assumitur, primi elementi partes in gyrum actas conari semper à centro recedere, & rectum usque motum affectare; cum tamen juxta Cartesium quodvis corpus ad quemvis motum sit planè indifferens; adeoque nec motum, nec motus determinationem semel acceptam mutare de sua natura valeat. Certe

in Sole duplicem statuit Cartesius motum; primum, quo totus in se voluitur: alterum; quo singulæ partes recedunt à centro. accedunt ergo ad globulos secundi elementi, iisque imprimant duplicem determinationem oportet; alteram ad motum rectum, alteram ad circula-rem; Unde existere motus rectus in globulis non potest, cuius linea à Solis centro ducatur ad oculum. moveatur enim lamina ex chalybe circulariter, & simul vi sua elastica se explicet, manifestum erit, quod corpora, in quæ impingit, non ita potest rectà dimovere, ut ad-versarii in Sole fingunt.

Quartò, nullum erit in hoc systemate corpus non luminosum; si enim quia manus perfri-cat oculum, potest motum in globulis excitare, in quo motu luminis ratio sita est, cur non poterit eadem manus (idem dic de aliis corporibus) excitare globulos aeris usque ad oculum, & lucem efficere? finge multos à manu ad parietem protensos rectà baculos, nonnè, si manu ii premantur; impetum in parietem facient? atqui à manu ad oculum per rectam lineam extenduntur globulorum veluti baculi. ergo si manu eos premam, motum eorum usque ad retinam propagabo, & lucem consequenter efficiam: neque obstat, quod simul cum globulis secundi, movebo fortassè aliorum elementorum partes immixtas; ut enim istæ non possunt impedire motum globulorum, ita nec possunt tollere actionem luminosam, quæ in eo motu adæquatè consistere dicitur.

Quintò, duo sunt indubitata in lucis propagatione. primum, quod est actio minùs valida in potentiam magis diffusam, ita ut in magna distantia nulla tandè sit actio. secundū, quod à resistantia corporis, præsertim opaci reflectitur juxtà Leges tom. 2. explicatas. At neutrum in hac hypothesi potest consistere. non primum; quidquid enim exemplo tubi per

gradus sese explicantis declarare conetur Antonius Le Grand. cap. 13. phys. spec. art. 5. Cestè si actio luminosa per globulos rectà ante dispositos, & ab una parte impulsos explicatur, manifestum erit, quod impulsus idem sentietur, siue brevior, siue longior sit linea. globuli enim contineater in directum projecti, aut nullatenus, aut æqualiter propellentur, ut videre est in baculis, familiari adversariorum exemplo; quod sanè perperam modo ad arbitrium adoptarent, modo reiicerent. Sed neque constant alterum. quis enim unquam expertus est, si multi baculi sint duro corpori insistentes, ex impulsu unius in tale corpus alium evehi, juxta reflexionis leges? si globuli seorsim moverentur, & impingerent, ut pileæ solent, reflecterent quidem. nunc verò cum globuli supponantur lineam conficere, quæ ab uno externo ad aliud modico impetu, qualem sentire nata non est, nisi retina, impellitur, non video, qua ratione possit reflexionem luminis gignere. Statue pilarum lusoriarum lineas multiplices; tum vide, utrum ab unius lineæ pressione alia vel leviter retrorsum dimoveatur. Ecce quomodo à baculo isto suo visorio multipliciter vapulant cæcutientes Cartesiani. Et ista quidem ex multis, quæ possent afferri, satis erunt veritatis, non novitatis amatoribus.

§. I I.

Lux non est flamma substantia per medium à luminoso corpore diffusa, sed est qualitas ab eodem producta.

Multa sunt, quæ ad hanc veritatem stabilendam congerunt Peripatetici passim, sed non omnia sunt solida, quæ videri possunt apud adversarios plerosque soluta, præfer-

tim apud nostrum Derkennis *De opere sex dierum*, die 1. c. 4. quæ mihi efficaciter rem istam conficiunt. hæc sunt.

Primò, si lux est corpus, necessè est, ut per motum localem propagetur; atqui per talem motum lux propagari non potest. ergo lux non est corpus. prob. min. motus lucis per medium aut est ab extrinseco impulsu, quem illi corpus luminosum imprimat, aut est ab intrinseca lucis ipsius natura. non primum; tum quia non videtur posse ignis ingentem illum luci impetum, quo immensa penè spatia exiguo intervallo pertransit, imprimere, nisi ipse vehementissimè moveatur; nullum enim ex motoribus secundis movere solet, aut potest immotum. ~~Motus~~ autem ignis illuminantis minimus est, & vix sensibilis. tum quia in hac sententia flamma diffundens lucem, & lux diffusa sunt ejusdem rationis; nec differunt, nisi penes raritatem in luce maiorem. non potest ergo motus esse à flamma, & non à luce. Sic dum pondus majus urget deorsum minus, non potest minus quoque nativa gravitate non se deorsum urgere, si omnia pondera ejusdem sunt rationis. atqui lucem ipsam non posse per medium se movere, quæ erat altera pars probanda, sic ostendo. Nulli corpori homogeneo competere possunt inclinationes oppositæ secundùm alias, & alias sui partes; aliter partes eo ipso essent heterogenæ. flamma autem est corpus sine dubio simile; inclinari autem ab intrinseco ad motum sursum; deorsum, & ad latera, est inclinari ad oppositos terminos. ergo non possunt luci ab intrinseco tales motus competere.

Conf. 1. virtus ab intrinseco motiva in omnem partem non est alia in natura præter elasticam. atqui per talem vim lux non se movet: quod apparet manifestum in radio luminoso rectà à foramine ad foramen obscuri cæteroquin

roquin cubiculi ita transmissio, ut nihil prorsus latera illuminet, neque inde ullatenus videatur. hoc autem non contingeret, si in ea flamma vis elastica inesset; sic enim deberet in obscura latera irumpere, eaque illuminare.

Conf. 2. motio lucis in visum esset præcisè per impetum, motu medio, propagatum, si vera est hæc hypothesis. hoc autem esset revera visum de medio tollere, illumque integrum intactum reponere: ex quo redit, quod possit lux manu etiam sentiri. Nec juvat dicere, quod impressio lucis sit ad eò tenuis, ut eam non possit, nisi delicatissimus retinae sensus percipere. Contra enim est; quia si perceptio lucis non est, nisi tactio. non video, cur non possit ad eò delicatus manus sensus inesse, qui ad lucem etiam percipiendam assurgat. Fuit inter Batavos cæcus, qui, teste Boylio, colores manu distinguebat. quid ni erat, qui manu etiam lucem attingat, si tactilis lux est? Saltem poterit sola lucis existentia, non item corporum figura, & differentia, quæ organum certum requirunt, manum afficere, ut contra Cartesium § sup. inculcabam.

Arguo præterea. non potest hæc sententia lucem substantialem asserens defendi, nisi diaphaneitas, seu perspicuitas dicatur in poris corporum transmittentibus lucem per rectam lineam dispositis consistere. atqui non posse hoc pacto veram diaphaneitatem constitui ex eo constat; quod vel pori supponuntur ita recti, ut valeant facile mutare directionem: atque hoc est inopinabile, si loquamur de diaphanis solidis, quale est vitrum. vel directionem mutare non valent; atque ita salvari non potest, quo pacto vitrum idem, quod prius utrinque planum, radios undique rectos trans mittebat, deinde eisdem obliquet magis, & magis, prout magis, magisque convexum evadit; & pori tamen semper eandem rectitudi-

nem servant. Ad hæc diaphanum in hac sententia constabit ex partibus opacis, & diaphanis; quomodo enim canales vacui, per quos aditus est luci, consistent sine suis parietibus resistentibus luci, adedque opacis? Hoc autem quo pacto sit verum in diaphanis fluidis, in quibus partes sunt facile mobiles, ac miscibiles, imò & juxta Atomistas plerosque continenter agitatæ, itaut fluida servant, ut docet experientia, continentem perspicuitatem, non equidem intelligo. quid enim esset, quod partes aquæ v.g. non ita quandoque invicem misceantur, ut interrupta canaliculorum rectitudine, lucis transductio impediretur.

Solent etiam adversus lucis substantialitatem hæc alia communiter urgeri, quæ sanè contemnenda non sunt. primò, lux propagatur in instanti. non ergo est corpus, quod diffunditur per motum; aliter esset motus in instanti. Negant adversarii antecedens: sed negare tamen non possunt tantam in ea propagatione celeritatem, quæ fidem omnino superet. Hoc autem habent ex ipsis plerique invictum argumentum, quo firment immotum pro Copernico Cælum, ac Solem. Certè sine efficacissima ratione asserere id non debent, quam tamen nullam apponunt. Secundò, si lux est corpus, non est ratio, cur, luminoso remoto, debeat removeri: quemadmodum vapor (est exemplum Gassendi, quo lucis propagationem declarat) non removetur ab aere, remota aqua, unde emanat. Neque dicas, concidere omnino radium, ubi à luminoso non impellitur, perinde, ut radius humidi cum impetu sursum tendens, si à fonte, clauso celeriter orificio, impelli desinat, illico subsidit. Contrà enim est; nam aqua concidit, cessante impulsu, & prævalente gravitate. at flamma nativa videtur in directum ferri, ut est prius ostensum. non ergo est ratio, cur concidat, amoto luminoso.

noſo. Tertio, quidquid eſt per ſe ſenſibile, non eſt ſubſtantia, ſed accidens; ut colligimus ex Eucharistiæ Myſterio. Lux autem per ſe ſenſibilis eſt. Quarto demum, ſi accidentis exiſtentia univerſim impoſſibilis non eſt: imò & poſſibilem eam merito aſſumimus, donec adverſarii oppoſitum oſtendant; lucem ſubſtantialem non eſt quod autument, niſi & efficaci- ter probent; cum nos interea eam aſſumere merito poſſimus accidentalem, ne multiplice- mus ſine neceſſitate ſubſtantias. Scio, adver- ſarios pleroſque noſtrum hunc arguendi morem irriſuros; ſed nihil penſi habemus, ſi ab iis irridemur, qui omnia palmo metiri aſſue- verunt.

§. III.

Diluntur obiecta.

QUæ lucem ſubſtantiam eſſe probant, hæc fermè ſunt.

Primò, quod inexiſtit aeri, & non move- tur ad motum aeris, non eſt accidens aeris, ſed ſubſtantia aeri commixta; accidens enim mo- veatur oportet ad motum ſubjecti. ſed lux non movetur ad motum aeris. ergo non eſt accidens in hærens aeri.

Secundò, quod repercutitur, & refringi- tur, eſt corpus. lux repercutitur, & refringi- tur. ergo eſt corpus. prob. major. Repercusſio ex eo eſt, quod ſuperficies unius corporis im- pingens in ſuperficiem alterius, nec potens eam penetrare, cogitur reſilire, ut videre eſt in pila luſoria impingente in planum. Reſtractio oritur, quod corpus permeans reſiſtentiam ali- quam patitur, quæ non impedit omninò mo- tum, ſed facit illum aliò divertere. hæc autem propria ſunt corporum, non qualitatum, quæ impenetrabiles cum corporibus non ſunt, nec à corpore interjecto moram accipiunt.

Tertiò, lux habet substantiæ corporeæ proprietates; nam prius sparsa, deinde colligitur: collecta iterum dissipatur. quemadmodum pluviam, quæ per regulas sparsim defluens in canales aptè dispositos in una demum cisterna excipitur; atque inde derivatur, ita lux per poros convexi diaphani immissa colligitur in foco, ubi ignem generat, & ulterius dein eversa difficitur.

Quartò; diaphaneitas, quæ est dispositio ad lumen excipiendum necessaria, non est nisi minutissima, & recta corporum porositas. ergo lux non est accidens, sed substantia; ad accidens enim recipiendum poris, & canalibus opus esse non potest. ant. prob. sæpè videmus de opaco fieri diaphanum, de diaphano opacum, nulla nova entitate producta, vel destructa, sed solùm variato partium, adeoque pororum ordine: si enim opacum v.g. os in tenues bracteas dividatur, illæ erunt perspicuæ, & nonnisi quia poros jam habent rectè ordinatos, ac propterea luci pervios, quos ita non habebant dum reliquis partibus jungerentur.

Quintò demum, Jobi 38. inquitur primò; *In qua via lux habitet*: deinde, *Per quam viam spargitur lux*. Ex quo apparet juxta modum loquendi Scripturæ lucis diffusionem fieri per motum localem, adeoque lucem esse corpus.

Ad 1. resp. illius experimenti facilem esse in nostra sententia rationem; cum enim lux statuatur qualitas non in fieri solum, sed etiam in conservari pendens ab agente luminoso; consequens est, ut remoto aere à linea directionis, destruaturs prius lumen ex defectu causæ conservantis, & novum illicò lumen in novo aere succedente producaturs. Non sic esse facilem rationem in sententia opposita, superius est declaratum.

Ad 2. sed neque refractionis lucis facillè salvatur ab adversariis per medium canaliculis undequaque

que intercisum, ut dictum est; neque reflexio, cum fluida corpora incidant, & non reflectant, ita ut servant certas reflexionis leges. Lux autem si corpus est, fluidum est. Nego igitur reflexionem præcisè haberi ex incidentia corporis in corpus: quod toties repetunt adversarii, sed nunquam probant. & quidem ut potest productio successivè propagari per medium, & in hoc imitari aliquàlter localem motum: ita & illum potest imitari reflectendo versus principium, dum incidit in corpus incapax actionis. Causa verò physica refractionis quamvis difficilè detur in nostra sententia, difficilior tamen in opposita.

Ad 3. patet ex modo dictis. Luminis propagatio analogà est diffusioni corporis; quid enim est, cur nequeat lux spargi per productionem proportionaliter, ut corpora per motum? Quas dicimus Stellas cadentes, videntur flammæ quædam motæ cum sint tamen in nova semper materia productæ: quare in iis productio ad sensum est latior. Poterit ergo lux colligi, & diffundi per productionem perinde, ut diffunderetur per motum, si corpus esset, ratione reflexionis, ac refractionis diversæ.

Ad 4. aliqua diaphaneitas minus propria constitui potest in poris transmittentibus lucem: non item propria, ut probatum jam est. Imò id ipsum exemplum confirmat rationem supra datam, quod fluida scilicet diaphana deberent per motum sæpe opacari: quæ enim sunt hoc pacto diaphana, multiplicata opacantur, ut videre est in bracteis ossis.

Ad 5. nomine lucis veniunt ibi corpora ipsa lucida, quorum certè via mirabilis est. in quo sensu communiter accipiunt Augustinum tribuentem luci primum locum inter corpora.

C A P U T IV.

De Influentiis.

BRevissimè ab his me expediàm . Influere Cælestia in inferiora citra dubium est . Cum enim ortus rerum , & interitus à temporum vicissitudine sint , hæc autem à sideribus , præsertim Sole , diversimodè terram aspicientem , afficienteque sit tota ; consequens est , ut ab his ipsis ortus , interitusque sublunarium pendeant : Sed utrum per motum , lucem , caloremque dumtaxat , quæ sunt extra aleam , an verò per alias etiam , quas vulgò occultas influentias dicunt , alterius omninò , ac diversæ inter se rationis pro corporis cujusque Cælestis diversitate , influant sidera , controversum est .

Picus Mirandulanus , phoenix ille ingeniorum , ut Astrologorum placita , seu verius deliria funditus evertat , nullam ejusmodi occultam influentiam agnoscit . Sed cavendum semper doctis est , ne æstu disputationis abrepti , falsum falso impetant , declinentque ad extremum ; cum sæpè veritas in medio sit . Occultas influentias negare multum obest , admittere non multum prodest Astrologiæ . Cæterum cum pro diversa Stellarum positione , ordineque , quo se mutuo , Solemque respiciunt , diversa in his sublunaribus effecta deprehendantur , eaque consent longæ seculorum observatione , neque alia appareat nobis eorum causa , ad siderum varias , ignotasque efficientias , insito veluti à natura stimulo ; confugimus . Et istæ quidem influentiæ in se ignotæ , nec notæ multum in effectibus sunt . ratio est varietas ipsa , & nunquam ferè idem Astrorum concursus . quæ pro alia , atque alia heterogeneorum influxum mixtione sublunarem hunc Mundum ita afficiunt , & alternant , ut nulla
sit

fit certa eventuum lex, qua possit Cælestium virtus solidè definiri.

Hinc est Astrologiæ artis compertissima vanitas, non solum qua parte eventus humanos, sed etiam qua tempestatum vices ipsas à siderum concursione divinaturam se jactat. adversus hanc latè citatus Mirandulanus, & novissimè, accuratissimèque P. De Chales tom. 3. *Mathem. Mundi*, ubi ex his potissimum capitibus Genethliacorum fallacias evidenter demonstrat. primò. quia qui eundem habent horoscopum, non eosdem semper habent eventus. eodem enim momento plurimi simul homines nascuntur, ut videre est in Esau, & Jacobo, in Romulo; & Remo, in filiis ancillæ, & Astrologi ab Augustino relatis, aliisque sexcentis, Neque juvat dicere, breve illud tempus, ac penè insensibile, quod duorum natiuitatem distinguit, posse eam diversitatem inducere. Si enim ita est, tota ruat oportet Astrologia, cum semper in observazione Stellarum aliquis error irrepit.

Secundò, quia qui eosdem habent eventus, non eundem habent horoscopum, ut videre est in iis, qui communi aliqua clade vel belli, vel pestilentie, vel terræmotus involuuntur. Dicent, unum particularem eventum à diversis horoscopis oriri posse. Benè est. sed quia peculiares etiam eventus habent suas in sideribus causas, & signa, ut mors in bello aculeum sagittæ, mors in naufragio Situlam aquariam, &c. persuadere nunquam poterunt, omnes, qui eodem die in pugna sunt mortui, sub aculeo sagittæ, aut si quod est aliud mortis huiusmodi signum, natos esse.

Tertio, quia ex eodem horoscopo contrarii sæpè concluduntur eventus. Ratio est, quod Astrologia fit involucrum præceptorum nulla vel ratione, vel experientia sancitorum, sed vel à constellationum fabuloso nomine
vel

vel ab arbitrariis veterum commentis ductorum: quorum quidem tanta est multitudo, & varietas, ut ad omnia attendere angusti, quale est humanum, ingenti non sit. quid enim dicam de divisione domorum, de dignitatibus Planetarum, ac, si superis placet, etiam sexibus, de directionibus, exaltationibus, revolutionibus, similibusque ineptiis sexcentis ad libitum confictis? Certè de eadem nativitate Astrologi plures consulti, contraria non raro prædixere, ut refert Gassendus, & alii.

Quartò, nihil est, cum prognostica affixa sint tempori nativitatis potius, quàm conceptionis; cum tamen proles, dum concipitur, utpotè tenerior, aptior sit, ut Astrorum impressionem excipiat. Nihil est, cur Astra agant in prolem nativitatis momento, & non alio quolibet antè, vel post. Nihil est, cur semel accepta tempore nativitatis impressio debeat toto vitæ tempore perdurare, nec possit à sequentibus siderum ipsorum influxibus deleri.

Mitto alia, quæ videri possunt apud citatum De Chales. illud omittendum non est, artem istam non vanitatis solum, sed etiam impetatis damnatam meritò esse à Patribus, & Ecclesia; quod pro Dei providentia, humanoque arbitrio fatalem in rebus necessitatem inducit, dum nostram voluntatem sideribus, agentibus nimirum necessariis, subiicit. Et hoc quidem veteres Astrologi disertè asserébant; Recentes vero cautiùs pro necessitate inclinationem, sed cum eventu infallibiliter connexam usurpant.

Quod verò asylum habent Genethliaci, experimentum multiplex, quo ipsorum prædictiones sunt comprobatae, multipliciter etiam præcluditur, primò enim non mirum, si, qui sæpè aberrat, aliquandò collimet neque verò hinc ulla esse potest artis non modò certitudo, sed ne probabilitas quidem. Secundò sæpè non Astrologiæ, sed Magiæ prædictiones fuerunt.

Dz.

Dæmones autem, ut non possint futura prævidere, sagacissimi tamen sunt, & possunt eas coniectare; validissimi sunt, & possunt, Deo permittente, quæ prædixerant, perficere. Tertio sæpè non prædictio eventum, sed eventus prædictionem sequitur. multi enim ita perterriti sunt, ut prædictionis instante tempore, in morbum, ac mortem ex ipso timore inciderint. Quarto sæpè prædictio non ab Astorum situ, sed ab hominum conditione regulatur. Sic Astrologi consulti ab Duce Mantuano de muli sui nativitate sub nomine spurii sibi nati, dignitates alii Ecclesiasticas; alii Militares ominati ridiculè sunt. Quinto sæpè prædictiones sunt universales, & æquivocæ variisque eventis accommodabiles. Sexto pleræque prædictiones, quæ adducuntur in exemplum, manifestum est non fuisse ab Astrologia; prædictus enim est locus mortis, ut Babylon Alexandro; cum certum tamen sit, nullum esse Astrologiæ canonem, quo locus prænotetur. Septimò demum Augustini sententia est, sæpè Deum permisisse, ut prænunciata ab Astrologis infortunia contingerent in penam eorum, qui fidem Astrologiæ habuerant. Atque hæc satis de re, quæ ab omnibus doctis, ut inutilis, & inepta traducitur.

LIBER SEXTUS

PHYSICORUM

DE ELEMENTIS.

Q U Æ S T I O P R I M A .

De primis Elementorum qualitatibus .

C A P U T I .

*Numerus, & definitio qualitatum
primarum .*



Umerum primarum qualita-
tum accepimus ab Aristote-
le: Aristoteles ab antiquio-
ribus se Philosophis. Igitur
2. de gent. 1. 8. & 4. Meteor.
1. 1. quatuor istæ traduntur
qualitates primæ, Calor,
Frigus, Humiditas, Siccitas.
In his vi dendum prius, quid sit esse qualitates
primas: tum singularum natura, & notio de-
claranda.

Primas qualitates eas plerique intelligunt,
quæ neq; ex aliis, neq; ex alterutris, sed ex ip-
sis reliquæ. In hoc sensu qualitates numeratas
esse primas, res est dubitationis plena: nam
calor, & frigus humiditatem, & siccitatem vi-
dentur activitate sua efficere; adeoque sunt ex
alterutris; & propterea difficile videtur salva-
ri posse, qua ratione qualitates plurimæ, quas
vocamus occultas, ut sunt magneticæ, electricæ,
multæque herbarum, ac lapidum virtutes, ad
istæ.

istarum qualitarum temperiem tanquam ad suam causam reduci, mixtione queant. Missa ergo eiusmodi acceptione fortasse vera; sed ad institutum Philosophi non necessaria, qualitates istas censeo dici primas, quia primò elementa constituunt mixtiva, & miscibilia, atque adeò idonea, ut ex ipsis mixtum resultet. Calor quidem, & frigus reddunt elementa apta miscere: humiditas, & siccitas reddunt eadem apta misceri; ut ex notionibus mox tradendis apparebit. Solæ ergo qualitates istæ dicuntur in mixto primæ, quia solæ ad eius generationem concurrunt, dum solæ mixtionem efficiunt.

Definitiones porro qualitarum primarum ex Aristotele ita se habent. Calidum est, quod congregat homogenea, & disgregat heterogenea. Frigidum est, quod homogenea simul, & heterogenea congregat. Humidum est, quod facile terminatur termino alieno, difficile proprio. Siccum est, quod facile terminatur termino proprio, difficile alieno. Ità 2. de gent. t. 8. qualitates primæ notificantur non in abstracto, sed in concreto, physico scilicet more, cuius est accidentia considerare, ut afficiunt, ac denominant subiectum.

Istarum notionum veritatem (sint ne primæ, an secundæ, non moror. videntur enim à Philosopho adhibitæ, ut solum explicet vires, quas ad mixtionem conferunt qualitates primæ) experientia firmat, Nam primò calor vi illa, qua corporibus raritatem inducit, eorum quoque vincula dissolvit; quo fit, ut pro partium varia gravitate, aut levitate in alium aliæ locum migrent; atque ita homogenea, h. e. levitatis eiusdem superiorem, gravitatis eiusdem inferiorem, mediæ medium locum petant. Sic facta homogeneorum inter se coniunctione, heterogenea segregantur; quemadmodum dum aurei nummi in unum, argentei in alium transferuntur, aurei ab argenteis separantur. Id autem

tem à calore præstari constat ab experientia in combustione, distillatione, &c. Sed hoc intelligendum de actione caloris ultimata, & per se intenta; nam calor mixta primum congregat, ut metalla, ceram, & picem, & similia, sed eodemum spectat, ut elementa inde extrahat: qui est ultimus caloris effectus mixti non compositionem, sed resolutionem intendens: qua tamen vi per frigus temperata utitur ad mixtionem natura.

Ex opposito frigus omnia in unum cogit, cuiuscumque sint naturæ, ac levitatis. Cum enim eius proprium sit densare, ac constipare corporum partes, consequens est, ut omnia contineat, quæ intra illa reperiuntur, argumento sit glacies una, in qua, quæ antea intra aquam fortuito erant, simul adunantur, & concre-
scunt. Atq; hoc est fortasse, quod Empedocles olim voluit, dum omnia fieri per litem, & amicitiam dixit. quis scit enim, an non per litem calorem heterogenea dividens, per amicitiam frigus omnia in unum veluti amicabiliter permiscens intellexit?

Eadem experientia humidi, & sicci notiones comprobatur: aqua enim, & humores reliqui, atque à fortiori aer, corporum ambientium figuris sese accommodant. quare terminum, ac figuram certam per se non habent, sed eam à continentibus mutuuntur. Contra verò sicca per se sumpta, quæque sunt per continuationem unum, ut terra, lignum, lapis, metallum propriam sibi figuram vendicant, neque eam facile mutant, & corpus etiam continens sibi accommodant.

Fatendum tamen, istas esse notiones fluidi potius, & solidi, quàm humidi, & sicci, si standum sit vulgi conceptionibus, & usurpato communiter loquendi modo: juxta quem humidum species est fluidi, eique addit vim adhæsi-
vam, hinc aerem licet fluidum maximè, mini-
mè

mè tamen humidum, per se loquendo, dicimus, quòd scilicet natura sua non adhæret, sed mobile est, & facillè evolat. aquam verò humidam vocamus, non quod fluat, sed quod adhærescat. Verùm tota hæc lis de vocabulis est, adeoque non immorandum, sed permittendum cuique vel cum Aristotele, & Peripateticis, vel cum vulgo loqui.

Hinc demum apparet, quæ sint istarum qualitatum relatè ad missionem munera. Humidum enim, & siccum facillè junguntur. illo in huius partes se insinuante, ac dante vinculum, terminumq; accipiente. Calidum, & frigidum elementa adunat, servatq; ne dissolvantur, præsertim forma mixti præsentè, cui qualitates istæ ad temperiem redactæ serviunt.

C A P U T II.

De Calore.

Post traditam istarum qualitatum ab effectu notissimo definitionem, scrutanda penitus est singularum natura. Incipio à calore, cuius quantum est sensui cognita existentia, tantum est intellectui obscura quidditas.

Tres sunt circa constitutionem caloris præcipuæ sententiæ. Prima Cartesii in motu quodam, & agitatione partium exiguarum. secunda Epicuri in effluvio atomorum sphaëricarum (aliis pyramidales, aliis filamentorum in morem contortæ placent) tertia Aristotelicorum in qualitate accidentali à substantia quavis toto genere seiuncta caloris essentiam statuentium, Hæc quidem tertia sententia, quæ nostra est, priorum accurata rejectione abundè confirmata relinquetur.

§. I.

Calor non est partium exiguarum motus.

Caloris, ut & ignis (neque enim est illi aliud re ipsa calor ab igne) generationem Cartesius ita exponit. Corpora inflammabilia ea statuit, quæ ex materia tertii elementi cum globulis secundi commixta constant: tunc verò isthæc inflammari dicuntur, cum excussis secundi elementi rotundis particulis, particule tertii, quas terrestres appellat, innatant materię primi, quæ quia cælestis est, & celerissimo motu fertur, eas etiam secum huc illuc rapit, & quaqua versus impellit; ablato scilicet cum globulis impedimento, quod vires cælestis materię antè frangebat. In hac partium agitatione terrestrium ignis, & caloris productionem reponit, quæ tamen huiusmodi nomenclationem non subit, nisi ubi similiter agitatur sensorium, eiusque nervi motum suum imprimit.

Sed primò, nisi fallor, manifestum est idem corpus esse non posse calidum simul, & lucidum: quod tamen manifestissimæ experientię refragatur. Probo sequelam, ubi actiones calefaciendi, & illuminandi sunt oppositæ, seque mutuò destruentes, non possunt ex eodem agente simul manare. atqui in hypothesi Cartesiana ita se habent: quandoquidem actio illuminatiua non stat, dum globuli secundi elementi excutiuntur; iis enim ablati, per quos rectà dispositos illuminatio propagatur, necesse est, ut auferatur illuminatio: sed calefactio aufert globulos istiusmodi, ut possint scilicet terrestres particule innatare, & rapi à cælesti materia. ergo impedit illuminationem. Ut verò sua sit argumento vis, considera eiusmodi actiones intrà oculum: tum vide,

de, quo pacto stare ibi queant perturbata agitatio tertii, excluso secundo, & impulsio secundi elementi per rectam lineam usq; ad retinam.

Secundò, falsissimum est, si calefactio sit motus, eum esse perturbatum, quique partes exiguas corporum pro cuiusque dispositione, ac figura, alias ad dexteram, alias ad sinistram, has sursum, deorsum illas, quasdam antroorsum, quasdam retrorsum impellat. Actio enim calorifica perinde, ut illuminativa; per eosdem rectos radios propagatur, ut est evidens in lentibus vitreis, & in speculis concavis, in quibus eadem refractionis, ac reflexionis lege radii caloris, ut lucis, in foco adunantur: quod non contingeret, nisi eadem recta linea per totum medium diffunderetur uterque radius. qua autem ratione rectus caloris, non autem lucis radius possit motum corporibus à se calefactis imprimere, cum id ipsum rectus lucis radius non possit, equidem non video.

Tertiò, hinc fit ulterius, ut caloris causa, quæ eadem est, ac lucis, viribus ad calefaciendum sufficientibus instructa nulla sit commode assignabilis. Certè enim Sol non illuminat modò, sed & calefacit. jam doceant, quæ vi Sol, dum in se circumvolvitur, ejusque partícula se explicant, dum à centro sui motus recedere conantur, globulos secundi elementi circa se positos non differat, non excutiat, sed rectà propellat; tum ubi ad terrea inflammabilia ejus actio pervenit, caloremque, aut ignem excitat, globulos eosdem distrahat, ut terrestres atomi incipiant agitari, & innatare. Si hæc Cartesianus aliquis evolvat, magnus mihi erit Apollo.

Quartò, nullum est in hac sententia discrimen inter calidum, & fluidum. Fluida enim, si Cartesio credimus, ea sunt, quæ exiguis particulis sejunctis constant jugi motu agitatæ, atqui hoc ipsum est esse calidum, ergo esse fluidi.

Fluidum est esse calidum, adeoque omne fluidum est calidum.

Respondent, calidum duplex, aliud absolute, aliud respectivè. primo modo admittunt omne fluidum esse calidum. sed non secundo; hoc enim pacto calidum dicitur per habitudinem ad nostrum tactum, à quo motus fluidorum propter exiguitatem non discernitur, cum tardior sit, quàm motus particularum corporis atrectantis, ad quem proinde se habet non ut motus, sed ut quies.

Verùm hæc responsio multipliciter peccat. Primò supponit sensationem non nisi motus esse perceptionem: cuius oppositum lib. 4. ostenditur. Secundò fit, ut nullum solidum possit esse calidius fluido; quia nullum solidum potest habere partes suas magis agitates quàm fluidum; aliter fluidius esset fluido ipso; cum enim hoc sit esse fluidum habere partes commotas, esse fluidius est habere easdem commotiores. Sequela autem evidenter ab experientia rei citatur, docente, nitrum, si solidum sit, contractari impunè posse: si fluidum, fusumque in humorem, tangi sine vehementi frigoris sensu non posse. Tertiò fit, ut, cum sæpè fluidum frigidissimum sit, calidissimum à frigidissimo non differat, nisi quia illud est calidum magis, hoc minus ità, ut eius calor à sensu percipi nequeat. quod sane, nisi partium studio occupatus, persuadere sibi quis poterit? Quartò fit, ut aucto motu, in quo fluiditas consistit, debeat augeri calor, adeoque sentiri. quare si aqua fluida, & frigidissima bacillo aut molendinulo eo, quo potus quidam ad miscelam perficiendam, agitetur, debeat illico incallescere sensibilibiter. quid ni? si agitatione minori incalescit manus, & igitur filix, cuius partes utpotè quietæ motui resistunt magis.

Quintò demum si calor est perturbatus motus, sensibilis eiusmodi motus erit sensibilis calor;

calor; maior, ac minor motus, maior, ac minor calor. Atqui licet in liquorum effervescentia sensibilis motus appareat, iis tamen ab igne remotis, & effervescentiæ motu intra exiguum spatium sensibilibiter detumescente, nulla tamen in eo fit ad sensum caloris imminutio. Quin etiam dum pix igni primum exponitur, effervescentia fit maior; quæ sensim amittitur, dum calor augetur. Præter hæc iniice manum aquæ frigidæ. tolerabis utcumque frigus, dum manum immotam servas: quam tamen si agites simul cum aqua, ferre frigus non poteris. Hunc mihi nodum quis adversariorum exsolvat? Si enim calor est agitatio, cur frigus agitatione non minuitur, sed augetur? an frigus calore crescit, & vires ab hoste accipit?

§. I I.

Calor non est effluvium substantiale.

Dixi, non est; alibi enim ostendi ex Aristotelis mente, intervenire quidem effluvium aliquod igneum substantiale in caloris propagatione. in præsentī nego calorem esse effluvium illud, quamquam sine illo ad certum spatium non sit. Certitudo eius effluvii ab experientia est, docente, ignem longè fortius calefacere corpora ad perpendicularum sibi insistentia, quam quæ posita sunt ad latus. hoc autem esse præcise à productione qualitatis non potest agens enim quæ tale in æqualiter distantia nequit inæqualiter agere. est ergo à concursu spiritum igneorum maiore; qui à nativa levitate sursum in copia maiore feruntur, adeoque calorem generant intensiorem.

At verò calorem non esse id unum effluvium, præsertim atomorum, prob. 1. adversus eos, qui atomorum calorificarum neturam in solam figuram reiiciunt, quales sunt Epicurei omnes.

Ab his primum peto, ut ostendant, quam potissimum figuram atomis hisce donent; si enim hoc non præstant, à laude illa penitus excident, qua se reliquis antecire jactant, quòd rerum causas in aperto sistant. Nam quid reliquum est, si negant, nisi ut ad figuram occultam confugiant. Jam verò nullam posse aptam caloris muneri figuram tribui, constat primò ex Atomistarum pugna; nam alii globosam tradunt, alii pyramidalem, alii contortam filamentorum in modum, seseque perinde, ut de aere non pauci philosophantur, elastica vi explicantem. Et ipsi quidem Andabatarum more in sese mutuo perpetim incurrent, donec meliorem mentem induant, & Epicurum ejurent. quid enim iis unquam conveniant, quos non ratio, sed arbitrium committit?

Caloris deinde effectus non pauci frigori sunt communes. talis est penetratio corporum, & quandoque etiam discissio, ac dissolutio. Penetrabile quidem frigus Maro ex Epicureorum sententia, quorum sectæ addictus fuisse narratur, appellat. Scindi per frigoris vim corpora, vitra, lapidesque testantur. dissolvi etiam certum, nam pomum glaciatum si igni exponatur, statim computrescit: quòd frigus in intimas pomi partes à calore compulsum, eas ad putredinem, dissolutionemque trahit. Quæ ergo erit caloris, & frigoris secundum atomorum figuram diversitas, ut consimiles quandoque effectus generare adhuc possit?

Ad hæc calor, ut constat, corporum analysim molitur. jam, quæso, qui poterunt atomi ab igne propulsi, cujuscumque demum sint figuræ, corpora ita resolvere, ut aliz partes in ignem, aliz in fumum, aliz in cinerem abeant? quia, inquirunt, insinuantes se per poros in corporum penetralia, similes sibi ato-

mos

mos in eandem secum agitationem, ac fugam compellunt; hisque destitutæ aliæ partes, soluto veluti vinculo, collabuntur. Audio. Verum si atomi similes expeditæ prius non erant (aliter avolassent) sed dissimilibus veluti carcere inclusæ, & compedibus involutæ, qua ratione claustra ea perfringuntur, ut libertatem nanciscantur? num concepto impetu intrâ pororum angustias, quibus à motu impediuntur, adiutæque ab insitis extraneæ quasi auxilium sentientibus; in eos veluti parietes utrimque arrietant? num atomi rigidæ, & inflexibiles, nullisque poris excavatæ, sese dilatant, atque ità corpus dissilire cogunt? num ab ignis extrinseci violentia aliæ suprâ alias in eosdem poros adiguntur atomi, quousque repagula distendantur primum, tùm verò in fragmina, ac cinerem abeant? quodcumque sanè ex his dicent, circulatoribus digna, non Philosophis præferent. quo enim sensu, qua ratione ducè, ista mihi confirmabunt? qui potest motus rectus, qualem esse in caloris propagatione jam ostendi, tantam atomorum perturbationem efficere; si lucis recta propagatio in similia corpuscula intrâ corpus latentia nihil simile audere valet? tenuitas enim lucis maior tantum abest, ut imminuat eius vim, ut augeat potius, dum aptam eam reddit ad corpora altius subeunda, cum constet cæteroqui de eiusdem motu, & agitatione, qui calorem longè superat.

Demum si nullum est inter atomos, dempta figura, discrimen, unde est vis illa in igne, ut aculeis suis omnia corpora penetrare, ac dissolvere valeat? figura ne iners per se, ac minimè actiuosa eas vires igneis atomis tribuat? hoc sanè perinde est, ac asserere, ferrum, quod nemini est noxium, dum in informem massam coactum est, si in gladium, aut sagittam acuatur, nullo movente, per se posse homines vulnerare, & interimere.

Prob. iterum eadem assertio generalis. Lux est accidens ab ignis substantia omnino aliud. ergo & calor. antec. est latè lib. 1. q. 4. c. 3. ostensum. Cons. prob. si enim calor sit ignis substantia, & lux accidens, nobilior esset luce calor: quod nemo asserat; est enim & per se absonum, & exinde etiam, quod nobiliori potentia nobilius respondet objectum: oculo autem inter sensus nobilissimo lux aptatur: tactui sensuum infimo calor. Præter hæc iisdem penè passibus lucis, & caloris propagatio perficitur. Non ergo consequenter lux accidens, calor substantia asseritur.

Quod si lucem accidens concedere reformidas, habeo ex hoc ipso, quo te efficacius urgeam. Sumo enim lucem à calore non ratione solum, sed re distingui. Nam præter velocitatem longe maiorem, quam in sui diffusionem lux habet, & sentitur jam plena, ubi calor vix dum tenuis sensum incipit vellicare: speculum metallicum, & concavum, ut refert author. Bur. Phil. ignis calorem ita reflectit, ut in puncto concursus multo sit intensior. At si inter ignem lucidum, & ardentem, ac speculum ipsum interponatur vitrum, in speculi foco lux quidem augetur, sed nullus omnino calor procreatur. Ex hoc evidens est, calorem à luce distingui omnino, quod altero prohibito, altera diffundi adhuc pergat expedita. Jam si tam lux, quam calor substantia est, duæ erunt substantia naturis, viribusque se junctæ, ac re ipsa mutuo separabiles. quare ignis non erit substantia per se ardens, & lucens, sed per accidens tantum ex duplicis substantia fortuita conjunctione; quæ proinde si dividantur (ut possunt, si duæ sunt, nec mutua opis indigæ) altera erit lucens tantum, & non ardens: ardens altera tantum, & non lucens. Neque poterit congrua ratio asserri, cur in qualibet ignis, seu generatione, seu educatione non contingat in duas.

duas partes substantias illas, motu, & natura usque eo dispares, secerni, ut secernitur ignis ab aere: aut cur flamma indispensabiliter utramque conjungat, nec ardeat sine luce, nec luceat sine ardore. Fatendum ergo est, esse in flamma commune principium, cui lux, & calor debeatur, adeoque istas esse qualitates, non substantias.

§. III.

Atomistarum argumentis occurritur.

EX his aliud est negativum, quod assertionis nostrae rationibus est rejectum: aliud in qualitates, & accidentia ex genere pugnat, quod est alibi dissolutum: aliud ex contemptu, conviciiisque constat, quod planè negligimus, utpotè cui responsum aptum non doctrina, sed audacia reponat. Ad rem, quae pertinent, ista sunt.

In qualibet calefactione motus semper localis contingit. Sic aqua dum incalescit, sensibilibiter agitur: imò si phialam impleas aqua facu- lenta, aut putrida, eamque igni admoveas, perspicies, incipiente calore, aqueam illam illuviem commoveri, & susque deque verti, magis, aut minus pro actionis calefactivæ mensura. Idem cernere est in metallis, quorum particulæ à vehementi calore ita agitantur, ut aliz ab aliis disiungantur, atque ita metallum colliquescat. Idem apparet in combustionem, quæ summa est calefactio, per quam mixta penitus dissolvuntur, aliis aliò abeuntibus corporum partibus. Quid? Nonnè sola collisio calorem, imò & ignem excitat? Manus mutua perfrictione incalescunt. ferrum lima corrosus calidissimum fit. glans plumbea è sclopo explosa per aeris collisionem calorem concipit. ignis è filicis percussione sola excutitur. currum

rotæ propè centrum, ubi major est attritio; ignem sæpè concipiunt. huiusmodi verò exempla suppetunt innumera fixum, ergo sit calorem à motu certo distinctum non esse.

Hoc argumentum, nisi falsus animi sum, ad hoc enthymema reducitur. *Nullus calor est sine motu, ergo calor non est, nisi motus.* Antecedens latè probant adversarii ab experientia multiplici: consequentiam, quam nos negamus, non probant. & quidem, ut ea vim habeat, hæc debet addi maior propositio: *Quoties A non contingit sine B, toties A est B.* quæ tamen falsissima est, tum à priori; quia A non posse esse sine B, potest nasci vel ab identitate, vel à connexionem. perperam ergo identitatem potius, quam connexionem concludis. tum ab exemplis; nam nec motus contingit sine movimento, nec sonus sine solidorum collisione, nec sensus sine organo, &c. nec tamen aut motus est movens, aut sonus collisio, aut sensus organum, &c.

Neque obijcias Verulamij in novo organo authoritatem, ubi eam statuit formæ aliquius inveniendæ rationem, ac legem, ut id, in quo res aliquæ dissimiles conveniunt, mens diligenter expendat, atque omnia corpora calefacta conveniunt in motu. ergo motus est caloris ratio. Etenim quanta sit huius hominis authoritas, qui nobis Aristotelis vel Numinis loco obijcitur, si hinc conijcere licet, fidem eam meretur, quam in mendacio deprehensi. quandoquidem cum id, in quo dissimilia, dum eandem denominationem subeunt, conveniunt, possit esse vel causa prævia, vel effectus consequutus, vel forma, seu ratio, non est, cur unam præ alia secundum consequentiæ rectas leges deducas. Atque hoc specimen unum sit ex tot arguendi fallaciis, quibus Peripateticam doctrinam impetunt Atomistæ.

Cæterum falsitatem etiam antecedentis §. r. abua.

abundè demonstravi, quod attinet ad caloris, & motus veluti comitantiam, qua verò ratione percussio, & collisio calorem excitet. seq. qu. palàm fiet. Nunc illud adverto, non in quibuscumque corporibus id contingere; neque enim si chalybe lignum percutias, ignem excuties. quod quidem argumento est, non solum percussione ad id sufficere.

C A P U T III.

De Frigore.

EX disputatis de caloris natura, sequitur, quid dicendum de natura frigoris. contrariorum enim eadem est doctrina. Constat igitur primò, frigus non consistere in quiete particularum, quæ ante fuerunt per calorem agitatae. Aut enim loquuntur de quiete particularum omnimoda; atque hanc nullam in corporibus esse præsertim fluidis, solemnis est Atomistarum sensus. Rursus omnimoda quies percipi à sensu non posset, qui solum localem motum ex eorundem mente sentire est natus. frigus autem tactu judicatur.

Aut loquuntur de quiete, quæ sit motus imminutio; atque hanc frigoris naturam non esse, ex multis conficitur. Primò, quia agitatione manus intra frigidam augetur frigefactio: agitatione nivis circa phialam frigus intensius concipit aqua. Secundò, quia nitrum liquidum frigidius est se ipso solido; cum tamen universim liquidum concitatus sit solido juxta adversarios. Tertio, hinc fieret, frigus non esse, nisi calorem minorem: quod sanè experientiaè evidenter adversatur docenti. sensum frigoris longè alterius esse rationis à sensu caloris. Sequela autem probatur primò, quia si agitatio est calor, & major agita-

tiò major calor; minor agitatio erit calor minor. Secundo, aut agitatio illa minor tactu percipitur, ut agitatio est; & jam percipitur sub ratione caloris. vel percipitur sub ratione quietis; atque hoc pacto nihil est perceptibile; cum perceptibile idem sit motivum; quare à tactu nullus motus perciperetur, sed sola motus privatio experimentaliter innotesceret; adeoque tactus se haberet ad frigus perinde, ut oculus ad tenebras.

Constat secundo, frigus non esse substantiale effluvium atomorum figura sola, aut etiam natura à cæteris discretarum. tum quia non satis Atomistæ sibi constant in ea figura tradenda, necputo tradi aptè eam posse, quæ omni frigoris effectui valeat accommodari. tum quia figura actiuosa non est: frigus autem, ut minus calore, non tamen est minimè efficax. Non ergo sola figura frigus creat. Utcumque porro sua statuatur, ac specialis frigori natura, hoc non firmat, sed destruit hypothesim Atomistarum; cum enim multa sint corpora per se frigida, frigus erit diversæ pro corporum diversitate naturæ. Postremò glaciem, quæ summi frigoris effectus est, non perfici immissione corpusculorum, quæ aquam veluti coagulent, infra ostendam. Non ergo eiusmodi immissio frigus est.

Ex his apparet primò, quæ sit de iis sententia ferenda, qui frigoris substantiam in nitro statuunt. Et quidem præter jam dicta, nitrum frigus non esse ex eo manifestum fiet, quod calidum non mediocriter est, & inflammabile. quis autem ferat seriò asserentem, transire frigus in flammam posse?

Apparet secundo, quam sit abs re Cardani opinio, frigus reponentis in mera caloris privatione. Non enim hic opus ad rationes acutas, & abstrusas experientias recurrere, ut falsi arguatur. Satis est si suam quisque manum consulat;

sulat ; ab ea scilicet discet , calorem privationem non esse . Ut enim gustus est ad dulce , & amarum , visus ad album , & nigrum , ita & tactus est ad calidum , & frigidum . quare ut amarum dulcis meram privationem non esse , sed positivam qualitatem gustum afficientem , & nigrum albi non esse carentiam , sed positivam lucis qualitatem visum immutantem , gustu ipso , visuque evidenter dignoscimus , ita & frigidum comparari ad tactum , cujusque tactui evidens est ; neque enim dum hoc tangitur , sensorium ita se habet , ac si nihil tangeret , sed positivè alteratur , & aliquid percipit . non ergo frigus privatio est .

His accedit , quod ingense est frigoris efficacia in aqua , aliisque liquoribus densandis , gelandisque , in calore opprimendo , in corporibus etiam durissimis perfringendis : quæ quidem in meram privationem reduci non possunt nisi si activitatem non enti tribuere velimus . Nec juvat dicere , frigus quidem ipsum privationem esse , sed causam ejus esse positivam , Nam vel calor supponitur qualitas , & accidens ; atque ita dum causam positivam ad ejus meram privationem inducendam affers , causam naturalem merè destructivam facis : quod repugnat naturæ instituto . Vel supponitur calor effluvium ; & hoc expelli , aut obtundi sine contrario effluvio prævalente in vi motiva non potest . Vel demum supponitur calor sola particularum agitatio . quarum quies sit frigus à positiva causa inducta : & qua vi agitatio illa sistatur sine ulla actione , quam mere sistendi , non est explicabile . aut enim causa secundum particulas suas movetur , aut quiescit . si movetur , motum non sistit , sed auget . si quiescit ; rursus vel nihil immittit intra corpus , quod frigefacit ; atque ita motum , qui est intra illud , sistere non potest , quamvis possit motum halituum calidorum ex eo manantium

repercutere: quo tertè eius motum non sisteret, sed augeret. vel aliquid immittit; ~~quo~~ que ita non quiescit, sed movetur; qui enim concipi potest sine motu halituum expirationo?

C A P U T IV.

*De Raritate, & Densitate.
Præcipuè Caloris, & Frigoris effectibus.*

Proprium caloris est rarefacere, frigoris condensare. hoc quamvis multi ex Neotericis negent ex eo potissimum adducti, quod aqua dum à frigore concrevit, non condensatur, sed rarefcit potius, quatenus & levior fit in specie, & majorem locum occupat, adeòque videtur ad frigus etiam raritas pertinere; infra tamen confirmabitur, errorqueprehendetur. Non negaverim rarum etiam, & densum effici per impetum extrinsecum violenter comprimentem, aut dilatantem corporis partes; sed cum hoc fiat, rarum, & densum ab hisce tantum qualitatibus, tanquam ab intrinseco, & inhærente principio proficisci.

Finis, quem natura per raritatem intendit, est, ut agens in maiori sphæra per se agat: quem intendit per densitatem, est, ut agens restringendo partes in minori sphæra agat validius. hinc fit, ut agens fortius, quale est calidum, quasi de sua virtute securum, in spatium se magis extenuat: minus forte, quale est frigidum, in spatium se minus contrahat, colligatque vires, de sua scilicet activitate sollicitum. Hæc certa: illud maximè dubium, quid sit formaliter corpus rarefcere, quid densari.

Communis Atomistarum sententia, quam nonnulli ex Peripateticis ipsis amplexi sunt, censet raritatem contingere per dilatationem poro.

pororum corporis, in quo se aliena materia insinuat, adeoque per localem separationem partium, intra quas Cartesiani ætheriam substantiam, Epicurei vacuitates immittunt: condensationem contra fieri per corpusculorum eorundem, aut vacuitatum expulsionem, majoremque partium, aut omnimodam pro modo densitatis localem proximitatem.

Communis sententia Peripateticorum est, rarefactionem strictam, & philosophicam (nam admissam ab Atomistis negare non possumus, sed eam vulgarem appellamus) haberi, præciso quocumque alieni corporis, aut vacuitatis ingressu, per hoc, quod idem quantum majores dimensiones, & localem extensionem acquirat, adeoque mutet dumtaxat extensionem minorem in maiorem. condensationem verò, quod corpus dimensiones, localemque præsentiam accipiat, mutetque maiorem in minorem extensionem, præciso quovis corpusculorum, aut vacuitatum egressu.

Mitto alias sententias examinare, quæ vel per se sunt improbabilis, vel ex alibi dictis, aut dicendis reiiciuntur. Per se est improbabilis, quæ raritatem per replicationem, densitatem per penetrationem partium explicat; physicè enim est evidens, replicationem, & penetrationem naturæ impossibiles esse, adeoque non posse in iis effectum naturalem consistere. Reiicitur ex dictis, quæ ad puncta inflata confugit, maiorem, minoremve ubicationem acquirant. Reiicitur ex dicendis, quæ ad mutationem quantitatis recurrit; supponit enim, quantitatem vel esse rationem partium, vel dimensiones ipsas. quod utrumque in Metaphysicis improbabitur.

Sustinenda igitur mihi est Peripatetica sententia, adversus quam mirum quantum adversarii invehuntur: sed equidem ut ea, quæ afferunt, diligenter excusserim, voces, convicia,

admirationes plurimas audio; rationes solidas & momenta nulla video; procedunt enim, quia Philosophi mentem non tenent, aut tenere nolunt. Hæc igitur prius exponenda, & probanda: tum quæ in oppositum urgentur, solvenda.

§. I.

*Peripatetica raritatis, ac densitatis ratio
ex Aristotelis mente exponitur, &
confirmatur.*

Aristoteles 4. phys. tex. 84. rari, & densi naturam explicaturus, quatuor physica principia præmittit, ac statuit. 1. Una est materiam contrariorum; contraria enim nata sunt fieri circa idem. 2. Omne, quod est in actu, ex eo fit, quod est in potentia; omnis scilicet forma confurgit ex præsupposito subiecto. 3. Materia non est separabilis à contrariis re, sed ratione tantum; quamvis enim concipi possit sine calore, & frigore, &c. non tamen esse per naturam valet sine altero ex his. 4. Materia ex eo, quod modo est sub uno, modo sub altero ex contrariis, non est alia, & alia, sed eadem secundum substantiam invariata; aliter non una & eadem esset contrariorum.

Ex his infert, quod cum magnum, & parvum. seu magna, & parva extensio sint contraria circa quantitatem, necesse est ex principiis præjactis primo, & quarto, ut eadem quantitas, & materia esse queat modo sub parva, modo sub magna extensione, quare ut subiectum dum ex calido fit frigidum, non debet in eo alia esse quantitas, & materia: ita neque universim dum ex magno fit parvum, ex parvo magnum. Rursus ut materia sub aliqua semper extensione sit, concipi tamen potest in sola sua
enti-

entitate omnem extensionem præveniente: & tunc manifestum est nondum tantam intelligi; esse enim tantam ab extensione habet, quæ tantum, majorem, minoremvè locum occupat; non potest autem in priori ad formam concipi cum ejus formali effectu. Præterea in eo priori concipitur cum omnimoda indifferentia ad quamvis extensionem, ad quam à forma superveniente determinatur pro rei cuiusque natura.

Hinc porro est adversariis Aristotelicæ raritatis, densitatisque difficultas; quod corpus imaginantur per se extensum, v.g. palmariter, vel transire, dum rarefit, ad bipalmarem extensionem; quod quidem inopinabile est sine replicatione contingere; vel transire, dum densatur, ad extensionem semipalmarem; quod concipi sine penetratione non potest. Sed corrigenda est imaginatio; ut enim frigidum evadit in calidum, non retinendo frigus, sed mutando frigus in calorem: ita poterit quantum palmare evadere modo bipalmare, modo semipalmare, non retinendo palmarem extensionem, sed eam amittendo, commutandoque in maiorem, minoremvè. Affert deindè Philosophus tex. 85. ad hoc explicandum arcusexemplum, qui curvatur magis, aut minus, nondum partes alias accipit, vel amittit, sed dum in iisdem majorem, minoremvè curvitatē acquirit, priore deperdita. ita corpus extenditur raritate, densitate constipatur, non quod extranea corpora admittat, emittatvè; sed quia parvitatem in magnitudinem, aut hanc in illam mutat.

Aliud est exemplum non minus aptum à velocitate, & tarditate motus deductum. Mobile siquidem, quod intrà horæ spatium quingentos v.g. passus acquirit, idem si duplò velocius moveatur, acquireret passus mille jam. ergo idem mobile per tarditatem quingentis,

per velocitatem millenis partibus correspondet intrà horam eandem. Simile huic in quiete contingit, dum corpus per raritatem maiori per densitatem minori spatio respondet, & coæquatur. Rursus, ut in velocitate recurri non potest ad interruptionem morularum; ità in raritate recurri non debet ad interjectionem corpusculorum; sed ut sine illa intelligitur mobilis intrà idem tempus coæquatio successiva modo maiori, modò minori spatio: ità sine hac intelligi poterit ab intellectu non preoccupato corporis per eandem entitatem, sed per extensionem diversam cum maiori, aut minori loco coæquatio simultanea.

Ex hac Aristotelis doctrina manarunt notiones illæ Rari, & Densi à Peripateticis communiter usurpatæ, dum Rarum dicitur, quod sub magnis dimensionibus parum habet materiæ: Densum contrà, quod multum habet materiæ sub parvis dimensionibus. *Parum* autem, & *multum* non sunt in his adiuncta quantitatis, sed entitatis, quæ parva, & magna dicitur in priori ad dimensiones, respectu etiam ad dimensiones ipsas habito. sic dum materia extensa palmariter evadit semipalmaris, dicitur magna relate ad novam extensionem, quia capax est extensionis maioris, quam præhabuit: dum evadit ex semipalmaris palmaris, dicitur parva relate ad novam extensionem, quia capax est præhabitæ minoris. atque ità de reliquis.

Sequitur demum ex istis, quàm sit certa Aristotelis mens circa Rari, & Densi naturam, quam non aliter, ubi eam ex professo tractavit, exposuit. quare Philosophum certè non videtur legisse Magnanus, quum cap. 9. Physic. nò. prop. 4. oppositam nostræ fuisse vult Aristotelis mentem in Categoriis cap. 8. tex. 4. idque *Evidenter*; ait enim: *Densum quidem ex eo quipiam est, quia partes ipsius sibi ipsis propinquæ sunt: rarum autem ex eo, quia à se distant.* tum
con-

concludit: *Quid clarius?* Sed parcendum hæc vice homini, qui unum, & alterum Aristotelis textum hinc inde corradere solet, ejus methodum, ac mentem assequi nihil curans, cujus scilicet libros nunquam nisi hostili, aut in ipsum, aut in ipsius assecclas animo perlegere (si legit tamen) assuevit. Sciat ergo, rari, & densi notiones Aristotelem in Categoriis ex vulgi tantum sententia tradidisse; quid enim abstrusiores alias traderet, eorum, quorum naturam nondum plenè, intimèque versaverat? quod deinde in physicis præstitit. Perperam igitur mens Philosophi alibi inquiritur, quam ubi rem ex professo tractat.

Superest jam, ut Raritatem, Densitatemque sic explicatam, & à vulgari secretam probem dari in natura. Hoc autem ità primùm conficio. Dantur corpora per se, naturaque sua densiora alia, alia rariora. quis hoc neget? nam certe rarissimum elementorum ignis est, densissimum terra: per se autem id fieri, ex eo est certum, quod ignis semper se explicat: semper item terra se contrahit. quod autem semper fit, naturà fit. Rursus corpora rariora eadem perfectiora sunt; accedunt enim magis ad ignem simplicium corporum perfectissimum. Si ergo corpora sunt rara per meram partium separationem, aut intra partes vacua, aut aliena corpora miscenda sunt: Neutrum cum præsuppositis constat; hinc enim fieret, ut corpus per se rarum, aut multum de non ente, aut multum de alieno ente deberet intrà se, tanquam naturæ suæ partem admittere. Quod ostendo; quia quod per se est rarum, per se pariter est omne illud, per quod in ratione rari constituitur. atqui in ratione rari per vacua, vel corpuscula constituitur. ergo hæc ipsa est corpus per se rarum. Jam primò scire vellem à Vacuistis. qua ratione ignis rarissimus idem perfectissimus sit, si in esse ignis per tot

vacua, seu non entia, defectusque constituitur? An non perfectio maior cum raritate defectus, & imperfectiones inducet, quo nihil absurdius? Mitto, quod non nisi perperam asseritur ens ex non entibus constans.

Dicant porro Plenistæ, cum ignis non sit nisi ignis, quid illi extraneum corpus immiscet, à quo in esse ignis constituitur? An non ignis hoc pacto ex igne, & non igne constabit? Accedit & aliud inconueniens, quod ignis non erit terra rarior; si enim unà cum illo corpore, quod intra poros admittit, sumatur, tantam densitatem habere deprehendetur, quantam habet terra, & quodvis aliud densissimum corpus. quod sane evidens est, si nullæ vacuitates admittantur; nam densissimum est corpus, quod aliud corpus intra se non admiscet. atqui ignis cum corpore admixto non admiscet aliud præterea; aliter esset progredi in infinitum, ergo sic acceptus est densissimus. atqui ignis est ignis sic acceptus. ergo ignis est per se densissimum corpus.

Ità arguo contra Atomistas, qui accidens non agnoscunt, sed omnia substantiam asseverant. quare ignis per suam ipsam, substantiam erit rarus, ut per eandem est calidus. Quod si illum nolint per se esse rarium, seu esse rarum per illud ipsum, per quod est ignis, adhuc negari non potest, raritatem esse proprietatem ignis. quoniam verò raritas per aliena corpuscula, aut per vacuitates constituitur, quibus scilicet præcis, nulla intelligitur; fatendum erit aut aliena corpuscula, aut vacuitates ad ignis proprietatem pertinere: & hinc fatendum ulterius aut substantiam esse substantiæ proprietatem, aut non ens entis: quo nihil absurdius, & magis à vera Philosophia alienum. fiet præterea adversus Plenistas, ut ignis cum sua proprietate simul acceptus densissimus sit. fiet rursus, ut densitas summa sit
ignis

ignis proprietas; si enim admixtionem illam corporis extranei exigit, & ea admixtio densitatem summam efficit, quid porro est consequens, nisi ut ignem, cuius est in se, & aliis raritatem inducere, natura sua summam densitatem exigere fateamur?

Quid deinde certius, quam corpus quodvis eò esse gravius, quò est compactius, ac densius? Densissimum ergo idem sit gravissimum oportet. atqui omne corpus (suppono nullum esse in natura vacuum) densissimum est; eo ipso, quod omne est plenum; ergo omne corpus gravissimum est; adeoque non erit aliud alio in specie gravius. Exemplum sit in glacie, quæ sane propter sensibilem aeris admixtionem aquæ, cui supernatat, levior est in specie. Jam quæro, unde ea in gelu gravitas minor? ab aere, inquit, levior. bene est. Sed aer, ut sit levior, debet esse rarior, rarior autem esse non potest, nisi alterius corporis admixtione; adeoque tandem redibit, quod glacies unâ cum aere, & corpore alio quocumque permixto sit corpus densissimum, & gravissimum, nec possit proinde aquæ supernatare.

Postremò si raritas Aristotelica impossibilis non est, ut ostendent, quæ mox dicam. congruentior rerum naturæ præsertim elementorum apparet: quæ satis scilicet abs re pura esse non posse, & ab extraneo corpore secreta assereretur: nec minus abs re, si pura sint, ad æqualem densitatem omnia compigerentur, ut purus ignis tam sit per se densus, quàm terra.

S. I I.

Contrariis objectionibus fit satis.

O Biic. 1. adversariorum Achillem. Ex rigorosa ista rarefactione (verba ferme ipsa

ipsa Magnani sunt c. 8. Philof. nat. prop. 3.) sequitur partem unam esse in duobus locis; & ex condensatione partes duas esse in uno. primum replicationem: alterum penetrationem importat. Nam si totum corpus rarefactum occupat locum duplò maiorem, necesse est, ut duplò etiam maiorem occupent singulæ partes. locus autem duplo maior est duplex locus æqualis, seu adæquatus. ergo. Item si corpus condensatum occupat locum dimidio prioris æqualem, idem proportionem dicendum de singulis eius partibus. at locus dimidiatus corporis totius non est æqualis ipsi, nisi ut dimidiato. ergo, si nihilominus totum est in eo loco, duæ medietates erunt simul in eodem loco, qui est æqualis cuilibet seorsim. ergo erunt simul in eodem loco penetrativè.

Resp. argumentum peccare in supposito; concipit enim totum, & partes ut certæ extensioni substantes, cum tamen, ut motui, præscindendum sit ab extensione, & considerandum corpus in sua entitate ad hanc, & illam extensionem indifferente. hoc si fiat, apparebit manifestum discrimen raritatis à replicatione, densitatis à penetratione. replicatio enim est, qua corpus ex. g. palmare manens palmare duplicem locum palmarem occupat: penetratio est, qua duo corpora v. g. palmaria, dum adhuc palmaria sunt, unum locum palmarem ingrediuntur. longè aliter se res habet in re nostra; nam neque totum corpus; neque pars corporis ulla priorem extensionem retinet: sed quæ erat semipalmaris, per raritatem evadit palmaris; adeoque replicatione opus non habet, ut teneat palmarem locum: quæ erat palmaris, per densitatem transit in semipalmarem; adeoque penetratione non eget, ut semipalmari loco æquetur. Hoc autem quæ ratione contingat, satis est §. sup. explicatum, nec difficile intelligitur ab illis, qui in-

intellectum imaginatione posteriorem non habent. Cæterum alia omnino isthæc esse, reque & ratione separata, constat in Angelis; neque enim dicitur Gabriel replicari, dum prius palmarem, deinde, palmari relicta, bipalmarem sphaeram implet, sed dum retinendo palmarem ubicationem, aliam palmari loco correspondentiam induit. nec dicitur Gabriel Michaeli penetratus, quia singuli distinctam palmarem sphaeram prius occupantes, tum eandem palmarem tenent singuli ad semipalmarem restricti. Idem dic de nostra.

Instabis: quælibet pars est in loco sibi adæquato. ergo non potest esse nunc in maiori, nunc in minori, nisi vel replicata, vel penetrata.

Sed si est sermo de loco extrinseco, cum corpus huic non per se, sed per ubicationem, extensionemque adæquetur, consequens est, ut, si maiorem habet, maiori: si minorem, minori loco adæquetur. Si autem est sermo de loco intrinseco, scilicet ubicatione, aut extensione; negandum est suppositum antecedentis; materia enim non habet unam ubicationem, aut extensionem sibi proportionatam, sed si sit taliter disposita per primas qualitates, exigit unam: si aliter, aliam.

Instabis iterum. pars, quæ nunc est palmaris, commensurata est ipsi palmari extensioni. ergo non potest sine replicatione fieri commensurata bipalmari, aut sine penetratione semipalmari. conf. prob. 1. materia palmaris non potest commensurari loco intrinseco, nisi palmari: aliter si fiat, replicatione, aut penetratione fit. ergo idem dicendum de parte commensurata cum extensione. Secundò manet eadem palmaris materia, quæ erat antea: palmare autem bipalmari, aut semipalmari commensurari non potest. ergo.

Hæc

Hæc est ultima instantia, quæ potest ab adversariis opponi. Resp. igitur negando antec. cum enim materia sit palmaris per extensionem ipsam formaliter, & in priori ad hanc nec palmaris sit, nec alterius mensuræ, quæ solam rem extensam metiri potest; sequitur, materiam extensioni suæ commensuratam non esse, nisi *ut quo*; quatenus ab hac habet, ut sit alteri palmari extenso commensurata.

Obiic. 2. argumentum, quod Magnanus l. c. prop. 4. evidens, ac demonstrativum habet. Supponit corpus minimis physicis virtualiter solum divisibilibus per correspondentiam ad minora, vel ad puncta imaginaria spatii conflatum. Cum verò, inquit, singula minima occupent singula spàtia sibi commensurata, & duo occupent duplum unius, & tria triplum, &c. consequenter corpus ex his constans v. g. mille, occupat necessariò spatium millicuplum unius. quod si occupat minus, evidens est, aliquod è minimis esse in spatio minori, quam sit suum naturale, vel duo esse in spatio unius. quod si occupat maius, evidens est, aliquod è minimis esse in spatio majori, quam sit naturale, aut aliquod esse in spatio duorum, aut vacuum inter aliqua relinqui.

Hoc argumentum, ut præcet, est mera petitio principii; sumit enim minima naturalia habere per se certum locum naturalem, ac debitum; cum tamen Peripatetici, qui minima isthæc naturalia admittunt, contendant nullum iis esse certum locum, sed solum loci certos terminos in majus, & in minus, intra quos nullum sibi determinant, sed à calore, & frigore, aut aliunde determinantur. afferunt exemplum in Angelis, & Anima rationali, qui ad arbitrium, aut naturaliter contrahuntur, ac dilatantur in loco, vel corpore.

At

At enim singulis minimis suam determinatam extensionem inesse supponit Magnanus ex probatis cap. 7. prop. 4. sed ibi non aliundè id probat, nisi quia determinatam habent entitatem, & ex consequenti determinatam quoque mensuram. Hoc autem nemo non videt ad rem argumenti nihil prodesse; aliud enim est, minima semper habere certam mensuram; aliud unam exigere naturaliter, itàut eam non possint in maius, minusvè mutare. Nam anima semper certo corpori adæquatur, nec propterea non potest nunc minori, nunc majori correspondere. Rursus determinata entitas solum affert determinatam exigentiam, quæ stat cum termino indeterminato, ut videre est in materia prima relatè ad formas, in corpore relatè ad loca, &c. Propterea demum addit in calce num. 7. *Hoc quòd dixi esse in quovis minimo physico diversum à spiritu (h. e. ut non possit sub maioribus, vel minoribus dimensionibus poni) probat ipsa natura motus, & corpulentia naturaliter subiecta legibus quantitatis, quam sane experimur affectare semper, & nunquam excedere desinitos sibi, quales dixi, terminos extensionis, ut magis constabit ex dicendis de raro, & denso.* Hæc si perpendas, intelliges Magnani demonstrationem ad circulum, & petitionem principii devolutam evanuisse.

Obiic. 3. ostendi ab experientia non potest, eiusmodi rarefactionis genus in natura contingere; cum alius modus rarescendi per ingressum corpusculorum satis constet in aqua calida, & bulliente, cui sensibiliter multum aeris admiscetur; atque idem contingit in aliis. ista igitur raritas merum est commentum, non ex natura, sed ex ingenio profectum.

Resp. nec posse ab adversariis ostendi, nunquam in natura ejusmodi rarefactionem contingere, quæ enim experientia docet, univer-

falem in omni rarefactione ingressum invisibilem atomorum in corporum dilatatos meatus se undique penetrantium? an non ipsi sæpè ad insensibilem, ætheriam, tenuissimam materiam confugiunt, quam sola ratione deprehendunt? satis ergo mihi erit ratio, qua Peripateticam raritatem hætenus confirmavi.

C A P U T V.

De Humiditate, seu Fluiditate.

HUmidum, seu Fluidum ex Philosopho dictum est, quod alieno facile termino terminatur, difficile suo. Unde autem hoc fluido corpori proveniat, inquirendum. Epicurei, quos turmatim recentes Atomistæ imitantur, fluiditatem in atomorum maximè sphaëricarum omnimoda dissolutione, ac jugi motu consistere censent. Ex utroque enim habetur, ut facile, ac sine resistantia saltem magna dividi possit; quod est fluidis omnibus commune. Hæc ego seorsim aggrediar, ut tandem naturam humiditatis declarem.

§. I.

Humidi partes, quamvis dentur atoma, dissoluta omnino non sunt, sed omnino continuata.

ID antequam probo. præcipua experimenta, quibus oppositum Atomistæ videntur sibi demonstrare, paucis exhibeo: 1. quò corpus in minutiores particulas comminuitur, eò magis ad fluiditatem accedit. ergo fluiditas est partium comminutio. antec. constat, si per canalem prius frumentum, tum vrena, demum farina evoluatur; ex his enim, quod in partes tenuiores concisum est, proprius fluidi spe-

speciem imitatur. 2. metallorum fusio, quæ liquefunt, & fluunt, nihil est aliud, quam eorundem partium comminutio ignis ope, aut aquarum fortium factæ, quæ ipsæ nihil sunt præter sales ad atomos tenuissimas redactos. 3. præcipuè id demonstrat Baylii experimentum. Si enim alabastrum in tenuissimum pulverem comminuas, & igni admoveas, illi- cò liquoris ebullientis speciem induet; quem si bacillo agites, perinde ut si aquam move- res, exiguam senties resistantiam. videbis etiam inde album vaporem elevari. quod si non nihil eius pulveris, cum maximè fervet, accipias, & chartæ imponas, non liquorem, sed pulverem experire. adeò verum est, sola partium comminutione, & agitatione liquo- rum formam, ac speciem exhiberi.

Sed ista, aliaque his similia tam parum apte rem conficiunt, ut mirum sit, hanc atomo- rum dissolutionem in fluidis plerosque Atomi- stas assumpsisse tanquam unum ex philosophiæ suæ principiis, ac potissimis fundamentis, cui tam multa nituntur, quæque ruant oportet, aut nutent, hoc tam male materiato, ut se su- stinere vix queat. Et primum quidem, quod assertur, inane est; ut enim dissolutio acce- dat aliquatenus ad fluiditatem, non tamen est fluiditas, nisi ostendatur præterea non in ali- quo solum, sed in omnibus cum fluiditate con- venire, non enim identitatem similitudo probat. an non cuprum, & auricalchum auri speciem aliquam præseferunt, & aurum non sunt? an non chymici falsum aurum elaborant, colore, & pondere à vero non multum absimi- le, quod tamen aurum non esse, ignis osten- dit? Neque verò alterum, quod additur, effi- caciùs est; nam primò assumitur sine probatio- ne, fusionem metallorum sola partium com- minutione perfici. deinde utcumque hoc detur, nunquid non perperam hinc ad liquores argu-

argumentum ducitur . arguendo scilicet à simili ad idem . Eodem vitio laborat tertium , quod ab istis tanti fit .

Atqui discedere maximè à dissolutione fluiditatem , illud mihi primò efficaciter probat ; quod liquores diaphani multi sunt . adeoque liquor quà talis perspicuitatis est capax . atqui corpus habens partes dissolutas perspicuum nullum est . hoc primùm ab experientia constat ; nam si vitrum minutatim contundatur , eo ipso perspicuum esse desinit , quod contingere non posset , si confusio vitrum fluido re ipsa proximum faceret . Sic enim arguo . non potest amitti perspicuitas per accessum ad qualitatem perspicuitatis patientem , sed fluiditas patitur perspicuitatem ; ergo accessus ad fluiditatem non potest tollere perspicuitatem . si ergo hanc tollit comminutio , hæc non erit ad fluiditatem , sed ad fluiditatis falsam speciem accessus . Idem constat ad hominem ; ex Atomistarum enim sententia perspicuitas est pororum rectitudo . hæc autem non stat cum partium omnimoda comminutione præsertim continenter , ut volunt , agitatare : non enim apparet , qua ratione particule susque deque motæ in omnem partem possint pororum directionem servare incolumem .

Deindè partes liquidorum non esse mutuo sejunctas , sed potiùs sibi coherere , & aliqua-
li tenacitate necti , multa ostendunt . 1. experimentum Glissonii cuique parabile ; si enim ex tenui fistula utrimque aperta , & aquæ plena aquam guttatim decidere sinas , *Gusta* (verba sunt huius authoris tr. de nat. subst. enerp. cap. ult.) primò elongatur , & pendens suam cū aqua reliqua , debilem licet , coherentiam clarè demonstrat : sed hac demum à gravitate victa , gutta abruptitur , & cadit . 2. dum ros in arboris frondem , aut oleris cadit , ità illi hæret , & simul in se recipitur , ac rotundatus , ut non-
nisi

nisi violenter inde abstrahatur : quin etiam leviter deorsum inclinata fronde, elongatur nonnihil gutta ; tum iterum in se redit, & conglobatur, fronde elevata. quid evidentius, ut pateat, aquæ particulas sibi mutuò coherere ? quid enim simile unquam in pulvere alabastrino, aut alio solutis partibus constante deprehensum est unquam ? 3. idem liquet in aqua ex observatione Galilæi, cui si lignum, aliudve corpus immergatur, ut totum madescat, dum deinde paulatim ex ea educitur, sequacem adeò habebit aquam, ut ea multum suprâ reliquæ superficiem elevetur. Unde hoc autem, nisi quia aqua aquam sequitur solidi poris immixtam, & adhærentem ? Manifestum ergo est, aquæ partes (eadem est de aliis liquoribus ratio) mutuò nexu continuas esse.

Hæc quidem tanti sunt, ut non paucos, nec exigui nominis Atomistas ab Epicuro abduxerint, coactos fateri mutuum inter liquidorum particulas vinculum. Sed in hoc ipso fatendo Atomistæ adhuc sunt ; non enim alium nexum agnoscunt, quàm per lanuginem quandam, vel hamulostalis naturæ, ut proximis atomis injecti mutuò eas adstringant, & pro eorum diversa vi flexioni magis, minusve resistente, corporum maiorem, minoremve divisioni resistantiam efficiant. Hoc totum duplici exemplo. altero à natura, altero ab arte petito, per calami anserini capillamenta, & per loricam hamatam explicat Magnanus cap.7. Phil. Nat. prop.7. à num.4.

Verùm hæc inventa in liquidis solidè reiciuntur. hæc enim millies divisa semper eandem coniunctionem repetunt. non autem apparet, qua ratione vis illa hamulorum relaxatione continenti non debilitetur, ac demum amittatur. Præter hæc hamuli, ut se restituant, indigent vi intrinseca, quæ sanè ad elasticam

reducitur. hæc autem esse in atomis ipsis seorsim spectatis nulla potest, si vera sunt; quæ de hac virtute ab Atomistis, & aliis scribuntur, & quæst. 3. discutientur. Deinde hamuli atomorum minores sint atomis oportet, & motum alium, aliamque virtutem ab atomis ipsis habeant: quod tollit omninò atomorum tum parvitatem summam, tum ex contradictione indivisibilitatem. Postremò quid opus est ad crassa ista confugere, quasi non alia in natura foret coniunctionis ratio? ac certe cum physicas quascumque minimas partes ex infinitis actu constare tom. sup. ostenderim, qui est partium istarum nexus, idem est reliquarum: has autem hamulis etiam necti nemo dicet, cum de partibus ipsis hamulorum sit quæstio. non ergo hamulis opus ad partes physicè individuas communi vinculo copulandas.

§. I I.

Humidi minima particula, dato etiam, quod dissoluta sint, non tamen jugi motu agitantur.

SI suppositio dissolutionis non fiat, quæstio de motu nulla est; manifestum enim est, quæ partes invicem copulantur, non posse moveri nisi simul, multò minùs susque deque contrariis in alias, & alias partes motibus. Do igitur atomos aquæ dissolutas, & nego agitas. Hòc dicto irritavi crabronum examen; intelligunt enim peti maximum doctrinæ Atomisticæ lumen; quo supposito, multa naturæ obscura phænomena satis, ut aiunt, in aperto sunt.

Primum igitur arguunt. Si sal in aquam conjicitur, ab ea dissolvitur, & aqua licet gravior, toti aquæ misceretur. Rursus vinum etiam mo-
di.

dicum in multam aquam injectum totam ita pervadat, ut nulla sit sensibilis aquæ pars, quæ aliud vini non habeat, ut ex odore, saporeque patet. Jam verò id fieri non potest, nisi aqua continenter in suis partibus agitetur, quæ agitatio mîscelam illam perficit. Secundò sit poculum spiritu vini purissimo plenum, in hujus superficiem si oleum terebinthinæ inspergas, compèries, olei guttas hinc illinc bacchantium mose discurrere. Unde hoc autem, nisi quia ab humoris illius particulis agitatæ commoventur? Tertio dum digitum aquæ immergis, & huc illuc dimoves, nullam aut vix sensibilem ab aqua resistantiam pateris. atqui nisi aquæ atomi sint in motu, resistantia sentiri maxima deberet; nam quæ moventur, facile dimoventur, cum mutare non debeant, nisi motus determinationem: *Difficile autem esse nequit* (verba sunt Boylei) *ex iis locis eas* (atomos) *depellere, quos ipsa, utpotè in motu jam constituta, erant relitura.* at quæ quiescunt, difficile moventur, cum longior sit à quiete ad motum transitus.

Mitto nunc causas huius motus sectari. quæ quidem variæ ab his afferuntur, aliis ad naturam atomorum intrinsecam, aliis ad vim illis à subtiliori corpore omnia permeante impressam recurrentibus. Sed causas inquirere reales effectus imaginarii non vacat.

Resp. igitur ad 1. falsis experimentum solvendum esse ab adversariis in duplici casu. Nam primò ubi certum aliquid salis in aquam injectum est, ac solutum, si plus injicias, non ultra solvitur, ac miscetur. quid ergo? nunquid aqua sale imbuta motum partium, adeoque fluiditatem amittit? aut, si retinet, cur reliquum salis non agit, ac permiscet? Deinde si vitream fistulam tenuem, ac longam aqua repleas, eique salis granum immittas, senties inferiores tantum aquæ partes salas esse, reliquis su-

perioribus omnino, ut antè, insipidis. hoc autem qui possit contingere, si aquez atomi in perpetuo sunt motu? Vera igitur experimenti ratio est, quòd aqua in salinas partes agens eas attenuat, & humectat, redditque leviores, ut possint ascendere, & aquam permeare. Sed ab hac actione ulterius promovenda impeditur a qua debilitata saliscopia sibi permixta. Rursus cum salsa aqua gravior sit dulci, residet in fundo fistulæ: quod non contingit in vase latiore, in quo sal attenuatus libertatem majorem nactus, ad summa facilius ascendit, ab aqua ipsius pressione, impetuque concepto adjutus, ut in loco declarabitur. Verum igitur est in hoc casu intercedere motum, sed motum, non præsuppositum, sed à salis dissolutione, mutationeque gravitatis inductum. Idem dicendum de mixtione vini; quisenim neget ex vini defluxu aquam agitari, & hac agitatione miscelam perfici?

Ad 2. inquiri, cur illius olei particulæ communi aque injectæ non similiter agitantur, si agitatio illa à motu partium, quo communis aqua non caret, unice proficiscitur? Concedo igitur, posse ex motu spiritus vini oleum commoveri, & resilire; sed si ex motu ejus spiritus motum aquæ deducis, longè aberras, qui ignis proprietates in aquam intrudis.

Ad 3. nego exiguam illam fluidorum resistantiam à motu partium esse, quin etiam ex illa ipsa nullum esse talem motum inferri autumo. Motus enim resistantiam auget, dum auget impetum, & conatum. Et sanè si digitus semper motum partium secundaret, fateor non modicam solum, sed nullam resistantiam experturum. at partes perturbatim hinc inde moventur; adeoque necesse est, ut digitus in partes incidat adversus ipsum actus, quarum proinde motum reflectere habeat: & interrompere. quis autem dicat, facilius esse dimovere

corpus quietum, & in æquilibrio positum, ut sunt omnes aquæ particulæ, quam corpus ad versus se commotum, dum nativæ virtutis aut impetu sunt vires? Quod ergo, ait Boylius, difficile non esse dimovere atomos à loco, quem erant relicturæ, id est verum, si secundentur, & promoveantur ad eum locum, quem erant acquisituræ: falsum, si in contrarium propellantur à loco, ad quem nativo, vel extraneo impetu contendebant.

Ex his jam constat, gratis omninò ab Atomistis motum istum perennem in partibus fluidorum assumi. quare cum quietem potius doceat sensus, & experientia, pro hac standum. tanto magis, quod vel atomi agitantur per totum fluidum, vel intra certam partem, si hoc dicas, cessat ratio commixtionis salium, ac liquoris; pars enim salis à parte aquæ per totam agitur. Sin dicas illud, peto, cur intra aquæ unius superficiem motus ille continetur, si, addita aqua, natæ sunt atomi. ulterius agitari? an ab aere continentur? Sed hoc sequenti cap. rejicietur, & præterea si aer, ut potè fluidus, est similiter agitato, ut aqua, cur motum aquearum atomorum, suarum motu inhibet? cur saltem aerias bullas, quæ sæpè intra aquam sunt, particulæ seorsim commotæ non ingrediuntur?

Accedit, quod motus iste perturbatus, & irregularis pugnat cum aquæ natura non solum gravi, sed gravitante continenter actu, ut Boylius ipse fatetur, & q. 3. probabitur; Jam verò gravitas est vis ab intrinseco motiva deorsum per rectam lineam ad terræ centrum: non alium ergo motum natura sua habent aquæ particulæ. quod si alium aliunde accipiunt, necesse est, ut is quandoque desinat, prævalente nativæ vi; neque verò gravitatione ipsa turbare se possunt, cum, viribus impulsivis, ac resistentia æquilibratis, motus existere nullus queat.

Ile autem, quod aliam vim motivam habeat aqua, aliam eius partes, est somnia, imò chimæ ras sibi fingere.

C A P U T VI.

De Siccitate, seu Soliditate.

Ex disputatis de humiditate, vera siccitatis, seu soliditatis doctrina descendit. Constat jam enim primò siccitatem non esse dissolutarum partium quietem ex hoc ipso, quod earum agitatio fluiditas non est: Sed quia ubi agerem de physicis principiis, rem hanc tractaturum me in præsentî sponendi, uberius adhuc discutienda est.

Sola quiete particularum cæteroqui penitus comminutarum soliditatem corporum non effici, non probari solum, sed etiam demonstrari adversus Cartesium nullo negotio potest. quid enim certius, quam corpora solida resistere divisioni? hoc non ferum modo, & marmor, sed cera etiam, & alia molliora testantur. quid iterum certius, quàm divisa utcumque quæta divisioni non resistere? hoc palam facit pulvis marmoreus, aut ferreus, quid ergo certius, quàm, quod ex his est consequens, soliditatem cum partium dissolutarum quiete non constare? Nec potest recurri ad variam atomorum figuram; nam eadem sunt ceræ, & aquæ particule, quæ prius fluunt, deinde concrescunt.

Propterea videntes alii satis debile partium vinculum esse quietem, ad corporis externi pressionem recurrunt; quæ corpora solidentur. Afferunt, aut id declarent, ac probent, duorum marmorum optimè lævigatorum exemplum, quæ invicem divelli nulla vi possunt, dum externo aere comprimuntur: eodem pacto philosophandum. inquirunt, de particulis,
seu

seu atomis sua invicem plana superficie cohaerentibus, & à subtili corpore, cuius maiorem vim, quam aeris, faciunt, compactis. Sed huiusmodi compactio ab extrinseco displicet primò; quia hinc sequitur soliditas in omnibus corporibus æqualis; ex eadem enim subtilis corporis virtute. non potest impar resistentia nasci. neque recurras ad diversitatem texturæ, figuræque partium: tota siquidem hæc reducitur ad planas superficies invicem nullo medio conjunctas. Secundò eiusmodi soliditas à subtilis corporis pressione manans, aut nullam, aut invictam parit in solidis resistentiam adversus divisionem. nam si superficiem à superficie divellere coneris, perinde ut marmor à marmore, separare non poteris quamquam enim tenuem cylindrum subtilis materiæ incumbentem videaris posse facile vincere; quia tamen juvatur à pressione laterali similis materiæ, eandem vim habet ad comprimendum parvus, ac magnus eiusdem cylindrus incumbens. quod est manifestum in experimento Torricelliano. in quo Mercurius ad eandem altitudinem elevatur, sive latior, sive minus lata sit superficies Mercurii in pelvi subiecta ab externi aeris maiore, minoreve cylindro compressa. Quod si superficiem unius atomi non rectà in contrarium ab alia, sed lateraliter, ac reptando separare contendas, nulla impedit ab extrinseco resistentia, ut probat exemplum marmorum lævigatorum. quare nihil erit, cur manus supra ferrum ducta violenter, limæ munere non fungatur, sensim ex eo præsegmina, vel laminas semper aliquot corradendo.

Sed neque probabilius ii discurrunt, qui in atomis hamulos, ansulas, pilos (quid ni manus etiam, ac digitos?) agnoscunt, quibus se mutuo tenaciter complectuntur, atque ita soliditatem pariunt. Ut enim mittam, quæ capite su-

periori adversus imaginationes istas disputavi, sumo in præsentī discutiendam unius glaciē soliditatem. Aqua sanè dum fluit, divisioni minimum adversatur. Unde ergo resistantiam acquirit, dum concrevit? Non potest dici, atomos à frigore hamulos, pilos, aut ansulas primum accipere; quo enim pacto id frigus præstat? aut quibus typis aquæ particulas reformet? si enim de novo addit, explicandum, quo pacto hamuli, aut pili atomis coniungantur. Quod si isti supponebantur in aqueis particulis, dicendum, antea molliores, deinde vi frigoris rigescere, ac durari. Jam verò libenter audirem philosophantem Atomistam, qui transitum hunc atomi è molli in rigidam sine novæ entitatis productione, vel accessione declararet. Neque enim aliquid accipiunt intra poros, quibus carent, nisi velit, pilos illos non quidem rigescere, sed convolvi in nodum; quod quidem lepidum inventum ut tueatur, ostendere debet, quibus instrumentis frigus valeat tam sedulo pilos sigulos mutuo innectere. quod si non explicat, abstrusorem facit frigoris naturam, quam Peripatetici, dum astruunt intelligibilem illam, ut toties dictat, qualitatem.

Hinc habeo (id quod egregiè notat in simili Petitus in Dissertatione de Cartesii Principiis) Philosophiam Atomisticam clariorem esse Peripatetica in eo, quod dicunt: quis enim non facilius capiat partes corporum nexas per hamos, per capillamenta, & similia, quàm per unionem Peripateticam? sed in istorum causis assignandis, utcumque primò aspectu aliquid dicere videantur ad rem, si penitus inspiciautur, nihil minus, quàm effectuum causas, aut principia afferre deprehenduntur: & si ulterius propellantur, in latibula, quæ nostris oblectant, sed longe obscuriora se recipiant.

Redeo

Redeo ad rem, & inquirō ab istis, num alium inter partes solidorum nexum naturæ possibilem negant, præter hamulos, ansulas, &c. an verò alium admittunt, sed suum de facto esse, non alium volunt? Primum si afferunt, tenentur afferre impossibilitatis istius argumentum: quod quidem licet tentaverit Magnanux eo, quod unio, & forma quævis si produceretur de novo, crearetur, infeliciter tamen illicessisse, constat ex dictis tom. sup. ubi de naturæ principiis. alii verò istam ne tangunt quidem. Alterum si dicunt, perperam, & abs re discurrunt; si enim effectus A potest æquè esse à causa B, & C, adversus dialecticæ, & rationis leges facit, qui ab existentia effectus A potius causæ B, quam C existentiam concludit. quare frustra de rerum suarum certitudine gloriantur Atomistæ, dum suis hypothesibus explicatis, Peripateticas non improbant, sed negligunt, quod plus esse veritatis, ubi plus est claritatis ex vāno fingunt.

Constat iterum ex dictis, siccitatem esse corporum accidentalem qualitatem, quæ unionem difficile amissibilem iisdem præstat, & à contrario dividende munit. quin etiam eadem ita firmat, ut in semel accepta figura stare per se, nec à circumstante corpore valeant immutari.

C A P U T VII.

De Glacie, potissimo Frigoris effectum.

QUamquam glaciæ consideratio ad sequentem librum, qui est de Meteoris, spectet, lubet eam in præsentī meditari, ubi in proximo sunt principia, ex quibus eius natura descendit.

Ex dictis liquet, glaciem non esse aquam stantem, seu aquam, cuius atomi prius agitatæ,

adeoque fluentes, tum vi frigoris quiescant, h. e. glacentur. Est ergo glacies aqua non stans (stat enim etiam fluida) sed concreta, ac durata per fluiditatis amissionem, & acquisitionem siccitatis, seu soliditatis.

Dux jam supersunt circa glaciei naturam quæstiones. 1. num glacies densatione, quod hætenus creditum, an potius rarefactione contingat, ut non pauci jam censent. 2. num frigoris unius vi, an verò alterius etiam agentis glaciatio contingat. & utrum aqua, dum glaciatur, substantia intra se coagulantem accipiat. Utramque optimè versat, ac decidit P. Danielis Bartoli libellus *De Glacie* vernacula lingua conscriptus, ex quo pauca & præcipua in præsentem decerpam.

Quod attinet ad primam, sunt, qui glaciem rariorem esse aqua, adeoque raritate potius, quam densitate perfici, eo plausibili argumento contendunt, quod aqua dum glaciatur, in maiorem molem sensibilibus affurgit, & præterea levior est aqua, qui proinde supernatat, utrumque videtur infallibile indicium raritatis in glacie maioris.

Verum hæc opinio, quam docuit Galilæus, propugnatque acerrimè Magnanus, videatur quamvis ab experimento firmata, ab hoc ipso diligentius inspecto evidentis falsitatis est convicta à Digbæo, Liceto, & aliis. deprehenditur enim in glacie notabilis aeris admixtio sensibilibus bullis, canalibus, ac fistulis disposita, quæque aliquando, ut Borello visum est, medietatem spatii totius glaciei adæquant. Ex quo inferunt, dilatari quidem partes aquæ, dum concrevit, non autem rareferi, nisi forte vitream ampullam aere plenam rarâ etiam appellare malueris. Et hinc nascitur major glaciei levitas, non quod ipsa per se sit levior; sed quo d simul cum aere permixto corpus integrat in specie levius aqua; ex qua ratione vide-

mus, æream concham aquæ supernatare. Cæterum si posset pars glaciei, cui nihil aeris insit, seorsim accipi, non dubium, quod minor in mole, maior in gravitate, ac densitate foret, ac proinde aquæ immergeretur. Argumento est, quod glacies dum incipit mollescere, & liquari, dissipato aere, quem miscebat, gravescit illico magis, & aquæ fundum petit.

Quod attinet ad alteram, primum censeo solum frigus glaciationi perficiendæ non sufficere. id primum probat, quod aqua nivi ad mota frigescit sæpe usque ad summum, nec tamen concrevit, nisi sale nix juvetur. 2. aqua in maris fundo frigidissima est; nec tamen ibi, etiam in summis frigoribus, in quibus superiores partes ad multos passus glaciuntur, concreta unquam deprehenditur. 3. nix, & gelu, aqua affusa etiam frigidissima, solvitur: quod non contingeret, si uni frigori glaciationi deberetur. 4. aqua dum gelascit, violentiam patitur: quod manifeste indicant irruptiones illæ in vasorum latera, si clausa sint, aut oris angusti, quibus non vitrea solum, sed etiam ænea perfringit. atqui solo frigoris incremento, quod est qualitas aquæ innata, non potest violentiam ullam pati: non igitur à solo frigore congelatio provenit.

Requiritur ergo præter frigus etiam siccitas. hoc quidem ut palam fiat, non opus est, nisi obvia experientia, docente, utcumque hibernæ noctes asperæ sint, ac frigidissimæ, nec lutum, nec aquam concrevissent, nisi flante Borea, vento scilicet frigido, ac summe sicco: nec nive nisi sale, sicco corpore, adjuncta aquam per artem glaciari.

Dux istæ glaciei causæ sunt sufficientes: nec præterea aliud corpus est necessarium, quod aquam undique ingrediatur, ac permeet, idque illi præstet, quod lacti coagulum. Ita

que distinguenda est diligenter à coagulatione glaciatio, nec una cum altera confundenda: quod quidam faciunt, unius generis experimenta ad alterum non rectè trahentes. Atqui congelationem non fieri ingressu corporis coagulantis, primum ostenditur ad hominem; quia hoc pacto deberet aqua non condensari, sed rareferi; & si corpus coagulans grave est, non mole solum, sed pondere etiam crescere. Deinde si quod esset aquæ coagulum, maximè spiritus alinitrales, qui, ut ferunt, frigidi sunt, & sicci. at certè si verum id foret, nitro, aut ejus spiritibus in aquam injectis congelatio fieret, ut sola injectione coaguli lac concrescit. at quis unquam expertus est sola nitri, aut alterius corporis commixtione aquam glaciari? Credidit hoc quidem P. Cabeus, atque ut certum exposuit 4. Meteor. tex. 1. q. 6. Sed aliis experiri volentibus non successit, nec puto fieri posse; nitrum enim, ut alibi notavi. non frigida minus, quam calida naturæ est: quod autem paradoxum id esset, si à corpore temperato sine frigoris summi adjumento glaciatio procederet? procedere autem deberet, si glaciatio non est, nisi mera coagulatio.

Postremo cum glaciationem fieri contingat in vitreis etiam vasis, ut coagulatio ista glaciei subsistat, debet vitrum porosum statui, ut sit scilicet à coagulo permeabile. At verò quamvis Atomistæ passim hanc vitri porositatem ut certam assumant, sine qua tota eorum doctrina rueret; alii tamen mordicus eam negant; afferuntque illud non contemnendum argumentum, quod à vitro hermeticè clauso spiritui tenuissimi nulla vel minima ex parte elabuntur, quin etiam ab eiusmodi vitro igne sigillato, accenso intus concluso sulfure per radios solares à speculo concavo adunatos, extra nullus sulfuris odor manavit. quid ergo? si flamma, cur non odor emissus? Scio, quo se
reci.

recipient, sed finam eos cum suis imaginatio-
nibus abire quò libitum. Certè vitri porosita-
tem probare non possunt, nisi petendo princi-
pium, supponendo scilicet lucem calorem,
frigus non esse, nisi effluvia.

CORROLARIUM PRIMUM.

*Humiditas, & Siccitas sunt qualitates
accidentales à substantia rei
distinctæ.*

SI enim humiditas non est partium disjun-
ctio, non agitatio, ut est cap. 5. probatum;
non rarefactio (quia sæpè humida densiora
sunt solidis) non ipsa humidi substantia, quæ
ab humiditate in siccitatem, ab hac in illam
mutabilis est, ut apparet in aqua, dum con-
crescit, in cera, dum liquefit, &c. restat, ut
humiditas, & siccitas sint accidentales qualita-
tes absolutæ, ac positivæ à substantia rei humi-
dæ, ac siccæ secundum rem distinctæ.

CORROLARIUM SECUNDUM.

*Non solum calor, & frigus, sed etiam
humiditas, & siccitas qualitates
activæ sunt.*

Siccitas enim in aquam inducitur ad siccitatis
præsentiam, perinde ut frigus ad præsen-
tiam frigidi: neque est ratio, cur à frigore fri-
gus, & non à siccitate siccitas oriatur: fortasse
etiam frigus ex parte ad siccitatem aquæ concur-
rit: quæ est ratio, cur solus sæpè calor glaciem
solvit, quatenus tollit frigus ad servandum ge-
lu necessarium: Neque verò aquæ soliditas
habetur, ut in luto, per humoris educationem,
sed per productionem qualitatis, quæ cum in-
dispensabiliter fiat ad similis præsentiam, huic

proinde non incongruè tribuenda. Eadem porro est ratio de humiditate, quæ de siccitate. Aristoteles autem 4. Meteor. t. 1. ubi humidum; & siccum qualitates passivas pronunciat, non omnem istis activitatem adimit, sed eam solum, quæ mixtioni confert, quam solus scilicet calor, frigusque perficiunt. fortasse etiam non activitatem simpliciter, sed completam negat; quia in agendo à calore, & frigore juvari debeat.

Q U Æ S T I O S E C U N D A

De substantia, & mixtione Elementorum.

C A P U T I.

*Natura, & Numerus Elementorum
exponitur.*

Elementum sumitur sæpè æquivocè pro primo cuiusque rei principio, sive res sit naturalis, sive artefacta, sive ars, sive scientia, sive aliud quidvis. Sic literæ dicuntur elementa orationis; & primæ demonstrationes, quæ supponuntur à reliquis, & alias non supponunt, elementa appellantur à Mathematicis. Strictius accipitur pro primo rei constitutivo. atque ita definitur 5. Met. t. c. 4. *Id, ex quo aliquid componitur primo inexistente, indivisibili specie in aliam speciem. id. ex quo aliquid ita constat, ut ipsum in eo inexistat, non utcumque, sed primò, quatenus nihil est prius, ex quo res componatur; quodque præterea ita se habeat, ut in alias res specie distinctas dividi non possit.* In hoc sensu sola materia, & forma sunt elementa, ut ex Averroe recte notat Suarius in Met. Hinc est, ut quatuor vulgata corpora, Ignem, Aerem,
Ter

Terram, Aquam, Aristoteles non elementa, sed *vocata* elementa plerumque appellat: & Commentator addit, ista non esse elementa, nisi juxta vulgarem hominum opinionem.

Sed accipiendo elementum, ut quatuor etiam vulgata complectitur, sic definitur 3. de Meteor. 31. *Elementum est, in quod reliqua corpora resolvuntur, in quibus inest potentia, vel actus: ipsum autem resolvere non potest in diversa secundum speciem.* Hæc definitio solis competit vulgatis quatuor elementis, ut probabitur; sola enim ipsa sunt corpora simplicia, in quæ alia resolvuntur, & ipsa non resolvuntur in alia corpora, sed in materiam, & formam, quæ corpora non sunt.

Quod attinet ad numerum elementorum, quatuor ea esse, nec plura, nec pauciora, receptissima est jam inde à primis Philosophiæ cunabulis sententia, quàm post Hippocratem Plato, & Aristoteles, & utriusque Scholæ alumni unanimi consensu tenuere. Probat hunc numerum Philos. ex numero quaternario primarum qualitatum, quæ quatuor tantum modis possunt combinari, ut singulis binæ tribuantur. Prima est combinatio calidi, & sicci in igne. 2. calidi, & humidi in aere. 3. humidi, & frigidi in aqua. 4. frigidi, & sicci in terra. duæ reliquæ combinationes, frigidi nimirum, & calidi, humidi, & sicci, possibiles non sunt in elementis, quibus qualitates tribui debent in summo. Addunt Peripatetici, elucere in hac distributione mirabile magisterium naturæ contraria copulantis, & per symbolas qualitates quodam veluti fœdere conjungentis, ut concors in iis foret ipsa naturarum discordia, & hinc proportio Mundi existeret, & harmonia.

Verùm hæc ratio non ita sumenda est, quasi ea una elementorum numerum ostendat, sed

sed quasi hujus numeri ab experientia cætero-
qui noti congruentiam à priori indaget. Scio
enim quàm multa in eam Arriaga, alique post
ipsum moliantur: sed perperam, quia pariter
multæ sunt naturales conjecturæ, quæ Fidei
divinæ veritatibus supersunt Theologi,
quæque scorsim à certitudine per Revelatio-
nem hausta intentum non omninò conficiunt;
juvant tamen nonnihil eas ipsas veritates, à
quibus mutuò juvantur, improbè proinde rei-
ciuntur, quasi unæ rem totam probantes. Idem
dici potest in re præsentī.

Quæ autem instantia videtur in contrarium
efficacissima, quòd scilicet hinc conficeretur
numerus octonarius elementorum, si ritè per-
pendatur, nulla est. Dicunt. Quatuor prima-
rum qualitatum combinationes ità procedunt
ex Aristot. 2. de gen. t. 23. Calor in summo,
siccitas in excellenti propria est ignis: aeris
humiditas in summo, calor in excellenti: aquæ
frigiditytas in summo, humiditas in excellenti:
terræ siccitas in summo, frigiditytas in excellen-
ti. Atqui aliæ supersunt quatuor complica-
tiones. 1. calor summus, humiditas excellens.
2. humiditas summa, frigus excellens.
3. frigus summum, humiditas excellens. 4.
siccitas summa, calor excellens. quatuor igitur
alia supersunt elementa. Resp. tamen, ut-
cumque concedatur, quatuor alia ejusmodi pos-
sibilia corpora superesse, non tamen huic uni-
verso utilia fore in ratione elementi. in hac
enim attendenda sola qualitas summa, cujus
est elementum fons, & origo, quamque præ-
cipuè in mixtionem confert, ut declarabi-
tur.

Dico igitur primò. Corpora elementarem
sphæram, Mundumque sublunarem compo-
nentia sunt quatuor enumerata. Hujus dicti
fides sit penès sensum, & experientiam; dari
enim quatuor ista corpora nemo, nisi stipes,
neget.

neget. Porro hæc ipsa sunt omnium maxima, quæque si minus perfectione, mole saltem reliqua excedunt; adeoque ex iis dicitur elementaris sphaera componi.

Dico 2. hæc ipsa quatuor corpora sunt omnium corporum sublunarium elementa, quatenus ex his omnia componuntur, & in hæc resolvuntur.

Ratio communiter solet ab experientia peti, quam vide apud Magnanum Philos. Nat. c. 13. prop. 5. & apud alios passim. Equidem in alto sensu, & magis fortasse ex Aristotelis mente dictum hoc declaro, & probo. Mixta componi ex elementis non est aliud, quam actu esse in mixto qualitates primas, quæ primò, & ad modum proprietatum, si summæ sint, debentur elementis. atqui in omni mixto est reperire quatuor primas qualitates temperatas, & in aliis alias partibus preponderantes, ut ex chymicis resolutionibus patet. Ergo omnia mixta componuntur ex elementis; Major declaratur. licet qualitates primæ in mixto existentes compositionem faciant non substantialem, sed accidentalem, adeoque ex hoc capite non satis rectè dicatur mixtum ex elementis constitui; quia tamen est in mixti forma istarum qualitatum exigentia, rectè ea dicitur ex elementis componi non actu, sed virtute, seu non physicè, sed metaphysicè; quatenus per exigentiam primarum omnium qualitatum coadunat in se proprias rationes formarum elementarium in quo sensu anima etiam rationalis est vera, & propria forma mixtionis: quod est necessarium, ut quatuor ista dicantur elementa. si enim mixtum nobilissimum, qualis est homo, ex his adæquatè non constet. quid ista sola elementa appellentur, quæ debent esse universalia corpora ad omnem mixtum quæ tale complendum pertinentia? Et in hoc peccant communiter Atomistæ, qui talia rerum principia exhi-

exhibent, ex quibus homo in esse hominis componi omninò non possit.

C A P U T II.

*An quatuor vulgata elementa sint inter se
substantialiter diversa.*

Responso affirmativa est mihi omninò sustinenda adversus Epicureos, eorumque appendicem, Cartesianos, nullam inter elementa, imò, & alia quæcumque corpora diversitatem agnoscetes, nisi in magnitudine, figura, & motu. Et quamvis hæc satis ostensa sit tom. sup. ubi de rerum principiis, addenda nunc nonnulla, quæ rem confirmant.

Prius igitur præmitto, esse in corporibus omnibus naturam, qualem habemus 2. phys. ab Aristotele definitam, principium scilicet motus, & quietis ejus, in quo est, primo & per se, & non ex accidenti; h. e. esse in unoquoque intrinsecum sui motus principium. Hoc licet negaverit Cartesius, non aliud à Deo motus principium recognoscens, certius tamen Aristoteli visum, quam quod probatione indigeret. nec immeritò; nam est insitum cuique effectuum naturalium in causis ipsis secundum rationem quærere, quibus scilicet efficiendis istæ non impares inveniuntur. hinc notiones naturalis, violenti, præternaturalis, supernaturalis; ut l. cit. sum prosecutus. Et quidem quid est, quod luminis actionem à Sole, caloris ab igne, &c. provenire Epicurus, & Cartesius non negat; negat motum ipsum Solis, & ignis in se ab igne, & Sole ipso procedere? quod enim huc præter rem trahit dictum Aristotelis, *Quod movetur, ab alio movetur*, apparebit in metaphysicis, non rectè intellectum

Etum ab eo eiusmodi principium. Accedit, quod motus, qui à natura mobilis non sunt, perpetui esse non possunt; aliter motus non à Deo solum, sed à creato etiam artifice operi suo impressus posset, imò & deberet perpetuari at motus, quem elementis suis tribuit Cartesius perpetuus est: ergo non à Deo solo, sed à natura etiam corporum est.

Quæ verò ut naturam eliminant, Cartesiani opponunt, hæc sunt. 1. ajunt, in ratione corporis nullum contineri motus principium: ergo nullum corpus est motus principium. 2. Id, quo carere corpus potest, non habet à se, dum habet. sed corpus potest carere motu, ergo dum movetur, non à se, adeoque non ab intrinseco movetur. 3. quod se movet, liberum est. nullum corpus est liberum, ergo nullum corpus se movet.

Hæc argumenta indigna videntur, quæ à Philosopho, nisi fortasse cum pueris ludente, proponantur.

Ad 1. similiter in ratione communi substantiæ, quæ est, ut per se subsistat, in ratione spiritus, quæ est, ut virtualiter tantum extendatur, motus principium non continetur. quid ergo? inferent ne hinc, nullam substantiam, nullum spiritum esse principium motus? In ratione divinæ sapientiæ formali æternitas non continetur, ergone Dei sapientia non erit secundum rem æternitas? Ipse motus in suo conceptu non dicit, nisi translationem de loco in locum, nec propterea quis concludet, motum nec rectum esse, nec curvum. Consulant Cartesiani summulas, & invenient hunc arguendi modum à suppositione simplici ad personalem, seu à statu, quem res habet in cognitione præscindente ad statum, quem in se habet, esse evidenter fallacem, & ineptum.

Ad 2. nego maiorem, aut distinguo: non

hæc

habet à se adæquatè, transeat: inadæquatè, nego, &c.

Ad 3. diff. maj. si se movet cum indifferen-
tia ad partes oppositas, positis omnibus ad agen-
dum requisitis, concedo: secus, nego maiorem:
corpus autem v. g. lapis, licet deorsum se mo-
veat, non tamen nisi necessariò, sublatis omni-
bus sui motus impedimentis.

Hoc posito, cum motus alios in aliis elemen-
tis experiamur (nam ignis semper calefacit, ac
lucet, aqua semper fluit, ac frigescit, & sic de
aliis) consequens est, ut cū istorum motuum sit
in ipsis elementis fons, & origo, & una sit in
uno proprietas, quam nunquam videmus in
alio; aliam esse in uno, & in alio naturam fa-
teamur oportet.

Deinde motus, & figura accidentia sunt cor-
poris; quod enim accedit, & recedit à cor-
pore, invariata substantia, accidens est ejus.
Sic autem se habere ad corpus figuram, & mo-
tum ne ipsi quidem adversarii dissentiant. Hinc
conficio, ignem ab aqua solis figuram, & motu
non distingui, dum enim ignem, & aquam
concipio, non accidentia, sed substantias me-
ras cogito: atqui substantia in suo esse per ac-
cidentia non constituitur, neque, quod con-
sequens est, distinguitur; aliter cum possit
à suis accidentibus separari, & non possit à
suis constitutivis, si idem esset accidens, &
constitutivum, ab eodem posset, & non pos-
set separari. ergo ignis, & aqua per solam fi-
guram, & motum in esse ignis, & aquæ non
constituuntur. maior prob. non enim aliter
ignem, & aquam in suo esse, ac hominem, &
Angelum in suo concipimus, ac definimus.
Quod ipsum sic ulterius ostendo. Dum ignem
cogito, vim cogito motivam, qua caret aqua.
sed vis motiva non est figura, & motus; et-
go aliquid antecedens, natura scilicet ipsa
ignis, quæ alia est à natura aquæ. sola minor
est

est probanda, nam maior ab experientia satis patet. eam verò sic demonstrò. quod est per se inertis, & nullatenus operativum, potest quidem esse virtutis effectus, vis & virtus esse non potest. atqui figura, & motus, si per se & in suis rationibus spectentur, inertia omnino sunt.

Hoc primum est evidens in figura. quis enim unquam potuit rem de inertis actualem facere sola mutatione figuræ? finge materiam Cartesianam nullum motum accepisse à Deo; sed perstitisse immobiles primas illas tesseras à Deo creatas; nunquid si Deus eas sine motu comminuiisset, per se sequè illas conformasset in globulos, particulas striatas &c. per hoc unum vim accepissent se, & alia movendi? non nego, figuram ad vim motivam aliquid conferre veluti dispositionem, quæ motum faciliat; nego, figuram se sola motum non habenti dare posse; & hoc evidens pronuncio.

Rursus evidens non minus censeo, motum ipsum vim motivam non esse. si enim motus à vi motiva à se distincta separatur, nec se ipse potest continuare, nec alia corpora movere. nulla ergo est in motu ipso motiva vis. antequam constet motus naturam consideranti, quæ est, ut sit successiva acquisitio spatii, adeoque ut, dum est acquisitio unius partis spatii, non sit acquisitio, sed potius derelictio alterius. ex quo manifestum est, non posse motum se continuare; ut enim hoc præstet, debet acquisitio unius partis acquisitionem alterius efficere: hoc autem ex duplici capite non potest; 1. quia moliretur interitum suum, 2. quia illam efficeret, dum non est. Quod si motus ipse non potest se continuare in mobili, in quo est, nec posse alia ab eo corpora moveri, est certum intelligenti, nullum corpus movere aliud, nisi & ipsum moveatur.

Ex his jam liquet, præter figuram, & motum varium, esse in elementis antecederet vim

vim motivam, quæ propria cujusquecum sit,
& vel natura, vel à natura manans, arguit in
iis, antecedenter ad figuram, & motum. sub-
stantialem differentiam.

C A P U T III.

De Igne.

HUjus ignis, quem præ manibus habemus,
natura cognitu non est facilis. Illud
primo constat, ipsum esse in continuo motu
sursum versus, & statim, ac accenditur, evo-
lare. Notat id Philof. lib. de juven. & senect.
ubi, ignis, inquit, *perseverat semper siens, &
fluens sicut fluvium: sed latet propter velocita-
tem.* Ratio est levitas ignis major, quam, sta-
tim ac generatur, acquirit, ab eaque supra æ-
rem elevatur. Hinc ut in fluvio ex gravitate
aqua aquam trudit, ita in igne ex levitate
flamma flammam trahit. tractio autem ista fit
ex eo; quod cum ignis, ut d. cam, oleosum
humidum depascatur: partes autem humidi fi-
bi mutuo cohzreant; pars inflammata jam jam
abscissura dum se à sequenti divellere conatur;
eam interea attenuat, & accendit, quæ proinde
statim post priorem abit. Ad hæc corpus hu-
midum sicco insinuaturn, ut oleum ellychnio,
multas circa se habet flammæ partes brevi tem-
pore commorantes, quantum satis est alias hu-
midi partes disponendas, incendendasq; hinc
est necessitas sicci corporis, philti rationem
habentis, per quod humidum diffundatur sen-
sim, ad flammam continendam diutius, & pau-
latim alendam.

Hinc intelligitur, cur ventus, & insufflatio
candelæ flammam extinguat, carbonem ma-
gis accendat. Flamma quidem candelæ violen-
ter ab humido separata, non potest illud am-
plius accendere; & hinc flamma illicò tota

perit, at in carbone ex duplici capite insufflatione fit maior accensio; tum quia in eo multò est maior accensa jam materia in poris latens: quæ dum ab insufflante egredi prohibetur, pergit alias partes accendere tum quia in carbonis superficie multæ sunt cineræ partes liberam igni respirationem prohibentes; iis proinde flatu discussis, augetur per dilatationem pororum exitus, adeoque actio ignis.

Constat iterum, estque consequens admodò dicta, ignem respiratione, & pabulo indigere, nec consistere sine alterutro posse. Respiratione est illa ipsa perennis partium materię ignitarum evolutio; quæ ubi liberum aditum non inveniunt, condensantur à loci constrictione per suum ipsum impetum; & ex hoc circulariter reflexæ, comprimunt, & occludunt materię inflammabilis poros. hinc non possunt reliquæ partes rarefcere, & propterea ab accensione prohibentur, ideò si ignis non respirat, non ardet; & si parum respirat, parum ardet.

Ex hoc ipso est pabuli necessitas, ex quo scilicet novas subindè, ac novas partes attenuet, & educat in avolantium supplementum. Propterea Philosoph. I. c. duplicem ignis destructionem assignat, per extinctionem, quæ dicitur violentia, fitque vel à contrario in frigidante, vel à corpore suffocante, & per marcorem, quæ dicitur senectus, & habetur ex materię, seu pabuli defectu.

Hinc est primò, cur ignem non destruit; sed servat occultatio sub cinere. quia scilicet (verba sunt Philosoph. I. c.) *respirare non prohibetur propter raritatem cineris: Obstat ei, qui in circuitu, aeri, ne extinguatur, copia existentis in se ipso caliditatis*. poterat addi lenta respiratio, qua serius materiam attenuare, adeoque longius vivere cogitur.

Est secundò, ignem, si supponatur existere in sua sphaera; opus ibi pabulo non habiturum.

partes enim non avolarent, sed consisterent in proprio loco. quare nihil esset, cur nova deberet materia subministrari.

Constat denique pabulum ignis esse humidum non aqueum, sed viscosum, oleaginosum, ac pingue. quare depascitur oleum, ceram, picem; resinam, sulfur, &c. ex lignis vero ea sunt igni concipiendo aptiora, quæ de tali humido plus habent. hinc ubi totum corporis humidum fuerit in ignem resolutum, non amplius materia quantumvis calidissima igitur. Vidit hoc Aristot. sec. 3. probl. 25. ubi ait: *Calorem in senibus alimento deficiente marcescere; humor enim alimentum caloris est: senectus autem sicca est.*

His positis, duo supersunt de igne querenda. 1. de ejus qualitatibus. 2. de eius generatione. 3. enim de ejus loco mox discutietur.

Quoad primum, certum est ignem esse calidum, humidum verò, an siccum formaliter sit hoc quidem controversum, sed non nisi de voce. nam si humidum sit fluidum adhaesivum; certè ignis non humidus est, sed siccus. si verò humidum sit alieno termino terminabile, videtur ignis humidus, non siccus, configurat enim se facile ambienti corpori ex sua fluxibilitate. Quare qui ignem in hoc sensu siccum asseruere, videntur falsi à figura conica quam flamma per se assumit: sed eam assumit ab aeris pressione compressa, coactaque evolare; perinde, ut in globum, sicut conum se aer ipse configurat, dum per aquam ascendit: neque aer propterea siccus est.

Quoad secundum dari ignis veram de novo substantialem generationem, neque eam esse vel particularum novum motum, vel evolutionem flammæ latentis, satis puto ex alibi dictis constare tum de rerum principiis, tum de calore. Illud solum in præsentì considero, quod evenit in pulveris pyrii accensione. quod.

libet

libet sanè pulveris granum dum inflammatur . notabiliter plus spatii longè , latèque occupat , quod non defuere , qui ad calculum revocarent . rursus ità in flammam abit totum , ut vix sit ullus cinis superstes : ità quidquid est partium non inflammabilium ab incensis rapitur , ac dissipatur . Hæc porro dilatatio tanto impetu fit , ut , si pulveris eiusmodi notabilis sit copia , quæ incenditur . non modo in bellicis tormentis plumbeas pilas plurium librarum jaculetur , cuius vi muri urbium solo sensim æquantur , sed in cuniculis solidæ turres , ac propugnacula urbium uno impetu diruuntur , quasi ibi fulmina , hic terræmotus ingenio æmulante .

Jam vero nullam in eiusmodi operatione subtilis materiæ motum intervenire , satis ex superioribus liquet . non educi autem in apertum præexistentem in occulto flammam , inde probò , quod flamma ingens , quanta in accensione perspicitur , non poterat alterius generis particulis veluti carcere prohiberi , quominus facto impetu eas per se perumperet , atque avolaret . quid enim tantum flammæ , cuius vi ingentia corpora loco moventur , non posset tenues atomos , quibus ambiebatur , à se amoliri , & libertatem sua sponte nancisci ? Sane si totum ignem ex una parte cum terra , & propugnaculo , quod dissipat , compares : ex altera atomos flammæ cum atomis alienæ materiæ , quibus involui supponuntur ; deprehendes plus virium habere atomos cum atomis compositas , quàm flammam integram , cuius vires sunt illæ ipsæ atomi , cum mole , quàm eruit , compara-
tam .

CAPUT IV.

De ignis loco, & sphaera.

SI de igne nostro usuali sit sermo, probabilem valdè puto Pythagoreorum sententiam, qui hunc non suprâ aerem, sed infrâ terram statuunt, ad eum finem ibi à natura sepositum, ut spiritus calorificos, ac vegetandi vi præditos perpetuò immittens foveat interna terræ viscera, perfectamquè mixtionem, & rerum coniunctionem, generationemque efficiat. Docet autem experientia, eiusmodi ignes plurimos sub terra existere. tum ex eruptionibus ab Æthna, Vesuvio, aliisque Vulcanis, tum ex copia calidissimarum aquarum pluribus in locis erumpente. Nostra rursus Campania ostendit, ubi ignes isti vigent, multum terræ fecunditatis inesse. Alium ignem, eumque maximum, ac perfectissimum in Cælo dari existimo, Solem nimirum, quem naturæ esse igneæ libro superiore probavi. Et hoc quidem meritò, ut tota sublunarium moles intra ignes hinc inde positos staret, quibus scilicet unis præcipua naturæ activitas, & efficacia circumscribitur. sed de his partim libro I. dictum, partim dicetur in tertio.

Præter hos alium ignem suprâ aerem, & infrâ Lunam admittit Aristoteles. sed quid nomine ignis intelligat, satis explicat I. Meteor. sum. I. cap. 4. ubi loquens de loco elementorum hæc habet: *In medio, & circa medium est gravissimum, & frigidissimum segregatum Terra, & Aqua. circa hæc autem, & attigua his Aer, & quod propter consuetudinem vocamus Ignem, non est autem Ignis; excessus enim calidi, ac veluti fervor est Ignis.* Quibus verbis testatur, immediatè infrâ Lunam non esse ignem, qualem

lem hic habemus, sed alium, quem quident nihil aliud esse multi existimant, nisi substantiam tenuissimam, & calidam, quæ propter nullam aut exiguam halituum mixtionem pura, æther appellatur, vocabulo, quod illi ab Anaxagora, & Antiquioribus datum est, Philosopho ipso referente, & non improbante r. Meteor. c. 8.

Utrum vero detur præterea in Lunæ concavo ignis elementaris eiusdem rationis cum usuali, quæstio est in utramque partem ambigua, ut vix certi aliquid definiri possit. Adversus hunc ignem à Peripateticis plerisque assertum arguunt. 1. quia ignis est lucidissimus, & per se visibilis. si ergo nullus infra Lunā videtur ignis, nullus est. 2. ignis natura sua est opacus, ut videre est in flamma prohibente magna ex parte prospectum ulterioris objecti. deberet ergo prohibere siderum conspectum, si ignis in sphaera esset. 3. ignis est maximè calefactivus, & combustivus; adeoque in immensa copia ibi constitutus totum orbem incenderet. 4. ignis indiget pabulo. in sphaera nullum pabulum. ergo in sphaera nullus ignis.

Hæc tamen non obstant. Non primum; quia lucidum non videtur, nisi idem sit opacum, aptumque terminare lucem, & visionem, ut videre est in aere, qui licet illuminatus, non tamen videtur. at verò ignis in sphaera rarissimus esset, ac perspicuus. Non secundum; quia ignis usualis per accidens est opacus, per admixtionem halituum terreorum. Non tertium: quia ignis in sphaera utpotè summè rarus, esset parum activus. accedit, quod ignis non multum agit deorsum, sed sursum versus. Non quartum; ostensum. n. satis est, ignem in sphaera pabulo non indigere.

Contra pro vero igne in sphaera existente arguunt Peripatetici ejus sententiæ authores. r. ex Averroë 4. de Cælo com. 32. Quælibet pars elementi habet totum elementum, ad quod

moveatur. hinc quamvis aquarum Universalitas, mare scilicet non sentiretur, ex hoc quod videmus fluvios omnes ad medium currere, sciremus inter aerem, & terram esse mari locum. Cum ergo videamus ignem omnem moveri sursum, satis demonstratum habemus, ibi esse ignem universum. 2. in tertia aeris regione ignescunt Meteora, & accenduntur Cometæ: non potest autem ratio alia commodior assignari, quam ignis proximitas. 3. non est major ratio, cur reliqua elementa creaverit Deus in propriis locis, & non ignem in suo, qui certe est supra aerem, cum sit ignis aere in specie levior.

Hæc minus adhuc obstant. Non enim primum; quia sicuti descensus metalli, vel alterius gravis ad centrum, non arguit ibi esse universam illius molem adunatam; ita nec ignis ad circumferentiam ascensus. Similiter si nulum mare esset, non propterea aquæ non defluerent; hoc enim habent ex insita gravitate, non quia maiorem quærunt aquam, cui se immisceant. Non secundum, ut ostendetur lib. sequ. Non tertium; tum quia aqua non est in proprio loco, sed infra terram, cuius cavitates implet. tum quia major est ratio, quod satis, superque est ignium in Sole, & caminis subterraneis. quare non oportuit maximam ignis, ac penè fatuam molem (nulla enim eius operatio deprehenditur) intra Lunæ concavum collocare.

Et quidem ex hoc probabilior mihi est sententia negans, verum ignem, & eiusdem rationis cum usuali supra aerem usque ad Lunam esse. cum enim ignea natura sit maximè iniquies, & actiuosa, ad alienum à se usum ibi in summa inertia statueretur. Ad hæc argumentum ductum ab opacitate non est benè solutum; quia non rectè ignis statuitur per accidens opacus, per se diaphanus; perspicuitas enim est

conditio propria mediæ, non principii lucis: cuius est potius, ut sit per se visibile: atque ita reddat alia visibilia. Accedit autoritas Aristotelis loc. cit. & D. Thomæ in 1. Meteor. lect. 4.

C A P U T V.

De Aere.

Quem spiramus aerem, nihil aliud esse multi ex Recentioribus volunt, quàm corporum inferiorum halitus, & effluvia. Sed id credant Bæoti, aut si quis crassior, equidem persuadere mihi non possum, ad spirandum, vivendum, totque alias operationes exercendas, nihil aliud nobis naturam aptasse, quam corporum etiam vilissimorum unas expirationes. Accedit, quod virtus est in aere elastica, ut infra dicam, quæ tamen in corporibus, halitibusque à liquidis, aut solidis corporibus expiratis nulla est. Censeo igitur, aerem per se esse tenuissimum corpus, ætherem scilicet ipsum superiori capite declaratum, ab antiquioribus, & Aristotele ipso agnitum: qui quidem ubi à corporum præsertim aqueorum halitibus impurior evadit, & crassior, aeris nomen subit. Id ergo est aer, æther effluvis plenus, cuius molem undique per gyrum circa terram diffusam Atmosphæram dicimus, vaporum scilicet sphaeram. Jam duplex est de aeris qualitatibus quæstio. 1. sit ne humidus, an siccus. 2. sit ne calidus natura, an frigidus.

Prima facile resolvitur ex dictis de humido, ac sicci varia notione. Si enim humidum sit terminabile alieno termino, aer, qui corporibus cæteris se accommodat, eorumque cavitates, ac poros etiam tenuissimos subit, & implet, humidus est, & quidem magis multo quam

aqua. Si verò humidum sit fluidum adhærere natum, aer humidus non est; neque enim est aptum gluten partium terrearum, sed potius per corpora se ita insinuat, ut faciliè amoveatur locoque cedat ad alterius cuiusvis ingressum. Et quidem non aliter aerem, nisi facile mobilem natura constituit, ut motui scilicet solidorum non multum resisteret, & præterea aptus esset tum ad vacuum prohibendum, tum ad spiritus convehendos, qui mixtis generandis, servandisque sunt necessarii.

Altera quæstio magnis semper dissidiis inter Stoicos, & Peripateticos versata, illis aerem, his aquam primum, summumque frigidum statuentibus, sub iudice adhuc est. Proponam equidem breviter prioris partis argumenta præcipua. Arguitur pro Stoicis primo. unicuique est propria illa qualitas, ad quam, remotis contrariis, se naturaliter reducit. Atqui aer nocturno tempore, remota Solis actione, ad frigus se revocat. ergo frigus est qualitas aeri debita.

Secundò, aer in media regione, quæ ab aqua, & terra, frigidis agentibus, magis remouetur, magis est frigidus; vapores enim ibi in nives, & grandines concresecunt. ergo aer natura est frigidus. Neque dicas, mediæ regionis frigus esse à vaporibus ipsis ad suam se frigiditatem revocantibus. Contra enim est primò; quia in regionibus calidissimis, ubi non multi vapores ascendunt, montium tamen jugis nivibus canescunt. signum igitur est, non à vaporibus, sed ab aere ipso summum esse frigus. 2. quia copia vaporum minor ibi est copia calidorum halituum, qui simul cum aere, si calidus hic supponitur, deberent superare vim vaporum, & impedire frigiditatem.

Tertiò, maxima infrigidatio est aeris effectus. ergo aer est summe frigidus. antec. ex eo patet, quod dum aqua concresecit, superficies, quæ
aeri

aeri vicinior est, eadem est prima, quæ in glaciem constipatur.

Quartò, aqua non est summè frigida. ergo aer est summè frigidus. consequ. videtur recta; non enim superest aliud elementum, cui frigoris origo tribuatur. antec. prob. 1. quia nunquam videmus aquam sibi relictam reducere se, nisi ambiens sit frigidissimum, ad summam frigiditatem. quod tamen deberet posse, si summum frigus est qualitas ipsi naturaliter debita. 2. si aqua per se esset in summo frigida, esset per se naturaliter glaciata. quod sanè absurdum est concedere elemento, quod rerum usui, agrorumque ubertati, ad quam ordinatur, nonnisi fluxile servire potest.

Quintò, aliam ad id experientiam affert P. Ricciolus in Almag. novo lib. 1. c. 31. Crepusculum vespertinum longius est matutino. ratio est, quia halitus per diem calefacti, & rarefacti altius ascendunt. deinde verò per noctem refrigerati, densatique humidiores fiunt, indeque matutinum crepusculum brevius reddunt. Hæc etiam est ratio, cur æstivum crepusculum longius sit hiberno. At crepusculum non est, nisi diei artificialis appendix orta ab Atmosphæra, halitibus reflexione, refractioneque solarem lucem ad terræ superficiem transmittentibus. Ex quo consequens est, ut halitu omnes non solum in secunda, sed & in tertia aeris regione per noctem, remoto calefactivo, frigescent, ac descendant. Halitus autem cum sint natura sua calidi, non possunt se ipsi frigefacere. superest ergo, ut frigesiant ab aere, qui propterea natura frigidus statui debet.

Quæ contra afferunt Peripatetici pro aeris calore, & summa, primaque solius aquæ frigiditate, multa sunt, sed non omnia rem æquè conficiunt. Mihi sanè, ut aerem calidum potius, quam frigidum statuam, eiusdem nativæ rari-

tas, & levitas probat. Cum enim istæ calorem agnoscant, ut propriam causam, calidum aerem ostendunt, tanto magis, quod frigidum eum esse nullo satis argumento suadetur. Quod verò primum frigidum sit aqua, demonstrat experientia, qua docemur, aquam in maris penitissimo fundo, ubi maxime removetur à contrario calefaciente, ad summum frigus reduci. Testatur id Robertus Boyle, eruditissimus author, in tractatu *De Temperie submarinarum regionum*, ubi refert, plurimos à se nautas, & urinatores interrogatos, falsos omnes pariter esse, intollerabile percipi frigus in maris imo, eoque maius, quò ad fundum magis acceditur.

Sed hic adverto, non esse mihi sermonem de aere, prout hoc nomen stat pro æthere à vaporibus impurato; hic enim sequitur potius vaporum naturam, qui aquei sunt adeoque frigidi, aeremque, cui miscentur, pro secundaria qualitate non multum pugnantiem facile ad frigus trahunt, Stat ergo pro æthere ipso secundum se spectato, & à vaporibus præciso, quæ ratione probabilius videtur ad calorem potius, quam frigus natura factum.

Post hæc difficile non erit Stoicorum rationibus respondere. Ad 1. reductio illa aeris nocturni ad frigus non aeris naturæ, sed mixtis vaporibus substantialiter aqueis tribuenda.

Ad 2. in eadem causam revoco frigus mediæ regionis. Neque obstat primum, imo probat oppositum; à maiori enim calore plus vaporum elevatur. & præterea solvendum est ab adversariis; si enim tam modici ibi vapores, unde tanta nivium copia, quarum materia vapores? Neque obstat secundum; calidi enim halitus altius evolant, relictosque inferius vapores ad suum frigus redire permittunt.

Ad 3. nego antec. cuius probatio solum conficit.

ficit, à causa extrinseca in aëre existente perfecti glaciationem. hæc autem non solum est frigus; aquæ connaturale, sed etiam siccitas aquæ contraria, quæ proinde ut inducatur, causam requirit externam, prius in superficiem, quam in intima aquæ actione sua pervadentem.

Ad 4. jam est probatum, aquam à contrario remotam, ad summum se frigus revocare. Neque hinc fit, aquæ nativam fore congelationem; male enim supponitur ad hanc satis esse solius frigoris vim; cum tamen sit superius ostensum, ad hanc concurrere non minus debere siccitatem, quæ aquæ naturalis non est.

Ad 5. responsio est facilis; nego enim, habitus in tertia regione existentes per noctem frigescere. descendunt ii quidem ad descensum vaporum, qui uni frigore densantur; cum enim iis suo pondere incumbant, ac sustententur, quævis vaporum Atmosphæram contrahit, eadem calidos halitus nihil etiam frige factos descendere cogit.

C A P U T VI.

De Aqua, & Terra.

PAUCA de his supersunt, & vix aliquid discussionis indigum. Constat primò ex jam dictis, aquam non frigidam solum esse, sed summè frigidam. Constat secundò humidam esse; sed si humidum sit alieno termino terminabile, non esse summè humidam: si humidum sit fluidum adhæsiuum, esse humidam in summo, non solum comparatam cum reliquis elementis, sed fortassè etiam absolutè, quamvis enim alii liquores propter suam viscositatem videantur magis adhærere, in vitamen insinuandi se in poros corporum, atque illis

hærendi, in qua propriè vi stat humiditas elementaris mixtioni necessaria, vix est humor, qui aquam superet.

Terra deinde sicca est. quare in sacris Literis Arida nuncupatur. imò est per se omnis omnino humiditatis expers; alia enim corpora quamvis duriora sint, ut lapides, & metalla, non tamen sicciora; quia ex illis humiditas exprimitur, & liquefcunt: quod puræ terræ non contingit. in quo illud advertendum, dum dicimus, humidum esse siccorum vinculum, non ita generaliter intelligendum, quasi nihil continuetur, nisi per humidum; ut enim partes humidi possunt se ipsis continuari; ita & partes ficci. Sensus ergo est, siccio esse partes physicè minimas, ab intrinseco continuatas, quæ invicem præterea conjungi non possunt, nisi humido interveniente.

Quod attinet ad aliam terræ qualitatem, sunt, qui putent, eam esse calidam, quod censeant scilicet cum Keplero eam esse animatam: nulla est autem sine calore vita. Sed hoc commentum est prorsus inane; nam ex eodem capite deberet statui humida, quia nulla est pariter sine humido vita. Hoc igitur ex communi consensu habemus, terram per se potius esse frigidam. quamvis enim ab experientia non constet, calorem, an frigus sibi relicta, & contrario omni remoto, acquirat; quia tamen frigus videtur aptius infimo, tardissimoque elemento, frigida verosimilius asseritur.

C A P U T VII.

De mutua transmutabilitate Elementorum.

Elementa esse omnia invicem transmutabilia, probat Aristot. 2. de gen. à tex. 23. à priori. Universim quolibet A. potest alterare B per

per qualitatem ipsi A debitam, & B contrariam, potest etiam B corrumpere, introducendo in materiam B formam suam. Sed omnia elementa possunt in se mutuo agere per contrarias qualitates, ignis v.g. introducendo in terram, vel aquam calorem, qualitatem nimirum uni ipsi in summo debitam, illis verò contrariam. ergo potest in aquam, & terram inducere suam formam; adeoque quodlibet elementum in quodlibet mutari potest. maior est certa; quia rigorosa alteratio, quæ est contrariæ qualitatis introductio, via est ad generationem, eam maximè, quæ est productiva formæ, cuius est proprietas qualitas introducta. minor autem constat ex alibi dictis de natura qualitatumistarum.

Rursus asserit t. 15. difficilius, ac tardius elementum converti in asymbolum, quam in symbolum. asymbola sunt elementa, quæ utraque qualitate discordant, ut ignis, & aqua, aer, & terra: symbola, quæ conveniunt in altera qualitate, ut ignis, & aer, aqua, & terra. Probat facilius enim est unum, quam multa mutare. atqui in mutatione symbolorum una dumtaxat qualitas est mutanda: duplex in mutatione asymbolorum. facilius ergo asymbolis symbola transmutantur. Neque dicas, transmutari quidem duas qualitates, sed per actiones duarum. eadem autem est proportio unius ad unam, quæ duplicis ad duplicem qualitatem. Nam contra est: quia humiditas, & siccitas licet statutz superius sint qualitates activæ, sunt tamen activitatis exiguz, & resistentiæ multò maioris. quare ad agendum juvantur à calore ipso, ac frigore, quæ proinde dum in geminas qualitates efficiendas, alteram ex toto, alteram ex parte vires distrahunt, minus valent, ac difficilius progrediuntur.

Dices ad probandam impossibilem transmutabilitatem asymbolorum. Igni in aqua

calorem, & siccitatem producit successivè, & in tempore. ergo prius producit eas qualitates in gradu temperato, dum autem sunt istæ temperatæ, habetur jam dispositio ad formam mixti, quæ proinde prius introducatur oportet, quàm ad ignis productionem deveniatur; adeoque non est possibilis in his transmutabilitas immediata.

Resp. 1. ad mixtum non satis esse primarum dumtaxat qualitatum temperiem; sed requiri insuper mixtionem substantialem corporum elementarium. 2. & melius: ad mixti generationem non sufficere solam primarum qualitatum temperiem, sed requiri insuper virtutem specialem, ac propriam cuiuslibet productivam, ut infra dicitur; quæ virtus cum non semper in promptu sit, non semper habetur mixti generatio.

Hæc quidem ut à ratione veluti à priori, & ab experimentis alibi adductis confirmata, bellè procedant; non tamen certa sunt ab experientia id ipsum in suis terminis ostendente. quis enim unquam vidit ex aere, aqua, aut terra ignem fieri, aut è converso? Certè Aristoteles ipse 4. de gen. anim. tomo sup. citatus, aquam asserit, ubi ad certam caloris intensiorem devenit, non amplius calefieri, sed attenuari, rarefieri, & in vaporem evanescere: quod ibi rejeci in resistantiam ab aquæ substantiali forma proveniente, ulteriorem caloris gradum invicta vi repellente. Ad hæc terra tam contumax est adversus ignem, ut per nullam caloris activitatem corrumpatur unquam, aut minuatur. Hinc quod Chymistæ caput mortuum, seu terram damnatam appellant, quodque vel terra estelementaris, vel ad hanc proximè accedit illud per nullam caloris licet vehementissimi actionem resolubile quotidie experiuntur. Quod si aqua in terram, aut hæc in aquam mutari posset, quid ni, dum miscen-

tur,

tur, id experimur? cur mare fundi arenam in suum humorem non trahit? cur aer circumstans flammam, eam non alit?

Hæc cum ita sint, aut fatendum possibilem quidem, se longè difficillimam esse elementorum mutuam transmutationem, dum extra mixtionem in sua mole non comminuta, ac permixta perseverant: aut fatendum, dum istam transmutabilitatem asseruit Aristoteles, non aliud voluisse, nisi hanc possibilem ostendere, quantum est præcisè ex distributione, & activitate primarum qualitatum. Cæterum, quia potest cum hoc stare impossibilitas ejusdem transmutationis ex alio capite, ex resistantia scilicet formarum elementarium, impediens, dum in sensibili mole seorsim existunt, progressum alterationis destructivæ; non puto, Aristotelis doctrinæ adversarium, qui ex hac uno elementa concedat mutuo transmutari non posse. Quia verò ex altera parte experientia, quæ in contrarium asseruntur non sunt omnino manifestæ (unde enim constet, nullam cineris, nullam aeris, aut aquæ ardentissimæ fornaci injectæ particulam in ignem verti?) & ratio non minus, quam authoritas Aristotelis, omniumque Peripateticorum pro elementorum mutua transmutabilitate pugnat accerrimè, ab hac sententia censeo non recedendum, idque tantò magis, quod aquæ, adversus ignis actionem contumacissimæ, ignem quandoque aluisse narrentur. In eruptione liquidæ Vesuviana, anno huius seculi primo supra trigesimum, proximum littus ad multos passus exsiccatus est, monte aquas exsorbente, & igneas vomente. Simile de flammis in Chimeræ Lyciæ Monte aqua accensis, ac nutritis Plinius refert.

C A P U T VIII.

De Mixtione .

Ubi ,

An Elementa sint formaliter in Mixto .

Mixtio alia vulgaris, & impropria, quæ & dicitur materialis, atque habetur, cum duo corpora in minutissimas partes concissa, invicem ita commiscantur, ut unum ab altero per sensum distingui nequeat: sed ut simul unum in alterum non agat, illud alterando, vel in se transmutando. sic juxta veteriorem sententiam vinum, & sal miscentur aquæ. Alia est mixtio propria, & stricta, quæ dicitur formalis; & habetur, cum corpora modo dicto commixta, se insuper mutuo alterant: Sic miscetur aqua calida cum frigida. Hoc pacto accepta Mixtio definitur 1. de gen. tex. ult. *Miscibilium alteratorum unio*. Neque verò circulus hic committitur, ut aliqui Aristoteli objectant, quod declarat *Mixtionem* per *Miscibile*, quod rursus declarari nisi per mixtionem non potest. Etenim *Miscibile* Philosophus antea, & non per mixtionem definiverat, dicens, *Miscibile esse*, quod cum faciliè dividi possit, passivum est, & activum.

Ex his porro constat, omnia elementa posse invicem misceri formali, & stricta mixtione. Et quidem quod misceantur aqua, & terra, in luto est manifestum. aer etiam, & ignis sese poris corporum insinuant, & reliquis elementis confunduntur, ut infra notum fiet. Quod autem ista se alterent, constat, & ab experientia, & à ratione, qua probatum est alibi, dari actionem, reactionemque inter contraria.

Deindè elementa sæpè ita miscentur, ut nullum de novo mixtum generetur, sed ipsa tantum integra mancant: Mixta verò, quæ ex

eorum mero confluxu resultant, imperfecta appellantur. patet hoc in luto, in grandine, aliisque Meteoris, in quibus similis est illi mixtio, quæ in artificiosa ciborum, pharmacorumque compositione apparet. Et in his quidem mixtis elementa, ut dixi, integra, & cum propriis formis substantialibus manent; ex quo habent, ut modicum durent, & facile dissolvantur. Ratio est vel à materia, vel ab efficiente. à materia quidem; quia elementa vel non omnia, vel non perfecte miscentur, h. e. non in partes minutissimas concisa, ab efficiente verò; quia præter qualitates elementares censeo requiri ad mixti perfecti generationem propriam, ac specialem qualitatem singulorum productivam: quæ ubi desit, nulla est nova mixti generatio. Profectò enim elementa non per se, sed per accidens, ac præter intentionem particularis ipsorum naturæ sunt causa mixtionis, & mixti, quare nec ipsa, nec virtutes ipsorum sufficiunt ad mixtum efficiendum, sed requiritur causa per se: nec potest commodior tradi, quam virtus seminalis cuiusq; propria: & hæc rursus præstò sæpè est allata à spiritibus à mixto olim evaporatis, servatisque in aere, tanquam in communi seminario: qui ubi congregantur, quæ sunt opus ad mixti generationem, mixtum producant: fecus verò elementa intacta perseverant.

At dum mixtum perfectum est, nova in eo substantialis forma generatur, ut liquet ex fusè disputatis tom. sup. adversus Atomistas. Num verò in his etiam elementa maneant formaliter, h. e. secundum proprias substantiales formas; an tantum virtualiter in forma scilicet nova mixtionis, elementorum virtutes refractas exigente; quaestio est inter Peripateticos ipsos agitata; quam Aristoteles in elementi definitione dubiam reliquit. Averroes, Avicenna, atque post hos & Philosophi, & Medici

dicij pro existentia elementorum formaliter in mixto pugnant. Maior tamen, ac melior. Peripateticorum pars cum D. Thoma, Scoto, Gregorio, Suario, stat pro sola virtuali elementorum in mixtis inexistencia: imò & pro hac etiam videtur stare Aristoteles ipse 1. de gen. 1. 84. & 2. de part. anim. c. 1. apud P. Maurum hic q. 42. Sed media, quam in it idem Maurus, via probabilior multò videtur, & omnino verior.

Itaque dicendum primo in mixto quà tali formas elementorum non permanere. Aut enim nova mixtionis forma recipitur in materia alia à materia elementorum; atque ita mixtum ex elementorum mixtione non resultabit, sed per accidens cum illis coniungetur. Aut recipitur in materia ipsa elementorum; atque ab hac elementares formæ discedant oportet; quia ex alibi probatis eadem materia plures simul formas naturaliter non suscipit. Accedit, quod frustra manent elementares formæ, accedente forma mixti perfectiore, in cuius scilicet virtute illæ continentur.

Dices. Mixtio non est corruptio; quæ enim corrumpuntur, cum non sint, misceri non possunt. si ergo elementa in mixto non sunt, sequitur ea non misceri, nec mixtum ex ipsorum mixtione, sed corruptione resultare.

Resp. mixtionem non esse, sed trahere corruptionem. ipsa enim est unio alteratorum, quæ dum sunt alterata, non sunt adhuc corrupta, quamvis sint in via ad corrumpi. quare miscentur elementa, dum sunt. deinde verò per actionem agentis proportionati transeunt in mixtum, hic ipse porro transitus solet mixtio appellari denominatione desumpta à mixtione, quam præsupponit.

Dices iterum, hinc sequi, ut elementa non component mixtum, sed mutantur in mixtum, ac proinde non esse elementa. quis enim lignum appellet elementum ignis, in quem con-

convertitur? Sed huic instantiæ tactum est satis
c. i. ubi notionem elementis attuli, & declaravi.

Dicendum secundo, manere tamen intra
poros mixtorum, localiter cum iis coniunctas,
plurimas elementorum particulas, in quibus
elementares formæ intactæ manent. Hæc asser-
tio, pro qua faciunt pleraque Averroistarum
argumenta, ab experientia multiplici, & à ra-
tione etiam constat.

Principio corpora etiam frigidissima per
mutuam attritionem incallescunt vehementer:
quod non alia ratione contingit, nisi quia
igneæ particule in poris latentes per attritio-
nem agitantur, & simul adunatæ nativum cal-
lorem reparant; unde & calefaciunt, & non
rarò propterea accendunt. Non posse autem
præter hanc, aliam causam commodè tradi, pa-
tet ex disputatis de natura caloris? Neque enim
potest assignari motus ipse: quod præter ibi di-
cta adversus Cartesium, multis probat Cabeus
1. Meteor. t. 16 q. 1. nam & ferrum candens in-
citatisimè motum refrigeratur; & rota dum
movetur, incalescit secundum axem, cum ta-
men curvatura; moveatur licet magis; mini-
mum caloris concepiat. dum lima politur fer-
rum, lima movetur, & ferrum stat. ferrum
tamen, non lima incalescit. Aqua velocissi-
mè mota, fractaque per saxa, manet frigida:
& glacies attrita, agitataque, quam ambit
aquam, frigefacit. Manifestum ergo est, à
motu calorem non effici, nisi per accidens,
quatenus attritione agitatur, & coadunatur ignea
corpuscula in poris latentia.

Idem conficiunt, quæ in oculis apparent
scintillæ, dum fortius atteruntur: idem scin-
tillæ ex festum pilis, aliisque multis corpori-
bus emicantes, dum manu colliduntur in tene-
bris. Id ipsum probat ignis ille fatuus homi-
num capitibus quandoque insidens: ejus rei
insigne est exemplum apud Fromondum in

Meteor. de quodam, in cuius capite, quoties aperiebatur, flammula conspiciebatur. Hoc demum ostendunt scintillæ, quæ ex chalybis, ac silicis attritione excutiuntur, quæ nihil sunt aliud, si credimus Poetæ philosophanti, quàm *Semina flamma abstrusa in venis silicis*. Neque enim de novo generantur, cum non sit causa, à qua possint generari.

Quod dictum est de igne, dicendum de reliquis elementis, aer enim poros mixtorum undique permeat. aqueæ autem, ac terræ particulæ illæ, quæ faciliè exprimuntur ex mixtis, probabilius illis formaliter inerant, ac latenter immiscebantur.

Ratio etiam id confirmat, in mixtionem enim non omnia elementa ità minutatim conciduntur, ut per actionem agentis valeant in mixtum transmutari: sed aliquæ partes manent in tanta mole, in qua possint formam suam conservare: & contrariæ actioni resistere, quod explicat P. Maurus exemplo cibi à vitali potentia non semper secundum omnes partes concocti, digestique, ut possint in aliti substantiam commeari, ità scilicet elementares particulæ non omnes formæ mixtionis aptantur, sed aliquæ manent indispositæ, substantiamque suam incolumem retinent.

Q U A E S T I O T E R T I A :

De Virtutibus Elementorum motivis.

C A P U T I.

*Utrum Elementa moveantur
motu recto.*

ANtequam de motivis elementorum virtutibus inquiri, motus ipse examinandus, qui quidem cum secundum substantiam indubitabilis sit (quis enim sanus ambigat, moveantur, necne elementa?) dubius tamen est secundum qualitatem, sitne rectus, an circularis, Galilæus enim in suis Dialogis de systemate Copernicano multis agit & rationibus, & contumeliis adversus rectum elementorum motum, contenditque nullum motum eiusmodi à natura esse. Equidem missis, quæ ille in authores se citrà dubium meliores jactavit præter jus, fasque convicia (id nos magno illi ingenio, de reque literaria egregiè meritò facile condonamus) argumentorum dumtaxat rationem habeo.

Principio tantum abest, ut motus rectus à natura non sit, ut hic unus sit à natura, si vera sunt, quæ alibi de motu circulari disserui, ostendens naturalem esse hunc non posse. Cum enim nullus huic terminus sit præstitutus, qui circulariter movetur, semper movetur, asserere autem corpus à natura semper in motu, perinde est, ut animal constitui à natura semper in desiderio: cum tamen certissimum sit, si nihil est, quod tandem in quiete obtineatur, nihil pariter esse, quod desideretur. Sed illud mihi præ cæteris efficacissime rem istam probat; quod motus circularis, de quo in præsentia est transitus de loco ad locum eiusdem

dem planè rationis . atqui talem transitum esse à natura non posse, demonstrat intrinseca cuiusque propensio ad propriam perfectionem acquirendam , dum ea abest, & ad quiescendum, in ea, dum adest . Moveri autem à bono ad bonum eiusdem planè rationis, est re ipsa moveri ad bonum præhabitu, & relinquere, quod acquiritur, & acquirere, quod relinquitur . quis autem naturale hoc asserat, ut motu quærat id ipsum, quod quiete jam possidetur? Si tibi sint centum auri; nunquid recte, prudenterque laborabis, ut eos amittas, & alios centum eiusdem plenè valoris, & ponderis adipiscaris? Appetitu autem innato id unum res quærent, quod quærent, si prudentiam haberent; ut ait egregiè Aristoteles . Postremò rectum elementorum motum sensus ostendit . At enim corrigendus est sensus . Ità est, dum efficax ratio oppositum intellectui persuadet; sed id meritum non esse rationibus Galilæi ostendere jam pergo .

Primò igitur arguit . Motus rectus si est, non semper est; ut enim probat Aristot. nullus motus rectus potest esse perpetuus, & infinitus, sed proprium hoc est motus circularis, ergo motus rectus à natura non est . prob. contr. natura est principium motus . ergo semper, ac est natura, debet esse motus: vel si quando est natura, & non motus, motus non est à natura .

Secundò, omne, quod est à natura, est perpetuum . motus ergo rectus, qui non est perpetuus, non est à natura . ant. prob. proprium est violenti, ut durabile non sit, naturale igitur ut violento oppositum durabile sit oportet, adeoque perpetuum .

Tertiò, si daretur motus rectus . duplex is esset, alter deorsum, & ad centrum per gravitatem, alter sursum, & à centro per levitatem . Nunc sic . gravitas movet sursum . ergo mo-

tus

tas deorsum non est à gravitate. ant. prob. si terra esset diametraliter perforata per centrum, & per istuc foramen lapis deiceretur, ultra centrum progredieretur ascendendo: idest videre est in pendulis, & motu gravium reflexo. ergo gravitas movet sursum.

Quarto, terra movetur circulariter. ergo gravia, & levia dum moventur ad terram, vel a terra, non moventur rectà, sed circulariter.

Resp. ad 1. Naturam esse principium motus. vel quietis. quare semper, ac est natura, debet esse motus, vel quies. hinc dum est grave extra proprium locum, à natura habet, ut moveatur? dum est in proprio loco, à natura habet, ut quiescat.

Ad 2. dist. antec. quod est à natura ultimò, & per modum finis, concedo: quod est à natura per modum medii, nego antec. ad prob. dico, nullum violentum esse perpetuum, sed hinc non fieri, ut omne non perpetuum sit violentum; hoc enim genus conversionis in nullis summulis invenio; imò est aperte falsum, tum in aliis materiis (non enim sequitur, nullus Æthiops est albus, ergo omne non album est Æthiops) tum in materia præsentis; nam me videre obiectum A perpetuum non est, neque idcirco est violentum.

Ad 3. resp. motum illum sursum vel non esse à gravitate, sed ab impetu, quem gravia concipiunt, dum descendunt, ut fert communis opinio: vel esse à gravitate non per se, sed per accidens, ut infra declarabitur.

Ad 4. nego antec. de quo vide dicta lib. 1. Nunc adverto, aliud esse, non afferri rationes efficaciter probantes terram in centro Universi quiescere: aliud efferri rationes efficaciter probantes terram moveri. primum afferunt omnes Copernicani suum systema in hypothesim assumentes, quæ omnia Mundi phænomena explicantur: alterum fortasse nemo, nisi Galileus,

laus, aut pauci ii, quibus ejus autoritas imposuit. Cæteri vident, quàm frivola sunt, quæ directè afferuntur ad probandam hypothesim; quod enim hæc salvet phænomena, argumentum non est sufficiens ad veram hypothesim astruendam, si simul probetur, eadem in aliis hypothesebus non salvari.

C A P U T II.

An gravia moveantur ab intrinseco per virtutem accidentalem ipsis inherentem.

§. I.

Gravia deorsum ab intrinseco moventur;

Conclusio est primò contra Gilbertum, cui assentitur Gassendus, & alii, motum gravium deorsum, ut levium sursum ad magnetismum terræ referentem; quemadmodum enim magnes ab una facie, seu polo ferrum ad se trahit, ab altero repellit, ita tellus, quam ingentiscuiusdam magnetis instar concipit, gravia ad se rapit; levia à se removet. Est secundò contra eos, qui talem motum à pressione aeris incumbentis profectum volunt. Est tertio contra Cartesium descensum gravium eò reiicientem, quod cælestis materia jugiter agitata, dum recedere conatur à centro sui motus, alia corpora infra se deprimat, perinde ut, qui omnia corpora gravia esse volunt, suber aquæ immersum ab aquæ pressione sursum ascendere, seu potius trudi censent. Ut ergo firmetur conclusio, quæ est Aristotelis 4. de Cælo tex. 24. ubi, *Grave, inquit, & leve in se ipsis videntur habere principium motus*; quæ aliud sentiunt opiniones, aggrediendæ seorsim sunt.

Pri.

primò aduersus Gassendum, & Gilbertum ostendo descensum gravium non esse à terræ magneticis substantialibus effluviis. 1. quia vel effluvia impingunt in plenum, vel in vacuum corporis gravis. primo modo illud non deorsum, sed sursum impellunt, secundo modo nec sursum, nec deorsum; habent enim liberum aditum: adeoque nullum motum valent corpori imprimere. Neque dicas, effluvia eiusmodi esse atomos uncinatas, quæ per vacuos gravis poros ingressæ, reflexæque hinc inde intrà proportionatas cavitates vim trahendi ad terram corpora obtinent. ut enim reliqua nunc mittam, id unum quero, quæ ratione effluvia sursum evolatia, invento gravi, eique uncinis suis adhærentia, illud valeant ad terram trahere? non enim per se id possunt, si eorum motus est sursum. non terra id præstat; posset enim ab Atomistis potiori iure inquiri, quod ipsi sæpè à nobis, quo pacto novit terra longe posita, atomos suas iam grave invenisse, iam satellitum more alligasse; ut novam tum demum iisdem vim imprimat, quæ possint fugitivum retrahere? Rursus quibus manibus, aut alio instrumento terra & atomos suas, & gravia ad se trahit? quod si insita vi id præstat, cur negatur insita vis gravibus ipsis, ut ad terram descendant, quæ quidem vis facilius intelligitur?

Deinde si grave à terra magneticè trahitur, deberet efficacius, velo cuiusque trahi, dum terræ vicinior est; omne enim agens plus agit in propius, quam in remotius passum. atqui omnia æqualiter gravia (sicætera quoque paria sunt, præsertim figura) in principio sui motus æqualiter moventur, æqualiter in decursu accelerantur, sive propè, sive procul à terra moveri incipiant. ergo non trahuntur à terra. antec. est manifestum ab illa ipsa experientia, qua docemur gravium accele-

ratio

rationem, quæ quidem non acquiritur, niſi per motum. hinc fit, ut ſi in valle conſtitutus ſaxum manu excipias ex modica altitudine ruens, non plus impetus ſenties, quam ſi idem excipias in altiffimo montis vertice ex eadem altitudine cadens.

Postremò in hac ſententia. leviora eſſent graviora, & è converſo. Nam graviora ſunt, quæ, cæteris paribus, citiùs deſcendunt: leviora, quæ tardiùs. Rurſus leviora ſunt, quæ faciliùs, adeòque citiùs trahuntur: graviora, quæ difficilius, adeòque tardiùs. ſi ergo deſcendere eſt trahi, leviora citiùs deſcendent, graviora tardiùs; & per conſequens leviora erunt graviora, & è converſo.

Minùs adhuc probabilis eſt altera ſententia: motum gravium in aeris preſſionem reiiciens, nam 1. vel aer ſtatuitur ab intrinſeco gravis, vel ab extrinſeco. primum non dicitur coherenter; quid enim gravitatem auro v. g. ablata aer concedas? alterum ſi dicatur, de alio corpore inquiretur aerem premente; atque ita vel ibitur in infinitum, vel ad corpus devenietur per ſe grave. 2. ſi totum pondus eſt à ſolo aere, tota vis ponderis meſurabitur ab aere incumbente; adeòque ea erunt graviora, quibus plus aeris imminet. hoc autem eſt aperte falſum; plus enim gravitat auripondo quamvis in exigua mole, quam laminæ cupræ ſemilibra; huic licet multo plus aeris impendeat. 3. ſi motus deorſum eſſet ab uno aere, nullum grave moveretur. probo hanc conſequentiam; quod enim dicimus grave, ſupponitur nullam habere vim internam, qua deorſum impellatur. non poſſe autem impelli ab aeris ſeu gravitate, ſeu elaterio, ex eo patet, quod quantum habet virium pars aeris ſuperior ad impellendum deorſum, tantundem habet virium pars inferior ad ſuſtentandum corpus, prohibendumque motum. ut conſtabit ex iſſrà dicendis de elementorum
gra.

gravitatione. æquilibratis ergo utrimque viribus, nullus motus sequi potest.

Sententia porro Cartesii multa habet à veritate prorsus aliena. 1. supponit motum terræ vertiginosum alibi reiectum. 2. si tam subtilis materia, quam terrestris, & globosa in gyrum agitantur, non est, cur illa efficacius moveatur, atque isti prævaleat; cum potius experientia doceat, solidiora, & maiora corpora motum velociorem, fortiolemque concipere, ut quisque potest experiri proiciendo lapillum & arenæ granum. 3. explicari non potest major, & minor gravitas; ab eodem enim ætherio pulvisculo est idem impulsus; reliqua elementa eiusdem prorsus sunt in omnibus rationis. eademque in omnibus est propensio ad motum, seu verius in omnibus nulla, sed omnimoda ad motum quemvis indifferentia. dicere autem; quod corpora compactiora, ac graviora minus conantur recedere à centro sui motus, & proinde citius detruduntur, est hominis ad libitum philosophantis, imprimientisque corporibus, ac tollentis ex arbitrio propensiones. Qui plura de his volet, legat Magnanum Phil. Nat. c. 35. à n. 167.

Post hæc Aristotelis sententia probanda est primò ex aliarum sufficienti reiectione. 2. à priori; unicuique rei debetur naturalis proprietas, & præterea virtus eam reparandi, si fortè ab extrinseco ea violenter spoliatur. locus autem deorsum proprius est, ac naturaliter debitus gravi. debuit ergo grave à natura instrui viribus, quibus possit locum suum reparare, si quando ab eo removeatur.

§. I I.

*Ut habeant gravia motus sui adequatum in se principium, debent tamen ad illud ab extrinseco, à corporis scilicet subje-
cti levitate, determinari.*

IN prima huius asserti parte convenio cum Magnano ; eamque sic probo . si Deus ante rerum exordium lapidem unum in immenso illo inani creasset ; certe lapis in tantam gravitatem habuisset, atqui lapis tunc in motum nullum potuisset erumpere ; nullum enim tunc centrum, nulla peripheria, quam ad illud acquirendum relinqueret . Manifestum ergo est, ad motum solam gravitatem non sufficere, sed opus esse extrinseco corpore determinante . Hinc etiam tomo superiore dixi, corpus in vacuo nullum motum vi gravitatis habiturum ; quod ipsum ex dicendis amplius constabit.

In altera parte à Magnano dissentio : Censet hic author, determinativum gravis ad motum deorsum esse mutuum occursum efflu-
viorum hinc à gravi, inde à terra emissorum . Hoc ut explicet, ac probet, sumit ab experientia, cognata quædam esse corpora, quæ mutuo immediato contactu ita se commovent, ut spiritus unius ad alterum, & vicissim confluant, Sic virga ex solido auro erecta, si ima tantum sui parte subiectum mercurium tangat, ascendit is statim per totam virgam, eamque non extrinsecus tantum, sed totam intus pervadit, occupat, inficit . Sic sponsia prius aqua imbuta, tum compressa, emissioque humore iam inanis, si filo suspensa sublimis teneatur, ita ut ima sui parte subiectam in vase aquam tangat, paulatim madescet, ascendente aqua & totam implente, Sic ubi duæ phialæ, quibus certi in
sunt

sunt liquores, nempe spiritus salis, & spiritus ammoniacus, sibi mutuo admoventur, illico, ut docet Boylius, densior è liquoribus fumus erumpit.

Sumit deinde ex mutuo contactu spirituum è corporibus evolantium determinari posse ad mutuum accessum corpora ipsa mediata se tangentia. Hanc propositionem non alia probat experientia, quam ea, quæ controversa est non minus, quam præsens, attractione scilicet magnetica, & electrica, quam reiicit in mutuam cognatorum corporum sympathiam à spirituum actione sese ad conjunctionem localem impellentium. Tum pergit modum exponere, quo spiritus sibi invicem occurrentes, ac sollicitantes, mutuo implexu secum, & cum corporibus catenati, fontes suos vicissim admovent, & coniungunt.

Si ita Peripateticus aliquis philosophatus, in Magnanum incidisset, quæ non convicia meruisset, quod ad occultas sympathias recurrat, quod amicitiam inter inanima statuatur, quod res physicas non physicè tractet; aliaque huiusmodi, quæ solent Atomistæ Peripateticis obiicere; & hic Magnano obiicit author Burgundicæ Philos. eiusmodi doctrinas vocans, *balbutientis Philosophia ludibria*. Sed hæc à nobis non expectet; qui doctrinas istas passis ulnis amplectimur, utpote Aristotelico systemati faventes maximè. hinc enim alibi confeci corporum simpliciter dictam corruptibilitatem, qualitatumque accidentalium novam productionem. quid enim cognata corpora à mutuo contactu quærant? non defensionem à corruptione, quam atomi ipsa componentes non timent: non perfectionum communicationem, quas nullas habent distinctas per productionem participabiles. quid ergo? Si servanda sit sympathiæ, & amicitiae analogia; hæc sane in bonorum communicatione

mutua magnam partem consistit; unde illud proverbii loco jam tritum, *Amicorum communia*. Mirum est porro, quod hic author elementorum fictas pugnas, ac rixas alibi deridens, & propter eas assertas Peripateticos traducens, hic corporum naturales amicitias statuatur, quasi non plus repugnet inanimis amor, quam odium. Audiatur ipse adversus lites elementorum dimicans Phil. Nat. cap. 13. propos. 17. n. 2. *Non alia de causa censuit vulgus esse potius odia, & jurgia inter elementa, nisi quia putavit huic ab illo reciprocè esse perniciem. Sed jam ex propos. 4. habemus, ignem, aquam, &c. quibus convenit elementis ratio, esse incorruptibilia, adeoque nullam huic ab illo timeri posse cladem. ergo. Audiatur nunc, quæ vulgus in ipsum regerit. Nullum est odium, nulla inimicitia, ubi nullus cladis timor. ergo nullus est amor, nulla amicitia, ubi nulla salutis, alteriusvè boni spes. ut enim odii motivum est malum suum, ita & suum bonum amoris. atqui incorruptibiles atomi, ut nihil mali timent, ita & nihil boni ab aliis vel similibus, vel dissimilibus expectant. ergo. Sed ista obiter, & extra rem præsentem dicta sint.*

Revoco nunc me, & ad gravitatem venio: Transmissis, quæ de corporum sympathia generatim dicuntur, duo sunt, quæ istam mihi sententiam improbabilem faciunt. 1. quia cogitur asserere, efficacius, adeoque velocius moveri grave, dum terræ vicinius est, quam dum est ab ea remotius: quod est contra experientiam §. sup. adversus Gilbertum inculcatam. 2. quia inde fieret, ut terra non in centro universi, sed alibi consisteret, adhuc gravia ad eam moverentur. quod quidem licet asserant Copernicani, non tamen Magnanus. quicumque ergo terram in centro universi statuimus, eamque ibi non per accidens (quid enim per accidens esse possit perpetuum in natura?)

terra?) sed per se stare immotam asseveramus, illud fateri cogimur, centrum universi idem esse centrum, ad quod motu suo gravia omnia properant, ut se circa illud pro cuiusque vi motiva disponat. quare si terra divinitus elevaretur, ac transferretur aliò violenter ibi staret, sibi que relicta centrum repeteret. quod non potest in suo philosophandi modo salvare Magnus: à qua enim alia terra traheretur, aut determinaretur ad motum? quare dicat oportet, in centro universi terram de facto per accidens esse; & perinde ad ipsius naturam hic, & alibi stare posse.

Dicendum igitur, determinativum gravium ad motum esse potius corporum in specie leviorum ambitum, seu verius inferiorem immediatum situm. cum enim gravitas sit ea virtus, quae corpora elementaria sese circa universi centrum disponunt eo ordine, ut quæ graviora sunt, inferiorem, centroque propiorem, quæ minus sunt gravia, superiorem, remotioremque à centro locum obtineant; consequens est, ut eo ipso, quod gravius minus gravi superponitur, illud impellat, ut sub eo juxta naturæ legem se statuatur. Hæc quidem satis constant ex aliorum refutatione, & melius innotescunt ex infra dicendis de gravitatione.

§. III.

*Gravitas est virtus accidentalis à
gravis substantia secundum
rem distincta.*

HÆc propositio à Peripateticis communiter asserta (paucos excipio, inter quos est Vallesius, & Arriaga) non ab omnibus videtur sufficienter probata. Conandum ergo efficacius aliquid, ac solidius, cuiusmodi est

nica quidem sententia, quod sic propono. Nullum capax intensiōis est substantia. omnis gravitas capax est intensiōis: ergo nulla gravitas est substantia, argumentum est in *Celarent*, cuius proinde si probentur præmissæ seorsim, veritas consequentis probata omninò erit. Major autem ab Aristotele, & Peripateticis omnibus asserta statuentibus intensiōem qualitatis proprietatem, à nobis in *Metaphysicis* ostendetur, adeoque in præsentī supponitur. Sola igitur superest firmanda minor: pro qua sic arguo.

Intendi virtutem est ex parva sensim fieri magnam. atqui gravitas, quæ initio motus erat v.g. ut unum, paulatim augetur per gradus, itaut in vi motiva æquet gravitatem majorem, ac majorem: ergo gravitas intensiōis est capax. Maior est certa inductione; hoc enim est intendi calorem, ex parvo fieri magnum: sicuti remitti est ex magno fieri parvum: & sic de aliis qualitatibus. Minor est manifesta ab experientia; nam quo maiore ex altitudine gravia decidunt, eo citius moventur, majoremque ictum subiectis corporibus impriunt. quod intelligi non potest, nisi gravia plus virium per motum acquirant, quo & se citius concitent, & alia fortius depellant. neque enim major esse potest effectus ab eadem, & invariata penitus causa.

Responderi potest primò, grave per motum non fieri gravius, sed acquirere impetum, qui quidem cum alterius sit rationis à gravitate, non potest eam intendere. esse autem alterius rationis ex eo patet, quia gravitas non movet nisi deorsum. impetus autem movet etiam sursum, ut est videre in pendulis.

Verum quidem impetum à gravi acquisitum eiusdem esse rationis censeo cum ipsa innata gravitate. habent enim easdem vires impellendi deorsum, & ad centrum, quod est gravitatis.

Neque

Neque obstat, quod impetus quandoque impellat sursum; hoc enim ipsum gravitas præstat, non per se, sed per accidens, quatenus impedita, dum nititur ad centrum, pergit impellere juxta corporis impediens determinationem. sic luminosum, quod lucem non nisi, rectè emittit, prohibitum ab opaco, actionem aliò reflectit.

Responderi potest iterum, gravitatem innatam substantialem esse, acquisitam, seu transeuntem accidentalem. quamvis autem hæc augeat illam, non tamen intendit. quia non omne incrementum est intensio; nam bajulus bajulo accedens auget eius vires, & eas tamen non intendit.

Verum est, non omne incrementum esse intensivum; cum possit fieri per accessionem materiæ, aut agentis supposito distincti. at dum incrementum fit in subiecto ipso secundum substantiam invariato, ut accidit in gravi decidente, illud certè intensio est. Et quidem aliter statui poterit in calidis innatus substantialis calor, qui augmentum capiat ab accidentali adventitio, & sic aliæ qualitates: quod nemo hætenus somniavit. hoc enim ipso, quod calor adveniens priorem auget, eiusdem cum illo rationis esse debet, & uterque proinde accidentalis. idem dico de gravitate.

Responderi potest tertio gravitatem motu non augeri, atque vires novas acquirere, sed solum magis exerere præsuppositas. Sic tempore augetur calefactio, ignis calore non aucto, sed successivè virtutem suam explicante, novumque in passo calorem producente.

Hæc responsio non est melior præcedentibus. nam primò non est par ratio de calore, & gravitate, prout à respondente sumuntur; quia calor idem intra certam distantiam semper eundem effectum ponit, successivè quidem pro-

pter passi resistantiam. sed hic sumus in effectu simultaneo in fine motus à gravi posito multo maiore. quam potuisset vel in quiete, vel in motus principio, ictu scilicet validiore. quare si paritas sumatur, ut debet, retorquetur; ut enim calor omnes vires, quas habet, sola temporis successione exercet, ita & gravitas; adeoque si ædem sunt gravitatis vires in motu, & in quiete, deberet grave etiam quiescens parem ictum post aliquod saltem tempus infligere. quod si, ut certum est, non præstat, fatendum grave per motum novas gravitandi vires acquirere: quas in quiete nunquam habet, quasque propterea nonnulli gravitatem transeuntem appellant.

Alia responsio, quæ novas istas vires in motum ipsum, eiusque velocitatem refundit, cap. seq. manifestè reiicietur.

C A P U T III.

De motu gravium accelerato.

EX modo dictis apparet, gravia, dum descendunt, motum suum accelerare; ita ut velocius in fine, quam in principio moveantur. quod quidem non modo est certum ex ictu maiore, quem faciunt, quique ut arguit maiorem impetum, ita & celeriores motum, sed etiam ex ipso motu in se spectato. Sume enim lapidem, ac sine illum ex ulnarum 20. altitudine cadere: tum numerà vel penduli, vel tui pulsus vibrationibus, quantum temporis impendant in motu: & sint v. g. quatuor vibrationes fac deinde, ut lapis cadat ex altitudine 40. ulnarum. videbis non duplicari numerum vibrationum alterum hunc motum mensurantium; sicuti duplicatur altitudo; sed cadere lapidem sex circiter vibrationum spatio. evidens ergo est, minus temporis impendi in secunda

cunda parte, quam in prima æquali spatii pertranseunda; adeoque est evidens, motum accelerari.

Hanc accelerationem Galilæus ad calculum primum revocavit, censuitque fieri per numeros impares; quatenus si primo minuto ulnam v. g. confecit; altero minuto tres ulnas conficiet: tertio quinque, & sic de aliis, procedendo per hos numeros 1. 3. 5. 7. &c

Rursus certum est, eiusmodi accelerationem non progredi in infinitum, sed stare ad certum terminum, ultra quem non amplius acceleratur motus, sed fit æquabilis, eodemque celeritatis tenore procedens. Hoc quidem Recentiores Experimentales latè probant. Mihi satis est ista ratio: pro qua duo indubitata præsupponenda: primum, vires gravium finitas esse: alterum, aeris resistantiam eo esse maiorem, quo celerior est motus; cum enim cuiuscumque motui ipsum scindenti aer resistat, consequens est, ut magis resistat maiori, quam minori scissioni. Res est evidens in aere, in quo dum quis equo celerrimè fertur, sentit aeris à fronte quasi vento in se agitati resistantiam; quam sanè non percipit, dum tardius movetur. Evidentior est in aqua, in qua dum baculum lente moves, modicam, dum citius, magnam resistantiam deprehendis. Hinc porro æquabilitas motus apertè descendit: si enim quo motus acceleratur magis, eo magis medium resistit, palam est, si vires gravium non sunt infinitæ, ut deveniendum sit ad gradum celeritatis, ultra quem non possit gravè majorem ponere, quod non possit ulterius medii resistantiam superare. Quamvis autem motum acceleret, quo suas vires augeat, in ipsis necessariò est status; ut est status in reliquis omnibus qualitatibus ad certam mensuram à substantia qualibet in se productis.

Jam quod attinet ad accelerationis eiusmodi

causam, quod est physico in hac quaestione precipuum, eam alii aliter explicant; unde enim gravitatem, inde accelerationem desumunt; eadem quippè universim causa, quæ effectum simpliciter ponit, aucta ponit maiorem. quare iisdem argumentis, quibus motum deorsum ad terræ magnetismum, vel aeris pressionem, vel ætherii pulvisculi impulsu referentes superiori capite reieci, accelerationis causam in iisdem agnoscetes reiecti manent. Et quidem quod attinet ad aerem, eum non esse accelerationis causam, ut Averroes, Burlæus, & Zabarella contendunt, ex eo præterea fit manifestum, quod aer, ut dixi, motum non promovet, sed resistantia sua potius retardat. Ad hæc si ex edito loco fumantem titionem deicias, fumus non deorsum cum titione, sed sursum evolat. Jam verò si aeri à tergo gravis accurrenti ea vis esset, ut grave primùm moveret, tum ejus motum acceleraret, à fortiori id posset in fumum.

Improbabilius adhuc faciunt, qui motus accelerationem in aeris non confluxum, & impulsu, sed resistantiam coniiciunt. Ut enim à resistantia sit retardatio, non tamen acceleratio. & quidem ut ab ea motus acceleretur, deberet prius aer resistere magis, tum minus. sed oppositum contingit; medium enim suæ continuitatis tenax magis resistit scindenti ipsum velocius, quam scindenti seriùs, ut dictum est. atqui grave dum primò movetur, tardiùs aerem scindit. ergo tum aer minus resistit. at quis asserat, idem agens posse minus in passum propterea, quod passum minus resistit?

Magnanus l. cit. prop. 30. à n. 8. accelerationis causam ita explicat. Grave acquirit velocitatem; dum aeris resistantiam vincit. hoc evidens est; quia motus ipse est victoria supra aeris resistantiam, rursus omnis motus velocitatem aliquam habet, si comparetur cum motu possi.

possibili tardiore; velox enim, & tardum dicuntur respectivè, sicuti magnum, & parvum. Addit, ex sola maiori motus-velocitate in movente, vividior, ac fortior esse ab eodem actionem movendi aliam. per velocitatem enim vis motiva est in actu, & viget; ergo per eandem majorem est magis in actu, fortiusque viget. at vis motiva fortius vigen- est nata celerius movere. ergo celerior motus à sola est velocitate. Conf. velocitas, quæ primo tempore fuit acquisita, conservatur eadem salva, & incolumis tempore sequenti, & insuper eodem sequenti tempore nova velocitas acquiritur, eò quod urgeat continuò gravis pellentis nisus idem; imò major, & fortior ex conjunctione scilicet sui cum prius acquisita velocitate.

Ita quidem, ut hìc jacent ex eius verbis excerpta, evidenter insubstantia sunt. nam velocitas est motus ipse minori tempore idem spatium acquirens. ut ergo, dum mobile acquirit secundam partem spatii, non est prior motus, seu acquisitio primæ partis spatii, ita nec prior velocitas. Vel igitur motum stabile aliquid, ac perseverans, nec totum in fluxu perperam imaginatur; vel cogitur fluentem quoque velocitatem asserere, adeòque nullam unquam ipsius partem in mobili permanentem. quoadmissio, ut admitti debere ostendit entis successivi natura, tota corrumpit Magnani doctrina. Quod porro ait, per velocitatem esse in actu, & vigore vim motivam, lusus est in æquivoco. nam verum est de actu non primo, sed secundo, qui vigorem, seu vires non facit, sed supponit. vis autem, quæ magis est in actu primo, est nata fortius movere, non quæ magis est in actu secundo, nisi actus secundus, quem sibi dat sit ipse quoque operativus. Et quidem si ista Magnani dicta penitus inspiciantur, deprehendentur nuda ver-

ba cum aperta principii petitione. Accelerationis enim gravium, qui est effectus per experientiam notus, causam ignotam quaerimus. Magnus non aliam causam affert, quam velocitatem ipsam, seu celeritatem, quid autem ineptius, quam celeritatis causam inquirenti celeritatem reponere?

Propterea num. 12. ad gravitatem ipsam recurrit, quatenus hæc est, quæ vi sua totam velocitatem acquirit, & conservat; quamquam quia gradus velocitatis acquiri non possunt, nisi per partes, & nullo modo per saltus, consequens est, ut sensim ad maiorem se velocitatem descendendo promoveat.

Equidem nescio, quid sit velocitatis gradus acquiri per partes. potius dicendum, mutari velocitatem minorem in maiorem, sicuti mutatur motus antecedens tardior in sequentem velociorem. Huius ergo mutationis quaeritur in præsentia causa, quæ non est in ipsa velocitate, quasi antecedens efficiat sequentem, aut ipsa sese. non in gravitate. cur enim gravitas eadem per idem medium descendens, modo illud tardius, modo citius impellit? in primo siquidem minuto supponitur unam ulnam percurrere, in secundo tres. si ergo viribus gravitas non est aucta, qui poterit cum medio eiusdem, aut fortè maioris resistentiæ composita, illud efficacius detrudere: quod antea adversus medium eiusdem, aut minoris resistentiæ non poterat?

Communis ergo Peripateticorum, & vera ratio eiusmodi accelerationis est; quia per motum producitur in gravi maior semper, ac maior impetus usque ad terminum accelerationis: qui impetus & gravitatem auget, & motum proinde magis accelerat. Profecto motu impetum generari, & maiori motu maiorem impetum, constat in proiectis, quæ à proiciente impulsæ non accipiunt, nisi cum eo move-

moveantur: & quod diutius cum eo moventur, eò fortius proiciuntur. ideò lapidem funda longius, quam manu jacimus; motus enim lapidis in funda maior est. ideò ut saltum altior emedamus, vel ut obstaculum perumpamus, retrocedimus querentes motui maius spatium. ideò arcus adductus, dum se restituit, sagittam impellit: & quò tenditur magis, eò magis, ut se restituat, movetur, maioremque propterea impetum facit in sagittam. Certum igitur ab experientia est, motum impetus, & maiorem motum maioris impetus esse causam. Hunc impetum Peripatetici qualitatem volumus in prolectis violentam, ab extrinseco motore, superposito motu, tanquam necessaria conditione, impressam. Negant Atomistæ infra impugnandi. quare ad aeris elaterium, aliasque machinas confugiunt, sed mera verba dant; ut ostendam cap. 8. Similem qualitatem transeuntem à gravi in se per motum produci censemus, quæ simul cum innata gravitate maiorem semper in progressu motus velocitatem efficit. Atomistæ aliò divertunt, sed, ipsis etiam sitentibus, in ambages se induunt, difficultatesque insuperabiles, quare in nostram sententiam pedibus irent, nisi obstaret susceptarum semel partium contumax studium, odiumque qualitatum, ac simul Peripatetici nominis capitale.

Dices. si tota ratio motus gravium accelerati esset gravitas aucta, consequens esset, ut, quæ graviora sunt, cæteris paribus, deberent velocius moveri. atqui teste Cabeo 1. Meteor. 1. 17. q. 5. Galilæo, Arriaga, & aliis, experientia docet, omnia gravia etiam inæqualia æqualiter cadere; itaut non modò plumbeus unius libræ globus æquali velocitate descendat; ac globus plumbeus 100. librarum, sed etiam hic æquali cum globulo ligneo pectorio.

Concessa maiore, nego minorem. nam ut

alios omittem, P. Ricciolus *Almagesti novi lib.* 9. sect. 4. cap. 16. num. 13. narrat. sumptum à se circa rem istam multiplex experimentum, demittendo diversi generis gravia è coronide turris *Asellorum*, quæ est Bononiæ editissima, & manifestam velocitatis disparitatem deprehendisse, coram testibus, quos nominat, non paucis, nec rerum istarum ineruditis: ex quibus cum multi essent Cabeï opinionè præoccupati, rei evidentia convicti, mutavere sententiam. Notat ipse Ricciolus diligenter totam disparitatem motuum, apposita tabula, quæ videri à curiosis apud illum potest.

C A P U T IV.

An levitas sit specialis qualitas, & in quo subiecto reperiatur.

D Ari in corporibus gravitatem, nemo inficiatur. ambigunt tamen plures, an detur levitas, qualitas scilicet specialis à gravitate distincta, eique contraria, cujus sit corpora ab intrinseco sursum ferre; censent enim probabilius levitatem non esse, nisi gravitatem minorem; adeoque corpora sursum non ferri, nisi extrusa à corpore graviore.

Dico primò. Possibilis est levitas positiva à gravitate non gradu, sed naturà distincta. Prob. tum quia nulla apparet qualitatis ejusmodi repugnantia, tum quia congruum est, ut sicuti partes Universi, quæ semper habent medium obtinere, virtute polleant ad medium se movendi: ita partes, quæ naturaliter in medio esse non possunt, sed in circumferentia, vim habeant insitam se sursum pellendi. hæc autem est positiva levitas. congruum ergo est, non modo ut possit, sed etiam ut de facto detur levitas positiva.

Dices.

Dices. Vis motiva tributa est elementis à natura, ut, valeant se circa centrum in unam solidam sphaeram conformare, & si violenter inde abstrahantur, ut valeant eam reparare. atqui inepta ad hoc est positiva levitas, quæ partes à medio removens, invicem abstrahit, nec facit, ut respiciant idem centrum, sed ut ferantur in incertum. ergo non est possibilis positiva levitas. Conf. corpora naturaliter contigua non debent habere positivas contrarias inclinationes ad opposita loca: quia hoc ipso inclinarentur ad mutuam separationem. atqui levitas est positiva inclinatio gravitati contraria, inclinansque ad oppositum, ac dissitum locum. ergo elementis natis esse contiguus non potest levitas competere, si competit gravitas.

Resp. hoc ipso, quod elementa unam sphaeram componunt, alia debere ad medium, alia moveri à medio. sic enim constabit suis cuique locus. neque verò ab oppositis istis inclinationibus periculum est discontiguationis elementorum, & dissolutionis sphaeræ; huic enim malo abundè est à natura provisum, creando tantum corporis levis, quantum satis est, ut impleatur, quidquid spatii relinquitur à gravibus. Per quæ patet ad conf.

Dico 2. Minus grave non est tale per admixtionem positivæ levitatis. Prob. positiva levitas est positivus ab intrinseco impulsus, ac nisus sursum, atqui nullum grave sic impellit, ac nititur sursum. ergo nullum grave est simul leve. Minor constat per experientiã, dum enim minus grave est infra gravius in specie, lignum v.g. intra aquam, nisi sursum impellatur ab aqua graviore, non ascendit (modus, quo aqua sursum pellit, declarabitur capite seq.) argumento est, quod lignum intra glaciem, quamvis glacie levius, vim non facit in superiorem, sed in inferiorem glaciæ partem;

idem

idem ergo contingere debet in aqua ; adeoque motus ligni sursum non est à ligno, sed ab aqua. Similiter inclusus terræ aer non pellit terram sursum, ut debet, si positivè levitaret. ergo gravia positiva levitate non sunt prædita.

Dices. aer dum ascendit per aquam, assumit sæpè conicam figuram ; itaut pars aeris superior sit coni vertex, inferior sit basis. at si aer pelleretur ab aqua, deberet potius coni basis esse superior, à parte scilicet aquæ superiori, à qua accipit impulsus.

Resp. impulsus non accipi à parte aquæ superiori (aliter non sursum, sed deorsum aer truderetur) sed ab inferiori, quæ ab aqua lateraliter incumbente propulsa, aerem simul cum aquæ cylindro aeri rectè incumbente, cum quo scilicet corpus levius in specie componit, sursum evehit, ut declarabitur.

Dices iterum, lignum violenter infra aquam depressum, si permittatur ascendere, ultra aquæ superficiem cum impetu insilit, itaut aquam ipsam secum trahat. sed impetus non concipitur, nisi per motum naturalem. ergo lignum non vi ab aqua, sed à sua natura sursum movetur.

Nego minorem. fume enim vitream fistulam utrimque perforatam, eamque ex una parte digiti pulpæ diligenter obturatum ex parte, qua patet, aquæ infunde. videbis, remoto digito, aquam ascendentem per fistulam sine dubio violenter, impetum concipere, & ultra superficiem aquæ circumjacentis ascendere. Perinde est autem ad rem præsentem, siue impetus huiusmodi sit corporis propellentis, siue propulsi.

Dico 3. Terra, Aqua, & Aer sunt elementa positivè gravia : sed terra magis, quam aqua, & hæc, quàm aer. Conclusio solùm est dubitabilis quoad tertiam partem, quæ aeris

gra-

gravitatem asserit à Peripateticis plerisque negatam. Ea igitur unice probanda tum Aristotelis autoritate expressa, tum manifesta experientia.

Philos. quidem 4. de Cælo tex. 30. loquens de elementis hæc habet: *In sua regione omnia gravitatem habent præter ignem, etiam aer ipse. signum autem est, quod plus trahit inflatus uter, quam vacuus.* Quod ipsum repetit, & probare aggreditur tex. 39. Experientia idem probat. & 1. ea ipsa, qua Aristoteles utitur. plus enim ponderat uter, & follis luforius aere plenus, quam vacuus: & quo plus de aere per vim intruditur plus ponderis acquiritur. At si aer positivè levis esset, oppositum contingeret. per additionem enim levis ad leve non fit gravius, sed levius: ergo aer non levis est, sed gravis.

Respondent duo. 1. hoc accidere ratione densitatis. 2. hoc esse verum de aere vaporibus impurato, à quibus unis gravitas habetur.

Hæc secunda responsio non est ad rem; quia nomine aeris venit, ut supra notabam, hoc spirabile elementum, in quo versamur. de aere illo puro nullam possumus experientiam sumere; ac proinde integrum cuique est de illo affirmare, quod lubet. Prima resp. manifestè est nulla. densitas quippè non alio pacto grave reddit gravius, nisi quia plura gravia coniungit, maioremque molem, ac gravitatem in minori dimensione constituit. sed ex eadem ratione leve debet reddere levius; nisi velis grave fieri per levis additionem: quod item repugnat, ut fieri calidum per additionem frigidi. Et quidem densitas modus est quidam generalis augendi qualitates activas, quas restringendo efficit fortiores: quare ut frigus, ita & calorem auget, adeoque non gravitatem solum, sed etiam levitatem augere debet.

Altera experientia, quæ hanc responsionem reicit, & conclusionem evidentius firmat, est hæc. Aer non solum densatus, sed rarus, qualem spiramus, præcisa omni extrinsecus violentia comprimente, ponderat. Id clarè ostendit experimentum Magdeburgicum, cujus meminit Gaspar Schottus in *Technicis curiosis* lib. 1. cap. 2. Vas enim vitreum communi prius aere oppletum, multo aere per vim extracto, inventum est minus, quam antea, ponderasse, erat autem vas capax dimidiæ urnæ Francicæ, quod antea æris extractionem diligenter ponderatur, post extractionem ponderavit unam unciam cum sex decimis minus quam antea.

Huc demum faciunt omnia experimenta, quibus Neoterici passim ostendunt, suspensionem hydrargyri in experimento Torricelliano ab externa aeris gravitantis pressione provenire: ut videre est apud Boyleum, Schottum, & alios.

Dico 4. Ignis usualis, quem apud nos habemus, adeoque fumis, & terreis halitibus impuratus, non levis est positivè, sed gravis. Prob. & quidem id certum est in carbonibus ignitis, de flamma potest esse dubium. Sed hoc excussit jam pridem Robertus Boyle, ingeniosus ille Anglus, qui rerum naturis scrutandis non mentem minùs, quàm manum feliciter admovit. is flammæ pondus ad lancem examinavit. nam cupræ laminæ frustum ad ignem sulphuris in crucibulo exposuit; laminamque deindè invenit quintam partem prioris ponderis crevisse. quin etiam stannum, & plumbum in vitreis valis hermeticè signatis fusæ ad ignem, & calcinata, ponderis non nihil acquirunt ultra illud, quod habebant.

Dices cum Mauro hic quæst. 48. dum mustum dolio clauditur, spiritus ignei tanto impetu conantur ascendere, ut magna vi opercu-

lum

lum extrudant. vis autem illa non est à corpore sursum pellente ; aliter deberent spiritus in superficie quiescere. est ergo in iis positiva vis ascendendi ; adeoque positiva levitas. Quod si spiritus ignei, à fortiori ignis ipse levis est positivè.

Resp. ascensum spirituum esse à partibus musti gravioribus sursum pellentibus, atque etiam ab ipsi calore mutuo rarefcentibus magis, & agitatis. ubi verò in superficie magna spirituum copia adunatur, calidiores ibi, adeoque rariores effecti, dum quærunt ampliorem locum, nec possunt humorem subiectum comprimere (humor enim omnis maximè cōpressioni resistit) in operculum dolii vim faciunt.

Dico demum 5. probabiliter dicendum, ignem elementarem, seu ætherem, qui ab aeris confinio ad firmamentum usque protenditur, esse corpus positivè leve. Prob. quia cum levitas ex probatis sit naturaliter possibilis, nec sit in ullo ex corporibus apud nos existentibus, dicendum eam esse in igne elementari. Et quidem non debuit dari positiva gravitas corpori, quod in nullo casu debet naturaliter descendere ; aliter fuisset tributa virtus plane cœtiosa. sed igni elementari in nullo naturali casu debetur descensus. non ergo debita est illi gravitas. Adde, quod nullam experimur gravitationem à toto æthere ad firmamentum usque diffuso : quæ sane si esset, ingens esset ab immensa corporis illius mole ; adeoque ea esset, cui corpora subiecta resistere non possent. hinc Neoterici communiter dum aeris gravitatem assumunt, non nisi ab Atmosphæra eam assumunt ; adeoque supponunt, ut experimentis consonum, nullam esse gravitatem in corpore ultra Atmosphæram diffuso. Hoc idem probabiliter asserendum de flamma per se, præcisisque terreis fumis, quibus hic involuitur, spectata : quod satis
pro.

probat solare igneum corpus vi sua in æthere
suspensum.

C A P U T V.

Utrum Elementa gravitent in propriis locis?

§. I.

Nonnulla præmittuntur, & sensus questionis proponitur.

Primùm notandum, gravia, dum comparantur, dici æqualia, vel inæqualia dupliciter, vel absolutè, vel in specie. dicitur æquè, minùs, aut magis grave absolutè, cum æquè, minùs, aut magis absolutè ponderat. Sic lignum decem librarum est æquè grave absolutè cum decem plumbi, vel auri libris, & absolutè gravius quinque plumbi, vel auri libris. dicitur gravius in specie, quod in mole æquali præponderat. hoc pacto lignum 100. librarum minùs est grave plumbo unius libræ; si enim æqualem molem ligni, & plumbi accipias, plumbum præponderat. in hoc sensu aurum de facto est notorum omnium corporum gravissimum.

Notandum secundò, locum proprium; ac naturalem gravium non sumi hic pro centro, in quod omnia per rectam lineam tendunt; cum enim centrum sit punctum quoddam imaginarium, æqualem habens à tota Cæli circumferentia distantiam, est propter eà locus, quem nulla gravia possunt naturaliter acquirere, nisi si essent in punctum spatii compenetrata. aliter dum manent extensa, semper pars quælibet est à centro remota; adeòque nulla locum eiusmodi naturalem obtinet. Locus ergo naturalis, de quo præsens est controversia,

sia, ille intelligitur, in quo gravia neque sub se, neque ad latus mediâtè, vel immediâtè habent corpus levius in specie in eadem à centro distantia. In hoc sensu si elementa naturaliter disponderentur juxtâ seriem gravitatis, deberet terra in unum globum conformata esse in centro universi: circa, & supra terram aqua, tum aer, & ignis. de facto montes non sunt in loco naturali, quia circâ, & infra se in cavitatibus multum aeris habent. aqua intra situlam è puteo extractam non est in loco proprio; quia circa se saltem mediâtè, habet aerem.

Notandum tertio, gravitationem ex vi vocis esse actum secundum gravitatis, eiusque effectum. triplex autem est gravitatis effectus, ac proinde triplex gravitatio. primus est motus ipse deorsum, secundus est quies in proprio, aut non proprio loco per motum acquisito. tertius est nîsus in subiecta corpora, quæ sæpè itâ pellit, ut vincat, & simul cum iis descendat: sæpè itâ pellit, ut ab eorum resistantia vincatur, nec movere se possit, quod non possit illa dimovere. In primo sensu si sumatur gravitatio, certum est, elementa in propriis locis non gravitare; quia certum est ulterius deorsum non moveri. In secundo sensu, certum est, elementa in propriis locis gravitare; habent enim ibi quietem vi insitæ gravitatis effectam, & conservatam. In tertio sensu procedit quæstio, quæ ambigitur, utrum elementa in propriis adhuc locis existentia, aqua v.g. supra terram, nîti deorsum pergat, ac terram impellere, conarique in motum. quamvis hunc obtinere non possit propter maiorem terræ resistantiam. Sic dicitur gravitare lapis è fune suspensus, aut humeris impositus: sic domus, dum pondere suo in fundamenta gravitat, quæ si debiliora sint, quam oporteat, imposito tandem oneri succumbunt.

Hoc quidem notandum fuit; quia Magnanus

l.cit. prop. 17. in alio sensu agitans controver-
siam præsentem, censet Peripateticos debel-
lasse, cum tamen quæstionis statum ne attige-
rit quidem. *Gravitare*, inquit n. 1. *actum non*
est aliud, quam esse in actuali exercitio propria
gravitatis, seu exercere vim illius. ergo grave
in ipso gravium centro gravitat: siquidem, ut
paulò antè dixerat, cum locum illum teneat,
eidemque insistat vi gravitatis, quatenus non nisi
vi gravitatis resistit cuicumque ipsum inde avel-
lere conanti; sequitur, à gravi possideri proprium
locum per exercitium propria gravitatis. quod
est gravitare in proprio loco. Hoc, inquam,
totum est extra rem; nemo enim Peripateticus
vel id unquam negavit, vel litem hanc agitavit
in hoc sensu.

§. I I.

Deciditur controversia.

Dico 1. Elementa in proprio-loco gravi-
tant per modum unius, totus scilicet aer
suprà totam aquam, & hæc tota suprà totam
terram. Oppositum sentit communis Peripate-
ticorum, ac veterum Mathematicorum sen-
tentia, itaut, teste Ruvio, proverbii, aut
etiã principii loco haberetur illud, *Elementa*
in propriis locis nec gravitant, nec levitant. sed
Peripatetici mihi deferendi, ubi ipsi Aristo-
telem deferunt, imò etiam experientiam, &
rationem. Philos. quidem 4. de Cælo tex. 30.
superiori cap. relatus, ut probaret aeris gravi-
tatem, attulit exemplum aeris inflati plus pon-
derantis, quàm vacui; adeoque ex aeris in
aere h. e. in proprio loco gravitatione probavit
aeris gravitatem. Hoc idem à fortiori probat
Magdeburgicum experimentum ex Schotto ibi-
dem relatum.

Ad hæc si sit cisterna, infra cuius pavimen-
tum

tum sit cavitas aere plena, aut cujus parietes non terram circa se, sed aerem habeant, manifestum est, quod aqua & rectè in pavementum, & lateraliter in parietes vim facit, & gravitat, ergo eandem vim gravitandi exercet, etiam dum nullus aer infra, vel ad latera existit. conf. prob. pavementum, & parietes, si, non obstante maiori in specie gravitate, capaces sunt accipiendi impulsu ab aqua, ut probat casus antecedentis, non est, cur impulsu non accipiant etiam in casu consequentis; nam universim dum causa proximum habet suae actionis susceptivum, necesse est, ut agat. quod autem aer sit infra, vel ad latera, conditio est valdè remota, quæ non potest ad actionem pertinentem se habere: neque verò est ullum in tota natura exemplum, quod similes conditiones probat ad actionem pertinere. Et sanè si cavitas circa cisternam in magna distantia effoderetur unius v. g. miliaris, aut plurium, dicendum ex eadem ratione, aquam tunc incipere in parietes impellere, inopinabile autem est, qua ratione aer tam procul dissitus actionem impulsivam determinet, in quam prius non poterat aqua, passum idem licet proximè admotum, & contiguum haberet, Hoc profectò perinde est, ac velle, ignem non posse calefacere, aut comburere stupam, nisi procul admoneat conditio calefactioni, aut combustioni necessaria.

Neque dicas, in casu antecedentis non gravitare aquam adversus pavementum, aut parietes, sed simul cum pavimento, & parietibus permodum unius corporis gravioris gravitare in aerem suppositum, aut circumstantem. Nam contrà est; quia nemo hactenus negavit, elementa ipsa gravitare, dum sunt extra proprium locum, ut re ipsa sunt in casu antecedentis. Et quidem pavementum propter paritatem suarum adhesionem in aerem subiectum

per se non gravitat, sed potius gravitatio exercetur ab una in aliam partem eiusdem pavimenti. idem dic de parietibus, qui sanè, ubi lapides sunt rite dispositi, nullum impulsus in aerem circumstantem valent exercere. tota igitur gravitatio est ab aquæ incumbētis pressione.

Denique compertum per experientiam est, levius in specie gravitare suprâ gravius, at, qui non alio ex capite elementa dicuntur in proprio loco non gravitare, nisi quia sunt in specie leviora. ergo. maioris veritas ex dicendis constabit.

¶ Dico 2. Elementa gravitant etiam divisibiliter, itant una pars eiusdem elementi præsertim fluidi gravitet suprâ aliam, aqua v. g. suprâ aquam.

Hæc conclusio ex dictis patet; nam primò ostensum est ex Philosopho aerem in aerem gravitare. Deinde si levius in specie suprâ gravius vim pellendi obtinet, ut probavi, manet eadem opera probatum à fortiori grave in æquè grave pariter gravitare.

Præter hæc plura experimenta ad veritatem hanc firmandam affert de suo Boylius in libello, cui titulus, *Paradoxa Hydrostatica*. Pauca afferam, quæ videntur satis rem istam conficere, & posse puto sine figura intelligi. Para tibi vas vitreum aqua plenum, sed non ad summum. tum sume vitream fistulam longiorem, sed angustam. hanc imple per suctionem communi oleo usque ad dimidium; & orificio superiore digiti pulpa ocluso, aquæ immerge; sed itaut olei superficies sit altior aliquantò, quàm superficies aquæ. Experientia ostendet, oleum manere in fistula suspensum, nec descendere in aquam per orificium inferius. Jam verò oleum est fluidum grave; quod moveretur deorsum, nisi ab aqua sursum impellente impediretur. quare ubi inferior aque
su.

superficies, cui incumbit oleum, non impellit, oleum descendit; ut constat ex eo, quod si fistulam magis eleves, olei tantum effluet, quantum satis est, ut obtineat æquilibrium, quod prius habebat.

Ratio experimenti ex gravitatione aquæ in aquam facilis est. Supponitur enim aquæ superficies imaginaria ducta per lineam horizonti parallelam ab ea parte, cui oleum imminet; jam illa pars huius superficiei tantum premittur ab oleo toto, quantum ab aqua circumstante: & idcirco obtinet rationem cuiusdam veluti bilancis, in qua libratæ viribus ponderativis olei, & aquæ, nec potest premi deorsum ab oleo, nec pelli sursum ab aqua, hinc fit, ut in aquam ponderet & aqua, quæ est æqualis in specie gravitatis, & oleum, quod minoris.

Hoc aquæ, oleique æquilibrium veram esse causam olei in fistula suspensi, patet ulterius 1. quia si attollas fistulam, oleum præponderat, & hinc dilabitur. 2. quia si fistulam deprimas, aqua præponderat, & ingressa per inferiorem fistulæ partem, oleum attollit. 3. quia si fistula manente in eadem elevatione à phialæ fundo, aqua infundatur in phialam, oleum assurgit, quod idem præstat, si non aqua infundatur, sed oleum; quia scilicet tam aqua, quam oleum auget pondus exterioris cylindri, cum quo ut æquilibretur fistulæ oleum, assurgat, oportet.

Idem experimentum si fiat inversum, evidentiùs hanc ipsam sententiam ostendit. Sit ergo vas olei, & fistula aquæ semiplena, quod si fistula eodem modo immergatur vasi, suspendetur item intra fistulam aqua, sed ita ut superficies aquæ, gravioris scilicet in specie, sit infra olei superficiem. Jam verò certum est etiam adversariis, aquam in oleum gravitare, cur ergo non descendit? non alia aptior ratio

ratio reddi potest, nisi quia prohibetur ab olei in oleum pressione, quod in maiori mole æquatur ponderi minoris molis aqueæ. gravitat ergo oleum in oleum, & ex eadem ratione una quælibet pars liquidi in aliam.

Hinc primò est ratio, cur corpus aqua gravius tantò minus ponderet in aqua, quantum ponderat aqua illi æqualis in mole. Hoc quidem ab experientia est certum; & ratio ex dictis est; quia corpus in aqua occupat locum, quem occupare deberet aqua illi æqualis in mole. aqua autem illa si esset, sustineretur ab aqua inferiori, cum qua vires æquaret. ergo aqua inferior sustinet corpus succedens aquæ, quantum sustineret ipsam aquam; adeoque debet pondus in potentiam exteriorem tantò minus ponderare, quanta est vis aquæ sustentantis, quæ cum sit æqualis aquæ deficienti, consequens est, ut in aqua corpus tantò minus ponderet, quantum est pondus aquæ in mole æqualis. Declaratur magis. Supponamus aquam deficientem habere vires ut quatuor descendendi, & aquam inferiorem habere vires ut quatuor resistendi, & sustentandi: corpus autem succedens loco aquæ habere vires descendendi ut sex; jam sequitur, ut non sentiatur ab extrinseca potentia ferente, nisi pondus ut duo; quia corpus indiget vi sustentante ut sex: aqua sustentat ut quatuor. ergo potentia non sustentat, nisi ut duo.

Est secundò, cur corpora secundum speciem leviora, tantum præcisè locum occupent suprà, intraque aquam, quanta est moles aquæ æqualis iisdem in pondere. v.g. sit navis, quæ dimidia sui parte aquam ingreditur, & dimidia supernatat; si sumatur spatium illud à navi occupatum intrà aquam, aqua eius spatii occupativa æqualis est in pondere absoluto cum tota navi. Ratio phyfica descendit ex dictis; quia corpus insidens aquæ ad aquam inferiorem

comparatur cum tanta vi impulsiva, quantum habet aqua, cuius locum occupat; & huic æqualem habet inferior aqua vim sustentativam. ut ergo aqua deficiens non posset ulterius inferiorem aquam premere: ita nec potest ulterius premere corpus aquæ succedens, sed unum illud spatium occupans, tenet cum aqua circumstante æquilibrium.

§. III.

Contrariis objectionibus satisfi.

Obiicit. gravitare est deorsum tendere. sed corpus in specie levius intra fluidum gravius non deorsum, sed sursum tendit. ergo non gravitat, sed potius levitat.

Nego maiorem. tendentia deorsum non est gravitatio, sed gravitationis effectus, qui tamen non semper eam sequitur, cum possit impediri à resistantia, & gravitatione maiori: Cæterum grave etiam, dum ascendit intra fluidum gravius actu gravitare, nique deorsum, constat primò, si enim in altera lance trutinæ sit homo cum plumbeo pondere; tum homo pondus manu attollat, non minor est gravitatio plumbi in lancem, quam prius, dum lancem immediate premebat. Similiter dum in una lance est vas vitreum aqua plenum, cui salis in pulverem redacti pugillus injectus sit; licet sal initio jaceat in fundo, & deinde paulatim ascendat, & aquæ misceatur, æquale semper est pondus. certum ergo est, gravia non ascendere sine gravitatione: sicuti non sine gravitatione quiescunt, dum in proprio loco non sunt. sed distinguenda est duplex gravitatio, alia prævalens, quæ superat resistantiam; & hæc una motum efficit; alia non prævalens, quæ vel æquatur, vel superatur à resistantia; & hæc motum efficere nata non est.

Obiic. 2. dum quis ærea situla extrahit è puteo aquam, non sentit aquæ pondus, sed situlæ unius, dum hæc est adhuc intra aquam: sentit verò pondus aquæ, dum situla est extra aquam. ergo aqua intra aquam non ponderat.

Nego conseq. quamvis enimaqua in aquam ponderet, tanta est tamen ipsius in inferiorem aquam gravitatio, quantus est aquæ inferioris conatus ad eandem sustentandam; & idcirco pondus ipsius intra aquam non sentitur, imo & pondus situlæ sentitur minus juxta dicta §. sup. illat. 1.

Obiic. 3. si partes aquæ superiores premerent inferiores, hæc deberent esse superioribus densiores propter compressionem à superioribus factam. hoc autem est falsum, quia eadem in tota aqua apparet densitas. ergo.

Resp. si verum, & compertum ab experientia sit, aquam ubique paræ esse densitatis, id nasci à propria fluidi conditione, quod nullam, vel insensibilem natum est per pressionem densitatem accipere. Cæterum in corporibus natis comprimi, qualis est aer, manifestum est inferiores partes esse superioribus densiores. ex quo argumentum militat potius pro conclusione, quam impetit.

Obiic. 4. obtento fine, cessat actio. sed dum elementa sunt in proprio, ac naturali loco, obtineat finem. ergo cessat gravitatio,

Nego maiorem, quæ est falsa evidenter, si sermo sit de actione conservativa finis. Verum est, obtento fine, cessare motum, sed hic nullus est elementorum in proprio loco, hinc autem non fit, ut debeat cessare gravitatio: imo potius ut hæc cessare non debeat, cum sit actio proprii loci conservativa. Nam gravitatio motum facit, dum elementa se circa Mundi centrum disponunt juxta ordinem gravitatis, ut patet. Eadem gravitatio quietem efficit; dum
enim

enim gravitant in graviora, aut æqualia, superatis, aut libratis utrimque viribus, qui es sequatur, oportet: eadem rursus gravitatio quietem firmat; difficilius enim sursum impelluntur, quæ continenter nituntur deorsum.

Instabis frustra est nîsus deorsum, ubi descensus est impossibilis. atqui elementis in proprio loco dispositis descensus impossibilis est, ergo ibi constituta deorsum non nituntur, adeoque non gravitant.

Instantia nimis probat: quia probat gravia non gravitare, nisi dum movent, adeoque neque gravitabunt extra proprium locum, dum qui fert pondus, non finit se à pondere dimoveri. Sed & nihil probat, frustra enim est conatus ad motum, ubi motus in omni casu est per naturam impossibilis, non verò dum est possibilis, & impeditur. Sic finis specierum visus est visio, & tamen species emittuntur ad Lunam usque & ultra, ubi nulla unquam visio efficeretur, ut ergo finis naturæ species emittentis in omnem partem est, ut alicubi visio fiat: ita ejusdem semper gravitantis est, ut aliquando sit motus.

Obiic. 5. experimentum in hac re celeberrimum. Urinatores existentes sub aqua pondus aquæ incumbens non sentiunt. ergo aqua in aquam non ponderat.

Respondet P. Maurus hic q. 51. supponendo, corpus humanum esse in specie levius aqua: quod probat, quia cadavera, quæ corporibus vivis propter spirituum defectum sunt graviora, aquæ supernatant. Hinc primò retorquet in adversarios argumentum; nam etiam per ipsos gravius in specie gravitat supra levius. aqua igitur in specie gravior, debet supra hominem gravitare. 2. ita respondet directè. corpora, inquit, humida premunt leviora demersa in ipsis non deorsum, sed sursum;

Obiic. 2. dum quis ærea situla extrahit è pur-
teo aquam, non sentit aquæ pondus, sed situ-
læ unius, dum hæc est adhuc intra aquam :
sentit verò pondus aquæ, dum situla est ex-
tra aquam. ergo aqua intra aquam non pon-
derat.

Nego conseq. quamvis enim aqua in aquam
ponderet, tanta est tamen ipsius in inferiorem
aquam gravitatio, quantus est aquæ inferioris
conatus ad eandem sustentandam; & idcirco
pondus ipsius intra aquam non sentitur, imo
& pondus situlæ sentitur minus juxta dicta §.
sup. illat. 1.

Obiic. 3. si partes aquæ superiores premerent
inferiores, hæc deberent esse superioribus den-
siores propter compressionem à superioribus fa-
ctam. hoc autem est falsum, quia eadem in tota
aqua apparet densitas. ergo.

Resp. si verum, & compertum ab experien-
tia sit, aquam ubique pariter esse densitatis, id
nasci à propria fluidi conditione, quod nul-
lam, vel insensibilem natum est per pressionem
densitatem recipere. Cæterum in corporibus
natis comprimi, qualis est aer, manifestum est
inferiores partes esse superioribus densiores.
ex quo argumentum militat potius pro conclu-
sione, quam impetit.

Obiic. 4. obtento fine, cessat actio. sed dum
elementa sunt in proprio, ac naturali loco, ob-
tinent finem. ergo cessat gravitatio,

Nego maiorem, quæ est falsa evidenter, si
sermo sit de actione conservativa finis. Verum
est, obtento fine, cessare motum, sed hic nullus
est elementorum in proprio loco. hinc autem
non fit, ut debeat cessare gravitatio: imo po-
tius ut hæc cessare non debeat, cum sit actio
proprii loci conservativa. Nam gravitatio mo-
tum facit, dum elementa se circa Mundi cen-
trum disponunt juxta ordinem gravitatis, ut
pater. Eadem gravitatio quietem efficit; dum
enim

enim gravitant in graviora, aut æqualia, superatis, aut libratis utrimque viribus, qui essequatur, oportet: eadem rursus gravitatio quietem firmat; difficilius enim sursum impelluntur, quæ continenter nituntur deorsum.

Instabis frustra est nisus deorsum, ubi descensus est impossibilis. atqui elementis in proprio loco dispositis descensus impossibilis est, ergo ibi constituta deorsum non nituntur, adeoque non gravitant.

Instantia nimis probat: quia probat gravia non gravitare, nisi dum movent, adeoque neque gravitabunt extra proprium locum, dum qui fert pondus, non finit se à pondere dimoveri. Sed & nihil probat. frustra enim est conatus ad motum, ubi motus in omni casu est per naturam impossibilis, non verò dum est possibilis, & impeditur. Sic finis specierum visus alium est visio, & tamen species emittuntur ad Lunam usque & ultra, ubi nulla unquam visio efficietur, ut ergo finis naturæ species emittentis in omnem partem est, ut alicubi visio fiat: ita ejusdem semper gravitantis est, ut aliquando sit motus.

Obiic. 5. experimentum in hac re celeberrimum. Urinatores existentes sub aqua pondus aquæ incumbens non sentiunt. ergo aqua in aquam non ponderat.

Respondet P. Maurus hic q. 51. supponendo, corpus humanum esse in specie levius aquæ: quod probat, quia cadavera, quæ corporibus vivis propter spirituum defectum sunt graviora, aquæ supernatant. Hinc primò retorquet in adversarios argumentum; nam etiam per ipsos gravius in specie gravitat supra levius. aqua igitur in specie gravior, debet supra hominem gravitare. 2. ita respondet directè. corpora, inquit, humida premunt leviora demersa in ipsis non deorsum, sed sursum;

atque adeò aqua ita gravitat; ut non aggraveret, sed sustentet potius, & elevet corpora Urinatorum.

Hæc responsio nulla est. nam falsò supponit minorem gravitatem in specie corporis humani comparari cum aqua; oppositum enim supponitur à viris harum rerum expertissimis, quibus corpus humanum est gravius in specie, licet non multò; nec valet argumentum ductum à cadavere supernatante. cadaver enim non sensim, sed post aliquod tempus supernatat, cum attenuatis, ac dissolutis partibus quibusdam solidioribus, & gravioribus, aliquid præscæ gravitatis deperdit. Sed neque hoc transmissio; valet directa responsio. dux enim aquæ sunt considerandæ, altera, cui Urinator insistit, à qua & sustentatur; & sursum pellitur: altera, quæ ad perpendicularum insistit Urinatori, à qua premitur deorsum. Sicuti autem si quis aquæ lagenam capiti impositam habeat, quamvis ab alio sursum elevetur, non idcirco lagenæ pondus non sentiet, si verè lagena ponderat: ita licet Urinator ab aqua supposita elevetur, non idcirco non premitur sensibiliter ab imposita, si hæc vim habet gravitandi in quæcumque subiecta corpora.

Resp. 2. Cartesius, supra Urinatorem non gravitare totam aquam, sed tantam solum, quanta descenderet, si corpus humanum desereret locum suum. Sed reiicitur; vel enim est sensus, quod aqua solum in mole æqualis gravitat supra corpus: atque hoc ex probatis est falsum: vel est sensus, quod tota aqua ad perpendicularum insistens gravitat supra corpus; & redit, quod Urinator deberet illius ingens sæpè pondus sentire.

Resp. igitur ex cit. Boylio, id nasci ex propria pressione fluidi in solidum, quod premitur ab eo undique æqualiter, & ideo nulla pars solidi

solidi pressionem sentit. Ponderis certè pressio non sentitur à sustinente, nisi ex peculiari doloris sensu in parte, quæ præ cæteris premittur, & luxatur, suoque loco dimovetur. Cum ergo fluidi pressio undique sit æqualis, non potest aliunde dolor esse, nisi ex nimia totali constrictione. hæc autem à fluido non est nimia, nec talis, ut corporis humani solidam, perfectamque structuram sensibilibiter lædere valeat. Huc facit, quod Plinius Hist. lib. 31. cap. 6. refert, luxata hominum, & quadrupedum corpora, nasando in cuiuslibet generis aqua, facillimè in artus redire. ex hoc arguo & pressionem aquæ in animantium corpora (qui enim fiat membrorum in locum suum restitutio sine aliqua pressione?) & simul pressionem non doloriferam, sed salutarem: cui non nihil conferre videtur aer intra animantis poros conclusus, & vi sua elastica partes muniens adversus nimiam, si qua est aquæ incumbentis pressionem.

C A P U T VI.

De vi elastica, & an ab ea contingat motus reflexus.

Nomine virtutis elastica, seu elaterii intelligimus vim illam, qua corpora flexibilia, & compressibilia dum flectuntur, aut comprimuntur, à flexione, ac compressione recedunt, ac se restituunt. Sic lamina chalybea complicata per hanc vim continenter se explicat, & horologiorum rotas pergit movere. Sic arcus ubi tenditur, si sibi mox relinquatur, cum impetu redit, & sagittam impellit. Sic testudinis fides ex intestinulis præsertim confectæ, si tensæ sint, & in unam partem impellantur, illico regrediuntur, & ex impetu concepto ad modum penduli hinc inde diutius agitantur.

Sic aer in sclopiis pneumaticis compressus, ubi libertatem nanciscitur, tanto impetu se dilatat, ut videatur ignis à pyrio pulvere concepti violentiam æquare. Hæc porro vis in quovis corpore non est; nam plumbum si comprimam, aut contundas, non idcirco se unquam restituet.

Unde autem virtus ista oriatur, quæstio est valde inter experimentales agitata: quorum equidem placita nec relicio in præsentī, nec refero; pendent enim à doctrina alibi refutata. Censeo igitur totam ejusmodi vim ad principium intrinsecum reduci, atque esse eam ipsam internam virtutem, qua res quælibet debitam raritatem, vel densitatem jam deperditam reparat. Ut enim sua cujusque natura dat rei à principio certum raritatis, ac densitatis gradum; ita eadem, ubi is violenter amittitur, materiæ suæ restituendi vim habet. Id constat primùm in aere, qui constipatus ad insolitam densitatem, vim exerit, dum rarefeit. Constat in lamina chalybea, quæ dum violenter in spiram contorquetur, ex parte convexa rarefit, ex concava densatur. quare sibi relicta, movetur ad acquirendum utrimque debitum hinc raritatis, inde densitatis gradum. Idem constat pariter in nervis testudinis, & arcus. Neque video huius rei aptiorem, faciliorem, magisque universalem rationem.

Dices 1. si rei cuiusque natura petens debitam densitatem, raritatemque esset virtutis elasticæ sufficiens principium, omnia corpora elaterium haberent, tam chalybs scilicet, quam plumbum: quod experientia adversatur.

Resp. omnibus corporibus vim intrinsecam inesse ad reparandam densitatem, raritatemque ex suppositione, quod sint deperditæ, sed ad vim elasticam requiri, ut suppositio purificetur, & raritas, densitasque amittatur, ut constat.

stat. id autem non contingit, nisi corporibus duris, ac rigidis, quæ, quod maximè recedant à conditione fluidorum, partes habent naturalis vinculi tenaces, nec ab uno ad alium locum migrare potentes. quare dum flectuntur, aut comprimuntur, rarescunt, aut densantur. Non sic accidit in mollioribus, ac liquidorum conditioni finitimis, quale est plumbum: cujus lamina dum flectitur, non rarescit ex convexa parte. nec densatur ex concava, sed partes aliquæ mollitudinis beneficio ex parte concava transeunt ad convexam.

Dices 2. si vis elastica esset à natura corporis, reparante raritatem, ac densitatem, dum pervenit ad debitum gradum, non progredieretur ulterius. Sicuti dum aqua ab intrinseco reparat frigus, sistit in gradu debito. oppositum contingit in elastica virtute ulterius progrediente ad gradum etiam indebitum, ut videre est in vimine, quod curvatum, dum se restituit, ultra rectitudinem debitam procedit. non ergo vis elastica est à natura corporis.

Resp. id esse speciale in motu etiam naturali, ut liquet ex supra dictis, & constat in pendulo; ut impetus concipiatur à mobili, quo feratur etiam ultra terminum naturalis exigentiae, donec sensim impetu extincto, in termino quiescat.

Dices 3. cum authore Burgund. Philos. Physf. Gen. tract. 3. dissert. 3. cap. 4. Aqua in xolipila; seu vase, cuius angustum admodum est foramen, contenta, & igni admota, in vapores cum impetu diffatur; nullus tamen hic locus est virtuti elasticæ, neque ullus est restitutionis motus. alia itaque est vis rarefactiva, alia elastica.

Resp. non omnem vim rareactivam esse elasticam, sed eam solam, quæ ab intrinseco facit motum restitutionis. is autem non habetur in xolipila; ibi enim aquæ in vapores dilatatio,

nec eſt ab intrinſeca aquæ natura ; nec eſt motus reſtitutionis , ſed violenta potiùs aquæ rarefactio à calore . Similiter non eſt vis elàſtica , quæ in igne primò habetur , dum pyrius pulvis accenditur ; motus enim ille non reſtituit corpori præexiſtenti raritatem amiſſam , ſed de novo genitò dat novam .

Post hæc inquirenda motus reflexi cauſam . Certum eſt , dura corpora dum deorſum à natura , vel aliter ab extrinſeco impulſore moventur , ſi incidunt in corpora motum ulteriorem prohibentia , impetum retrorſum concipere , & reflecti juxtà leges alibi explicatas . Certum eſt præterea , non eſſe omninò eandem cauſam motus directi , & reflexi ; ſi enim eadem eſſet , quò gravius eſt corpus , quod decidit , & quò violentiùs impellitur , eò deberet vehementiùs reſilire . hoc autem eſſe falſum , conſtat , ſumendo pilam plumbeam , & pilam indicam luſoriam multò levioſiorem ; quæ ſi ſuo pondere in planum demittatur , hæc multum reſilit , illa vel nihil , vel parum . idem accidit , ſi utraq; violentè in planum , aut parietem coniciatur . Non ergo ſola eſt gravitas , & impetus , quæ motum reflexum efficit .

Eſt ergo præcipua reſilientiæ cauſa vis corporum elàſtica jam explicata . patet ab experientia ; quæ enim compreſſa habent vim reducendi ſe cum impetu ad ſuum ſtatum , ea ſunt reſiliendo aptiora . ſic pila luſoria , tomento compreſſibili , & citò ſe explicante plena , multum reſilit ; magis reſilit follis luſorius aere reſertus , cuius quanta ſit elàſtica vis , oſtendit Boyleus in egregio de hac ipſa re tractatu . maximè reſilit pila indica bitumine quodam plena , quod facilè comprimitur , & validè ad ſuum ſtatum revertitur . Hinc apparet , cur ſphærica figura repercuſſioni ſit aptiſſima ; quia ex una parte faciliùs premitur à plano , quod minore ſui parte impellit ; ex altera impellit magis con-

trà

trâ planum ad punctum usque contactus. Non negaverim, ad hoc etiam conferre gravitatem, & impulsus, causas motus directi, sed tanquam causas reflexi non proximas, sed remotas; quò enim citior est motus directus, eò vis elastica q̃b maiorem, ac magis violentam compressionem fortius exeritur, & motum reflexum velociorem generat. Addo, juvare non parum corpus reperiens, quod ipsum vi sæpè elastica præditum est; ut videre est in eo instrumento reticulari ex fidibus nervosis compacto, cuius est in pilæ ludo usus, in quod dum pila impingit, nervis retrorsum actis, & iterum cum impetu redeuntibus, pila validè repellitur.

Dices. pila eburnea, vel chalybea in lignum impellens, resilit. incredibile tamen est solidum ebur, ac ferrum ex levi percussione comprimi.

Resp. incredibile id non esse, sed ab experientia compertum, ut demonstravit in Academia regia D. Mariotte apud authorem Phil. Burg. cit. globulum enim chalybeum in incudem sevo, aut pinguedine paululum illitam demisit, quo ex altiore loco decidebat, hoc majus in incude sui vestigium relinquebat, quod ex collisione pars illius fieret magis complanata. Verum est, eiusmodi compressionem in corporibus duris per sensum non deprehendi; tum quia est compressio in parte minima; tum quia pars compressa celerrimè se restituit.

Dices iterum. non videtur assignata generalis causa motus reflexi. 1. quia si pila filo alligata ita deiciatur, ut terram non tangat, in medio aere, ubi desinit filum, resilit. in hoc casu nulla est compressio pilæ, nec satis est compressio aeris. 2. dum aqua in aquam conicitur violente, resilit. aqua autem compressionem non patitur, nec vi elastica donatur.

Resp. utrumque casum rationem habere

in vi elastica: nam in primo cum impetu ponderis descendente distrahatur filum, dum sua vi se contrahit, pondus iterum cum impetu attollit. in 2. autem liquoris cadentis partes motu discontinuantur, interque ipsas aer inseritur, qui pressus à pondere liquoris incumbentis, prius densatur, tum vi elastica se explicat, & liquorem hinc inde guttatim aspergit. hoc ita esse, patet ex duobus. 1. quia liquores tenaciores, qui cadendo difficile divelluntur, ut oleum, &c. parum, aut nihil aspergunt. 2. quia per casum liquoris violentum excitatur spuma, quæ non aliter habetur, quam per aerem inclusum tenui liquoris velo.

C A P U T VII.

An sit quies in puncto reflexionis.

Sensus est, an dum pila violenter in parietem conicitur, ac resilit, aut recta sursum projecta descendit, inter directum, reflexumque motum necessario intercedere debeat aliquantula quies.

Huic quæsito affirmativè respondet Aristoteles 8. phys. tex. 64. & seq. Prob. 1. motus directus, & reflexus sunt motus contrarii. hi autem continuari non possunt, ut supponit ex 5. phys. ergo debent esse per quietem interrupti. 2. inter motum directum, & reflexum mediare quietem, sensu & ratione constat. sensu quidem; quia sæpè in reflexione mobile retardatur, ratione autem; quia mobile in fine motus directi tangit planum, in quod impingit. vel ergo illud tangit in tempore, vel in instanti. si in tempore; ergo ibi mobilem tunc quiescit. si in instanti; ergo in eodem instanti mobile accedit ad spatium, & recedit à spatio. hoc autem fieri non potest; sic enim instantis esset actu finis unius motus, & principium

pium alterius; quod repugnat, ubi motus sunt contrarii; inter quos proinde non est reperire finem, & initium, sed potius excursum unius ad alterum.

Pro resolutione adverto, reflexionem motus tribus modis contingere. 1. ut uterque motus, directus, & reflexus sit naturalis. talis est cordis dilatatio, ac restrictio, quæ græca voce diastole, ac systole nuncupatur. talis est motus vaporum sursum, dum rarefacti habent gravitatem minorem aere, & motus deorsum, dum densati acquirunt gravitatem majorem; motus enim sursum potest dici naturalis vaporibus non simpliciter, sed in quantum calidas, æ ærarius est. 2. ut uterque motus sit quodammodo violentus, ut dum parvo corpori sursum projecto occurrit magna moles descendens, à qua deorsum traditur ultra impetum naturæ gravitatis: vel cum pile violenter in parietem coniecta, violenter etiam ab eo resilit. 3. dum motui violento succedit naturalis, ut dum lapis in altum jactus, sua mox gravitate descendit: aut dum naturali succedit violentus, ut dum pile suo impetu deorsum cadens, sursum deinde resilit.

Jam vero in primo reflexionis genere puto quietem esse mediam unum inter, & alterum motum. Et quidem de motu cordis ita sentit ex Galeno Vallesius, & Medici communiter, ut constat ex arteriarum pulsu; & præterea quia cum talis motus sit ad levamen naturæ, aliquid quietis admiscere debet ad fatigationem vitandam. Idem dico de motu vaporum, qui dum ascendunt, habent gravitatem aere minorem, majorem, dum descendunt. at inter majorem, minoremque gravitatem est gravitas æqualis, quæ ubi habetur, necesse est, ut vapor quiescat. Quamvis autem æqualitatis Mathematica fortasse in nullo instanti detur, si præsertim supponatur progressus intensionis

in gravitate per partes proportionales; habetur tamen sufficiens ad quietem æqualitas physica. Neque enim omnis inæqualitas gravitatis etiam insensibilis valet præponderantiam, ac proinde motum efficere, ut videre est in trutina, cuius lanci non quodvis minimum additum facit illam alteri præponderare.

Hoc idem verum est in tertio casu, dum grave rectè proicitur sursum, & deinde ex insita gravitate redit deorsum; ut enim constat ex modò dictis, potest deveniri ad æquilibrium inter impetum, & gravitatem; & tunc oportet mobile conquiescere. Neque valet, quod quidam opponunt, impetum esse talis naturæ, ut statim ac cessat à motu producendo, corrumpatur; adeoque ut non possit facere cum gravitate æquilibrium; & quietem. Oppositum enim manifeste deprehendo, dum sicca digiti pulpa eburneum globum ita comprimo, & impello, ut duplicem impetum is accipiat, pulsione antrorsum, compressione, & quadam circumvolutione retrorsum. tunc enim ubi paululum progressus est, aut sistit, aut etiam revertitur; quod scilicet vel impetus retrorsum acceptus, prævalet, atque ita globum retrò agit; vel solum potest alterum retardare; & sic quietem tandem facit. quin etiam si alteram similem globum ante se habeat, in quem rectum impetum effundat, statim & quidem cum impetu revertitur. Manifestum ergo est, impetum posse in corpore perseverare, etiam dum prohibetur à motu suo efficiendo.

At in secundo genere reflexionis nulla quies contingit; aliter si lapillus ascendens; in reflexionis puncto quiesceret, deberet ingentem molem descendantem, in quam incurrit, sistere, ac retardare; quod est inopinabile.

Postremò in communi modo resilientiz superiori cap. explicato, per elasticas vires contingente, censeo haberi in puncto reflexionis quie-

quietem corporis tum in parte, tum fortasse etiam in toto. In parte quidem habetur quies; quia dum fit compressio, prius una pars, deinde alia accedit ad planum; adeoque dum secunda magis accedit, prima quiescit. dum vero fit dilatatio, quæ posterius accessit, prius recedit; ac proinde dum hæc recedit, illa quiescit. Fortasse etiam in toto; quia post factam partistotam compressionem, fit etiam æquilibrium inter impetum comprimentem, & vim elasticam dilatantem, ut dictum est de æquilibrium, quod fit inter impetum, & gravitatem. nisi mavis, vim elasticam naturæ fortiores esse, statimque, ac sibi relinquitur, dilatationem sine mora perficere, ut videtur docere experientia; neque enim inter derelictionem nervi adducti, eiusque restitutionem spatium ullum temporis intercedere deprehendimus. Constat jam satis ex his, quando habetur quies in puncto reflexionis, quando non.

Sed quia aliquam reflexionem sine media quiete admitto, solvendæ sunt rationes Philosophi, quæ hanc videntur generatim improbare. Ad 1. ergo dicendum, motus eiusmodi non esse continuos, sed contiguos; sicuti contiguus, & non continuus est motus gravium circularis, v. g. rotæ, in qua sunt partes ascendentes, & descendentes, adeoque aliæ violentè, aliæ naturaliter motæ. Motus autem naturalis deorsum, & violentus sursum contrarii sunt, & consequenter non continui, sed contigui.

Ad 2. dic, non innotescere à sensibili experientia quietem inter eos motus intercipi in omni casu, imò oppositum, ut dictum est. Ad rationem ibi additam resp. mobile, si reflectat à plano, vel aere citrà motum compressionis, ac dilatationis, non tangere planum, vel aerem subiectum, si contactus sonet permanentiam; tangere autem, si contactus significet successivum accessum in toto uno tempore, itaut

ita ut magis accedi non possit, & successivum recessum in toto tempore immediatè sequenti.

C A P U T VIII.

De Motu Proiectorum.

HActenus de vi motiva naturali. nunc ali-
quid in calce de violenta. Moventur qui-
dem gravia sursum, & ad latera à proiiciente.
queritur primò, qua vi. Certum est; non mo-
veri semper immediatè ab ipso proiiciente:
cum enim moveantur etiam à proiiciente di-
vulsa, si proiiciens esset motus eiusmodi causa,
ageret in distans. Dux igitur viæ supersunt
causam istam explicandi. altera est eorum, qui
projecta volunt propelli à mediò, nimirum ab
aere: quod ipsum dupliciter explicatur. pri-
mò sic. dum manus impellit lapidem, cum la-
pide aerem etiam movet: pars aeris propinqua
mota movet sequentem, & hæc aliam, semper
tamen minus. Motus partium aeris lapidem
secum defert, atque ultra pellit perinde ut per
digitorum pressionem nucleus excluditur. se-
cundò sic. aer manus impulsione comprimi-
tur, adeoque dum se deinde restituit, ac dila-
tat, impetum facit continentem in lapidem,
eumque propterea movere pergit.

Altera sententia est eorum, qui projecta mo-
veri censent ab impetu ipsis à proiiciente im-
presso. Et hi quoque divisi sunt, nam impetum
alii volunt esse qualitatem in proiiciente pro-
ductam, alii nihil esse præter meram determi-
nationem ad motum; qua scilicet stante, corpus
exigit à Deo poni in tali, tantoque loco suc-
cessivè.

§. I.

Projecta non moventur à medio.

Huius oppositum asserit Aristoteles 8. phys. tex. 82. & 3. de Cælo tex. 28. quem sequuntur ferè omnes ejus interpretes; inter quos D. Thomas. Verùm quia sententia ejus à vero abhorret, cum propterea deferunt Peripatetici passim, ipse quoque D. Thomas, ubi personam interpretis exuit, induitque Philosophi, ut videre est apud Ruvium 8. phys. tr. 2. qu. 1. n. 8.

Rationes huius dicti multæ, multumque efficaces communiter asseruntur, quas in præfenti paucis amplectar. Prima sit ab experientia multiplici. Primò eodem impetu, quo impellitur lapis, si impellatur pluma, hæc tardius, & ad minùs spatium movetur. oppositum autem contingere deberet, si motus projectorum esset ab aere; aer enim qualem impetum à proiciente accipiens, facilius deberet, quod levius est, minusque resistit, deferre.

Secundò si rota nullas habens in curvatura partium asperitates, in suo axe constituta, circumagatur, etiam si impellens per se desinat impellere, pergit circumvolvi; & quidem eò diutius, quò fuerit ex materia graviore, ac densiore, atqui talis motus non est ab aere; quia constat aerem vix, & ne vix quidem cum rota circumvolvi; si enim candelam accensam rotæ tunc admoveas, ejus flamma nullam patitur sensibilem agitationem; cum tamen deberet pati maximam, si aer circà rotam ità violenter moveretur, ut posset satis esse ad motum rotæ efficiendum.

Tertiò dum corpus magno impetu fertur per aerem, aer non juvat, sed impedit potius talem motum; patet hoc in velocissimè currente.

rentibus, qui experiuntur motum aeris adversum. quod si quid facile mobile secum habeant, velum v. g. vel capillos, isti in oppositam partem ab aere remonentur. Manifestum ergo est, quod aer non se habet in motu proiectorum perinde, ut fluvius corpora secum deferens.

Quartò, ventus multò fortius movetur, quam aer à proiciente impulsus. atqui ventus satis non est, ut ferat ad tantam distantiam, imò sæpè nec movet lapidem, quem impulsus proicientis longè jaculatur, etiam vento contritante. Motus ergo proiectorum non est ab aere. Et sane quis credat, pilam plumbeam, aut ferream è bomba explosam duo, vel tria milliaria conficere sola vi aeris delatam?

Altera ratio non minùs efficax ducitur ex motu ipso aeris, cui tribuitur motus proiectorum. quæritur enim, unde aer moveatur, dum à proiciente distat? respondent, partem diffitam moveri à contigua. benè est. sed pars contigua, ubi est à proiciente divisa, vel pergit moveri, vel statim à motu cessat. si primum, inquirò, qua vi moveatur ea pars aeris? non enim à proiciente jam distante: non ab aere à tergo accurrente ad replendum vacuum; ille enim aer accurrit, quia hic movetur; adeoque priùs est hunc moveri, quàm illum accurrere. movetur ergo à virtute ipsi à proiciente impressa, quæ si aeri, non est, cur projecto etiam imprimi non possit, ac debeat. Si secundum, jam illa pars non potest aliam ulteriùs urgere; adeoque motus omninò cessabit. Et quidem cum inter partes aliæ sint moventes, aliæ sint motæ; necessè est, ut aliqua distans à proiciente moveatur, dum præcedens quiescit, nisi velimus dicere, totum aerem moveri simul antrorsum ad modum baculi; & tunc totus aer haberet rationem projecti, ac rediret de eo eadem inquisitio.

Ex iisdem patet, non posse vel probabiliter
re-

recurri ad aeris elaterium. in projectione enim ut habeatur agitatio, & impulsio, non tamen aeris compressio; quæ tamen requiritur, ut possit aer vim suam elasticam exercere; sed vix habetur. nisi ubi aer solido corpori inclusus est. Ad hæc non video, qua ratione rota bene lævigata ab aeris elaterio circumagatur; præsertim cum elaterium totam suam vim momento penè temporis explicet, faciatque motum vibrationis potius, seu alternatum, quàm continuatum in unam partem.

Dices. motus violentus ideo est violentus; quia est ab extrinseco principio. ergo motus lapidis sursum ab extrinseco est; adeoque nihil est in ipso lapide, quod sursum pellat. extrinsecum autem movens non est projiciens, quod distat. superest ergo, ut sit aer.

Resp. motum sursum esse lapidi violentum, quamvis sit à qualitate ipsi lapidi Intrinsicæ, à projiciente producta; quia hæc ipsa qualitas violenta lapidi est. sic calor violenter aquæ impressus producit in ea raritatem eidem aquæ violentam.

§. I I.

Projecta moventur ab impetu, qualitate absoluta iisdem à projiciente impressa.

MOveri projecta per impetum à proiiciente acceptum, satis constat ex dictis superiore §. si enim proiiciens non per se, non per medium mover, superest, ut moveat vi impressionis in lapidem factæ. Jam verò istam impressionem censeo cum communi Peripateticorum qualitatem absolutam motricem adversus Magnanum, & Atomistas reliquos qualitatum istiusmodi professos hostes. Verum si recolantur, quæ superius pro impetu à gravibus

bus in motu naturali acquisito disputavi, à fortiori arguetur impetus specialis qualitas in motu violento.

Arguo prætereà ex propriis. dum lapis sursum proicitur, necesse est, ut habeat in se virtutem sursum motivam à se, & motu distinctam: hæc virtus est qualitas intenta, ergo. prob. maior: nam primò nihil moveri potest sine causa movente; motus enim effectus est: nullus autem effectus sine causa. Rursus debet esse causa naturæ mobilis, ejusque gravitati contraria, & prævalens: quæ quidem alia esse non potest ab impetu, qualitate à proiiciente projecto impressa.

Qui huic argumento responsionem quærit, consulat Magnanum Phil. Nat. cap. 19. prop. 21. ubi tam manifesta, tam evidentia afferre se dicit, tam plenissime satisfacere; ut dubium nullum supersit in re tam clara. quare si auctori credis, actum de Peripatetica qualitate est. Verum ego, qui huius hominis jactatorem genium novi, ructantemque evidentiam, ubi probabilitatis vix umbram assequitur, ut videatur Philosophorum Pyrgopolynices, am. pullas istas excutere diligentius habeo. quare totam eius doctrinam ex fide prius exponam; tum ventilabo.

Ait ergo, mobile semel à proiiciente impulsus, continuare deinde motum vi unius determinationis à Motore acceptæ. quod si petas, quid sit ista determinatio, responderet, esse motum ipsum. nam motus præsens ut se ipso formaliter determinat mobile ad moveri in præsentī, ita & idem determinat ad moveri in tempore sequenti, si nullam in eo accipit mobile determinationem ad quietem necesse est enim, ut sequatur motus, si non sequitur quies: non potest autem sequi quies, ubi nulla sequitur determinatio ad quietem. Atqui in projecto post primum motum, quo simul cum proi-

eiente

ciente movetur, nulla est ad quietem determinatio: quod probat; quia determinatio ad quietem victa est, & omnino sublata per ipsam determinationem ad primum motum, ergo post primum motum necesse est, ut proiectum moveri pergat.

Post hæc non adversarium sibi, sed prævicatorum apponit, qui ita obiicit. motus, & determinatio ad motum nihil est physicum, in Magnani sententia. ergo non potest physicè exigere motum sequentem. Respondet per instantiam, nam similiter ad quietem inchoandam, continuandamque requiritur sua determinatio: hæc tamen nihil est physicum de novo, sed est ipsum non mutare locum, seu incipere non mutare. Ut ergo sine nova physica entitate habetur quies, & ad quietem determinatio: ita & sine entitate physica haberi poterit motus, & determinatio ad motum. tum multa congerit ad probandam paritatem motus, & quietis, quæ prætereo, cum ad rem nihil faciant.

Ut verò, quantum sit huius doctrinæ momentum, planum fiat, distinguenda est duplex determinatio, formalis, & causalis. Hac quidem distinctione nihil in Philosophia tritius, ut mirum sit eam vel ignorasse, vel dissimulasse Magnanum, tantum sibi Philosophum, determinatio formalis est universim effectus ipse, qui sua existentia est sibi forma, aut quasi forma determinans esse potius suum, quam non esse: sua verò inexistencia, si est accidens (logicum, an physicum in præsentia non moror) determinat subiectum ad hanc potius, quam oppositam denominationem. determinatio causalis est in priori ad formalem, estque ea, qua causa ultimò determinatur, ut effectum hunc potius, quam oppositum ponat. Sit exemplum in actu vitæ v. g. cognitione, quæ quidem se ipsa formaliter est determinatio

tio potentia ad cognoscendum: sed in priori ad ipsam est alia in potentia determinatio, qua determinatur ad ponendam cognitionem potius, quam non cognitionem, & hanc potius cognitionem, quam illam. Rursus ab hac determinatione causali non eximitur nisi actus liber, qui procedit à potentia æquilibri quā tali. Verum hic etiam reperitur determinatio causalis, si hæc non sit aliud, nisi causa determinationis formalis.

Jam verò omnem formalem determinationem contingentem supponere in priori causalem, evidens est ex ratione contingentia; nihil enim, quod potest esse, & non esse, potest sibi esse causa, cur sit potius, quàm non sit. hinc naturalis cuiusque curiositas inquirendi effectus novi distinctam causam; unde rideamus, si quis pro causa effectum ipsum assignet. Ad autem non modò est verum de effectibus rigorosis, qui per propriam productionem existunt, sed etiam de minùs rigorosis, qualis est in sententia Magnani motus nullam physicam entitatem de novo existentem importans. Ubi enim motum videmus, vim motivam inquiremus. hinc motus naturalis deorsum Magnus ipse principium effectivum internum in gravibus agnoscit, hinc motus restitutionis vim corporis elasticam causam vulgò tradunt, &c.

Præterea virtutes motivæ contrariæ ita comparantur, ut una alteri composita moveat, si prævalet: quod si superetur, non moveat ipsa, sed contraria: si verò neutra superet, æquatis viribus, non motus, sed quies sequatur. Hæc omnia ita mihi sunt manifesta, ut non videam, quid possit ex his negare Magnanus.

Nunc ita arguo, & instauro datam rationem. Dum lapis movetur sursum violenter, assignanda est eiusmodi motus determinatio non formalis solum, h. e. motus ipse contingens, sed etiam causalis. Sed hæc non est motus sequens

quens, ut patet: nō motus præcedens, qui cū non sit, non potest motū sequentem efficere: nō mobile prout antea motum; quia cum hoc, quod antea motū fuerit, stare potest, quod nunc quiescat, aut moveatur opposito motu. quare si nihil in mobili distinctum sit, quod motum sequentem determinet, motus sequi non potest.

Accedit, quod in gravi est intrinseca vis motiva deorsum jam determinata ad talem motum à terræ effluvis juxta Magnani mentem: quare si nulla in eo sit vis gravitati prævalens, necesse est, ut sequatur motus deorsum. si ergo in gravi projecto nihil sit, quod determinet motum sursum præter motum, & hic certe nulla sit virtus motiva, sed potius virtutis motivæ effectus; consequens est, ut grave à proiiciente divultum statim decidat; si enim ubi duæ virtutes inæquales componuntur, sequitur à prævalente motus; multò magis sequetur à virtute motus, ubi ea comparatur cum non virtute. sic ubi pondus ingens fune continenter sursum trahitur, in momento, quo funis abrupitur, pondus decidit; quia tūc gravitas non prævalet solum, sed etiam nullam habet à virtute opposita resistantiam: quamvis adsit à prævio motu Magnaniano determinatio.

Dicet fortasse, grave indifferens esse ad motum sursum, & deorsum, imò, & posse per se utrumque juxta variam determinationem. Sed reicitur ex duplici ratione; primò, quia motus sursum æquè esset lapidi naturalis, ut deorsum: quod negat Magnanus. dum verò ait, lapidi esse violentum motum sursum spectato secundum se, sed non spectato, ut fuit sub motu immediatè ante, videat, ne idem dici possit pariter de motu deorsum, quod sit scilicet gravi secundum se violentus; sed non, ut stat sub determinatione à terræ effluvis accepta. dato, quod grave sit ita indifferens, stat adhuc, debere sequi motum deorsum potius, quàm sur-

fursum. nam in indifferentia principii videndum, quæ sit potior, & efficacior determinatio, à motu præcedente, & jam nullo, an ab effluviis terreis præsentibus, urgentibusque deorsum. equidem non intelligo, qui possint duo ista comparari; & qua ratione præponderet præterito præsens, h. e. nihilo ens.

Cont. hæc omnia. eadem aut par virtus est, quæ primò ponit, & quæ deinde conservat effectum; quod enim poni sine causa non potest, nec potest sine causa aut eadem, aut æquali in viribus conservari. atqui motus proiectorum poni primò non potest sine vi proicientis prævalente gravitati; nec satis est determinatio ipsius motus. ergo non potest motus ille conservari sine virtute prævalente gravitati. atqui talis virtus non est certè motus: non mobile: aliter hoc sibi prævaleret. ergo impetus ab his omnibus distinctus.

Dum ergo ait Magnanus, motum semper continuari, donec accedat determinatio ad quietem, debuit addere. si adsit determinatio non quæcumque, sed causalis ad continuationem motus; cum enim omnis effectus cesset, cessante causa, jam potest sequi quies, sola ablatione virtutis motivæ. Deinde falsum est dictum, cum possit accedere nova, aut prævalere vetus, & insita determinatio ad motum contrarium, ut dictum est. Hoc totum est verum de quiete, quæ quidem positivus est effectus requirens præsentem causam, perinde ut dictum est de motu.

Supere est ut solvam pauca illa, quæ adversus hunc impetum afferunt veteres Peripatetici. 1. arguit loc. cit. D. Thomas. Qui proicit, non alterat, sed solum movet localiter corpus. sed si qualitatem aliquam produceret in projecto, illud alteraret. ergo nullam qualitatem producit. 2. Qualitas ista non habet causam productivam, nec destructivam, ergo non est realis

his qualitas. prob. prima pars antecedentis; si qua enim esset causa ipsam producens, ea esset motus localis. at motus utpotè modus operativus non est. ergo: prob. secunda pars. nulla causa est corruptiva per se, sed solum per accidens. at impulsus non potest destrui per accidens; quia non habet contrarium, ad cuius adventum debeat à subiecto recedere. Rursus neque destruitur, ut lux deficiente causa; constat enim etiam cessante motu proiicientis, eoque jam distante, impulsus non cessare. Aliae etiam quaestiones moveri possunt circa naturam impulsus, quae satis difficilem ipsam reddunt.

Resp. ad 1. alibi dictum esse, non quancumque productionem qualitatis esse alterationem, sed solam productionem qualitatis destructivae, qualis non est impetus: sed accipiendo nomen alterationis latius, conceditur sine absurdo, proiicientem alterare.

Ad 2. dico 1. impetum non produci à motu, sed à proiiciente per motum; itaut motus sit conditio, sine qua non. Dico 2. impetum corrumpi per accidens, non per introductionem formae contrariae, sed quia repugnat naturae mobilis, ad ejus proinde exigentiam destruitur. Et quidem gravitas licet videatur impulsui contraria propter contrarietatem effectuum, non tamen ita, ut minuatur ab impulsu, & deinde sensim ab intrinseco reparetur, si quis enim lapidem manu attollat, adeoque impetum illi imprimat, non minùs lapis ponderat in lancem subiectam, ut suprà dictum est. Destruitur ergo impetus ad gravis ipsius exigentiam, quod quidem petit vel illum non habere, vel si violenter imprimitur, petit illum successivè deficere, & tandem destrui, ubi vim amplius movendi non obtinet. Aliae, quae de impetu quæri possunt, difficultatem non habent: & si haberent, non idcirco.

circò improbant eius existentiam, sed solùm naturam additam faciunt.

Hic demum nota, motum refluxum juxta superiùs dicta non esse ab impetu directo, sed ab alio per vim elasticam inducto. an autem impetus directus habeat vires efficiendi motum reflexum, ubi corpus supponatur durissimum, & minime compressibile, res est incerta; & quodcumque dicatur, nihil erit contrarium dictis. Sanè impetus quilibet de sua natura, & per se habet, ut moveat motu recto, ad eam partem, ad quam à proiciente dirigitur, quare ubi incidit in obstaculum, poterit mutare determinationem, & corpus retro agere. Neque valet, hinc ducta Magnani instantia; quod, scilicet si determinatio præterita potest hanc præ illa rectam lineam in motu efficere, poterit eadem efficere motum ipsum. Etenim recta linea non efficitur à præterita determinatione, nisi applicando virtutem huic potius, quam illi spatio: quæ applicatio non est satis ad motum sequentem, nisi adsit virtus superactiva gravitatis, ut dictum est. Exemplum est manifestum in gravitate ipsa. possum enim rotam per hos, vel illud declivè impellere; & stante mea applicatione in hoc declivi, perget rota deorsum hanc præ illa rectam lineam signare. Cæterum perperam hinc argues, meam illam primam applicationem sufficere, ut rota pergat deorsum per declivè moveri sine intrinseca vi motiva.

LIBER SEPTIMUS

PHYSICORUM

DE MIXTIS IMPERFECTIS.



Imperfecta voco Mixta, quæcumque inter elementa, & viventia naturam mediam sortiuntur. Sed hæc ipsa in duplici sunt classe; alia enim ex imperfecta mixtione resultant: cuiusmodi sunt omnia, quæ, quia in sublimi contingunt, Meteora appellantur: quibus omnibus ex debili compagine brevis est duratio, & facilis resolutio. Alia perfectum quidem habent mixtionis modum, sed quia vel non omnia in se elementa confundunt, vel ad vitæ perfectionem non assurgunt, imperfecta dicuntur. atque ea sunt metalla, lapides, & quæ communi Fossilium nomenclatione donantur. De his erit præsens sermo. quamquam quia faciliora, & ex principiis jam stabilitis pleraque descendunt, paucis, ac per compendium tractanda sunt.

Q U Æ S T I O P R I M A .

*De communi Meteororum materia
& causis.*

C A P U T I.

Quid, & quoruplex sit Halitus.

Halitus est generalis omnium Meteororum materies. quare eius natura primum scrutanda; tum causæ inquirendæ. Constant cor-
Philos. de Bened. T. III. I pora

pura omnia, ut videre est in singulorum analysi, parte duplici, altera fixa, quæ calore nunquam attenuatur, & evolat: altera subtiliore, quæ statim ac incalescit, tenuitatem maiorem adepta, & inde agitationem, & motum, sensim educitur, abitque in auras. Hanc ipsam dicimus *Halitum*, qui proinde non ex aqua solum, ac terra, sed ex nullo corpore non emanat; quod multiplex, compertaque experientia manifestum facit.

Omnes halitus ad duo summa genera revocantur. inflammabiles alii sunt, & *Exhalationis* nomine comprehenduntur, in fumum, spiritumque divisæ: quorum ille sæculentus magis, ac terreus, difficilius vi caloris attollitur: hic à terrea sæce secretior, & actuosior altius evadit. Alii sunt fluxiles, & in humorem resolubiles, qui *Vaporis* appellationem accipiunt.

Utrumque halitum Peripatetici actu calidum faciunt; neque enim aliam à calore attenuationis, & ascensus causam agnoscunt: in quo consentientes habent plerisque ex exteris, si Cartesium demas, cui hoc negotium subtilis materiæ motus solidum perficit. Sed differunt halitus partim natura, ac forma, quæ alia in ipsis est pro corporibus, ex quibus manarunt, discrimine: partim siccitate, & humiditate, illa exhalationes, hæc vapores distinguente:

Varietas porro naturalis halituum (ut hoc etiam obiter tangam) tanta est, ut in hanc præcipuè referenda videatur, ut alibi dictum est, vis illa seminalis, ac veluti Panspermia, quæ aeri latè immiscetur; unde tot vegetabilia sua sponte, nulloque ferente nascentia, tot animalia, quæ solo elementorum concursu ex putri generari credita sunt, ortum suum probabilius trahunt. Ex eodem est fonte mira aeris varietas, hic salubris clementia, illis gravis,

ac

ac noxii pernicies, ac penè virus: cujus rei vix aliud Cælum, quam nostrum hoc Campanum, luculentiora in dies exempla suppeditat. in non magna enim distantia magnam deprehendimus dissimilitudinem, ac penè pugnam, æstivo præsertim tempore, quo regio alia amœnissima est, alia inhospitalis, ac pestilens adeò, ut in eam vel ad diem commigrare lethale sit. Pausylipi collis, Poetarum nostrorum carminibus inclutus, cæpit & ipse hoc morbo laborare. In causa est subterraneum bitumen, salesque seu per se, seu mixtione nocentes, quorum venæ à Bajano, Puteolanoque agro eo usque pergunt pertelluris ima; ibique à calore seu externo solis, seu interno ignis agitati, fumantesque pestiferos halitus mittunt aerem inficientes. testes sunt toto agro emicantes fumi & crebri, & graveolentes. Sed hæc utpotè extrarem meam aliis curiosius inquirenda relinquo. Superest ut halituum eiusmodi causam in medium proferam.

C A P U T II.

De causa Halituum effectiva.

Ubi

De Ignibus subterraneis.

PARS corporum spiritiosa, & volatilis non est halitus, nisi exhalet: neque exhalat, nisi incalescat. Potest autem calor esse vel à causa interna, ut in viventibus, quæ in se propterea habent corruptionis suæ principium, ac fomitem: vel ab externa, quæ quidem præcipua Sol est, maria, terrasque jugibus radiis coquens, cogensque expirare. Verum quia Solis calor terram non altè subit, & certum cæteroque est, à penitioribus fodinis halitus elevari sulfureos, bituminosos, & ubi metallorum abditæ sunt venæ, etiam arsenicales, à terræ

ipſius intimo calore actionem iſtam proficiſci dicendum eſt. Sed hic ipſe calor, à qua ſit cauſa, non ſatis conſtat.

Equidem eorum ſententiæ accedo, qui hunc igni ſubterraneo acceptum referunt, quem ſcilicet penè omnium in terra contingentium generationum vel authorem, vel adiutorem cenſeo. Et hoc malo, quam ad ſales neſcio quos confugere, ſeu volatiles, ſeu fixos mutuo concurſu, & attritione calorem excitantes, perinde ut accidit in liquorum quorundam, ſumorumque permixtione, qui frigidi licet, dum ſe contingunt, incaleſcunt, ac fervent. Ubi enim cauſa eſt manifeſta, ad reconditam, & abſtruſam recurrere non eſt opus. quæ autem certior, quæ manifeſtior caloris cauſa, quam ignis? Accedit, ſubterraneum calorem eſſe perpetuum, ut eſt videre in thermis nunquam non calentibus. non ſatis autem apparet, qui poſſint falſi ii halitus præſto ſemper eſſe in caloris fomentum. Ad hæc ſales à ſuis corporibus non aelluntur, niſi vi caloris impulſi. danda igitur eſſet cauſa caloris halituum evolantium, quæ quidem ſi halitus alii ſunt, in infinitum ibitur; niſi tandem ſtetur ad ignem.

Demum experientia in Hungaricis auri fodinis, & alibi docet, in terræ viſcera ſe penetrantes, modicum primò calorem, tum majorem, majoremque ſentire, ut altiùs, & altiùs ſubeunt. ſignum ergo eſt, latere ibi profundè deſoſſum ignem, cujus vis pro accèſſus menſura percipitur. quod ſi permixti ſales plerumque volatiles calorem efficerent, nihil eſſet, cur ſummus calor ad hoſtia etiam cryptarum non ſentiretur, ſalibus ad ea jam patentia pervolantibus.

At, inquires, pares, aut fortiores etiam rationes perennem ignem ſubterraneum excludunt. nam primò intelligi non poteſt, quod ſit perpetuum alimentum, flammæ ubique terrarum

rum ardenti sine intermissione sufficiens. Deinde qui fieri potest, ut tantus ignis tamdiu in locis occlusis seruetur sine spiraculis, unde fumi, ac fuligines exhalent? cum sciamus cæteroqui ignem conclusum, & impotem expirandi suffocatione paulatim extinguï.

Præter hæc ubi immodicus est terræ calor, nullum sæpè, vel si altè effodias, ignem deprehendes. non ergo ab igne est calor subterraneus.

Sed hæc non tanti sunt, ut latentem sub terris ignem à calore ubilibet efficiendo prohibeant. Hoc, ut planius fiat, recolenda, quam lib. sup. sup. posui, veterum Philosophorum sententia, in terræ centro, tanquam naturæ Archæum, si licet cum Chymistis loqui, ignem statuentium; quod ipsum indicant divinæ literæ internum ignem non rarò inculcantes. & quamvis hunc faciant carnificem simul, & ergastulum reproborum; quo justus Deus injurias suas æternum ulciscitur; hoc nihil vetat, quominus verus, propriusque sit ignis, & eiusdem cum nostro elementari naturæ, nisi quatenus in materia est densiore, ut potè sulfurea simul, ac bituminosa, proindeque obscuriore, & acrius comburenti. Nihil est rursus cur ignis idem damnatis maximè noxius non sit reliquæ naturæ beneficus, calorem usquequaque suum ab intimo fonte in totam terram derivans; neque hoc abest ab ingenio Providentiæ, commendo magis nostro, quam damno prospicientis. quavis enim impurus ibi sit ignis, & nocere dumtaxat natum incendium: facile tamen per spatia, quæ decurrit, nocuam impuritatem deponit, perinde ut maris aqua falsedinem, cum ad fontes efficiendos terram ingreditur. Centralem ergo hunc ignem à Deo in ipso Mundi exordio cum cæteris elementis conditum, & in terræ sinu ultimo conclusum, considerare ita licet ut cor in animali; ut enim hoc per venas, & arterias ad dissita membra calorẽ vivificum usque propagat; ita prorsus

sus igniseiusmodi in longè positas terræ partes per rimas, canalesque quâ rectos quâ spirales, ac tortuosos, aliterve dispositos caloris sui radios immittit, ac terræ viscera ubique fover.

Quod verò attinet ad ignis huiusce pabulum, non habet aliam difficultatem ab ea, quæ adversariis etiam est solvenda in Vulcanis semper ardentibus, qualis est in Hecla Islandiæ Monte, in Monte Carbonum Misenæ regionis Germaniæ, & alibi. Ut ergo his natura, ut ardeant, perpetuum fomitem ministravit ex sulfure, bitumine, aliavè materia combustibili, cuius quantum ex una parte consumitur, tantum ex altera reparatur, circulante perpetim consumptione, ac reparatione: ita prorsus in centrali igne contingit. Mitto, quod à Theologis plerisque is ignis sine pabulo singulari Dei Numine conservari dicitur.

Periculum porro suffocationis mirum est, quod ingeratur ab adversariis. nam primò in ingenti ea cavitare non parum aeris, ac spatii est, ubi satis ignis respirare queat. Deinde tot Montes ignivomi quid aliud censendi sunt, quam flammæ illius spiracula, & infumibula? ad eos enim usque pertinere infernum ignem non modò Patres plerique apud Restam Meteor. l. 1. tr. 4. cap. 3. & 4. sentiunt, sed Deus ipse visus est testari Deuteron. 32. iis verbis: *Ignis succensus est in furore meo, & ardebit usque ad inferni novissima. . . . & Montium fundamenta comburet.* tot verò sunt eiusmodi ostia, ut prolixè valeat abditus ille ignis expirare. *Ætna* est in Sicilia, & prope eam Insulæ Vulcaniæ. in nostra Campania Vesuvius, *Aenaria* Insula, & Campus in colle prope Puteolos, ubi sulfuris fodina, ignisque perpetuus. *Hecla* in Islandia celebris est à continenti ardo: Mons item carbonum in Misena regione Germaniæ, teste Jonstono. in Lycia Mons est *Chimæra*, inquit Plinius, immortalibus,

ac noctibus flamma. Argæus in Cappadocia, in Bactris Cophanti vertex. In Africa maximo ardet incendio Theon, Ochema dictum, Æthiopicum jugum. Mons ibidem Guazeval, ut narrat apud Restam cit. Leonius, ex amplissimo hiatus ignem perennem eructat. Teneriffa item Insula una ex Fortunatis Montem habet ingivomum miræ altitudinis. Quid referam, quam multi pariter in America ardeant Montes? quam multi in India, præsertim in Insulis Ternate, & cui vulgare nomen *del Moro*? Neque verò licet rariora, nulla tamen sunt plana ignem vomentia, de quibus Arist. cap. 33. de admir. audit. & Strabo lib. 12.

Atque ita solutæ manent præcipuæ adversus ignem subterraneum universalem caloris item subterranei causam difficultates. quæ verò à thermis calentibus sumitur, quibus nihil ignis subesse deprehenditur, cap. 4. solvetur.

C A P U T III.

Causa terræmotuum ex modo dictis elicitur.

Non est animus in præsentia omnia, quæ ad terræmotum spectant, pro merito examinare, sed causas dumtaxat inquirere, & quæ inde consequuntur, innuere potius, quam persequi.

Aristoteles pro causa terræmotus spiritum assignat illi omnino geminum, qui ventos in libero aere generat: talis enim spiritus & mobilis est, & maxime motivus. Confirmat hanc spiritus vim ex iis, quæ contingunt in nostro corpore, in quo epilepsia præsertim laborante convulsiones tanto impetu à spiritu fiunt, ut multorum contra nitentium conatu reprimi

non possint. Huc etiam illud advocat, quod vulgò creditur, terræmotum non fieri nisi ubi summa est aeris tranquillitas, adeoque ubi spiritus intra terram continetur.

Relicta huic sententiæ sua probabilitate, probabilius multò est, non à spiritu terram moveri, nisi accenso; adeoque unum ignem terræmotus causam existere. Id multa indicant. Primò enim materiam, ex qua spiritus extat terræmotivus, esse ex iis, quæ in ignem, non in ventum resolvuntur, constat ex sulfureorum halituum copia, quæ ante, & post terræ concussionem expirant. Paulo ante nuperrimum terræmotum, qui Neapolim validissimè concussit, ex puteis teterrimus odor sulfuris exhalavit: & paulò post visa est urbi insistentis exhalationis rubicundæ per longum extensa series quasi spectatrix excidii, quod nobilissimis ædificiis intulerat. Præter hæc terræmotus saltem frequentès non contingunt. nisi ubi sulfuris, nitri, ac bituminis vis est ingens, ibique adeò, ubi ignes subterranei ardent. quare Campaniam nostram huic pesti obnoxiam maximè censeo. quod si hætenus ab ea immunis tanto intervallo fuerat, in causa perennis penè Vesuvii conflagratio; nam per eius ingens os erumpentibus continenter ignibus, materia non poterat congregari, & occludi. Sed ubi in ultima eruptione novum sibi combustorum lapidum montem imposuit, seseque obstructa materies, exitumque consuetum non habens in nostram perniciem exarsit, impetumque in nos omnem exeruit. quare verso jam in desiderium metu, Vesuvii silentium horremus, incendium votis omnibus sollicitamur.

Id ipsum probat bellicorum cuniculorum exemplum, in quibus tormentarii pulveris copia congesta, dum momento accenditur, & laxiorem locum quærit, muros, turres, propugnacula

gnacula evertit; ut hunc meritò dixeris arte factum terræmotum. Ex hoc etiam declarari potest & materia ignis terram concutientis, & modus accensionis. materia quidem sulfur, & nitrum, quæ dum miscentur, apta sunt, ut momento ignem concipiant: quod est opus, ut ex subita dilatatione concussio repaguli consequatur. Accensio autem contingere potest vel à radio Inferni ignis eò per novam rimam delati; vel ab igneis ipsis spiritibus, ac scintillulis in unum per antiperistasis coactis, & jam urendi vim obtinentibus; vel ab igne subterraneo jam olim ardente, ad quem ubi proximè accedit accensibilis materiæ congestio, illicò ignitur.

Ventum porrò in terræ cavernis inclusum tantò motui non sufficere, videtur manifestum. si enim is flatus dicatur ab aere in terram se penetrare, non potest terram succutere, ut non potest succutere cubiculum vehementissimus licet ventus, clausis januis, per fenestram patentem ingressus. si verò intrà ipsam terram flatus generetur, subitam dilatationem tanta vi efficere non potest; etenim aer ipse, cuius est vis elastica valdè potens, intrà follem luserium compressus quiescit, præpeditus tum à folle, tum ab aeris externi pressione. quantò magis id ipsum præstabit adversus frigidum spiritum terræ incumbentis pondus, ac moles?

Ex his pronum jam est explicare terremotus species, atque effecta. Dum enim materies accenditur ita, ut vis flammæ tota simul exaratur in partem terræ rectà incumbentem, quæ proindè arteriæ instar alternis subsilit, ac subsidit, Aristoteles *pulsus*, Seneca *succussionem* appellat. Cum vero ignis inæqualiter terram impositam elevat, quod priùs sub una, dein de sub alia accenditur, ex quo fluctuatio sequitur ædificiorum, perinde ut in mari navium,

Aristoteles *tremorem*, Seneca *inclinationem* nuncupat. Alia alii nomina tribuunt, quæ ab effectibus sumunt, sed duo data præcipua sunt, ortumque habent ex situ, quo materia congregatur; si enim disponatur secundum profunditatem, pulsus; si secundum longitudinem, tremorem efficit.

Effecta deinde terræmotuum multa sunt. Dehiscit quandoque terra, vi spiritus distrahente partes, dum exitum molitur quandoque subsidit, & urbes, montesque ipsos absorbet: quod accidit, ubi cavernosa est tellus. Insulæ, & montes de novo succrescunt, dum terra sursum evehitur, & veluti in fornicem curvata consistit. aquæ calentes in frigidas, frigidæ in calentes evadunt, obstructo per motum, vel reſerato meatu, quo ignem accipiunt flumina arescunt, & nova subinde emergunt, terræ lapsu occlusis, apertisvè canalibus, per quos aquæ se insinuant. ignes etiam quandoque erumpunt; pestilentia, sterilitateque succedunt pro spiritus accensi quantitate, qualitateque hominibus, ac terris noxia.

Signa demum terræmotus traduntur non pauca; sed vix aliquod minùs incertum, quam sulfurei halitus è puteis emanantes, turbantesque aquam. hinc enim Anaximandrum, & Pherecidem terræmotum prænuñciasse Plinius author est; idque nos etiam experti sumus. Subterranei sonitus, ac veluti tonitrua non tam terræmotum futurum, quam præsentem indicant. Nostrum etiam paulò ante memoratum terræmotum præcessit in Sole corona (halonem Græci dicunt) sed turbida, & nigricans. crediderim fuisse in causa sulfureos ipsos fumos evaporare incipientes, aeremque occupantes. Illud quoque frequenter notavimus vix ullam fuisse terræ concussionem, quam vel eodem, vel præcedenti die non anteiverit quædam in aere simplex vaporum, aut multiplex

plex linea in longum porrecta: quod ipsum notatum esse in Calabriae terræmotibus fama est. Meminit hujus signi Philosophus. rationem reddit ex sequenti valdè dubio. Alia signa omninò incerta sunt, præsertim aeris silentium, & tranquillitas. Eo ipso, quo hæc scribo, die qui est Decembris octavus, quinque fermè terremotus sensimus, & ex his duos valdè notabiles, cum aer, ac mare a Libonoto vehementissimè agitaretur; idque aliàs etiam observavimus.

De terræmotus duratione celebre est Aristotelis dictum, si vehemens sit, ad quadragesimum diem durare vel ipsum, vel ipsius periculum; si vehementior, ad annum, vel etiam biennium: potuit addere ad triennium; tamdiù enim tremuit Corduba, & Ferraria. de periodo autem quadragenaria ex Lunæ revolutionibus pendente multa meditatur Cabeus Meteor. l. 2. tex. 54. q. 2.

C A P U T IV.

Thermarum causa ex dictis eruitur.

Idem subterraneus ignis, qui terram quatit, aquas sub terra calentes reddit, ut constat. quare proxima est de his tractatio. Thermæ à calore dicuntur, & propriè sunt, quæ sudatoria dicimus; sed extenditur nomen etiam ad balnea non quæcumque, sed quibus calidæ aquæ à natura sufficiuntur. De varietate thermarum, & salubri corporibus usu tractatio est ex arte medica.

Examinanda igitur paucis causa, qua thermæ ealent. Fertur censuisse Democritus, calcis montes intrà terram esse, per quos aqua transiens calefiat, & bulliat. sed ut alia mittam, non hoc sufficit, ut thermæ continenter sint calidæ; calx enim jam diluta frigida evadit.

accedit, quod nullum est subterraneæ calcis vestigium.

Non magis probatur aliorum sententia, qui aquas intrâ terram fervere ex agitatione ventorum, allisioneque ad cavernarum rupes asseverant, nam & venti irregulares plerumque sunt, cum thermarum calor sæpè sit univormis, & cōstans: nec habent vim calefaciendi, sed potiùs refrigerandi, ut videre est in aquis putealibus, quæ frigidiores sunt, ubi spiracula plura sunt puteis, per quæ vento fit aditus. Præter hæc observat Agricola, à metallorum fossoribus aquas sæpè sub terra offendi frigidissimas, & ingentibus tamen fractas præcipitiis.

Neque satis est calor Solis externus, aut spirituum calidorum per antiperistasis congregatio. tum quia neutrius ex his est una semper in eodem gradu constantia, qualis est caloris in thermis. tum quia omnes aquæ deberent semper calere, cum istæ causæ ad omnes æquè pertineant. Non negaverim, antiperistasis variare aliquantisper thermarum calorem, quæ scilicet calidiores sæpè sunt nocte, quàm die, ut testatur experientia, & refert author Burg. Phil. tom: 5. tr. 2. dissert. 1. cap. 3. causam dat, quod *vapores* calorem efficientes *externo aeris frigore coerceantur*, atque hæc est ipsissima *Antiperistasis*, cuius nomen usque adeò traducunt Atomistæ, ut balbutientis Philosophiæ ludibrium vocent; rem verò nunc demum coacti admittunt.

Sulfur porro, ac bitumen, & alia quæcumque inflammabilis materia calorem generare non potest, nisi inflammetur, ut satis aperta docet experientia. Est ergò caloris huiusce causæ subterraneus ignis; quæ fuit olim Empedoclis sententia apud Senecam quæst. nat. l. 3. c. 24. cui sentit Aristoteles 2. Meteor. c. 3. & satis manifestè confirmatum ex dictis.

Supr.

Supereſt, ut ſolvantur, quæ in oppoſitum obiiiciuntur. 1. aquæ sæpè erumpunt frigidaæ propè igneos montes, ut ad Veſuvii, Ætnæque radices. 2. non ſibi conſtat mixtio iſthæc aquarum, & ignium; nam vel ignes aqua jampridem reſtinxiſſet, vel aquas ignis exiccaviſſet. 3. quædam aquæ calidaæ inſipidaæ omnino ſunt, ut pateat à ſulfure, bitumine vè æcenſo non tangi. 4. ſi ſub thermis alte fodias, sæpè nullum ignem deprehendes; non ergo ab igne eſt thermarum calor.

Sed primum probat præter adverſariorum mentem, ac manifeſtam veritatem, thermas non modo ab igne non calere, ſed neque poſſe. quò enim ſpectat ignis citrà calorem viciniæ? Cæterùm falſum eſſe, quod aſſumitur, probat illud, quod nuſquam maior thermarum frequentia, quàm ubi ignes ſubterranei ardent: ut videre eſt in Baiano ſinu: in Groelandia Inſula, ubi ex monte ardente calentes aquæ perpetim ſcatent, & alibi. Sic ubi vero frigida ad montes eiufmodi fluit, in cauſa eſt ignium diſtantia, medium ſolidius, calorigue non facilè pervium, & alia efficacior, ac prævalens frigoris ratio.

Ad 2. ignes aquis non miſcentur, ſed cum propinquas habeant ſcaturigines. ſurſum ignis evolat, aqua deorſum fluit. Nec eſt periculum exiccationis aquarum; tum quia hoc totum eſt à calore innegabili. tum quia non tantum exiccatur, quin tantundem à fonte jugiter ſuppleatur. accedit, quod ignis ipſe fontium sæpè eſt cauſa; attenuat enim aquam ſubterraneam in vapores, qui in unum coacti, & paululum de primo ardore amittentes, conſtipantur, & fluunt.

Ad 3. aquæ calentes ut plurimum ſulfuris ſapore, odoreque inficiuntur, dum verò nihil ſulfuris, aut ſalis alterius ſapiunt; exinde eſt, quod ignis, ſeu calor per rimas telluris tranſiens
de.

depuratur ; atque ità ad aquam deveniens, non ei aliam à calore qualitatem imprimit.

Ad 4. ignis quandoque non eſt, ubi aqua apparet, ſed ubi naſcitur. deinde poteſt ignis aquæ ſubeſſe, quin foſſione deprehendatur, ob nimiam ſcilicet profunditatem : à qua tamen impediri non valet, quin aquam ad ſummum etiam caleſciat, cum ſit ad eam igneorum halituum aditus ex rimis, canalibuſque in hunc finem à natura diſpoſitis.

Q U Æ S T I O S E C U N D A.

De Igneis Meteoris;

C A P U T I.

De fulmine, fulgure, ac tonitruo.

TRia hæc differunt, ut fulmen ſit ignis in ſublimi repente accenſus in materia ſulfurea, nitroſaque: fulgur, ſeu coruſcatio, & fulgetrum ſit fulminis lux: tonitru ſonus. ſcio, fulgur accipi non rarò pro fulmine inchoato, adeoque ſine tonitruo, ſine ictu, flammaque non, ut fulminea, denſa, & efficaci, ſed debili, ac penè fatua.

Incipio à fulminis materia, & accenſione, quæ proportionalis omnino eſt cum flamma, quæ incenditur in imo, ac terram quatit. Et materia quidem eſt eadem, ſulfur ſcilicet, & halinitrum, quæ ubi concurrunt, ac miſcentur, corpus conſtituunt momento inflammabile. poſſunt & alii halitus ſupetias venire ex camphora. ſtybio, petroleo, napha, cæteriſq; bituminibus, ſpiritum emittentibus igni facilè concipiendo idoneum. Sulfur tamen videtur præcipuum: quod indicat odor omnibus fulguritis inditus; unde meritiò Perſius

sius *Sacrum sulfur* fulmen appellat.

Modus accensionis duplex occurrit. primus à Solis radio per nubes convexa refracto, coactoque in punctum. alter ab igneis spiritibus. seu favillulis, quas ignivomi montes, aliaque corpora in terris ignita sparsim emittunt, sed ita tenues ex divisione, ut ignem generare non valeant. Verum ubi ex antiperistasi, vel alia de causa adunantur, & sensibilem ignis quantitatem componunt, si aptæ materiæ admoveantur, flammam illi statim iniiciunt.

Hæc materiæ adunatio, & accensio fit plerumque intra nubem, perinde ut pyrii pulveris intra bombardam; huic enim fulminis ortus æquiparatur, ut cuniculo terræ motus. Quamquam negandum non sit, fulmen rarò quidem, sed tamen aliquando Cælo etiam sereno, & nulla prorsus nube obstituto vibrari; quidquid in contrarium senserit Aristoteles, & Seneca. nam id testantur non Poetæ modo, sed Historici non pauci apud Restam l. 1. tr. 2. c. 4. Ratio etiam id posse contingere persuadet. nam quemadmodum tormentarius pulvis etiam extra bombardam accendi potest cum bombo, qui quidem non à tormento, sed ab aeris subita, magnæque fractione cietur: ita & contingere potest in aere citrà nubem, quæ vicem bombardæ gerat. pressius fortassè rem hanc explicat pulvis, quem tonantem appellant, ex nitro, ac tartari sale, sulfure puro, ac Martis croco compactus, qui aperto aere sensim accensus, majori scopi ictum refert. non negaverim, ceteris paribus, plus impetus concipi per nubem sua densitate magis resistentem: imò & nubem sua frigidityte concurrere ad materiæ coadunationem, accensionemque ut constat ex dictis; & idcirco difficilius esse fulmen sine nube: sed fieri nequitiam id posse, hoc est, quod nego.

Pergo nunc potissima fulminis phænomena, & effecta explicare. Occurrit in primis motus

tus ſæpè deorſum, ſæpiùs tranſverſim, & obli-
què incitatus contrà flammæ naturam ſurſum
tendentem. Eadem eſt utriuſque ratio. ut enim
flamma è bombarda erumpens eò tendit; quò
tormenti os dirigitur; quatenus rareſcens un-
dique flamma, & in tormenti fundum, ac la-
tera ſolidiora irrumpens, quà datur facilior
aditus, concepto tamen maiore per aliarū par-
tium reſiſtentiam impetu, per os evadit, per-
gitque impetu eodem rectà moveri. ità proſus
contingit in fulminis flamma, erumpente per
nubis partem tenuiorem, ac minùs reſiſten-
tem; ideòque nunc rectà deorſum, nunc verò
obliquè vibratur. Et quia hoc ſecundum
frequentiùs contingit, editiora montium ju-
ga, turriumque cacumina ſæpiùs de Cælo tan-
guntur; quod flammæ altiùs tranſcurrenti ſola
occurrunt. fortàſſè tanguntur ſola, etiam
dum flamma deorſum torquetur, nec ad ima,
niſi debilis pervenit.

Rumpuntur quandoque nubes à fulmine
ſurſum verſus, quibus ſcilicet ibi minor, ac
tenuior eſt materia: & tunc exauditur è lon-
ginquo murmur, ac veluti mugitus.

Deinde conſiderandus eſt ſonus, qui ſpecia-
li vocabulo tonitru nuncupatur. Huius cauſa
non eſt nubis, ſed aeris fractio. Maniſteſtum
id eſt in bombarda, quæ ſine ulla ſui ruptione,
dum flammam emittit. bombum creat. Toni-
tru autem quandoque brevi, dum ignis totus
ſimul erumpit, quandoque diutiùs durat, dum
ignis ſenſim accenditur: variatque intenſio-
nem pro halitus magnitudine. Concurrit etiam
ad hunc ſtrepitum augendum ſuis reflexioni-
bus non parum terra, præſertim ubi montes
vallibus interiectis diſtinctos habet: ex quo
ſæpè contingit, ut fulgure etiam extincto,
tonitru longiùs perſequeretur.

Fulgur porrò, ſeu coruſcatio, ſi ſit fulminis
lux ipſa, nihil habet ſpeculatione dignum.
quod

quod non sit in superioribus excussum. Si verò sitet pro splendore illicq; evanescente, ac vel sine tonitru, vel sine ictu, egregiè explicatur à Seneca, *nat. qu.* c. 12. videturque à fulmine accidentaliter distingui, quatenus est minor flamma in tenuiori materia, non valente aerem magna vi perrumpere. quare semper abest ictus: sonitus verò non quidem nullus, sed ita modicus, ut ad nos non perveniat. Illud tamen sive in fulgure, sive in fulmine certum, ut coruscatio, & tonitru simul fiant, prius illam ad oculos, quam hoc ad aures pertingere. In causa est momentanea lucis, successiva soni propagatio: de quibus alibi. Hinc ridendi, qui post coruscationem timere incipiunt, quasi tunc periculum immineat, ubi reverà jam desit.

Tempus fulminum, fulgurumque potissimum, dum nubilum est Cælum, quod serenitas, imò & æstas ante præcessit: tunc enim ignei halitus è terra educuntur: qui deinde in nubibus coacti, accenduntur, ac vibrantur. non patitur tamen fulmina nubilum, si sit nivosum? Causam eam vulgò tradunt, quod frigus summum prohibet ignem accendi. Ego verò precipuam eam puto, quod halinitrales spiritus à frigore non permittuntur congregari; hinc sparsi per vapores nivem creant, quæ admodum nitrosa est, ut infra constabit.

Fulminis demum effectus multi sunt, & plerique ita mirabiles, ut vix credibile sit in tam tenui, ac subita flamma tantum roboris inesse. 1. Illæsis sæpe loculis metalla colliquat. resistentia fortassè metalli maior, & arctiores pori in causa sunt, per quos dum viam ignis quaerit, ac diutiùs proinde detinetur, plus virium exerit. 2. vinum quandoque exhaurit, intacto dolio. fortassè quia subtilior exhalatio per dolii poros facilè transit, sed vino mixta, ita illud attenuat, ut in vapores resolvat, & expirare cogat. quandoque fracto dolio, vinum stare ju.

jubet, ut antea, rotundatum. fortassè quia crassior, ac tenacior exhalatio dolio adhæret, illudque propterea comburit. ejus verò cineres cum vino permixti ab halitus viscositate, & calore tenacitatem, coctionemque accipiunt, qua in crustam concrescunt, terreæ etiam vini partes possunt ad superficiem educi, dolio nondum consumpto, ibique veluti in membranam coalescere. 3. Hominem sine vulnere conficit; ingreditur enim per poros usque ad vitæ sedem, eamque vel immodico calore, vel pestifera qualitate, qua sæpè inficitur, occupat, & extinguit. & hic etiam habentur similia jam expositis exempla, ut quod ossa comminuantur, intacta carne; vel sola cute relicta. cætera in cinerem vertant, &c. 4. fulmen sæpè sequitur ingens pluvia; quod contingit, ubi accenditur, nube rorida, & imbri mittendo jam proxima: tunc enim accedente fulminis impetu, copiosior pluvia sequatur oportet. De aliis fulminis effectibus consulantur authores passim.

Illud postremò non omittendum, vulgarem esse opinionem, fulmen esse lapidem quendam, vel ferrum (cuneum dicunt) quo uno igneæ exhalationis virtute vibrato, veluti excusso è bombardà globo; turres diruuntur, finduntur arbores, ac cætera fulminis violenta effecta præstantur. Sed cum neque Aristoteles, neque alius antè Avicennam huius corporis solidi meminerit, cui fulminis vis, & nomenclatio sit tribuenda (ceraunius enim lapis apud Plinium nomen est non fulminis, sed gemmæ) & prætereà ut multi ferantur huiusmodi extare lapides, juniorque Cardanus multos se tractasse asseveret; non tamen videam, qui possit sciri, eum à fulmine jactum; iis accedo, qui hanc sententiam reiciunt ad Deum Fabulinum.

C A P U T II.

De reliquis impressionibus ignitis .

Aliæ à fulmine impressiones igneæ complures numerantur; sed vix aliter, quàm duratione, situ, figura, motu distinguuntur, quare paucis sunt percurrendæ.

Stellæ cadentes habentur, cum exhalatio in altum porrecta, ac disposita pergit successivè à summa ad infimam partem inflammari; videtur enim tunc eadem flamma deorsum cadere, cum non eadem sit, quæ ruit, sed alia & alia subinde generetur, pabuli sui seriem sequuta; unde & localis motus speciem exhibet. quod si exhalatio in longum disponatur, discurrentes Stellæ dicuntur.

Rursus exhalatio nonnunquam viscosior est, ignemque non in transcurso tantùm, sed & aliquantò stabiliùs, ac diutiùs servat; & tunc à multiplici forma nomen multiplex accipit: Pyramis est, dum latiore fundo, ac veluti basi, desinit superiùs in mucronem. dum oblonga est, ac teres, si ad perpendiculum. insistit, columna, si transversim locetur, trabs, & lancea appellatur. hujus verò si mediæ partes gibbosæ sint, ac tumeant, extremis gracilioribus, draco volans dicitur. Si exhalationis cumulus longior sit, quam latior, sed undique veluti lanæ flocci emineant, sitque in accensione discursus, ac saltus quidam, dum ab una in aliam halitus partem commigrat flamma, saltantes capras Aristoteles agnoscit. Fax est, dum longiuscula exhalatio latius habet fastigium. Clypeus est, dum exhalatio plana est, & rotunda. quod si halitus ità dispergitur, ut in unum non coeat, sed in multos exiguos ignes distribuat, stipulæ nuncupantur.

Atque hi quidem omnes in celsiori aeris par.

parte ignes accenduntur. Sunt & alii terræ proximi, ex quibus specialem cum vivo homine cognationem habent ignes lambentes, cum mortuo fatui. primi quidem hominum crinibus adhærescere solent, de quibus Plin. l. 2. c. 107. & Virgil. 2. *Æneid.* eorum materies est tenuis, viscosusque halitus ex ipso humano corpore abunde emissus, & ab inclusis igneis spiritibus antiperistesis vi coactis accensus. Fatui verò ignes in cœmeteriis potissimum visi, aut pendentibus è patibulo cadaveribus insistentes, eadem materia constant, eademque ratione igniuntur.

• Allus est ignis, qui navigantibus apparet, qui si singularis sit, *Helenæ*, si geminus, *Castoris*, & *Pollucis* nomenclationem obtinet: quas superstitiosas antiquitatis voces Christiani nautæ jam commutarunt, communique nomine *S. Telmi* ignes appellant. Tempus istorum ignium est, cum valida tempestas præcessit. Materia vel sunt sicci halitus è mari expirantes, & vento frigidiores coacti, & attriti, vel ex ipsa navi exsurgentes. Præsagium ex iis ducitur impendentis nunc serenitatis, nunc procellæ. Sunt enim qui credunt, à duplici malaciam, ab unico graviolem tempestatem præmonstrari. Sed ab aliis id reprobatur ut vanum, utpotè nullam habens ex rei naturæ probabilem causam, sed non vanum, nec improbabile censet Cardanus; dum enim duo sunt, probant halituum tenuitatem, ratione cuius facile disjunguntur, & absumentur: & hinc tranquillitas, dum est unicus, monstrat fumorum crassitiem, ac densitatem. & hinc tempestas. Alii indicium sumunt ex quiete, vel motu; si enim navis malo, antennis, aut velis insident, serenitatis signa habentur; quippe ostendunt fractam jam tempestatem, pacatumq; Cælum. Sin verò huc illuc discurrant, perseverantem adhuc procellæ vim ex motu exha-

Jationum de novo subinde emergentium ostendunt. Hoc tamen non consonat cum veterum observationibus, quibus non fuit naufragii index iste discursus, ut videre est apud Plinium l. 2. c. 37. Propterea alii praesagitionem in his ducendam censent ex materiae qualitate; si enim graves sint, & in ima navis decidant, & urant ob crassitiem, & viscositatem, pessimi sunt ominis, certumque naufragium edicunt. dum verò malis haerent immotæ flammulæ, minus sunt graves, minusque ominosæ. dum transvolant, nec crassæ sunt, nec viscosæ, adeòque felices potius, ac salutare. Res est omninò incerta; cum enim ipsa experientia nutet, nec aliquid comperti à nautis acceptum sit adhuc, frustra ratio adhibetur, & quaeritur.

C A P U T III.

De Cometis, praesertim elementaribus.

Cometæ alii cælestes supra Lunam, alii elementares, & sublunares. De primis non nihil dixi libro primo, ubi de cælestium corporum corruptibilitate, cætera petenda ab Astronomis, quorum est propria tractatio. De secundis agere huius est loci; hæc enim propriè Meteora interque ignea ab Aristotele recensita; quamvis, ut dicam, ignea re ipsa non sint.

Principio probandum dari Cometas elementares. Et quidem fieri posse, ut Cometæ in suprema aeris regione, aut in æthere infra Lunam generentur, modus eorum generationis mox exponendus, declarat simul, & confirmat. Fuisse autem aliquandò Cometas in elementari regione multæ historicorum narrationes ostendunt, quibus si fidem abrogare velint Recentiores, videant, ne suo sibi noceant exemplo; credat enim aliis oportet, qui credi vult sibi. Et primò Astronomi ex recentibus
non

non pauci, nec nominis exigui, inter quos Regiomontanus, & Keplerus, Cometas quandoque sublunares esse disertè affirmant apud Restam Meteor. l. 1. tract. 1. cap. 4. Visi aliquandò certis locis immoti insistere; quemadmodum de falcato Cometa (alii figuram gladii habuisse volunt, qui Græcis Xyphias dicitur) Hierosolymis antè excidium imminente narrat Josephus. at nec quies cælesti corpori consona: nec ad unam urbem pertinere potuit in Cælo positum sidus. Rursus refertur in *Theatro*, Cometam anni 1450. Lunam obscurasse; quod est evidens signum infrà illam fuisse. Quosdam Cometas inconditos, tumultuariosque motus habuisse, Aristoteles asserit, consentitque Jovianus Pontanus historiam referens. Cometæ suo tempore visi, qui cum ad Boream primo pergeret, deflexit deinde ad Occasum. ejusmodi autem motus in corpus Cæleste non cadit. Seneca teste q. nat. l. 7. cap. 15. Cometes quandoque visus Soli æqualis, quandoque tantus, ut *Plagam illam Cali, cui Lactea nomen est, in immensum extentus aquaret.* hoc quidem efficaciter probat Cometam elementarem, nobisque proximum, in nubis morem, quæ parva licet, magnam Cæli partem propter viciniam adimit. Alius apud Restam citatum, vidisse se Cometam, à quo scintillæ deciderent, & medio in aere extinguerentur, testatum reliquit. non potuere autem ex altissimo æthere igneæ particulæ ad nos descendentes videri. Stet igitur, præter Celestes dari etiam elementares Cometas.

Modum, quo isti generantur, duplicem tradidit Aristoteles. primus est per halitus inflammabilis vim ingentem è terra eductam, & accensam. Hunc modum licet Cabeus noster multis possibilem probare contendat, vix tamen adduci possum, ut acquiescam. quamvis enim dem, igneum quodpiam Meteorum, cui Cometæ

metæ nomenclatio per quandam similitudinem tribui possit; ad breve tempus durans, gigni hac ratione, non puto tamen flammam in aere ad longum tempus acceptam durare posse. Unde enim tantum pabulum perpetuò sufficiens corpori elementari? aut qua vi spiritus, fumi, quæ à terra hinc inde egressi, eò affatim accurrant, ubi postulat Cometæ indigentia? Deinde deberent videri de die, si ignei sunt; ignis enim noster, quamvis, præsentè Sole, corpora non illuminet, habet tamen tantum lucis, quantum satis est, ut videatur. Accedit, quod nulla est apta in flammeo Cometa caudæ ratio à Sole semper aversæ; cauda enim ipsa flammea esset, adeoque sursum semper erecta. Postremo Cometa rotundus semper apparet: non esset autem, curex accessu novæ materiæ igniendæ, non mutaret subindè figuram, prout maior, vel minor ex hoc, vel illo latere admoveatur, & adhæresceret.

Probabilior est alter modus generationis Cometæ ex fumidis vaporibus simul in magna copia adunatis, supraque omnia aeris regiones, & atmosphæram evectis: qui sane à Solis radio tacti lucem & reflectant, quo corpus ipsum Cometæ visibile nobis fiat, perinde ut candida nubes Soli apposita: & prætereà propter aliqualem perspicuitatem ulteriùs transmittant, atque albescentem tractum post se signent, quem caudam appellamus.

Supereſt jam examinanda hæc ipsa Cometæ cauda. Huius causam meritò jam illam censent, quam modò innui, quo scilicet lux per corpus, seu caput Cometæ semidiaphanum traiecta, ac refracta, incidensque in vapores circà Cometam aggregatos, eos in longum illuminat. exemplum satis aptum habes ex Fromondo, & Cabelo in vitrea phiala aquæ plena, quæ si Soli, vel lucernæ in aere non quocumque, sed vaporoso exponatur, proiicit lumen, radiosque in op-

posita

posita parte visibiles, eo prorsus pacto, quo præstat Cometes. Quia verò non semper caudam hic porrigit, sed sæpè circa se lucidos veluti crines spargit, unde & crinitus appellatur; dicendum id ex eo contingere, quod fumosi halitus circumfundantur ei, qui lumen excipere possint, ac reddere, atque ità crinium formam exhibere.

Difficultas est maior in danda causa, cur nonnunquam Cometæ cauda curva nobis apparet; unde Cometes falcatus dicitur. Certum videtur, ejusmodi curvitatem in obiecto ipso non esse; ut enim lux transmissa refringatur; recta tamen post refractionem pergit, nec est in natura exemplum luminis per curvam lineam propagati. itaque curvitas ea est tota in apparen- tia. sed hoc opus explicare, qua ratione recta linea curvam se oculo exhibeat. probabilior est ratio, quæ hoc tribuit vaporibus atmosphæ- ræ, qui diversimode dispositi secundum tenui- tatem, & crassitiem, variè etiam refringunt radios à cauda remissos; quæ propterea recedere à rectitudine videatur. Profectò baculus in aqua per unam refractionem fractus apparet: si plures in ejus partibus variis ab alia, & aliis mediis diversitate similes refractiones concipias, apparebit sine dubio curvus; præsertim in tali distantia, quæ puncta refractionis, & angulos distinguere vetet.

Nunc aliqua de Cometarum prognostico ad- denda; nam de motu Astronomica est tracta- tio. Vulgatissimum est, Cometas esse Mundo exitiales; & siccitatem, ventos, tempestates, agrorum sterilitatem, famem, pestilentiam, Principum, ac Regum funera, seditiones po- pulorum, ac bella seu indicare, seu efficere. Istarum omnium rationes alii alia tradunt, sed plerasque falsis principiis, doctrinisque fretas. nec verò planè consonant experimenta; non paucienim extitisse dicuntur humano generi salu-

salutares. Tribus maximis, potentissimisque Regibus, dum nascerentur, faustum omen Cometa prætulit, Alexandro Macedoni, Mithridati Pontico, Carolo V. Austriaco. Post eandem Julii Cæsaris visum Cometam ut sibi planè felicem accepit Augustus: *Interiore, inquit Plinius, gaudio sibi Cometam natum, seque in eo ad Imperium nasci interpretatus est. Et si verum fatemur, salutare sidus in terris fuit.* In eandem sententiam de hoc ipso Cometa loquutus videtur Q. Curtius historix Macedonum lib. 10. Seneca quoque l. 7. c. 17. alium, qui sub Nerone Cæsare apparuit, Cometis infamiam detraxisse affirmat, quod Neronis Imperium prænunciavit. primum quinquennium intelligit, in quo certè Nero optimum Principatum aut gessit, aut simulavit. Justiniani senioris ævo Cometes Narsetus victoriam adversus Gothos portendit, qua Italia à Barbarorum servitute vindicata est. Ann. Christi 725. duo Cometæ apparuerunt, quorum alter Solem præibat, alter sequebatur; quos Caroli Martelli de immensa Saracenorum multitudine triumphus sequutus est. Ann. 1238. Cometes nascenti Eduardo Primo, totique Angliæ faustus fuit: quem proinde ita Anglia non timuit, *Ut potius, inquit Polydorus Virgilius, creditam vulgò sit, publicisque acclamationibus celebratum, eo præfagio demonstrari futuram Principis, atque Imperii felicitatem.* Mitto alia; non tamen illud, quod Stella, quam inter Cometas multi numerant, nascenti cum Christo Domino nostri generis felicitati faustissima præluxit; ut hinc demum intelligatur, nec ipsum per se Cometam horribilem, luctuosumque sidus terris esse, nec divino semper nutu in calamitatum indicium ostendi. Ut non immerito Chæremôn Philosophus Origeni æqualis; ut hic ipse refert l. 1. contr. Cels. Cometam ex veterum hi-

Philos. de Bened. T. III. M *storia.*

storiarum monumentis tranquillitatis, felicitatisque prænuncium integro volumine demonstraverit.

Q U Æ S T I O T E R T I A

De Meteoris Aeriis.

Aeria voco Meteora, non quæ ex aere. sed quæ in aere contingunt, & ignea non sunt. quare sua hoc nomine nubes, pluvias, nives, grandines, ventos, iridem, cæterasque apparentes impressiones comprehendo, de quibus singillatim agendum.

C A P U T I.

De Nubibus, ac Nebulis.

Nubes dicta, quod Cælum, diemque obnubat. eius materia est aqua in halitum, vaporemque resoluta; ratione cuius perspicuitatem amittit; de qua re Psaltes, *Tenebrosa*, inquit, *aqua in nubibus meris*. Efficiens causa nubis est calor tum Solis, tum subterranei ignis, qui aquam rarefcere faciens; ac levitare, eam sursum ab aeris incumbentis pressione transmissam, ut constat ex superioribus, evehit ad mediam regionem; ubi à frigore nativo, remotus scilicet a radio Solis reflexo, & propterea à fortiore. non nihil vapor concrefcit, & nubis formam induit. quod si frigus intendatur, in aquam demum resolvitur, ac pluviam efficit.

Nubium altitudo magna non est, ut constat ex motu, qui sæpè velocissimus oculis testibus deprehenditur: quod non contingit corporibus valdè distantibus. Cardanus, & Fromondus censent minimam nubium à terra distantiam esse

esse ad semimilliare . Cæcis sæpe minus distare putat, quia in Montibus non habentibus semimilliaris perpendicularum videntur subiectæ nubes . & quamvis dicant , illas tunc non nubes esse , sed nebulas ; primum faciunt litem de nomine . deinde nebulas eas non esse ostendit earum in aquam resolutio : quod in nebulas non cadit . Summam verò nubium altitudinem quamvis Cardanus ad 4. Fromundus ad 8. miliaria extendat , incertissima est .

Suspensionis deinde nubium causa in promptu est , æqualis scilicet cum ea aeris parte , in quo consistunt, gravitas . Opacitas ex ipsa comminutione , divisioneque partium aquæ , cæteroqui diaphanæ , existit ; sic enim vitrum perspicuum , si in partes minutas frangatur , opacum fit . Figura inconspicua , & varia est , prout vaporum partes aliæ aliis leviores sunt , aut prout à vento impellente diversimode coguntur , ac formantur .

Nebula , seu caligo Aristoteli est nubis decidentia, ac veluti exercitium ; cui consonat Sap. 2. ubi vestigium nubis nebula dicitur. cum enim vaporibus aqueis nubem efficientibus terra sæpè exhalatio misceatur , hæc utpote gravior vi sui ponderis à vaporibus segregata , in terram decedit , & circa eam consistit . quamquam non uno hoc modo nebula generetur , cum sæpè nulla præeunte pluvia , aer sit nebulosus . Hinc est , ut nebula sit signum serenitatis ; indicat enim defectum vaporis in pluviam resolubilis ; sive quia vapor est jam resolutus , sive quia non est elevatus . Terream porro nebula naturam indicat primò odor ipse teter , & qualis solet è pulvere mitti , dum à primis pluviis madescit ; secundò infecunditas aquæ ; neque enim ex terra elici aqua potest . tertio fecunditas , quam terræ communicat ; quod sit crassa , & terræ congenita . fortasse etiam nitrum admiscet , quod est natura secundum . quarto dam-

num, quod maturis, aut maturitati jam proximis frugibus infert. exsurgit enim sua siccitate earum humorem, qui non potest illico à terra reparari.

C A P U T II.

De Pluvia, Rore, & Aura Serotina.

Pluviam est resolutionem nubis in aquam. causa est frigus, à quo vapor concrefcit, graviorque jam factus descendit. Dividitur pluvia in stillicidium, imbrem, & nimbium, quorum est discrimen solum accidentale. Stillicidium est pluvia per guttas minutissimas decedens. in causa est vel debilitas frigoris, vel propinquitās nubis. ut enim docuit Cabeum experientia, qui per mediam nubem in editis montibus iter facit, pulverulenta quadam pluvia perfunditur. probabile est igitur, nubem principio in stillicidium solvi: guttulas verò in descensu coniungi, & crescere. Imber constat grandioribus guttis, Nimbium maximis. ratio est proportionaliter eadem ex magna. n. altitudine guttæ majores cadunt; ex summa maximæ. hinc æstate, dum Nubes ex caloris vehementia altiores sunt, Nimbi sunt frequentiores, quàm hieme. sed ad Nimbium concurrat quandoque fulminis vibrati impetus, ut supra dictum est: quandoque est ex magna vaporum copia confertim cumulata, & suo frigore statim exsoluta. Non omittendum, quod nubes aliquæ in pluviam non solvuntur. Ratio fortasse est ex vaporis raritate, mixtioneque halitus calidi, qui vaporem suo se frigori, ac densitati restituere non patitur.

De signis pluvie multa Aristoteles, & vulgò Meteoristæ, sed rustici, agricolæ, & navitæ plura. rationes reddere pronum consideranti pluvie, vaporumque naturam.

De

De pluviis prodigiosis mira ab authoribus referuntur. Pluisse lapidibus non semel Livius narrat, idque alii non pauci confirmant. Fortasse vento, aut turbine validissimo in aerem rapti, & inde in pluviae formam delapsi sunt. fortasse ab igne in Vulcanis ardente jacti; qualem pluviam saxorum, & cinerum experta Neapolis est in Vesuvii eruptione anno huius seculi primo supra trigesimum; cuius extant adhuc ad eius radices plurima monumenta. Fortasse ingentes grandines lapidum speciem præ se tulere. Sunt qui velint, lapides etiam posse in nubibus generari. Hoc licet prima specie incredibile videatur, non tamen est ita, si perpendatur aquarum quarundam natura facile lapidescens: cuius generis non pauca exempla habes apud Gasparem Schottum in Anatomia Hydrostatica l. 6. cap. 8. aliqua nobis suppetunt proprio experimento comperta; ut enim mittam, quæ de Sarno, & Silaro nota jam sunt, vidi ego Latronici in oppido Lucaniae duas cryptas continenter stillantes, in quibus guttæ dum pendent, brevi lapidescunt; & in tot se figuras induunt, filicum, pomorum, columnarum, ut res sit digna naturæ ludentis ingenio, artem quandoque æmulantis. quamquam propediem futurum credo, ut cryptæ claudantur: usque adeo nova lapidum accessione tectum in dies magis, magisque descendit. Jam verò si quod aquis ejusmodi inest coagulum, in aquas pluvias immittatur, accedente caloris fulminei activitate, incredibile non est, posse in nubibus etiam magnam lapidum vim generari.

Pluisse etiam metalla dicuntur. ferreæ pluviae meminere Plinius, Avicenna, & Scaliger: argenteæ Dion Romæ sub Imp. Severo: aureæ Aristoteles in Peonia. Rationem istarum querant Chymistæ, qui fidem ejusmodi narrationibus facile habent, quid? quod pi-

sces etiam pluuisse Plinius, & Atheneus memoriz prodiderunt; mures Maiolus; vitulum Avicenna. an non hoc est abuti patientia posterorum, quibus ista transmittuntur? Tolerabile est, quod de pluvia lactea, ac sanguinea tradunt; non quia verum lac, verusque sanguis deciderit; sed quia terræ albæ, ac rubræ halitus a quæ permixtus eam suo colore diluit. Huc etiam referri possunt rubræ cruces vestibis in Suevia ann. 1534. à pluvia impressæ: quarum meminit Cardanus, earumque rationem meritò refert in guttas rubras aquæ permixtas, quas ipsa vestium fila in crucis figuram disposita pro filtri natura hinc inde attraxerant. Sed adhuc mirabilius, quod apud nos accidit anno præteriti seculi sexagesimo, ubi iterum Vesuvius erupit; visæ enim tunc eiusmodi cruces non tam rubræ, quam ferrugineæ in vestibis lineis præsertim alibi citra pluviam etiam signatis, nec apertis solum aere, sed & in arca conclusis. Fortasse halitus ex metallica vena, qualem esse intra montem eructati lapides docent, rubiginosi, & aere vaporoso diluti, sese per rimas insinuabant; & quamvis ubique consisterent, nonnisi in albis vestibis conspicui erant, in crucis formam ex posita ratione lineæ signantes.

Ros à pluvia quantitate primùm differt; vaporem maior pluvia, minor ros evadit. differt etiam loco; pluvia n. est vapor in alto collectus, & frigoris vi concretus: at ros vapor est à debili Solis occidentis calore parum elevatus, qui à frigore nocturno concrevit, ac resolvitur, herbarumque foliis adhærescit. Differt & tempore; pluvia nonnisi nubilo: ros nonnisi sereno Cælo decedit, tum quia ubi nubilum est Cælum, Sol vapores elevare non potest. tum quia pluvio Cælo si quis vapor educitur, terreis halitibus miscetur, & sursum evehitur. Rursus ros non cadit summis, seu

calo.

caloribus , seu frigoribus ; ista enim vaporis
eductionem à vespertino Sole impediunt : illi
nimis attollunt , nec sinunt propè terram con-
sistere . hinc ros frequentior autumnò , & vere .
Demum flante vento , præsertim boreali , ros
nullus cadit , seu frigoris vi prohibente eleva-
tionem vaporum , seu flatus impetu dissipante .
Differunt & aliis qualitatibus ; ros enim nitro-
sus est . quare , si credimus Suessano , scabiem
curat : affert etiam terræ , frugibusque fecun-
ditatem . Unde in Scripturis Patriarchæ , filiis
suis bene precati , rorem de Cælo in ubertatis
symbolum augurabantur . quin & salubris cor-
poribus humanis est , quod purgandi vim ha-
beat . Sed non est ita utilis , ut quandoque non
noceat , præsertim cum Sole nimis ardenti su-
perveniente exiccatur , & putrescit : quo sege-
tes , herbasque arentes , & marcida , reddit .

Affinis est rori aura serotina , quæ quidem
est tenuis vapor vespertino Solis calore elatus ,
& noctis adventantis primo frigore concretus ,
corporibusque iis præsertim , quibus pori sunt
laxiores , perniciosus temporibus iisdem cadit ,
& ex iisdem rationibus , quibus ros .

C A P U T III.

De Nive , Grandine , & Pruina .

Nivis formatio eadem fermè est , quæ stil-
licidii : dum enim nubes incipit in te-
nuissimas guttas resolvi , si frigus his accedat
intensius , non sine siccitatis auxilio ex nitro ,
vel alio sicco halitu permixto , concreſcunt , &
gelantur . ex his porro concretis guttulis levi-
ter sibi mutuo adhærentibus flocci nivei coales-
cunt , ac decidunt : qui proinde ob laxiorem
texturam friabiles sunt , & citò liqueſcunt
hinc flante Austro pleniores sunt flocci , te-
nuiores , flante Aquilone ; quod sub Austro

non ita rigescunt guttæ, ac proinde humidiores facilius invicem agglutinantur. Illud etiam certum videtur aeris nonnihil intra concretas ballulas admisceri, ut accidit in spuma: atque hinc est candidus nivis color; ut quarto libro declarabitur. Neque verò ad aeris mixtionem opus est vento agitante, nubesque collidente; cum sæpissimè nix generetur in aere pacato; & possit in ipsa guttulæ ad guttulam repentina accessione aer comprehendi, & concludi.

Figura nivis videtur irregularis ad modum lacinia, seu flocci orta ex tortuata plurium guttularum adhæsiōe. Primus tamen Keplerus, rem diligentius scrutatus, animadvertit nivem regularis esse figuræ, & perpetuo in affixi sexanguli formam cadere. Rationem huius phænomeni ut afferat, nescio quid idem ipse meditatür, ad vim terræ formatricem, ac vivificam in vapore latentem recurrrens. Sed inanis hæc est, & recocta jam crambe de terræ animatione. Revera nix figuram semper eandem non assumit. nam in Montibus Riphæis pinnarum similitudinem accipit ex Plinio, & Solino. in Septentrionalibus regionibus multimodis variat ex Cardano, & modo crucem, modo stellam, modo rosam, aliumve florem, scorpionem quandoque, aut muscam refert. Cabeus in causam trahit spiritus vegetabiles per aerem volitantes, qui nivem ita formant, ut est propria cuiusque natura. Sed lepidum videtur, spiritum crucis, & lanæ in medium adducere, ut crucis, & lanæ figura habeatur. Crediderim potius variam figuram contingere pro fortuito concursu globulorum juxta nubis crassitiem, vel tenuitatem, & frigoris majorem, minoremve vim. Quod si sexangula plurimum nix decidat, idest fortassè ex natura ipsa globulorum, quatenus circa quemlibet sex globuli adunantur; tot enim & non pluribus

bus locus est circa unum. Ita Phil. Burg. author ex D. Rohault.

Nix porrò terræ, cui incumbit, fecunditatem inspirat: id potest ex multiplici ratione contingere, & quia multum nitri admixtum habet: ex quo vix dissoluta frigidum ventum ciet: nitrum autem secundum per se est, & quia herbas, plantasque dum operit, halitus, spiritusque vegetos ab eis expirare non finit. & quia dum diù terræ incumbit, sensimque liquatur, altiùs subit, & humoris copiam majorem frugibus suppeditat.

Grandinem ex nive fieri aperte indicat eius nucleus opacus, & albus, qualis est nix. itaque ejus generatio ita progredi videtur. Dum nive jam facta nubes altior est, & ningere incipit, decedentes globuli liquantur primum ex parte; atque invicem coeunt: quos ubi frigidior aura excipit, concresecunt in glaciem, rotundam illam quidem, aut ad globum accedentem; quia scilicet à vento contorquentur in gyrum; atque ita in alias, & alias glaciei crustas se induunt. hinc pars extrema pellucet, quod ea liquata prorsus erat, & sic à frigore correpta. Hinc majores sunt grandines, quo altior est nubes, & vehementior ventus: hoc enim pacto diutius detinentur in aere, pluresque sibi interea possunt calidas crustas inducere.

Mirum tamen est illud, quod cum nix fecundet, grando contra sterilefcere agros faciat. neque est, quod unicè id reiiciatur in impetum, quo cadit, & quasi lapidatione segetes, ac fructus sternit. pejus est multò, quod deinde consequitur, fructuum, ac frondium, imò & ramorum, & palmitum ariditas; ac tabes: fortassè, quia grando sale multiplici abundat, eoque acri admodum, ac mordaci; qui arbores, ac fruges penetrat, atque adurit. argumento est, quod grandinem sæpè numero siccitas

magna præcedit. hinc ubi largior pluvia sequitur, quidquid est vitii, detergit, & abluit; ac vel omninò, vel magnam partem ruinæ mædetur.

Pruina demum est ros multo frigore congelatus. non tamen ita ut ros in majores globulos tumet, sed potius veluti salis crusta in foliis expanditur, crassior, aut tenuior pro vaporis. & frigoris abundantia. Floribus exitialis est, quos spiritibus halinitralibus adurit, & marcescere statim cogit: non item oleribus, quæ, quia crudo humore abundant, hoc ad coctionem adducto, teneriora reddit.

C A P U T IV.

De Ventis.

Ventum denique ad eam naturæ partem quæ quàm in se manifesta, tam in suis causis abdita; ut non immeritò in sacris literis dicatur Deus de thesauris suis ventos producere. Certum est ventum esse aeris motum, ac fluxum, nec quemcumque, sed majorem, ac vehementem: si enim tenuis sit, ac levis, non dicitur ventus, sed aura. Jam quæ sit causa obliqui ejus motus, hoc est, quod magna saltem ex parte latet, & propterea vix desinet unquam inquiri. Equidem quæ ab aliis alia probabilius afferuntur, in medium dabo; neque enim videtur una esse omnium causa; & fortassè quæ improbabiliter traditur, ut generalis, probabilis evadet, si ut particularis tradatur.

Mitto igitur recursus multorum ad machinam; dum ajunt ventos ab Angelis excitari sive bonis, sive malis, quos proinde ethnica voce Aeolios dicunt. Mitto & aliorum deliria à terræ anima cieri ventum existimantium. Utrosque enim latè habes excussos, ac reiectos à

Cabeo Meteor. l. 2. tex. 33. quæst. 1. Videtur

autem

autem in primis non sola exhalatio sicca, qualis est halinitralis, quæ omnium maximè flatuosa est, sed etiam humidus vapor ventum efficere posse, dum dilatatur, aut deorsum truditur: quod asseruit etiam Aristoteles in problematis. Et quidem hanc vim vaporibusque esse, est manifestum in æolipila, globo scilicet æreo cavo, & os habente angustum, qui aqua refertus, & igni admotus, vehementem flatum per foramen emittit. Constat idigsum ex eo, quod venti vehementiores, crebrioresque in mari fiunt, præsertim in Oceano, ubi maior copia vaporum. Ad hæc ad fluminum ostia venti semper spirant, etiam pacato alibi Cælo. ratio est; quia vapores à fluente aqua eleuantur; retinentesque impetum pricrem, aeri eundem imprimunt. Non negaverim, vaporem non quemcumque aptum esse, ut resolvatur in ventum, sed oportere, ut rariores exsurgant; si enim crassi denique elevantur, in pluviam abeunt.

Difficultas nunc est, ut explicetur, qua vi halitus, cuius est rectè sursum motus, obliquetur, & ad latera moveatur. Principiò motus eiusmodi oriri potest ex solo calore aerem, ac vapores rarefaciente; idque tripliciter. vel enim vis rarefactiva prævalet: & ventus tunc cietur à parte calida in frigidam; atque hoc pacto à Sole oriente tenuis aspirat aura. Vel vis rarefactiva est debilior; & ventus tunc movetur à parte frigida in calidam; prævalet enim gravitas maior aeris frigidioris, irumpitque in partem calidiorē, ac leviorē. Vel demum halitus ipsi recens è terra emissi ampliorē locum in aere quærunt; atque ita urgent vapores proximōs, & isti alios: quibus vetita dilatatione præterquam ad unam partem, in eam totum impetum concipiunt, & effundunt. potest autem dilatatio in alias partes prohiberi vel à monte, vel à nubibus: & si nullum sit

repagulum , dilatabitur halitus undequaque , sed ubi alios spiritus non invenit , quos impellat , & per quos motum continet , illorum motus brevi finietur . Hinc ventus per pluviam cessat ; quia per aquæ frigus impeditur halituum rarefactio .

Aliter concipi potest ex halitibus procedere ventorum motus . ut enim dum aqua è subterraneo fonte emicat pulsa à nova aqua subeunte , cum non possit sursum ascendere , hinc inde , quâ locus descendendi datur , effluit : item halitus ubi ad debitum suæ levitati locum devenere , pulsati ab halitibus succedentibus , nec valentes altius evolare , hinc inde dilabuntur , quâ facilior patet aditus ad latus , & fluxum ibi aeris concitant . Simile quid vidi in Vesuvii eruptione ann. 1660. ubi enim emergens è fundo fumus , & cinis eò devenere , ut vi levitatis ascendere ultra non possent , ita in gyrum expandebantur , ut altissimam , ingentemque pinum referrent , indeque tenuiores longius vagarentur , relictusque à fumo cinis undique depueret , jam sînge prohibitam cineream eam nubem , quominus in unam partem dilataretur , quantum impetum in aliam concepisset , quantaque vi aerem movisset ! Idem contingere potest in venti formatione .

Non parum deinde ad ventorum generationem conferunt montes . Primò , quia descendentes halitus graviores aerem comprimunt , ac propellunt , qui à montibus præpeditus , ne progrediatur , circa eos cogitur , ac densatur , ultra quam possit pati . tum se nativâ vi elastica vehementer dilatans , & à monte prohibitus , ne possit in omnem partem , in unam impetum facit , & ventum creat . Angustari etiam potest aer in cavernis , quæ plurimæ in montibus sunt , & inde non sine vi proflire . Torrentes quoque aquæ è montibus defluentes possunt ventum efficere perinde , ut dictum est

est de fluviis. Rursus vapores dum frigidiores, gravioresque fiunt, ac descendunt, possunt in montium latera plerumque obliqua incidere, & inde obliquum motum concipere, Fortasse etiam hunc motum eadem ratione concipit aer montanis vaporibus spissatus, & gravior factus. atque hoc equidem pacto cieri crediderim à montibus vespertinam æstivo tempore auram, dum vapores à Solis recessu frigescere aliquantulum incipiunt, & densari.

Non est porro improbabile, quosdam ventos è terra oriri sola ope ignis subterranei, qui aquas item subterraneas in vaporem attenuans, eas cogit in vaporem expirare non sine impetu è cavernis, perinde ut expirat validus flatus è foramine æolipilæ. & quia cavernæ plerumque in obliquum dispositæ sunt; obliquum item motum aer, & vapores accipiunt. Id ipsum efficere potest motus ipse fluentium sub terra aquarum, quæ quidem, ubi spiraculum nactæ sunt, ventum ab eo vehementem exsufflant. Neque id ab experientia abhorret. refert Plin. lib. 2. cap. 45. specus esse in Dalmatia ventum generantes. In oppido propè Narniam in Umbria narrat Resta Meteor. l. 2. tr. 2. cap. 6. foramina multa esse perpetuò ventos proferentia. Licet us apud eundem testis est oculatus in agro Vicentino villam esse Custodiæ dictam, sitam ad montis radicem. Antrum ibi est, unde ventus frigidissimus æstate spirat, qui per tubos subterraneos in domos usque devehitur. Eiusmodi alia Scaliger affert exercit. 58.

C A P U T V.

De numero, & qualitatibus Ventorum.

Prima esse potest ventorum divisio, quod alii altiores sunt, & per summum aerem

rem fluunt, ut est ex eo compertum, quod sæpè silente circà nos aere, nubes videmus citissimè moveri: alii sunt humiliores, terrasque, & maria vertunt. Ratio est exhalationis minor, ac maior gravitas, ex qua habet, ut modò altiùs ascendat, ibique dilatetur, modò minùs altè, & propè terram. terminum verò ascensus ventorum vix possumus certum definire. feruntur quidem montes liberis à vento verticibus. sic sunt montes Peruviani: sic Carpatus Hungariam à Polonia dividens: sic Olympus in Thessalia, Athos in Macedonia, Atlas in Libya, & alii. atque hinc argumentum est iterum vapores magis ad ventum, quam exhalationes conferre. istæ enim altiùs ascendunt; quare si possent unæ ventos ciere, non video, qua ratione celsissima montium juga immunia à ventis essent.

Ventorum tamen divisio non hinc vulgò desumitur, sed ex partibus horizontis variis, unde spirant. Antiquiores duodecim tantùm ventos statuerunt. Neoterici exacti us ad duos & triginta numerant: nomina longum esset referre: nec philosophicum id est, quod nihil habeat speculatione dignum.

Venio igitur ad ventos anniversarios, qui scilicet statis temporibus iidem spirant, & græco nomine Etesiarum nuncupantur. Principio Aquilonarium Etesiarum meminit Aristoteles ab æstivo solstitio per dies 40. spirantium; eorumque causam eò refert, quod id temporis septentrionales nives, glaciesque solvantur. generari autem ventum ex nivium solutione, manifestum ab experientia est; continetur enim in iis multum nitrosi spiritus maximè flatuosi, qui vapidis halitibus commistus illicò dilatur. Eiusmodi Etesiarum Græcis regionibus olim solemnes erant: an & nunc sint, ignoro; nam earundem mentionem Seneca facit, quasi in Italia etiam flarent, & tamen nullæ jam apud nos,

nos, nisi occidentales, nec ita statæ; sæpè enim iis caremus, & dum adsunt, brevi quandoque, quandoque longiùs durant; causam, que non in nivibus septentrionalibus, sed in proximo mari habent, unde spirant. in aliis verò Italiæ locis alia sunt, prout Alpibus, aut Apennino obvertuntur, è quorum nivibus liquefactis auram accipiunt.

Certiores sunt Etesiz in Atlantico Oceano, & in Pacifico, ut aiunt, mari, ferè autem semper Eurusest, seu subsolanus, aut illi collateralis: causam habere videtur in motu Solis, non quasi Sol per se, dum movetur, aerem impellat; sed quia continenter vapores è mari directè supposito elicit, qui nova semper dilatatione Occidentem versus aerem impellunt: hinc validiores sunt ibi Etesiz interdiu, quam noctu. æquabiles etiam sunt; quòd nullum inveniant motus impedimentum, quo à recto cursu detorqueantur.

Alii sunt venti subiti, ac violenti, qui Procellæ nuncupantur. tres harum species Aristoteles facit, quarum hæc nomina. Ecnephas, Typhon seu turbo, & Præster. Ecnephas re ipsa generale est nomen cuiuscunque procellæ, sed contractum est ad eam, quæ subito è nube prorumpit citrà gyrum, & materiæ accensionem. Oritur, perinde ut fulmen, ex materia nitrosa, & sulfurea, sed nitrosa prævalente, quæ dum nimium calefit, & violentæ rarefcit, impingens in partem nubis superiorem nimis crassam, quam proinde superare non potest, totum impetum deorsum concipit, secumque nubis ipsius partem non exiguan rapit: quæ est fortassè ratio, cur accendi prohibeatur. hæc autem, auctis in ipso descensu viribus propter novam halituum accensionem, porro dilatari magis pergens, vim imprimat, quocumque incumbat, ingentem, sed brevem; quia nimirum materia non succellit.

seffivè per partes, sed simul tota cogitur, & absumitur. Huius generis frequens est temporibus, ac regionibus calidis, præsertim sub Aequatore; tunc enim, & ibi abundant halitus ficci, qui vaporem secum trahentes, in nubem primò, mox in procellam abeunt.

Typho, seu turbo procella est vehementior, sed vorticem agens, & cum gyro deorsum immissa, ac sæpè cum eodem gyro sursum reflexa. Eius ortum proportionalem Aristoteles censet modo, quo ventus inter vicorum, aut montium angustias coactus, circulariter agitur; similiter enim procella inter nubis latera volutatur, & motum, quem ibi circula-rem concipit, vibrata servat, & in terram aut mare impingens, cum impetu eodem, aut etiam aucto propter aeris compressi vim elasticam reflectitur. Potest etiam turbo oriri ex ventorum ab oppositis locis venientium concursu, & collisione. Potest & Ecnephias propè terram in Typhonem verti ex incurso in vallem undique montibus cinctam. Mira de Typhone narrantur præsertim in Japonia, & Sinico Oceano, ubi maximè regnat. naves enim integras sursum abripit; sorbendasque aquis ex alto præcipitat.

Præster est procella accensa, ubi enim materies commota nunc recta, nunc in gyrum discurret, congregantur particulae igneae reliquis celeriores, & in flammam erumpunt, quæ, quidquid est in procella inflammabile, corripitur. Frequentius tamen in Præstera Typho degenerat; facilius enim gyratione ignei spiritus adunantur. Differt à fulmine; quod hoc intra nubem, præster propè terram, & post vibrationem ignitur. flamma fulminis tenuior, & citò transiens: præsteris crassior, & diutior. fulmen utpotè in sublimi accensum majorem suam vim in aere consumit. præster cum propè terram inflammatur, totum hic suum impetu

tum impendit, & propterea magis comburit.

Explicandæ nunc essent ventorum qualitates. sed quod attinet ad eas nunc salubres corporibus, nunc noxias, uno verbo expediuntur; ortum enim habere à vento non per se, sed per accidens, quatenus scilicet è locis, per quæ transit, halitus secum trahit quandoque insalubres, quandoque salutare. ex hoc etiam oritur, quod alii frigidi, aut sicci, alii humentes, aut calidi, &c. hinc idem ventus uno tempore serenitatem, alio pluvias invehit, prout in medio exhalationes, aut vapores invenit, qui vel in flamina dissipentur, vel congerantur in nubes.

C A P U T VI.

*De Iride,
ceterisque impressionibus apparentibus.*

TOta Iridis natura triplici consideratione absolvitur, materiæ scilicet, in qua pingitur, colorum, quibus distinguitur, figuræ, qua arcuatur in circulum non perfectum.

Quod attinet ad Iridis subiectum, certum est, illud esse nubem roridam, h. e. in minutas guttas resolvi jam incipientem hinc formari solet Iris ante, vel post pluviam; dum nubes vel sensim in tenues aspergines convertitur, priusquam in sensibiles guttas cogatur: vel resoluta jam in imbrem, humoris reliquias retinet, quas paulatim exili stillicidio demittit. Hoc ita esse compertum inde est, quod in quibusdam fontibus, aquam ita jacentibus, ut ea minutissimè concidatur, aspergaturque, ad verso Sole, Iris formatur. Ità pariter si quis terga Soli obvertens aquam ore exsufflet, & irroret, iridem minorem quidem, sed perfecte rotundam aspiciet.

Colores porrò Iridis hi sunt præcipui, puni-
ceus

ceus in parte arcus convexa, ruber in concava, viridis medius, cui quandoque annectitur flavus. Modus, quo isti generantur, communis est mea quidem sententia reliquis omnibus coloribus, quos à luce per umbras, dum reflectitur, aut refringitur, modificata non distinguo; ut constabit l. 4. q. 4. c. 2. §. 1: Cabeus censet, colorum istiusmodi varietatem esse à majori, vel minori opacitate, quam radius in transitu accipit; quod probat ex vitreo prisma, in quo radii perinde ut Iride colorantur. qui enim radius transit per maiorem prismatis profunditatem, & crassitiem, ruber est, seu purpureus obscurior: qui per minorem, primo viridis, tum flavus, postremo puniceus; ita ut color sit clarior, & clarior, prout crassities, quam transit radius, est minor, & minor. Sed huius doctrinæ insufficientiam obvia cuique difficultas ostendit; si enim sola crassities vitri apta sit radio diversimodis colorando, etiam in vitris planis magis, magisque crassis idem contingeret; quod negat experientia. Requiritur ergo refraction, nec uniformis, & eadem, sed uniformiter difformis, semper scilicet decrescens ex una parte, & crescens ex altera. quam præstat triangularis in prisma, & rotunda in guttis roridæ nubis figura.

Dux igitur Irides distinguendæ. altera primaria, & inferior, cuius colores vegeti, ac viridi: altera secundaria, & superior, cuius colores debiliores, minusque sensibiles. dux istæ Irides ita disponuntur, ut qui supremus est color in primaria, infimus sit in secundaria, & è contrario. quare Cabeus, & alii post ipsum censuere secundariam non esse, nisi imaginem primariæ à superiore nobis parte veluti è speculo ad nos reflexæ; in speculo enim obiecta sæpè invertunt, ut dexterum appareat sinistrum, & contrà. Sed quàm rectè, alii viderint. Certè radii non subeunt coloris apparen-

rentiam, nisi in determinato puncto, in quo oculus constituitur in centro Iridis. quo autem pacto idem punctum transferri possit extrâ circumferentiam Iridis, ut Iridem superiorem pingat, Cælius non declarat, nec ego intelligo. Accedit, quod neque declarat, qua ratione superior nobis pars non una simplici, plana que superficie pellucida constans, sed innumeris ipsa guttulis repleta possit ad amissim inferius obiectum integrum repræsentare.

Melior est Neoteriæ sententia post Cartesium, utriusque Iridis generationem explicantium ex eo, quod in primaria, quæ ad 42. gradum attollitur. radii in aqueis guttulis duplicem refractionem. & unicam reflexionem patientur: in secundaria verò, quæ elevatur ad gradum 52. in guttulis radii duplicem refractionem, & duplicem etiam reflexionem accipiunt; atque idcirco minùs vegeti ad nos perveniant, & colorum ordo invertatur. Vide hanc rem fusiùs explicatam in Burg. Phil. to. 5. tr. 1. cap. ult. Declarat id totum experientia ibidem relata. Si enim phialam aqua plenam obscuri cubiculi foramini, per quod radii Solares admittuntur, in eo situ obiecteris, & aptè collocaveris, ut angulus sit 42. ferè graduum ad oculum, vel chartam candidam, tum color cæruleus ad puniceum accedens superior, flavus medius, ruber infimus conspicietur. quod si angulus sit 52. ferè graduum, eosdem colores in charta candida conspicias, sed inversos, perinde ut in Iride secundaria.

Figuræ demum Iridis ratio communiter redditur evidens; quidquid in contrarium concutitur Resta, eam deducere tentans ex Solis ipsius circulari figura. Ratio autem est; quia ut colores in guttis appareant, debet oculus ab iis in certo puncto distans constitui: ex quo Iris semper eandem altitudinem servat, graduum scilicet 42. quare non videntur co-

coloratæ, nisi guttæ æqualiter distantes ab oculo. sed guttæ æquè distantes ab eodem puncto sunt circulariter dispositæ. Iridem ergo circularem apparere necessè est. Hinc etiam est ratio, cur Iris circulum nunquam expleat; nunquam enim oculus guttas inferiùs positas à se distantes habet per gradus 41. ad quos si attolleretur, Iridem perfectè circularem posset conspiciere.

Nunc explicandæ aliæ apparentes impressiones; quæ potissimæ exsunt, Halon, seu Corona, Virgæ, Parhelii, Colores Nubium, & Lactea via, quam Aristoteles inter apparentes vaporum in aere formas recensuit.

Halon, seu Corona est lucidus circulus circa Solem, quandoque etiam circa Lunam conspicuus. fit in vapore non rorido, & in guttulis conformato, sed æqualiter per totum fuso, & semidiaphano, qui inter ea sidera, & nos interponitur. differt ab Iride; tum quia Halon circulum explet; tum quia colorum varietatem non habet, sed candidus plerumquæ est totus; tum quia non fit per radios ulatenus reflexos, sed solum refractos. Ratio istorum omnium ex Cæleo est; quia cæleste corpus qua parte vapores perpendiculariter ferit. eos pertransiens, ad oculum pervadit sub pura lucis suæ specie nullatenus coloratæ. dum verò recedit à perpendiculari radius, & obliquè in vaporem incidit, refringitur propter medii densitatem, & ab eo non nihil passus quandam contrahit opacitatem, qua in albedinem ex pura luce degenerat. quia verò albedinem contrahit vapor, seu potius in vapore radius ex remotione ab axe perpendiculariter à Sole ad oculum transeunte; ideò ex æquali remotione albedo formatur, seu apparet circularis.

Virgæ sunt vapores, seu nubeculæ coloratæ, sed in longum protensæ virgarum, hastarumve
 fos-

forma. coloratio est in his perinde ut in Iride à varia Solaris radii reflexione, refractioneque. Simile quid notavit Philosophus contingere in aqua: si enim Solis radius in maris superficiem leniter crispatam obliquus incidat, luminosas veluti virgas ex determinato loco in eo conspicias.

Parhelli sunt gemini, pluresve Soles in Caelo apparentes. tres quandoque, sex etiam alii, quando visi, & quidem, Cardano teste, adeò clari, ut à verò Sole distingui non possent. Certum est, eos à reflexione non oriri; quasi verò nubes speculi vicem subeat, per quod Sol geminetur; nam primò speculum requirit unam continuam superficiem, quam nubes habere non potest, nisiingas eam esse totam in aquam vel in glaciem concretam: quod non stat cum eiusdem nubis suspensione, quidquid dicas, ventos, aut halitus e terra erumpentes eam sustinere; venti enim eam potius turbarent, ac frangerent; halitus verò utpotè in specie leviores non possunt aquam incumbentem à descensu prohibere. Accedit, quod parhelli, si reflexione formarentur, deberent, ut Iris in parte Soli opposita videri. sed contrarium est verum; Soli enim hinc inde veluti laterones adherent, eiusque motum sequuntur. Probabilius igitur, vi refractionis formari: quemadmodum enim si obiectum videatur per vitrum plurium facierum, multiplicatum apparet: sic etiam geminatur, ubi vitrum ex una parte est planum, ex altera à plano priori inclinaturn: ita contingere potest, ut vapores inter sedii aliquo ex his modis inclinentur, ac variè disponantur; adeoque Sol ipse multiplex nobis appareat. Idem accidere Lunæ potest, & solet; & tunc pro parhelio paraselene dicitur.

De coloribus nubium, qui Oriente, atque Occidente Sole conspiciuntur, nihil est, quod dictis addam. De via Lactea celebre est Ari-

stotelis erratum, illam ex luce per vapores transmissa componens. sed duplici manifesta ratione reiicitur. 1. quia impressiones ex vaporibus ortæ variantur, nec semper eadem, eodemque loco, & modo videntur, ut videtur in Cælo galaxia. 2. quia telescopio deprehensum est, in ea Cæli parte, quæ albicat, innumeras esse Stellulas; quæ simul junctæ propter immensam distantiam ad oculum appellentes, candidam illam veluti fasciam representant.

Q U Æ S T I O Q U A R T A.

De Meteoris Aqueis.

A Quea voco Météora, non quæ ex aquis, sed quæ in aquis contingunt. itaque præsens quæstio tota erit de mari, aquarum omnium origine, & conceptaculo.

C A P U T I.

De Maris salitudine.

MAre quodvis natura falsum voluit; primo, ut à putredine præservaretur; quamvis enim salæ etiam aquæ aliquandò putrescant, ut videre est in lacu, seu sinu veriùs Comaclensi; negari tamen non potest, magnum esse in sale à tabe munimen, tametsi superari hoc possit à prævalentibus putredinis causis. Sic corpora salita, cæteris paribus, difficiliùs contabescunt, sed tamen marcent & ipsa aliquandò. secundò, ut piscium esset aptissimum domicilium: qui quidem cum supra reliqua animantia humore abundant (huc refert Plinius magnitudinem marinorum supra te.

terestria longe maximam) in sale vivere debuerunt, quo nimia humiditas temperaretur. tertio demum, ut aqua per mixtionem eius corporis, quod salsedinem facit, densior evadat, & gravior, atque ita ferendis ingentibus navium ponderibus aptior.

Jam verò, qua ratione maris aqua salietur, declarandum. Aristoteles id nasci censuit ex permixtione exhalationum non quarumvis, sed terrestrium, & adustarum. Verum hæc sententia utcumque ad probabilitatis aliquam speciem adducatur à Resto Meteor. l. 3. tract. 1. cap. 18. displicet jam Neotericis ferè omnibus, rem naviter excutientibus. Ut enim vapor est substantialiter aqua, ita exhalatio ista ponitur substantialiter terra. at terra per nullam actionem in salem aliquandò abiisse deprehensa est. Ad hæc exhalatio quò magis incalcescit, hoc magis attenuatur, & evolat. quod si mare ab ea salsum esset, duo sequerentur experimento contraria, primum, maris aquam vi caloris debere salsedinem amittere; cum oppositum contingat, igni enim admota salior evadit. hinc juxta veriore nautarum narrationem æstate salissimum est mare. alterum, nubes etiam, pluviasque in iis contentas ex eiusmodi halituum permixtione aliquid salsedinis contrahere debere: quod falsum est. Præterea ut exhalationi obnoxius sit sal, quem volatilem dicunt, non tamen fixus, qui per nullam ignis actionem attenuatur, & expirat: & hoc tamen præcipuo abundat marina aqua, eoque fit salsa. Demum non esset ratio, cur lacus etiam, & fluvii salsedinem non haberent, quibus exhalationes quoque, utcumque statuatur adustæ, & simul malè concoctæ, descendum permisceri.

Expediitissima igitur via erit, si dicas, mare salsum esse per salis admixtionem. Commune quidem est omni sali: ut in humido solvatur, ei

lique incorporetur, & fluat. Itaque vel à re-
rum exordio simul cum mari permixtum sa-
lem Deus condidit: vel sunt in maris fundo
salini montes, quales in terra non paucos sci-
mus, præsertim in Calabria, quos perva-
dens aqua, ac dissolvens, falsedinem contra-
xit: Huiusmodi salis fodinas, perinde ut re-
liquas, probabile est renasci in supplementum
salis; quem maris aquæ terram altius subeuntes
deponunt.

Habes hinc 1. cur non omnia maria sint æ-
què salia. nam septentrionalia, teste Philo-
sopho, minùs salia sunt, quàm Australia,
Ratio est; vel quia non omnibus par est salis
copia; vel quia non ab omnibus par exsolvi-
tur; frigidiora enim minùs sunt adhuc ido-
nea, alicubi per pluvias, fluviosque plus
aquæ dulcis influit, quæ falsedinem diluit, ac
temperat:

Habes 2. cur mare semper sit salsum, quam-
vis tanta dulcium aquarum copia in ipsum il-
labatur. extrahitur enim vi caloris Solaris ab
eò aqua, non sal. cum ergo dulcis influat aqua,
& dulcis evaporet, sale semper manente, sal-
sum sit semper, necesse est.

Habes 3. cur æstivo tempore mare sit magis
salsum; quia nimirum vapores vi summi calo-
ris ducti plures omninò sunt. manent igitur
eodem sale, qui, ut dixi, non expirat, & aqua
minori, necesse est, ut falsedo sit major.

Habes 4. cur pluvia non sit salia; sal enim fi-
xus cum vapore non ascendit; & quamquam
volatilis ascendat, non tamen ad tantam
altitudinem, sed paulatim devolvitur, ac ter-
ram repetit.

Habes 5. ex proportionali causa sudorem in
animali esse salsum. pars enim alimenti salia,
& excrementitia difficilè expirans, deferitur
ab alimento ad extremas animalis partes, ibi-
que residet, eò quòd humidum, cui miscetur,
tur,

tur, attenuatum per insensibilem transpirationem exhalat. at cum deinde humor ipse copiosior per poros exsudet, salem, quem ibi reperit, solvit, & secum aufert; unde & salus evadit.

C A P U T II,

Reliqua maris qualitates, & effectus considerantur.

PRincipiò mare pinguem habet, densamque aquam: pinguem quidem ab halitibus bituminosis immixtis: ex quo minus est restringendis incendiis apta: & tempestatibus collisa flammæ emittit malis navium adhærentes. densam verò, adeoque gravem ex sale, quod simplici aqua per se densius, & gravius est. Utrumque verò omni fontana, ac fluviali densior sit marina aqua, integram tamen servat perspicuitatem. quantumcumque enim altus sit fundus, ad imum usque perspicitur; unde & natantes falluntur, dum ipsum credunt ex specierum refractione propinquum. in causa saltem ex parte est salis ipsa perspicuitas, qualem in eo videmus è montium fodinis effosso. Lucidior porrò, magisque perspicua apparet ex olei insperione, non quod oleum nativam aquæ perspicuitatem perficiat; sed quia rotundatum, ut solet, & nonnihil etiam globosum, convexorum speculorum vicem subit, qualibus præbytae utuntur; auctis proinde rerum intra mare degentium speciebus, melius per aquam inspicere videmur.

Inter maris qualitates considerandi etiam colores. magis proprius, ac nativus censetur in eo cæruleus; qui vel ex eo est, quod in se recipit, ac reverberat Cæli speciem: vel quod hic ille est color, quam induit omne diaphanum in certa distantia, ac profunditate. hinc

montes longinqui, cærulei apparent, qui scilicet color est aeris intermedi. Colorem tamen plerumque mare variat; flante enim Austro aliter, aliter flante Borea coloratur: & dum tranquillum, stratumque est, pro varia Cæli apparentia, cui speculum sese exhibet, colorem varium induit. Sed non hoc uno modo malacia diversicolor apparet: constat enim ubi unus etiam in aere est color, multiplicem adhuc spectari in aqua. hæc igitur diversitas esse potest vel à fundo aliter, atque aliter variato, vel potius à superficie per levem aeris agitationem, ac veluti fluxus, refluxusque dispares non eadem ratione crispata; ex quo varia lucis tum reflexio, tum refraction, & hinc varius color. quæ omnia mirè consonant cum doctrina de coloribus seq. lib. tradenda in sola lucis modificatione consistentibus.

Speciali in hoc mentione dignum est mare illud, quod à colore Erythreum, ac Rubrum dici authores non pauci, nec ignobiles volunt. Sunt, qui ita dictum non à colore, sed à rege Erythra Erythreum à Græcis, Rubrum à Latinis per errorem appellatum ex Arriano autumant. Verum recentiores Lusitani, qui sinum illum navibus ingressi sunt, testantur, ut videre est in Joanne Barrio *Decade* 2. l. 8. cap. 1. apud Restam sup. cit. aquam re ipsa rubrum colorem spectantibus exhibere. quia verò è mari haustam pellucidam, & nullo rubore tinctam deprehenderunt, eum colorem non aquæ inesse, sed vel ab arena rubra, vel à coralliis, quibus id maris abundat, oriri arbitrati sunt: nec desunt, qui credant, infici aquam à circumstante terra, quæ rubra est tota, & sanguinei coloris. Crediderim tamen potius cum Resta, ruborem aquæ inesse ex minii, aut alterius rubræ terræ admixtione dilutæ. quod enim attinet ad arenam, littusque rubrum, mirum est, nihil tale à Lusitanis, oculatis testibus

Ribus narrari experimento suo deprehensum; de littoribus enim nihil omnino, & de arenis solum per conjecturam, ab eo falsi, quod aquam haustam nullius coloris viderunt; quasi verò non possit tenuissima esse, & insensibilis in modica aqua rubedo, quæ in immensa eiusdem mole conspicua evadat.

Postremò nausea, quam navigantibus mare ingerit, effectus est philosophica indagine non indignus. Hanc multi oriri putant à salinis, bituminosisque spiritibus, qui è mari elati, & ad stomachum appulsi, vomitum provocant. Reiecit hos Capeus: sic enim, inquit, non modò qui navigant, sed qui sedent ad littus, nausearent. Veriorem igitur putat causam esse in ipsa agitatione, fluctuationeque undarum. tum quia similis nausea cietur in iis, qui curru vehuntur, & qui per lacus, ac flumina navigant. non est ergo, cur petatur specialis ratio ab aqua, halituque marino. tum quia major nausea concitatur in navigio, quod remis, quam quod velis impellitur. Signum igitur est, nauseam tunc esse à propria agitatione; qua ratis concutitur, ac subsultat ex interrupto remorum impulsu. tum demum quia nausea maxima est in tempestatibus, & ingenti maris concussione. cum hac igitur specialiter nectitur, cuius sequitur incrementa.

Pergit deinde explicare, quo pacto agitatio nauseam creat. Supponitur ut notum ab experientia, dum corpus continens incipit aliquem motum, corpus contentum moveri confestim motu contrario. Si enim navis, aut currus, in quo slet quispiam erectus, ad Austrum moveri incipiat, homo non ad Austrum, sed ad Septentrionem cadit; sive id sit ex amore quietis, quo nititur in oppositum, ut acceptum impulsu superet, atque ita penset, sive aliunde. Dum ergo navigium remis impelli-

tur, ita movetur, ut ad singulos remorum impulsus motum incoheret. hinc fit, ut si phiala aquæ semiplena in navi sit, aqua ad hos phialæ fluat, refluatque ex data ratione. idem ait accidere in humoribus ventriculo inclusis; regurgitant enim ad hos; & quia inter eos multi sunt biliosi, ac mordaces, exasperant stomachum, & nauseare cogunt.

Hinc reddit eorum omnium rationem, quæ in nauseatione contingunt. Saturi enim minus laborant, quod plenus stomachus minus agitur. Jejuni omnino, ac benè puri adhuc minus; nihil enim est, quod agitetur, & stomachum irriter. Jejuni cibo, sed pravis humoribus referti, molestissimè nauseant; quod soli isti regurgitent, ac proinde acerrimè vexent. Pessima est nausea, qua nihil egeritur; quod tenacissimi humores ventriculi tunicæ adherentes, & agitatione commoti, mordacissimos spiritus continenter excitant, torquentque diutius, quia non emittuntur. Jacentes demum secundum navis latitudinem minus nauseæ patiuntur; mordax enim humor non ad os, sed ad latera ventriculi impellitur.

Hæc omnia ut probabiliter omnino sint dicta, quatenus agitationem præcipuam nauseæ causam faciunt: non tamen, quatenus bituminosos halitus excludunt. calido enim isti sunt, seu verius tepentes, & præterea vitrioli aliquid miscent: ex utroque autem capite ad nauseam possunt compellere, seu verius juvare, dum sunt humores jactatione commoti. hinc flante Austro major est nausea, quam sub Borea validiore; Auster enim utpotè calidior, mareque magis turbans, plures halitus bituminosos, ac vitriolicos ciet, stomachumque propterea vehementiùs vellicat.

C A P U T III.

De motibus Maris, præsertim à Septentrione in Austrum, & ab Oriente in Occidentem.

Motus maris alii sunt irregulares, & varii: alii certi, & uniformes. primigenis motus sunt tempestates, quæ gemina vi moventur, aut à ventis, qui ruentes oblique, ac deflectentes deorsum, mare impellunt, ac sua de sede dimovent: aut ab halitibus ex ipso maris fundo vi caloris subterranei excitatis, qui, que ut terræ, ita & aquæ motum faciunt. Pro duplici hac tempestatum causa, alia, quæ extra, alia, quæ intra mare est, duplici præsignitione venturas tempestates nautæ prænoscent, dum enim vident, aves ex alto se deorsum recipere, à ventis procellas imminere intelligunt: dum verò pisces cernunt è fundo ad superficiem enatantes, à subterraneis exhalationibus discrimen esse cognoscunt; utrique enim periculum instinctu fugiunt, & tutiora quærunt.

Motus certi, ac regulares tres ab authoribus numerantur. primus à Septentrione in Austrum, seu potius à Polis ad Æquatorem, diciturque motus *Æquationis*; fit enim, quod aqua æqualiter sua se superficie librat circa centrum. Alter est ab Oriente in Occidentem, & appellatur motus *Raptus*; creditur enim fieri, quia rapitur mare à primo mobili. Tertius est motus reciproci cujusdam æstus, qui vulgò nuncupatur *Fluxus*, ac *Refluxus* maris. primi duo examinandi in præsentis; tertius, qui longe celeberrimus, ac difficillimus in sequentibus discutietur.

Mare à Septentrione in Austrum moveri, inductione probat Philosophus. aquæ enim, inquit, à Mæotide in Pontum defluunt:

à Ponto in Aegeum : ab hoc in Siculum , usque ad fretum Gaditanum : quod totum experimento à navigantibus deprehenditur . Hic ipse motus in Oceano est ; navigationes enim à Septentrione ad Austrum celeriores sunt , quam ab Austro in Septentrionem . Hujusmodi defluxus causa inquiritur .

Sunt , qui ad fundi declivitatem in Australibus maribus maiorem recurrunt , quasi hinc fiat , ut aqua semper Austrum versus descendat . Hanc rationem Aristoteli tribuunt ; sed perperam ; indigna enim Philosopho est . nam ut mittam , falsò assumi minorem in Borealibus fundi declivitatem , cum in mari Danico , & Norvegico fundus alicubi altissimus sit , & inexplorabilis ; evidens est , non à fundi , sed à superficiei declivitate aquam moveri . ubi n. superficies est æquilibrata . cum distantia à centro gravitatis æquali , utcumque fundus sit inæqualiter cavatus , nullus est , aut esse potest à gravitate motus ; aliter in stagnis etiam , & paludibus , imò & in catina deberet aqua continenter moveri .

Vera igitur ratio est declivitas marinx superficiei , quæ quidem ex duplici capite oritur . 1. ex maiori fluvialium aquarum copia ad Septentrionem pelagus augente . hinc enim fit , ut cum aqua sese æquilibret , debeat esse in perpetuo ad Austrum motu . cur autem maiora sint ad Boreales tractus flumina , in promptu est causa , ibi enim maior pluviarum , ac nivium copia ; unde flumina vel generantur maiora , vel in progressu augentur . 2. ex vehementissimo Solis calore Australes aquas perpetuò exiccante , & imminuente ; ex quo consequatur necesse est major Septentrionalium altitudo , adeòque ad Austrum decursus .

Moveri porrò mare ab Oriente in Occidentem in Mediterraneo ferè certum ; experiuntur enim quotidie nautæ Mediterraneum in

Oceanum per fretum Herculeum ferri. ratio est eadem, quæ facit maris huiusce motum à Septentrione in Austrum; siquidem cum tota aquarum moles in Africæ littora incumbat, nec possit retro adversus fluxum regredi, obliquè in Mediterraneum se torquet, ut exitum in Oceano quærat. quamquam propter freti illius angustias non omnes aquæ sese in Oceanum exonerent, sed pars reflectatur circulariter in Africam. Similem circulum videre est in Adriatico; ingreditur enim mare per littora Illyrici, & Dalmatiæ; tum secundum Apuliæ littora revertitur in Ionium.

Ejusmodi motum stabilire in Oceano plerique conantur. nam primò testes sunt Conimbricenses, onerarias, quæ è portu Gaditano solvant Americam versùs, uno serè mense navigationem conficere, sed dum revertuntur, tres, aut quatuor menses requiri. Verùm illius majoris celeritatis aperta est causa in subsolanis toto anno vix unquam in eo mari interpolatis; ut non oporteat ad maris ipsius defluxum propterea recurrere. Neque dicas, ex hoc ipso argui motum maris ab Oriente in Occidente; mare enim in eam partem concipit motum, in quam fertur ventus. Quandoquidem non hic inquiritur motus maris à vento, sed alius vel à natura aquæ, vel aliunde profectus. Alii narrant hunc motum sensibilem esse in freto Magallanico ab Ortù in Occasum porrecto, per quod ab Oceano Atlantico in Pacificum itur. Sed neque hinc satis probatur motus alius in Oceano, quàm à Septentrione in Austrum, qui tamen ubi ad littora Magallanicæ terræ frangitur, deflectit per fretum ad Occidentem.

Rursus non placet huiusce motus vulgò tradita ratio; quod scilicet sit effectus primi mobilis aerem secum, aquasque raptantis. Nam si firmamento vis ista datur aquas impellendi,

cur non terram, quæ gravitate sua motui circulari non multum repugnat, cum à centro non removeatur? Præterea inquirō, utrum mare refluat aliquando ab occafu in ortum? fi ais; jam ergo fluit, & refluit; quare non erit perennis fluxus, fed reciprocus. & quamvis huc revocent nonnulli æſtum, apparebit ex dicendis, non ita eſſe. fi negas; fequitur, aquas ita rapi, ut terris omnibus superfundantur. Neque eſt eadem ratio de ventis perpetim ad occafum impellentibus; venti enim ſumma dumtaxat maris impellunt, quæ poſſunt propterea circulare per ima. Non ſic primum mobile: cuius viſa utraque extenditur, ſi alterum poſſe datur; cum vix ſit ulla diſtantiā ſenſibilis, & phyſica differentia fundi, & ſuperficiæ maris, ſi cum primo mobili comparentur.

Aliam alii talis motus afferunt rationem; quia, inquiunt, dum Sol movetur ab ortu in occafum, ſemper in parte maris Soli ad perpendicularum ſubjecta, fit major aquarum imminutio per maiorem vaporum extractionem. Sed ſi benè rationis huius viſ perpenditur, probat potius motum aquæ ab Occidente in Orientem; ubi enim aqua ſub Sole poſita imminuitur, non aqua Orientalis, quæ imminuta jam eſt, ſed Occidentalis, quæ imminutionem nondum eſt paſſa, adeoque altior eſt, deberet deſſuere in locum aquæ per evaporationem educitæ. Non ita ſe res habet in generatione ſubſolani, cuius hanc ipſam cauſam ſuprà tradidi; vaporem enim extractus non concipit impetum ad Orientem, ubi alium vaporem ſe dilatantem invenit, ſed ad Occidentem, ubi minor vaporum copia.

C A P U T I V.

De reciproco maris aestu, cujus primò narratur historia.

Marini aestus manifesti abditissima est causa; ut apud omnes in confesso sit, nihil haecenus, quod omni ex parte satisfaciat, à Philosophis allatum. Ipse Aristoteles, cum multa de mari l. 2. Meteor. multa in problematis disseruerit, aestum ne attigit quidem. quin etiam vulgò fabella circumfertur, quod cum motus eiusmodi causam invenire non posset, in mare præcipitem se dedit, ut ab eo caperetur, quod ipse non caperet.

Sed prius statuendum, quid sit marinus aestus, ac reciprocatio. Communis authorum sensus est, ipsum consistere in quadam vicissitudine, qua mare certis quibusdam temporum spatiis modò intumescat, modò detumescat. Negat hoc Galilæus in suis de Copernicano Systemate Dialogis, censetque potius esse fluxum maris ad unam partem, & refluxum ad aliam, ita ut quantum ad unum littus accedit, tantundem recedat ab alio, & vicissim; atque in hoc statas servari temporum vices. Verum in hac re Galilæus non causam effectui per experientiam noto, sed effectum potius accommodavit causæ, quam sibi ipse, invita rerum natura, præfixerat. Relictis ergo solitariis hisce opinionibus historia, marini aestus ex maiori, meliorique authorum parte sic habet.

Ergo unius diei spatio in quolibet mari aquæ bis intumescunt, bis detumescunt. plurimum autem sex horis augentur, & totidem minuuntur; sed non ubique æqualiter. etenim in fine Adriatici propè Venetias notabilis est intumescencia; non tamen par in opposito littore

æstus respondet. Ad oram Africæ magnum est etiam aquarum augmentum: ad oram Italiæ non item. In toto autem Mediterraneo reciprocatio eiusmodi exigua est. Sed in Oceano maximi contingunt æstus; nam in Belgio ad octodecim, in Britannia ad octoginta cubitos tumor assurgit: in Oceano Pacifico, præsertim ad Peruvix littora ad duas usque leucas excurrit pelagus in continentem. In Oceano autem Indico tantum est aquarum incrementum, ut ad ostia Indi fluminis aqua ad triginta leucas retrò agatur in morem rapidissimi torrentis, ut testatur Curtius l. 9. & tantumdem terrarum invadat mare ad littus Cambajæ. in Occidentalibus verò Indiis flumen Amazonum per centum leucas retrorsum impellitur.

Quod attinet ad tempus, triplex periodus in æstu distinguitur; diurna, menstrua; & annua. Diurna est, qua mare, cum primum ascendere incipit supra horizontem Luna, incipit & ipsum ita crescere, ut Lunæ ascensui se accomodet. quare ubi hæc ad summam altitudinem meridianam pervenit, mare summam intumescentiam obtinet. at ubi Luna in Occidentem declinat, mare decrescit, ita ut finis sit decrementi, dum Luna Occasum attigerit. Rursus eodem tenore incipit tumere iterum, ac sequi Lunæ motum ad oppositum Meridianum: à quo dum in nostrum Orientem agitur Luna, mare rursus minuitur. quare sex circiter horas crescit, totidemque decrescit. Sed varietas tamen alicubi in hoc est; sunt enim loca, in quibus octo horas incrementum, decrementum quatuor durat: sunt, in quibus est variatio inter septem, & quinque horas, plerumque tamen unam circiter horam variat pro Lunaris periodi à Solari discrimine.

Menstrua periodus ea est, quæ in noviluniis, ac pleniluniis maximam facit maris intumescen-

scientiam : minimam in quadraturis . Annua-
demum periodus habetur , quod maximus
sit æstus in Æquinoctiis , minimus in Sol-
stitiis .

C A P U T V.

*Minus probabiles de causa æstus sententia
prolata, ac rejecta.*

NON omnes hac de re opiniones in medium
afferre est animus ; possunt enim videri
apud authores passim , latissimè præsertim
apud Cabeum Meteor. lib. 2. à 9. 6. usque ad 10.
sed cum cæteras paucis , Galilæi opinionem
per quatuor integras quæstiones exagitat , de-
monstratque , tantum abesse , ut per motum
terræ Copernicanum reddatur ratio marini
æstus , ut potius ex marino æstu , qualem res
ipsa docet , non qualem sibi finxerat Galilæus ,
falsus evidenter ostendatur motus terræ Coper-
nicanus . Eandem sententiam fortiter etiã reil-
cit P. Fabri L infra citando .

Conveniunt igitur authores reliqui , maxi-
mè recentes , causam æstus petendam à Luna ,
cuius scilicet motui ad amissim consentit . Sed
qua vi Luna talem æstum efficiat , id est maxi-
mè dubium . Author Burg. Philos. duas opi-
niones proponit , quas censet utcumque defen-
di posse , Cartesii alteram , alteram P. Fabri ,
quas in præsentì discutiendas sumo .

Ergo Cartesius p. 4. princ. phil. à nu. 49 rem
ita componit . Supponit primò , terræqueum
globum una cum Luna circa Solem ferri per
eundem magnum vorticem , seu Cælum . Sup-
ponit secundò Lunam , utpotè terra minorem
secundùm molem , celerius terra ipsa cir-
cumvolvi ab impulsu materiæ cælestis . Sup-
ponit tertio materiam cælestem deferentem

velocius moveri, quam terram, & Lunam à se delatas. hinc porro explicare pergit causam marini æstus; cum enim Luna est in meridiano, ætherius pulvisculus inter eam, ac terram propter loci majores angustias, ut aquæ in Euripo contingit, celerius fluit: ex quo motu necesse est, ut terra de suo loco nonnihil demoveatur: quod facile fit propter eius æquilibrium. æther ergo interfusus citius motus, aerem, & aquam, fluida corpora premit magis, & versus littora attollit. dum autem Luna à meridiano recedit, æther à prioribus angustis liber, mare non ultra premit; & ex hoc aqua relabitur. Quia verò bis in die ad meridianum Luna revertitur, adeoque angustias illas efficit, consequens est, ut bis in die mare intumescat, & totidem vicibus detumescat. In pleniluniis porro, & interluniis majores sunt æstus, quia Luna propior tunc est terræ, maioresque proinde facit angustias, quam in quadratis, cum à terra recedit magis.

Adversus hanc sententiam plurima congerit Magnanius Phil Nat. c. 35. à nu. 149. Principio invehitur meritò in suppositiones à Cartesio præmissas. falsa enim est prima de motu terræ. falsa etiam secunda, & tertia, juxta Cartesii principia: quod probat exemplo fluminis, in quod si duo lignei globi mole, ac soliditate inæquales immittantur, manifestum est, eos deferri æquali & inter se, & cum fluminis aqua velocitate. Si ergo & Luna & terra ab æthere in gyrum rapiuntur; non potest æther, quam Luna, & terra, nec Luna, quam terra, velocius moveri. tanto magis, quod Luna, & terra motui, juxta Cartesium, non resistunt, ut resistit navis vento; & propterea ventus celerius movetur, quam navis. Quod totum confirmat ad hominem ex dictis Cartesii ipsius alibi hanc doctrinam insinuantis.

Q. uod tendit præterea angustias illas, fides omnino

omnino esse ; quia inauditum est, angustias creari in fluido à corpore mobili, implente spatium fluidi deficientis. quis enim dicat, cymbam ita angustare fluvium, ut propterea debeat fluvius maiore cum impetu, ac celeritate decurrere?

Urget ulterius, nam æther vel premit aquam immediatè per se, vel per aerem simul. Non secundum ; quia facilius est, ut aer condensetur, quam ut Oceani aquæ librationem amittant ; ut constat consideranti. quare primum potius sequi deberet, quàm secundum. Sed neque æther per se Oceanum premit ; cum enim ætheris motus sit circularis, & obliquus, magis multò debet aerem impellere in gyrum, quam aquas deorsum. atque adeò ut est sensibilis Oceani æstus, ita deberet esse sensibilior aeris motus : quod tamen negat experientia, docens æstum quandoque contingere, silente penitus aere.

Addi his possunt & alia. 1. quia ratio tradita pro interluniis, ac pleniluniis non est apta ; non enim semper in his Luna est terræ proxima, seu perigæa. 2. videtur apertè non causa effectui, sed causæ effectus aptatus. consentiunt enim serè omnes in eo, quod sub Lunæ meridiano aquarum est tumor, atqui in hac hypothese contingit oppositum, quod sub eo scilicet aqua maximè premitur, adeoque detumescit. tertio scimus in Adriatico sinu propè Venetias æstum esse notabilem, qualem in reliquis eius littoribus non experimur. scimus etiam ad littus Africæ, præsertim in Tripolitano sinu, quò videtur maiore vi latius Adriatico Mediterraneum ab ortu in occasum incumbere, ita notabilem æstum non esse. & tamen si vera est hypothesis Carthesiana, hic deberet æstus maior contingere à vi ætheris angustati, & aquas sine terrarum interruptum obice propellentis. tanto magis, quod

quod Africana ora ad Aequatorem magis accedit, ubi cælestis materiæ gyrantis fortior est impetus. Alia adversus hoc systema aliis occurrunt, mihi ista sunt satis.

Aliter in re præsentī stauit P. Fabri tom. 3. phys. tract. 8. l. 3. à prop. 29. Supponit, Lunam esse corpus terræ simillimum, sua atmosphæra, atque aere circumfuso stipatum; utque terræ centrum est, quò omnia terrea sua gravitate nituntur, sic Lunæ est centrum, quò omnia ad Lunam pertinentia corpora collimant, aer ergo à terra ad Lunam interiectus in duas veluti oppositas classes est distributus; quarum altera Lunaris, ac cælestis, terrestris altera, & ex æsse nostra. Jam ergo dum Luna in meridiano est, ex duplicis atmosphære concursu minor est aeris moles Oceano sub Luna incumbens: ex quo fit, ut aer ad latera versùs ortum, & occasum maior, magis hinc inde premat, adeoque versùs unum, & alterum meridianum aquam attollat. Tum pergit omnia phænomena marini æstus explicare; & ita quidem, ut negari non possit, magnam esse in toto eo systemate verisimilitudinis apparentiam; & vix aliud hæcenus excogitatum, quod à legibus mechanicis æstum maris peteret, aut ingenio maiore, aut meliore exitu: & nisi pauca, sed satis manifesta, obstarent, ipsam visus esset in consilio habuisse naturam.

Primo displicet Lunaris illa atmosphæra in Lunam premens; non enim aliud gravium centrum agnosco, quod idem centrum universi non sit, aliter terra, quam in centro universi adversus Copernicum statuimus, ubi est, non per se, & vi suæ gravitatis, sed per accidens staret. Verùm de hoc alibi dictum. Displicet rursus, quod atmosphære terrestris, & Lunaris tam amplè statuuntur, ut valeant se mutuò contingere, & premere; cum tamen oppositum de terræ atmosphæra sit in su-

perioribus statutum; & idem valet de atmosphæra Lunæ, quæ cum corpus sit scilicet terrestri multò minus, ad minorem distantiam pauciores suos halitus emittat oportet.

Præter hæc accedendo ad phænomena æstus, video ab authoribus suppositum, ut certum ab experientia, æqualem esse hic intumescentiam, si vè sit Luna in hoc, si vè in opposito Meridiano. atqui in systemate P. Fabri contingere id non potest; cum enim, dum Luna est in Meridiano opposito, hic aer sit expeditus à pressione Lunæ, plus premit hanc aquam, quam aer sub Lunæ Meridiano; adeoque multò hic erit minor intumescencia:

Accedit, quod dum quærit, cur Caspium mare, & flumina, lacusque non æstuent, illud esse in causa censer, quod breviora sunt, atque adeò ab inæquali aeris pressione secundum diversas lineas attolli non possunt. affer exemplum baculi, qui faciliè curvari potest; sed non faciliè potest curvari eius segmentum. Quid autem dicet, quod sunt lacus Caspio minores, & tamen æstu commoti? Lacus est in Huronibus, novæ Franciæ in America Septentrionali populis, qui bis in die intumescit, ac detumescit. Alius in eisdem Americæ tractu est (Unctorium dicunt) superficiem habens 500. saltem exapedas mari altiore, cujus æstus ad quatuor pedum altitudinem ascendit. Utriusque meminit in præsentī author Burg. Philos.

Postremò experientia huic systemati refragatur; in ea enim necesse est, dum Luna est in nostro Meridiano, nostrum aerem multò esse leviorē, quare deberet hydrargyrus in Torricelliano experimento multò minus attolli. Rursus dum Luna est in horizonte si vè ortivo, si vè occiduo, aer esset multò gravior; adeoque hydrargyrus deberet magis attolli; quod tamen ita re ipsa non succedit. Manifestum

ſtum ergò videtur, propter aeris preſſionem æſtum non contingere.

C A P U T VI.

*Alia de æſtus cauſa proferuntur opiniones ,
 & nulla hæcenus ſufficiens inventa
 concluditur .*

CAbeus, Reſta, Maurus, Fromondus, alii-
 que Meteorologi, ut cauſam æſtus è Luna
 petant, eam ſupponunt in corpora hæc infe-
 riora præſertim humida maximè dominari,
 perque ſuum motum periodicè ea movere. au-
 gere, imminuere. non ſolùm enim plantæ,
 ſed plura etiam animalia, ut cancri, echini,
 & conchyliæ ferè omnia, creſcente Luna, cre-
 ſcunt, & ſucci pleniora evadunt: decreſcen-
 te, decreſcunt, & de ſucco priore multum
 amittunt: *Spiritus Luna*, inquit Plinius l. 2.
 cap. 99. *terras ſaturat, accedensque corpora
 implet, abſcedens inanit.* quare non in mari
 ſolùm, ſed & in aliis corporibus æſtus qui-
 dam obſervatur à Luna pendens. Rurſus hanc
 vim exercet Luna non ſolùm dum eſt in no-
 ſtro, ſed etiam in oppoſito hemiſphærio. nam
 podagrici, epileptici, aliique ægroti ſen-
 tiunt effectus punctorum Lunarium, etiam
 Luna manente ſub horizonte: ità ut, teſte Ca-
 beo, multi habeant deſcriptam in ſuo corpore
 ephemeridem Lunarem, qua ſuo malo cogno-
 ſcunt omnem Lunæ configurationem. Quid ni
 ergo dicendum, ſimili vi Lunam agere in ma-
 ris aquam, eamque modo augere, & attollere,
 modo imminuere, ac deprimere?

Verùm ſi iſta aſſeruntur, ut probent Lu-
 nam eſſe cauſam marini æſtus, otioſè aſſerun-
 tur; in hoc enim, ex ipſo æſtus huiusce te-
 more Lunam ad amuſſum ſequente, conſentiunt
 jam omnes. Si verò aſſerantur, quaſi eadem
 ſit

fit utrinque ratio, non rectè afferuntur. alia enim à mari corpora sic moventur per affluxum Lunaris humiditatis, quæ sine dubio ad nos usque propagatur. at verò eandem non esse causam marini æstus, constat ex eo, quod aliter omnia flumina, lacus, paludes similiter æstuant. cur enim Lunaris humor ad mare copiosus accedens, ac recedens, lacus prætereat, & aquas reliquas, quæ non æstuant?

Pergunt laudati authores, & primò aiunt, intumescantiam non fieri per rarefactionem, nec detumescantiam per condensationem aquæ; aliter aqua intumescens esset levior, & detumescens gravior, & quidem sensibilibiter, ubi magni sunt æstus: adeòque deberent naves altius demergi in aqua crescente, minus altè in decrescente; quemadmodum altius demerguntur in fluviali, quàm in marina. hoc autem à nemine observatum est. Accedit, quod raritas, & densitas caloris, & frigoris sunt effectus. atqui nihil ad æstum eiusmodi qualitates.

Hinc inferunt prætereà, Lunam non efficere æstum per calorem, & lumen; nam istæ qualitates non possunt augere, ac minuere molem, nisi raritate, ac densitate, quam inferunt. & prætereà æstus Solem potius, quàm Lunam sequeretur; Sol enim his viribus efficacius pollet. demum Luna causat hic æstum etiam, dum est in opposito Meridiano; unde calorem, & lumen huc non derivat.

Recurrunt propterea ad occultam Lunæ virtutem, & influentiam, cuius propagationi solidum terræ corpus non obstat, quemadmodum solidum licet vitrum diffusionem lucis non impedit. & huc referunt, quod Luna ab opposito etiam Meridiano intumescantiam creat. Sed fortasse probabilius dixissent, si hoc reduxissent ad vim impetus in priore motu concepti, ut contingit in pendulo, in quo secunda etiam vibratio licet minor, non multum

tum tamen concedit primæ. Et hoc ap-
tius, quam Fromondi Antiscelenem ineptè
comminisci.

Sed ulterius inquirendum restat, quid occul-
ta vis ista præstet in mari, ut æstuet. P. Mau-
rus ait, per eam roborari vim aquæ attracti-
væ humiditatis extraneæ ex fundo, vel aere:
quam deinde humiditatem, debilitata virtute
attrahendi, fundus, & aer resorbent. Sed
primò Luna videtur habere vim humiditatis
diffusivam potius, quam tractivam; aliter ad
se eam traheret, & aerem exsiccaret quare non
potest talem vim mari communicare. 2. hinc
fieret, ut tempore intumescentiæ aer siccissi-
mus esse deberet: quod experimentis non res-
pondet. 3. maior est aeris humiditas in bru-
ma, quàm in æquinoctio; & tamen in æqui-
noctio maior, quàm in bruma æstus. 4. non
effert, cur eadem vis lacubus etiam non com-
municaretur. neque dicas, communicari,
sed non intumescere ex defectu humoris at-
trahibilis. nam contrà est; quia lacuum fun-
dus est plerumque limosus, & mixto humore
oppletus: aer etiam suprà eosdem est valdè
vaporosus. non ergo deest, quæ attrahatur,
humiditas.

P. Cabeus post Fromondum censet, virtu-
tem illam Lunæ commovere è maris fundo, ac
rarefacere quosdam spiritus salnitrales ac sul-
fureos, non illos quidem vulgares, sed alterius
generis, quamvis illos æmulentur. tales spiri-
tus rarefacti, & cum aqua dumtaxat fundo
proxima permixti, aquam ipsam, densita-
tem eandem in summa parte retinentem, at-
tollunt: densati, aquam descendere permit-
tunt. talis raritas spirituum non est à calore,
sed à virtute illa Lunæ, qui cum habent spe-
cialem convenientiam, eoque ferme pacto,
quo fit in musto exattenuatione spirituum in-
tumescentia.

Sed primò vis ista occulta rarefactiva Lunæ à calore distincta inducitur sine exemplo : quod enim dicitur de vi Lunæ commotiva catarrhi, nihil habet simile ; quia non à rarefactione, sed ab humectatione potius, ac frigore catarrhus existit. nec est par, quod additur de musto, in quo spiritus à nativo calore concitantur, ac fervent. Præterea spiritus illi non sunt halituales, non bituminosi, non vitriolarii, aut ex sale quovis educti, nam primò sunt læus his omnibus, aut singulis abundantes, qui æstum non patiuntur. Ad hæc, ut optime arguit P. Fabri, si ex his singula, aut simul omnia aquæ infundas, & Lunæ exponas, æstus in ea vestigium nullum deprehendes, quod si mavis nullos ex notis, numeratisque spiritibus æstui sufficere, certè ignoti illi alicubi sunt ; sunt autem, ut ais, in maris fundo. sumatur ergo inde aqua arenæ, lutovè permixta, ac Lunæ radio subiiciatur, quod si æstus in ea experieris, tunc equidem dicentè credam. interim finas me de hac re dubium omninò esse ; ac tandem aliquandò concludere, æstus marini causam hætenus in naturæ adytis ità involutam, ut nemini contigerit inde eam extrahere, & in bono lumine collocare.

C A P U T VII.

An, & quopasso Mare fontium, ac fluminum sit origo.

MARE esse fontium omnium, ac fluminum originem (mediatam, an immediatam, non moror) communis, & certa sententia est, quam Scriptura etiam firmat infallibili suffragio ; nam Eccl. i. dicitur : *Omnia flumina intrans in mare, & mare non redundat. ad locum, unde exeunt, flumina revertuntur, ut iterum fluant.* Difficultas est, ut explicetur, qua

ratione maris aqua ad fontes ascendat, ut inde per declivia dilabatur in flumina, & iterum in mare redeat. Accuratum de hac re librum edidit P. Gaspar Schottus, cui titulus, *Anatomia Physico Hydrostatica*: ubi varias authorum sententias diligenter expendit, & suam postremò apponit. Quantum autem ego viderim, si paucos excipias, vix est, qui non aliquid probabile in rem istam contulerit: sed nemo est tamen, qui unicam universalem causam invenerit omnibus pariter accommodatam. Itaque censuerim, non unam omnium, sed multiplicem esse causam: quas omnes si explicem, data erit sufficiens fontium, ac fluminum fcatu-rigo.

Principiò certum videtur, fontes aliquos, & flumina è pluviis, ac nivibus solutis oriri. Id quidem optime explicat toties citatus Burg. Phil. Authorex nuperrimo Philosopho, quem non nominat. Hic autem censet, solas pluvias aquas, quamvis detur, has non ultra duos pedes terram subire, sufficere ad magna flumina generanda, imò & multum superesse, quod in subterranea se recipiat, & in vapores abeat: quod probat, inito calculo aquarum Sequanæ ex una parte, & pluviarum, quæ possunt in Sequanam influere, ex altera. Nec verò solum torrentes, sed & perepnes fluvii ex his possunt originem habere. Nam & nives longiore sufficiunt sensim materiem; & aquæ ipsæ per terræ primam crustam, ubi declivis est, dilabentes per stillicidia in certa conceptacula se insinuant, unde rivuli emanant, qui juncti in fluvium coeunt.

Secundò satis est probabile, fontes, fluviosque non paucos oriri ab ipsa maris aqua per subterraneos meatus, & canales vi nativæ gravitatis injecta. Et ubi quidem fontes superficiem habent in eadem altitudine, & distantia à centro cum maris superficies, res est in-
rei.

rellektu perfacilis; neque obstat, nisi falsedo
sola, quæ in fontibus nulla plerumque est; quia
deponitur in transitu per terram arenosam,
argillosam, aut aliam, cui sal sensim adhæret,
dum aqua dilabitur. Quod si fontium superfi-
cies sit altior mari, valdè probabilis est ratio,
quàm affert ex Cæbeo Maurus. tria supponit.
1. aquas maris per rimas, aliasque cavitates
in terræ viscera se penetrare. 2. terræ viscera
interno calore ab ignibus subterraneis æstua-
re. 3. in pluribus locis præsertim montosis
esse spatia, & veluti concamerationes saxo-
rum. Hispositis, ait; aquam è mari ad mon-
tium viscera derivatam elevari in vaporem,
qui in superiores concamerationes, & suapte
natura, & impositis nivibus frigidas, impin-
gens, iterum in aquam transit, ac defluit. Res
est aperta in alembico, ad cuius analogiam om-
nia fontium phænomena authores isti compo-
nunt, & explicant. Perinde est autem ad hanc
sententiam, si vè aquæ per vim stillatoriam
exilientes, è mari deriventur, si vè potius ex
Abyssò, qualem veteres non pauci ex *Ægyptio*,
rum doctrina intra terræ viscera statuebant;
ex eaque non fluminum modò, sed maris ipsius
originem repetebant.

Tertiò probabile etiam est, aliquos fontes
oriri ex aere ipso, non quocumque, sed mul-
tum vaporoso in montium cavernis incluso,
& frigoris vi in aquam converso; quæ fuit
Aristotelis sententia. Et quidem, quod vapi-
dus aer per frigus in humorem abeat, ut cætera
omittam, satis probat humor ille, qui hiber-
nis frigidissimis noctibus fenestram vitris
ex interiori parte (nam ab exteriori ventus
abradit) plurimus adhæret. Id ipsum aliis expe-
rimentis confirmat cit. P. Schottus l. 2. c. 1. præ-
sertim, quod multa sunt patentia in mon-
tium jugis antra, quorum fornex guttis per-
petim decidentibus mader, nec aliam his prom-
ptiq;

ptiorem causam habes, quam tradas, nisi vaporem. Porro nihil facilius, quam quod humor ille ex vapore concretus, rivos primum, tum per hos concurrentes flumina efficiat.

Quartò potest ad fontes mari altiores aqua ipsa maris exsurgere per subterraneos canales vi marini æstus, ac tempestatum. quamvis enim certum sit, aquam nunquam altius ascendere, quam sit principii, unde fluit, altitudo: id tamen verum in quiete; nam in motu quamvis violento impetus concipitur, quo corpus ultra debitum finem effertur. quare potest aqua pelagi concussione agitata, eo altius pergere, & tum effundi, ità ut materia fontibus; fluminibusque quibusdam gignendis sufficiens adunetur.

Quintò contingere non minus potest, aquam à mari in telluris penetralia insinuatam inter ram incidere spongiosam, & aridam, à qua sursum attrahatur. hoc autem fieri posse, satis ostendit Magnano experimentum; spongiam enim prius madefactam, deinde expressam, filo appendens ità, ut ima sui parte aquam tangat, paulatim madescere deprehendit, ascendente aqua è vase, totamque perfundente, atque implente. Attracta autem ad aliquod spatium aqua, potest rimas, meatusque declives reperire, aut ab alia simili terra ad latus posita exugì, atque in fontem, flumenque erumpere.

Mitto alios ab aliis inventos improbabilis modos creandi fontes. cum rerum natura, & legibus hydrostaticis pugnantes, quos videre est latè relatos; & reiectos à citato P. Schotto.

Censeo tamen cum eodem, hætenus tot inventis non traditam viam fontium, ac fluminum omnium generationi sufficientem. quidam enim sunt fontes, qui ad nullam ex iam relatis causam reduci commodè possunt. In
pri.

primis certissimum videtur, non omnes oriri ex pluvialibus aquis. nam multi sunt in altissimis montium jugis, ut in Ceniso lacus, quò nullus est pluviarum confluxus, quò nullum prope habeat locum altius assurgentem. alii nascuntur è rupibus, quas pluviae penetrare non possunt. tales videntur in Peruvia, & alibi. alii marinum æstum imitantur. ut mox iterum dicam: quod argumento est, eos immediate ab Oceano derivari. Præter hæc flumina è suis fontibus ante omnem pluviam dimanasse, testatur Sacra Historia Gen. 2.

Sed neque alter modus derivandi fontes è mari, aut aliis subterraneis aquis per alembicum sufficiens est. nam primò lacus in Cenisi Montis planitie constitutus nullas habet cavitates, & concamerationes, ex quarum distillatione oriatur. 2. incredibile videtur, tantam aquarum molem, quanta in fluminibus toto orbe, sed præsertim in Americaprehenditur, ex unis stillicidiis proficisci. Ex quibus patet à fortiori insufficiencia tertie sententiae.

Quarta per se apparet non ad omnes fontes pertinere. Utcumque enim concedatur assuetus aquarum ex impetu; is certè ad tantam altitudinem assurgere non potest, quantam esse in fontibus quibusdam testantur Authores. Lacus ille in Cenisi jugo stagnans hoc certè modo nasci nequit. quia non apparet, unde eò aqua decurrat; quod si ex imo rectè ascenderet, deprehenderetur aquæ subsilientis reciprocatio.

Ex modò dictis reiiicitur pariter, ut insufficiens quinta sententia, quam probat Magnus. primò enim redit, flumina cum Mundo nata, non potuisse hoc pacto nasci. 2. quia in hac ratione requiritur declivitas, & defluxus. nihil autem tale in lacu Cenisi, & aliis, præser-

tertium in Maiz Insulæ propè Scotiam altissimo scopulo. 3. qui fontes in Montanis Cebreti sunt, & in Conschia Hiberniæ regione in Montis excelsi vertice, æstuant perinde ut mare, adeoque cum eo immediatè per apertiores tubos, canalesq; communicant; & non per solam arentis soli suctionem. Huc facit lacus *Unctorius*, de quo dictum cap. 5. qui quidem & ipse reciprocatur, estque maris littore altior quingentas saltem exapedas: nec est à flumine ullo derivatus, sed est potiùs fluminis scaturigo.

Hæc omnia mihi reddunt valdè probabilem eiusdem P. Schotti sententiam, quam gravissimi Theologi, ac Patres non pauci apud ipsum docent, & Stoici omnes apud Lipsium, aquam scilicet maris, licet propè littora sit terræ æqualis, aut depressior, in alto tamen, medii saltem Oceani, altiore esse, & montium fastigia æquare. Hoc si verum sit, expedita est ratio fontes è pelago derivandi, ut omnes facillè concedent. Ità porro esse, videtur non obscurè pluribus in locis insinuisse Scriptura, divinam potentiam ex eo specialiter commendans, quod mare intrà littorum terminos contineat, nec permittat, ut ulterius ad terram obruendam progrediatur. Ità enim habetur Job. 38. Jer. cap. 5. Prov. 8. & alibi. in quo Patres. præsertim Basilii, Ambrosii, Nazianzeni vim agnoscat aliquam mari illi, tam, quam Chrysostomus ità expressit, ut *aqua naturam cum divino imperio pugnantem* dixerit. extant eorum verba apud Schottum cit. l. 5. c. 10. §. 4. Atqui nisi mare in alto sit terra altius, frustrà hæc dicuntur. ergo.

Unum est, quod vulgò Philosophos ab hac sententia retrahit, nimirum altitudinem istam maiorem maris pugnare cum legibus hydrostaticis, adeoque perpetuum miraculum in natura admittendum, quo aqua contrà

insitæ gravitatis genium suspendatur. Hoc autem repugnât regulæ ab Augustino traditæ 1. 2. de Gen. ad lit. c. 1. ubi assertionem Scripturæ de aquis supra firmamentum repositis negat trahendam esse ad miraculum, & ad omnipotentiam ostensionem: *Quemadmodum*, inquit, *Deus instituerit naturas rerum, secundum Scripturas ejus nos convenit quærere, non quid in eis, vel ex eis ad miraculum potentia sua velit operari.* Hinc minus mihi probatur responsio P. Schotti dantis argumento manus, verumque in hoc miraculum concedentis; *Quia*, inquit, *Scriptura Sacra, & Sancti Patres id innuunt.*

Sed non est opus ad verum miraculum in re ista recurrere, quamvis admittam mirabilem divinæ potentie operationem propter naturalem causam nobis ignotam: neque verò id satis ad miraculum, aliter æstus quoque maris, cujus causa nondum perspectam superiori cap. probavi, miraculum foret. Quamvis autem nota non sit nobis causa suspensionis Oceani, est tamen nota exigentia naturæ saltem universalis, cui maxime convenit aquarum illa suspensio, ut circulent scilicet per fontes, ac flumina, terramque ubique irrigent, ac fecundent. Sic Cæli motum circularem naturalem dicimus, quamvis ejus particulari naturæ violentum; quia scilicet ab universo exigitur: quid ni ergo pariter specialis Intelligentia aquas perpetuò elevet, ut Cælum perpetuò movet? aut si id minus placet, cur dici non potest, virtutem eam occultam, quæ æstum creat, in alto ita regnare, ut aquarum tumorem perennem efficiat, & conserve, nec nisi de eo paululum identidem remittat? Alia sunt, quæ opponi possunt, quæ tamen optimè soluta habes apud Schoxtum laudatum.

Q U Æ S T I O Q U I N T A

De Fossilibus.

IN duplici sunt classe Fossilia juxta Aristotelem, metallica scilicet, & non metallica. primi generis sunt corpora, quæ igni admota liquefcunt, ac fluunt. secundi generis sunt, quæ non liquefcunt, ut lapides. Alii melius, ac distinctius ita dividunt, ut primò Fossilia in tria genera partiantur. primum varias terras continet: alterum succos, seu pingues, & inflammabiles, ut sulfur, & bitumen, seu aridos, ut sales: tertium mineralia, quæ rursus trifariam distribuunt, in lapides metalla, & metallica, quæ scilicet specialiter mineralia appellantur, suntque media inter lapides, & metalla. Alii demum cum Avicenna quatuor faciunt fossilium genera, sales scilicet, sulfura, lapides, & metalla. De his omnibus pro dignitate tractare longissimum foret; & multa in his sunt à nostro instituto aliena. Satis erit præcipua quædam excerpere, quæ discussione potissimum indigent.

C A P U T I.

De generatione Fossilium in universum.

Philosophus 3. Meteor. brevissimè de fossilibus disputat, eorumque generationem ita exponit. Censet primò duplicem etiam halitum, siccum, & humidum, esse materiam universalem, quæ in fossilia concrescit. 2. in iis, quæ liquantur, & fluunt, prævalere halitum humidum: in iis, quæ non liquantur, sed accendantur solùm, & evaporant, præponderare halitum siccum. 3. dum aridus spiritus terreæ, densæque materiæ adhæret, illam.

que

que intimè penetrat, ac suo calore exsiccet, adurit, & colorat, generat fossilia non metallica, ut sunt minium, alumen, sulfur, &c. 4. si idem spiritus materiam non adurit, sed solum exprimit humidum superfluum, subtile autem perfectè incorporat cum partibus siccis, generat lapides. 5. si halitus humidus vi caloris ascendens lapidibus adhærescat, ita ut in iis per modum pruinæ concreascet, proximam præstat metallis materiam; cui si accedat frigidæ actio continuata, & minera novam semper materiem suppeditet, crescit semper, ac densatur, donec in Metallum formetur. 6. ex metallis alia sunt faciliùs liquabilia, ut plumbum, & stannum: alia faciliùs ductibilia, ut aurum, quod in bracteas subtilissimas tenuatur. Prima sunt, quæ humido abundant: posteriora, quæ humidum habent mediocriter sicco attemperatum. 7. ex iisdem alia sunt puriora, quæ dum igniuntur: minimum, aut nihil deperdunt, quòd scilicet partibus excrementitiis carent, quæ ignis actione fecernantur. alia sunt minus pura, quod excrementis redundant, quæ in igne deponunt. Hinc aurum est omnium fossilium maxime perfectum, ac purum, quod nihil sui per ignem amittat. idem est densissimum, ac gravissimum propter perfectam humidi cum sicco mitionem. Ita ex Philosopho fossilium generationem exequitur P. Maurus l. 4. q. 75.

Hæc quidem non malè sunt excogitata, si unam inde petas fossilium materiem, quod verò attinet ad efficientem causam, quæ tota in calorem, & frigus reducitur, nullatenus placet: quantumvis addatur, qualitates istas agere, ut instrumenta cælestium universalium causarum. Nam primò si omnia fossilia his unis causis existerent, cum hæc ubilibet præstò sint, omnia omnibus in locis fossilia essent. 2. quia ut in viventibus semen est non solis primis qua-

litatibus, sed propria cuiusque virtute activum, ut suo loco dictum est: ita nemo prohibet, quò minus in reliquis mixtis perfectis, ut specialem formam, ita & specialem virtutem generativam agnoscamus; cum eadem in utrisque sit ratio, nec disparitas perfectionis possit facere eam differentiam, ut in uno sit virtus propria non in alio, sed solum ut in uno sit maior, in alio minor. Hanc porro virtutem in peculiaribus cujusque spiritibus reside-
re, eosque à Deo in prima rerum creatione elementis inditos, atque inspiratos, tanquam prima rerum semina, non improbabili-
tatur Cabeus ex Anselm. Boet. in egregio libello, quem laudat, de natura lapidum, & gemmarum. Itaque pro fossilium varia natura diversi sunt spiritus seminales eorum generationis ministri. alius ergo est spiritus bituminosus, alius lapideus, alius metallicus, &c. qui ubi materiam inveniunt aptam, & in sufficienti copia concurrunt, in ea suam formam imprimunt, ac fossile producant. Hinc est metallicorum fortasse generatio, quæ sunt in fossilibus veluti in viventibus, quæ tertiæ speciei dicuntur; coalescere enim videntur ex concursu heterogeneorum spirituum, nullo vincente. quare effectus in aliam speciem de-
generat.

Non negaverim, huic virtuti servilem operam exhibere calorem, & frigus; sed calorem præsertim in metallis halitus elevantem, & sublimantem, miscentemque ramenta primò generata: frigus verò in lapidibus, quos crescere videmus, ubi nullus, aut valde modicus est calor. Hinc lapides ubique, metalla nonnisi in montibus producantur; ad sublimationem enim halituum officinæ altitudo est necessaria.

Suam porro esse fossilibus substantialem formam stricta generatione acceptam, satis
con-

constat ex fusè disputatis initio tomî superioris; quæ quidem ex modo dictis lubet ita paucis confirmare. Speciali virtuti specialis respondet natura; nam siue virtus substantia sit, siue accidens, ex utrovis idem sequitur. Siquidem si est substantia, diversa virtus est evidenter diversa substantia: si accidens; quis nescit, à proprietatibus distingui essentias; nec posse unum esse uni speciale, non alteri, quin unum ab altero specie secernatur? Jam cuique fossili sua virtus generativa est; aliter si omnia elementis tribuantur, quodlibet fossile erit ubilibet, ut jam dixi. ergo cuique fossili sua est specialis natura, proindeque specialis forma. Rursus hæc non est mera mistio elementorum; cum enim mistio fiat satis per calorem, & frigus, recurreret, quod virtus generativa fossilium in his unis qualitatibus resideret.

C A P U T II.

Præcipua quadam Fossilia exponuntur.

S Equar in præsentî Avicennæ divisionem, & pauca exhibebo de salibus primò, tum de sulfuribus, tertio de lapidibus. quartò de metallis.

In quovis sale terra denominatur, ut probat pondus. aliquid tamen humoris admiscet: ex quo facile in aquam resolvitur, & fluit. Dividitur in fixum, & volatilem: ille est, qui à calore non attenuatur, ita ut rare scat & evolet: hic vero ab ignis actione in sublime agitur. crediderim istos specie non distingui, sed volatilem esse fixi portionem tenuissimam ab igne divulsam, & tenuitate ipsa facile mobilem, proindeq; in altum ab igneo spiritu educibilem. Species porro salium multa. 1. Sal cõmunis, qui vel è propria fodina, vel è salis aquis extrahitur. Innumeri ejus usus in vita, corruptione carnibus inspersus prohibet

non quod aciculis suis carniū partes affuat, atque ita contineat, ne dilabantur (quod quidam dixit, præfationemque meritò apposuit, testatus, non-jocari se, sed seriò agere) sed quia de more aridorum bibulus est, humoremque ad se trahens, qui propterea ab aere facile exugitur, corpus exiccat; atque ita à corruptione eximit, quæ in humido regnat. 2. Sal ammoniacus ex communi sale, ut quidam censent, & volatili nitro constans: cui accedit sal gemmæ constans ex sale communi, & nitro fixo. 3. Nitrum, seu sal petræ, sal nitrum, & halinitrum; hæc enim omnia pro eodem nunc habeantur. hoc multo igne constat, & propterea faciliè accenditur. includit tamen aliquid humoris, quia in flatus abit: ex quo capite melius dixerim, aeris compressi multum admiscere. Inter sales & hoc numeratur, quia in humorem liquescit; quamvis non desint, qui fulguris spumam ipsum credant, & propterea albescere: quasi verò quidquid albescit, spumosum illico sit. Facandum porro est nitrum: ex quo uberes sunt nitrosæ terræ. 4. Vitriolum, seu Chalchantum, quod multi censent metallorum, æris præsertim, excrementum; & Alumen vitriolo affine, quod excrementum putant argenti, utrumque astringente virtute pollet; ac propterea frigus videntur habere in prædominio.

Sulfur terræ adipem nonnulli appellant, igneum certè est, oleosum, ac viscidum. hinc faciliè accenditur, & adhæret: atque adeò vix alia parabilior est igni materies, proinde quæ loca ignibus subterraneis scæant, eadem sulfure abundant. Crediderim illud esse bituminis veluti florem, qui caloris vi ab eo sursum educitur; & hinc perperno suæ crescere in agro Pateolano; unde quamvis plurimum quotannis ab ipsa terræ superficie eradatur, semper tamen aliud renascitur. Bituminis por-

ro, quoad sulfuris naturam maximè accedit, genera varia: aliud liquidum, & lentum: aliud concretum, & solidum: illud tamen in hoc transit seu caloris, seu frigoris vi; calor enim nimium humidam per evaporationem educit: frigus per constipationem exprimit. Inter bitumina specialem mentionem meretur Naphta, tantæ cum igne cognationis, ut eum non longè positum ad se trahere dicatur; non quod re ipsa trahat, sed quia inflammabilem halitum emittit, per quem ignis ad naphtam pergit, perinde ut per fumum crassorem lucernæ recens extinctæ descendit ad ellychnium flamma. Insigniora sunt in re medica succinum, & ambra, de quorum ortu dubio varia ab authoribus referuntur. Verosimilius, illud pinguem terræ succum bituminis more concretum, sed puriorem, ac pelluentem; hæc fungi instar in maris fundo nasci, convulsamque ad littus eiici, nec desunt, qui eam piscium excrementum, perinde ut molchum quadrupedis cognominis, asseverent.

Lapides mixta sunt perfecta, ac dura, quæ tamen nec liquari, nec accendi, nec duci malleo in laminas possunt. ex humido terræ permixto generari aperta docet experientia; cui tamen lapideus inest spiritus, veluti coagulum; neque enim ex omni humore utcumque terreo lapis existit. Fortasse spiritus ille salinus est, si est verum, quod asserunt, materiam, sale penitus exhausto, non unquam lapidescere. At verò qui succus in pretiosos lapillos, seu gemmas coalescit, defæciatior est, & diligentius præparatur. Ex his crystallus non ex glacie, ut vulgò creditur (nam & generatur sub zona etiam torrida, ubi nullum gelu, & ignem excutit à filice percussa, & gravissima est: per quæ satis à glacie omni secernitur) sed perinde ut aliæ gemmæ à proprio halitu, spirituque plastica virtute prædita ab hoc hexagonam

figuram accipit: quare à nonnullis inter lythophyta numeratur. Sunt autem lythophyta media inter plantas, & lapides corpora, perinde ut mediant zoophyta inter plantas, & animalia videnturque ab intrinseco, perque introsusceptionem nutriri. Sic est corallium: sic glosso-petra &c.

Metalla demum mixta perfecta item sunt, & si in statu naturali sint, etiam solida; calore tamen liquantur, & malleo ducuntur. De horum generatione multa, & mira Chymistæ: advocant in eam vel parentes, marem, & feminam. fortassè maris nomine vim seminalem intelligunt: feminæ elementa, quæ vi illa prægnantia, metallum generant. Concre-sunt primò in exilia ramenta, ac veluti filamina, quæ sunt totius operis fundamen potius, quàm rudimentum. In hæc dum incidunt aquæ præterlabentes, nonnihil eradunt, & auferunt: ex quo quibusdam esse fluminibus aureæ feruntur arenæ. Genera metallorum septem vulgò recensentur, aurum, argentum, hydrargyrum, æs, ferrum, stannum, plumbum. Ad quinque ea redire maluit P. Fabri; excluso .n. hydrargyro, seu mercurio, qui propter fluiditatem metalli nomen non meretur. estque juxta Chymicos plerosque una cum sulfure proxima auri materia; reliquæ ita distribuit, ut extrema sint ferrum, & plumbum: illud durissimum, in quo ignis, hoc mollissimum, in quo humor dominatur. ferrum ad chalybem, plumbum ad stannum reducit, ut imperfectum ad perfectum. sequuntur duæ aliæ species, æs, & argentum, sub quibus etiam latitudo non parva perfectionis reperitur. Aurum quinta est species, quæ medium, utpotè perfectissima, locum tenet. Est & aliis suspicio, metalla non rigorosa specie inter se differre, sed intra eandem atomam omnia esse, plusque & minus perfectionis sub ea obtinere. quod certè si ve.

si verum est, perit omnis rerum specifica differentia, major certè, & minor perfectio, dum non est numeralis, ac merè quantitativa, facit rerum secundùm speciem rigorosam discrimen.

Ad metalla reducuntur metallica, quæ vulgò mineralia dicuntur. 1. est Stibium, seu Antimonium, quod & durum, & liquabile, non tamen est ductile: & hoc de lapide habet. ejus in arte medica celebris usus, sed inter Chymistas, Galenicosque controversus. 2. Pyrites, Arabibus, & vulgò Marcafita, lapis est metallicus, sed maximè sulfureus, ut odor ostendit, excussusque per chalybis incussionem ignis, conflat ex succo lapidescente, cui nonnihil metallici halitus commiscetur. 3. Magnes inter metallica celeberrimus est, habetque in se ferri, ac lapidis permixtas partes, quæ summi caloris vi mutuo separantur. Sed præter has suas habet proprias, quibus vis illa mirabilis inest; de qua infra. Sunt & alia metallica, ut Auripigmentum, Chrysocola, Sandaracca, Lythargyrus, &c.

Superest, ut duas quæstiones quam potero brevissimè, decidam. prima pertinet præcipuè ad bitumina, estque de vi eorum electrica, quæ in quibusdam etiam lapidibus reperitur. altera spectat ad lapides, seu veriùs ad metallica, estque de vi magnetica.

C A P U T III.

De vi Electrica.

Multa sunt, quæ virtute aliorum corporum tractiva pollent, sed præcipuè succinum, quod & electrum, ex quo virtuti nomen, imò & corporibus omnibus eam participantibus, quæ & ipsa dicuntur electrica, Ejusmodi est non unum, vel alterum corpus, sed innumera; nam præter succinum, quod primas

veluti obtinet, & alia corpora bituminosa, duriora, ut possint lævigatam habere superficiem, pleræque etiam gemmæ, adamas, saphirus, amethystus, crystallus, varum, &c. vim istam trahendi habent. Rursus corpora tracta multiplicis & ipsa sunt generis, imò & omnis ferè generis corpora, modo exigua sint, ut à tenui vi dimoveri possint, nec sint nimis calida, aut inflammata. itaque non paleæ solum, & festucæ, sed etiam charta, lignum, metallum, humores quoque omnes, aqua, oleum, &c. ab electo rapiuntur.

Hinc primum apparet, vim electricam nullius certi corporis affectionem esse propriam, perinde ut vim magneticam, quæ propterea ubi invenit capax subjectum, in illud se effundit, ut mox dicam: sed vis electrica non transit à corpore ad corpus; neque enim palea à contactu succini evadit electrica, ut evadit magneticum ferrum à contactu magnetis.

Apparet secundo, vim istam in speciali corporum trahentium, ac tractorum cognatione, ac sympathia non consistere. Non enim in tractis corporibus spectatur natura, sed ariditas, & levitas. Rursus quæ affinitas concipi potest inter corpora tam diversorum generum, & naturarum? Ut ergo quia vis tractiva machinarum ad omnia pondera se extendit, nemo eam somniet in sympathia reponendam; ita proflux nec vin electricam.

Itaque id primum censeo, vim istam sine halituum è corpore electrico emissorum copia non consistere. Id multa probant. 1. quia electrum non exerit vim tractivam, nisi modico calore, & frictione excitetur: frictio quidem necessaria est, ut pori à pulvere extraneo tergantur, atque ita apertiores sint; calor autem, ut in halitum pars corporis attenuetur, & expiret. 2. quia dum succinum præparatum tenuissimo pulveri admovetur, illum huc illuc

spar-

spargit; quod est evidens signum transpirantis halitus tanquam ventuli pulverem disiciens.

Censeo rursus, ab hoc ipso halitu fieri tractionem; neque enim recurrendum ad qualitatem occultam, ubi adest ratio manifesta, atqui halitus viscosa tenacitas est optima ratio tractionis in electricis, ut mox ostendam; ergo non est ad aliam recurrendum. quid enim, si ad occultam, & innominatam qualitatem recurras, ut ostendas qua ratione gluten corpora sibi adherentia secum trahat? Sed neque aptè ratio ista reicitur in motum vacui, quasi, aere ab halitu repulso, palea accurrat in eius locum; alibi enim dictum, nihil se movere, sed moveri potius ad vacuum implendum.

Propterea melius P. Cabeus Magnet. Philos. l. 2. cap. 21. hunc motum tribuit aeri primum rejecto, tum per gyrum redeunti, ac paleam, vel chartulam secum adducenti. reicitur tamen & ipse ab authore Burg. Philos. tum quia sic oporteret vim elasticam flammæ etiam tribuere; adde, & ventulo aperti oris calida insufflatione concitato. tum quia in machina Boyliana, aere recipientis exhausto, adhuc succino palea trahitur, & ibi tamen locus non est aeris pressionis, & circulationis. Ad hæc fieret, ut sola aeris externi pressione retinerentur paleæ succino coherentes. hoc autem est falsum; quia palea est aere gravior; cui si accedunt halitus electrici iterum exeuntes, adeoque paleam propellentes, non video, qui aerem hæc non repellat, & decidat. Rursus si paleæ jam tractæ, & adherenti aliud succinum admoveatur in sufficienti distantia, deberet tunc saltem, si recta esset hæc ratio, palea suo pondere decideret; quod tamen non ita succedere, docet experientia.

Pejor est allata à Cartesio ratio. ait enim è succino attrito materiam primi elementi

fluidissimam elabi, quæ per rimulas succini oblongas transiens, in tenues fasciolas conformatur; & modico affricus calore concita evolat; sed cum similes rimulas in aere non inveniat, ad succinum reflexa redit, complexamurque paleam rapit. Verum si hoc non est, quid est quæso ad libidinem philosophari, & somnia obtrudere? Unde enim urbanissimus aer reliquis halitibus facilem locum exhibens, hos dumtaxat rusticior jam factus excludat? Profectò intelligi non potest, fasciolas halituum regredi ad succinum, nisi eas aer premat, ac repellat. sed tunc redit, quod adversus Cabeum est dictum. Postremò certum est, halitus viscosos ab electricis emitti: quod quamvis neget Cartesius, quia censet, nullas esse eiusmodi viscositates in vitro; falsus tamen est, cum constat, vitra solidiora invicem attrita tertrum, sulfureumque odorem fundere. Et quidem non aliud partium vitri ligamen aptius humido oleoso, quod ab igne illi communicatur, & incoquitur: ex quo etiam habet, ut fluat.

Probabilior modus, quo halitus viscosi electricam attractionem perficiant, est, quem affert P. Fabri, considerans halituum flamina, qualia in fumo apertè conspiciamus, tendi, dum emittuntur, ultra debitam mensuram; adeoque nativo impetu sese retrahere. perinde ut citharæ fides, quæ nimium tensæ, ac sibi deinde relictæ, in se illicò cum impetu redeunt. quia verò palea halitui ob viscositatem adheret, ab eo ad succinum trahitur. tensio halituum fit ex calore, qui ubi se ita remittit. ut non prævaleat, ad suam principium flamina illa statim regrediuntur, ex natura corporis cujusque sua raritate, vel densitate spoliati. Hinc fit, ut vehemens calor impediatur attractionem; ita enim halitus tendit, ut vel frangat, vel urat, ut redire amplius in se non possint. Fit

præterea, ubi semel rediere possint, & debeant iterum egredi, cum perseveret idem in corpore calor, qui semper est ibi maior, quam in aere circumstante, propter sulfuream materiam, quæ & citius concipit, & diutius retinet caliditatem. Ex quo est, ut halitus à corpore graviore repulsi, iterum apti fiant, ad leviora rapienda.

Sed difficultas hinc est, quo pacto retentio succedat; si enim halitus alternant, cur corpus semel raptum iterum non reiciunt? Verum si consideretur natura filaminis viscosi, apparebit illicò, dum corpus ad succinum est adductum, implicari eidem se toto usque ad radicem in succino implantatam, ac propterea non posse amplius ab eo se expedire, illudque repellere.

C A P U T . IV.

De vi Magnetica.

DUæ sunt Magnetis vires, in quibus tota eius mirabilis natura impenditur. aliz sunt attractivæ, quibus & ferrum ad se, & alium Magnetem trahit: aliz sunt directivæ, quibus se ita disponit, dum pendet in aere, vel aqua in cymbula innatat, ut altera sui parte Boream, altera Austrum spectet. De utrisque seorsim agendum, brevissimè tamen, & quantum satis est, ut eius virtutis natura utcumque teneatur. Latius enim eas versare, non capitis est unius, sed voluminis: quæ hæc edidit Peregrinus, Gilbertus, Cabeus, Fabri, Leotaudus, alique non pauci.

§. I.

*In quo sita sit Magnetis tractiva
Virtus;*

Differentias tractionum magneticæ, & electricæ multas numerat Cabeus 1. cit. Primo enim est discrimen in multitudine corporum trahentium electricè; cum tamen vis magnetica uni determinato corpori insit. 2. vis electrica non communicatur alteri per contactum; ut ferro communicatur magnetica vis à contactu magnetis. 3. est discrimen in corporibus tractis; electricè enim vix est corpus leve, quod non trahatur; magneticè solum ferrum, & magnes. 4. ut magnes trahat, non requirit præparationem per tersionem, & calefactionem; quam tamen petit electrum. 5. electrica prohibentur à tractione cuiuscunque corporis, vel tenuissimi interiecti: non sic magnetica. 6. electrica trahunt indiscriminatim per quamlibet sui partem; nec ulla est pars, quæ repellat. Magnes trahit ità magnetem, ut facies borealis unius trahat australem alterius; borealem verò non trahat, sed rejiciat.

Primum igitur censeo, vim tractivam magnetis non esse ab extrinseco, sed ab intrinseco. Hoc dictum pugnantius habet Recentiores non paucos, præsertim eos, qui cum Cartesio causam tractionis referunt in particulas striatas ab uno terræ polo in alium fluentes, pro striatis particulis alii ramosas substituunt, ut ex una parte ingredi possint, non item ex alia.

Imaginatio Cartesii in hac re ità procedit. Censet, striatas particulas, primi sui elementi partes, perpetuò alias ab Austro, alias ab Aquilone opposito modo intortas pergere.
quod

quod si istae in magnetem incidant, in quo
meatus aptissimos, rectosque inveniunt, celer-
rimè per eos fluunt. Jam tractio ferri ita con-
tingit. evolant è magnete ad ferrum striatae
partes, aeremque medium propellunt. aer
propulsus ad ferri tergum confugit, illudque
versus magnetem premit. quod si petas, cur
non ex eadem ratione alia corpora trahit; re-
spondet, in causa esse, quod alia non habent
meatus aptos ad striatas atomos transmitten-
das, quae proinde pugnant à fronte adversus
aerem impellentem à tergo, motumque im-
pediunt.

Sed primò non datur in hac sententia ratio
retentionis; quae sanè in meram aeris pressio-
nem reduci non potest, ut reducitur in mar-
moribus laevigatis; aliter nulla vi posset fieri
divulsio: qua tamen non magna in presenti est
opus. 2. experientia docet, non citiùs magne-
tem à magnete, quam ferrum trahi. at si vera
sit haec hypothesis, multò citiùs magnes, quàm
ferrum trahetur. nam magnes habet poros ad
transmissionem striatarum partium omnino
expeditos: non ita ferrum; aliter magnes es-
set. debent ergo ferri rimae expediri: quod
tèpore opus habet. interea verò dum expediun-
tur, nulla esse poterit tractio, vim aeris à ter-
go retundentibus à fronte striatis particulis.
tertio vel inter striatas atomos ad ferrum à ma-
gnete per rectam lineam commeantes, mediat
aer, vel non. si secundum, dabitur inter eas
vacuum; neque enim illae exeuntes à poris
possunt immediatae esse, & totum spatium im-
plere. si primum; tractio nulla sequetur,
tantundem enim urget ex una parte aer modi-
cus, quantum ex altera magnus. si sunt aequa-
lis inter se densitatis, & gravitatis in specie.
Sic in syphone habente crura inaequaliter am-
pla, maior aquae copia ex una parte sese aequi-
librat cum minore ex alia. Sic tantundem
me.

mercurius in fistula suspenditur, sive maior, sive minor sit in subiecta pelvi mercurii superficies, adeoque sive maior, sive minor aeris columna insitit. ad pressionem igitur nihil facit inæqualitas molis, sed solum gravitatis. Hoc totum manifestius est, si tractio magnetica fiat non in aere, sed in aqua, in qua repulsio aquæ mediz, & affluxus à tergo sensibilis esset. Alia adversus hanc sententiam vide apud Magnanum Phil. Nat. c. 14. prop. 34. alia tibi occurrent.

Censeo iterum, vim magnetis tractivam non esse à corpusculorum effluvio. Nam primò nulla sit eiusmodi emissio citrà calorem, ut probat universalis inductio. at magnes trahit etiam in summo frigore, nec tunc minus, quàm in summo calore. Deinde explicabile non est, qua ratione atomi è magnete dilapsæ ferrum arripiant, & ad magnetem trahant. Utcumque enim ex cum Gassendo fingantur uncinatz, quæ in ferri poris implicatz, istum per modum catenæ rapiant, magnetique jungant; regressus tamen ille causam non habet, quandoquidem effluviū istud eiusdem est naturæ cum magnete, ut constat. si ergo vi magnetis, adeoque sua antrorsum pergat, quæ deinde vi retrorsum agitur? an eidem corpori oppositi motus suoptè ingenio contingant? an repelluntur ab aere, cui nullam eiusmodi vim inesse modò ostensum est? an vitam, & cognitionem habet magnes, ut, ubi ferrum suis effluviis contigerit, eadem, perinde ut limax cornua, actutum retrahat?

Reiicitur pariter commentum, ceteroqui valdè ingeniosum, P. Fabri, imaginantis aciculas quasdam magneticas passim per aerem vagantes, in quibus & sui sint poli, ut in magnete, & habeant à natura, ut ad se invicem accedant. Jam verò ubi eiusmodi acus multæ à magnete ad ferrum migrant, ex insita vi se attrahunt.

trahunt ita, ut una repat supra superficiem alterius, hoc autem ideo præstant, ut ex duobus centris magneticis unum efficiant, circa quod plures acus colligantur, & congerantur; hinc enim acum vis maior, & usus sensibilis. Sed primò mira statuitur in eiusmodi aciculis indoles, quæque vix fidem inveniet. Nam & hac illac prius volitantes, intra magnetis, ferrique poros veluti in suis vaginulis se reconducunt. inde rursus prodeunt veluti canes venatici; atque ubi alias similes aciculas nactæ sunt, cum præda domum se recipiunt. quid pulchrius? Illud tamen non plene intelligo, cur acus redeunt ferrum adducunt; ut enim ingressæ prius in ferrum, illud non repulere; cur idem retrahant regressæ? præsertim cum rectæ ferantur, & rigidæ, porosque nanciscantur rectâ dispositos. Sed neque intelligo, quid sit illud centrum, quod quærunt; si magnes non est magnes, nisi quia thecas præstat magneticis aciculis. quid enim, si vaginam gladii centrum constituas?

Censeo deinde vim eiusmodi tractivam non esse à terra, quæ una supponatur magnetica vi instructa. Nam primò, utrum terra sit magnes, res est non parum dubitabilis; aliud enim est, quod terræ poli sint terminus, qui respicitur à virtute magnetica: & hoc admittitur; aliud, quod terra suis polis Cæli polos respiciat, ad quos innata vi se conformet: & hoc ex pluribus negat P. Fabri. Deinde transmissio, quod terra magnus sit magnes, ut probabilius censent Gilbertus, Leotaudus, & alii passim; quibus ex parte accedit Cabeus, putans terram magnetem esse non eiusdem tamen omnino cum communi magnete rationis; adhuc negari non debet, quod magnes ipse per se, & sua natura virtute magnetica instruitur, ac polleat. Et quidem cum tractio non fiat ad terram, sed ad magnetem, in hoc etiam trahen-

hendi vim intrinsicam inesse dicendum est ; nam & experimento congruit , & ratio nulla oppositum ostendit .

Censeo demum vim magnetis tractivam esse qualitatem ab eiusdem forma substantiali manantem , & in alia subiecta productione propagabilem , perinde ut qualitates reliquas : sed ad actum trahendi reduci non posse , nisi juvetur ab alia consimili qualitate residente in corpore homogeneo , vel cognato , quæ ubi excitatur , ac roboratur , accessum perficiat . Itaque accessus magnetis , aut ferri ad magnetem est ex parte tractio , quatenus provenit à virtute magnetis trahentis , ex parte impulsio , nisiisque naturalis , quatenus provenit etiam à virtute magnetis , ac ferri tracti . Hoc totum per partes probandum est .

In primis vim istam esse magneti accidentalem , distinctamque ab eius substantia , constat , quia potest augeri , & minui , imò & omnino deperdi , manente tota magnetis substantia . non esse autem effluvia , liquet ex dictis . est ergo accidens non logicum modò , sed physicum . Rursus non satis eam esse ad tractionem , patet ; aliter aer etiam , & alia corpora similiter traherentur , & accederent , per quæ virtus magnetica propagatur . Reliqua ad vocem pertinent , & satis in suis terminis sunt . nota .

Sed cum sciamus magnetis ad magnetem non esse undequaque accessum (si enim polos magnetum boreales , aut australes , uno verbo , cognomines invicem admoveas , non se trahent , sed potius expellent) difficile videtur statuere , qua ratione eadem qualitas modò trahat , modò reiciat , adeoque contrarios effectus præstet . Dico tamen , id provenire ex situ innaturali , & violento alterius vel utriusque magnetis ; tunc enim eadem qualitas nata conciliare inter eos unionem localem , divi-
sio .

sionem potius efficit. siquidem unio tunc non juvaret magnetes; sed utrique, vel alteri noceret. cessante igitur fine, cessat motus accessio- nis, & consurgit recessus. Scio, si Atomista es, ista te risu excepturum. Sed age; si habes, me- liora profer: quæque in re occultissima, diffi- cultate prorsus careant; & eris mihi magnus Apollo. Id certè non præstant eochlæ Carte- sianæ; si enim istæ magnetem propellant, quòd in eo canales sibi aptos non inveniant; cur non similiter pellant aurum, marmor. &c. in qui- bus certè canales eiusmodi non offendunt? Quæ verò affertur ratio à P. Fabri, congruit toti magneti non minùs, quàm aciculis à se fictis; ut enim extremitas Borealis unius acus fugit Borealem alterius per accidens. quia intendit se conjungere cum extremitate Au- strali: idem possum de magnete sine absurdo opinari.

§. I I.

Satisfit argumentis adversus superiorum doctrinam.

Obiic. 1. confugere jam nos ad qualitatem occultam, consuetum scilicet ignorantie alium; adeoque revera nihil explicare.

Late respondet huic argumento Cabeus lib. 2. cap. 6. contendens debere dici non occultam, sed innominatam qualitatem; est n. in se, perinde ut reliquæ, ignota; nota, perinde ut re- liquæ, in suis effectibus. Idem fateantur oportet Atomistæ, qui sua effluvia non aliter co- gnosci asseverant.

Obiic. 2. manifestum est ab experientia, è magnete effluvia emitti. ergo in hæc relici de- bet eorum tractiva virtus. ant. prob. si duorum magnetum polos non cognomines limaturæ chalybis immergas, innumeræ velut aciculae disie-

disiectæ cuiusvis magnetes polo hærebunt . si magnetes admoveantur propius , aciculæ contrahentur . si cognomines polos admoveas , omnes aciculas veluti segetes flante vento depressas videbis . quod non aliter , quam halituum impulsione fit .

Resp. primum contingere ex roboratione virtutis in magnete ; alterum ex eodem , quo accidit recessus : neutrum ex halitibus emissis .

Obiic. 3. Pater Fabri , multasque rationes ponit , quibus qualitatem istam absolutam censet se prorsus expugnasse . quid ni ? si multas ex his demonstrativas appellat . 1. nulla qualitas agit ad intrâ . vis magnetica agit ad intrâ . ergo non est qualitas . maiorem ait se probasse l. 4. Metaph. 2. In eò subiecto recipitur qualitas , quod est capax eius effectus formalis . at lignum , & metalla non minus , quam ferrum capacia sunt effectus formalis qualitatis magneticæ . ergo si ea qualitas est , omnia trahentur à magnete . min. prob. quia magneticæ virtutis effectus formalis est impetus , tractio , & conversio ad talem situm , quorum omnium capax est lignum , &c. 3. si esset qualitas , nunquam destrueretur , cum careat contrario , nec pendeat in conservari à magnete . at destruitur in ferro , præsertim candente . ergo non est qualitas . 4. si esset qualitas , deberet refringi , & reflecti , quod supponit alibi probatum , omni esse qualitati commune . at neutrum habet . ergo non est qualitas . 5. qualitas non impeditur à medio , quo minus diffundatur . virtus magnetica impeditur à medio ; nimirum à rubigine , quam acus ferrea contraxit , quaque extersa , redit ad pristinam vim . ergo non est qualitas . 6. non esset ratio , cur in ferrum magnes ageret , non in alia subiecta . quod si ad sympathiam confugis , anile refugium quæris , imò non refugium , sed naufragium ; sympathia enim probat

bat oppositum; quia simile non agit in simile. 7. non est in illa qualitate ratio, cur hic polus magnetis sit Borealis, & ille Australis: & quo pacto possint ii poli cōmutari, ut Borealis evadat Australis, & contrā, adeoq; ut qui provocabat, repellat, & provocet, qui repellebat.

Ad 1. nego maiorem; nam & gravitas agit ad intrā, producendo impetum, & impetus agit ad intrā, producendo motum, quæ verò affert in Metaph. ad hanc maiorem probandam, non tanti sunt, ut timorem Peripateticis vel minimum incutiant.

Ad 2. videat, ne confundat effectum formalem cum effectū efficientis causæ. Cæterum ex dictis patet, cur alia à magnete, & ferro corpora non sint effectus magnetici capacia. quare hoc argumentum, quod demonstrativum appellat, nostram sententiam non tangit.

Ad 3. virtus magnetica prius concepta deperditur in ferro per ignitionem. hoc unde sit, fateor, difficilè explicatur. itaque prius audiendus P. Fabri prop. 57. duplicem huius rei rationem tradens. prima est, quòd ex candenti ferro plures ignis, humorisque particulae evolant, quæ secum acus magneticas, in quibus tota virtus, abripiunt. Secunda est; quia ignis perturbat ordinem pororum. quare acus situm mutantes, suum effectum in ferro illo non habent. Hoc secundum dicitur ad arbitriū; quæ enim pororum perturbatio per ignem? repletio potius habetur, insinuante se in rimulas flamma. adde, quod ignis poros non habet rectos invertere, sed inversos rectificare, si vera sunt, quæ de vitro, & diaphaneitate docent Atomistæ passim. Unde ergo probabit, eam pororum inversionem? Ad hæc per ignem ferrum disponitur, ut sit aptius virtutis magneticæ subiectum. at si ignis poros inverteret, ferrum non esset amplius capax, ut per ipsam
aci,

aciculæ rectâ commearent. Primum dicitur verosimilius, sed cur non & ipse dicam, earum partium evolatione, in quibus qualitas magnetica residebat, itâ debilitari, si quid virtutis in reliquis superest, ut non amplius in ferro exercere vim suam possit, superante jam scilicet eiusdem gravitate?

Ad 4. primum mitte, quod Magnus in virtutem magneticam refractionem agnoscit, & in hac statuit virium incrementum, dum magnes armatur. deinde nego omnem qualitatem debere refringi, & reflecti. Unde enim, aut cur hoc?

Ad 5. retorqueo argumentum: qualitas est, quæ non impeditur à medio. Sed vis magnetica non impeditur à medio; quocumque enim corpore interposito, quantumvis solido, inter magnetem, & ferrum, sequitur adhuc tractio. ergo. Cur ergo rubigo impedit? resp. ob id ipsum, quod exiguum opacum prohibet trajectionem lucis, quam non impedit solida crystallus.

Ad 6. ratio disparitatis jam est data. quod autem vocat hic author sympathiam anile per-fugium, videat ipse, qui non alia ratione arcus primarias ad se mutuò accedere censet, quam ex hac ipsa, si rectè ipsum intelligo, sympathia: Actio similis in simile impossibilis per naturam frustrâ huc advocatur, si vera sunt. quæ de ea dixi tomo sup.

Ad 7. dicetur §. sequenti.

Obiic 4. vix, & ne vix quidem explicari per qualitatem istam potest, quid sit, quod magnes armatus multò plus ponderis trahat, quam inermis.

Resp. in hoc etiam laborare adversarios, ut videre est apud ipsos. dico igitur vel cum Magnano, radios virtutis magneticæ propter specialem ferri transmittentis naturam refringi ad perpendicularem, & colligi, adeoque vim

vim multò maiorem exerere ; unde est , quod augetur , sed non longius extenditur magnetis activitas . Vel si refractione ista minùs arri- det , dico cum Cabeo , magnetem habere ad- mistas partes plures non magneticas , à quibus in sua actione retardatur : ferrum verò , quo magnes armatur , debere esse purissimum , adeo- que in pluribus , imò in omnibus sui partibus magneticam vim excipiens . ex quo est pri- mum ratio , cur ferrum eiusmodi seu chalybs magneticè excitus plus possit , quàm magnes ipse . est deinde ratio , cur iuncta qualitas in ferro residens cum residente in magnete , quæ est primum utriusque principium , ac veluti fons , plus longè possit , quam seor- sum singulæ . magnes enim per se , & simul per instrumentum non impeditum à sordibus permixtis trahens , plus trahit ; ut longe plus movet manus simul cum instrumento v. g. cum velle .

§. III.

De vi Magnetis directiva .

EX dictis §. I. infero , vim magnetis . quæ se ad Mundi , terræque polos se dirigit , in- trinsecam ipsi esse , & non solum à terra deri- vatam . Ut enim terra dicitur habere ipsa per se vim istam se componendi ad Cæli cardines , & illam proindè contrahere ferrum diù terræ ad perpendicularum insistens , aut cadens aquæ ad perpendicularum immersum , vel in li- nea meridiana constitutum , donec penitus re- frigescat ; nihil prohibet , quo minus magnes ipse per se , & ex sua natura eandem virtutem obtineat . quid enim ? num ex eo , quod Sol calidus igneusque sit , rectè colliges , has virtu- tes ignem nostrum per se habere non posse ? -
Accedit , quod huius directionis ratio non rectè

rectè deducitur ex particulis Cartesii striatis ab uno ad alterum terræ polum perpetim commutantibus. cur enim istæ non dirigunt pariter marmor, lignum; vitrum. &c.? dices, in marmore, & ligno non esse rimas, ac thecas iis particulis excipiendis idoneas: esse autem in magnete. bene est: sed istæ in magnete non sunt, nisi à polo ad polum. statuatur ergo ita magnes, ut poli ortum, occasumque respiciat; certum est, particulas ab Austro in Aquilonem rectà migrantes, eas rimas non offendere; adeoque ita poterunt magnetem convertere, ut possunt marmor. Atque hoc vim eandem habet, quocumque alio pacto particulæ istæ figuratæ fingantur. Sed illud præterea urget striatas particulas specialiter, quod non erit in magnete hic polus Australis potius; quàm Borealis; utrimque enim æque facillè possunt ex particulæ per suos canales meare; quandoquidem sunt canales cochleæ susceptivi, qui certò possunt utrimque cochleam admittere.

Verisimiliora sunt, quæ adducit P. Fabri, sed non omnino satisfaciunt. Ait, aciculas illas primarias, de quibus suprà, à natura habere, ut primum semper aspectum, quantum in se est, servant. hinc semper unam sui partem Boreæ, alteram Austro obvertunt. hæc verò si in sufficienti copia, quæ valeat vim gravitatis superare, corpori infigantur, illud consequenter ita vertunt, ut altera corporis pars Boream, altera Austrum respiciat. Sed inquirò, unde fit, quod ligno etiam, & marmorì eiùsmodi aciculæ frequentes infigi non possint, quæ ista etiam corpora, ut ferrum, & magnetem, obvertant? Nam certè per ista quoque aciculæ rectà transeunt, habentque ista etiam pororum ductus sæpè oblongos, ac rectos, ut & concedit P. Fabri prop. 49. non habere autem eos magneticis laxiores, probat eorum pondus, quod aliquandò magneti non cedit. Sæpè

et am

etiam viscosa sunt, proindeque implicare possunt per adhesionem aciculas, ac prohibere, ne evolent. Profectò extrâ præsentem quæstionem, in qua multa dicit hic author, ut naturam suæ hypothesei accommodet, vix posset disparitatem inter ejusmodi corpora aptam asserere quoad acuum ejusmodi susceptivitatem.

Superest ergo, ut vis magnetis ad polos directiva sit qualitas ejus substantiæ superaddita, quæ in alia subjecta transferri non possit, ita ut effectum obvertendi sortiatur, nisi in iis alia similis, inchoata tamen, & imperfecta, reperiatur, à qua juvetur: & fortassè etiam, nisi talem naturam, formamque inveniat, cui motus directionis tanquam concausæ tribuatur.

Duo nunc restant explicanda; 1. quo pacto unam semper partem uni, alteram semper alteri polo obvertat. 2. quo pacto partes istæ commutari possint, ita ut quæ Austrum respiciebat, respiciat deinde Aquilonem, & contrà.

Utrumque constabit, explicando istius qualitatis naturam. ea quidem habet, ut magnetem, & magnetica semper rectà ad polos disponat, ita ut poli magnetis respiciant polos Mundi. Ut ergo impetus, qui est qualitas motiva, per se habet rectà semper movere, sed versus hanc vel illam partem non per se, sed per accidens à moventis determinatione, sed ita ut hac determinatione semel accepta, pergat, quantum in se est. eodem movere. ita qualitas magnetica directiva habet per se polos magnetis in quiete ad polos Mundi dirigere, & quoslibet ad quoslibet. Sed ubi primò magnetem ita direxit, semper pergit ita dirigere, ac sequi acceptam primam directionem, donec oppositam validiorem accipiat. hinc est, ut poli magnetis mutari possint, non quòd prior quali-

tas unquam possit opposito modo dirigere, sed quia nova à validiori agente producitur novo, & opposito modo directiva.

Hæc habui, quæ utcumque de vi magnetica: si qua est alia, in philosophicis occultissima, afferrem; ut aliquid potius dicerem, & rem istam penitus intactam non relinquerem, quàm quod credam satis per istam rem hanc absolvi posse! sed quis hætenus absolvit? certè apud Atomistas non probabiliora invenies. Innumera porro supersunt, quæ de ejus effectibus, præsertim declinatione, tractanda essent. Verum hæc satis ad alia properanti.



LIBER OCTAVUS

PHYSICORUM

DE MIXTIS ANIMATIS.



Aggredior ultimam, eamque pulcherrimam naturalis Philosophiæ partem, in qua humana mens per res diù exteriores vagata, domum se tandem recipit, ut juxta Delphicam inscriptionem seipsa norit. quamvis autem generalis hîc sit de omni vita, animaque inquisitio, tota tamen rationali servit, in qua una, quidquid est vitæ in aliis, adunatur. Amplissimam hanc ego materiam, ut certis finibus circumscribam, ita distribuo. I. de animæ substantia, ejusque potentiis in communi; tum in particulari de potentiis prius vegetativis, deinde sensitivis, quibus species, & habitus annexam; postremo de rationalibus, intellectu, & voluntate, tractabo.

Q U Æ S T I O P R I M A .

De Anima substantia, ejusque potentiis in communi.

C A P U T I.

An, & quid sit anima, & utrum sit corporis forma.

Animam esse nemo inficietur, nisi qui sine anima sit, ut est celebre Augustini dictum. eam non consistere in mero atomorum

complexu, & Fide divina in nobis est certum, & ratione naturali tomo superiore universim est probatum. Superest, ut, supposita existentia, animæ definitionem inquiram.

Bis animam definit Aristoteles. i. sic. Est anima actus primus corporis naturalis organici potentia vitam habentis. Dicitur actus græcè *entelechia*. h. est habitus, seu possessio perfectionis, seu actus perfectus; non tam absolutus, quàm respectivus, seu non tam actus, quàm actuativus; nec quicumque, sed primus, adeoque non operatio, sed principium, non motus, sed natura, seu veriùs seminata, & forma simul cum materia totum ipsum animatum constituens. Quia verò animam esse corporis formam, quod hic assumitur, fuit ab aliquibus dubitatum, probandum hic breviter est.

Sicigitur arguo. Si anima esset forma non informans, sed assistens corpori, ut auriga curru, anima, & corpus supposito distinguerentur, ut patet. vel ergo homo esset anima tantum, vel corpus tantum, vel aggregatum ex utroque. non primum; quia sic homo nec corporeus, nec sensitivus, nec mortalis esset, cum nihil istorum seorsim sit anima. non secundum; quia sic homo discursivus, ac liber non esset; cum nihil h. m. sit corpus non tertium; quia sic homo esset aggregatum per accidens, nec unus in rigore, sed duo: cujus oppositum unicuique est evidens; scit enim unusquisque non duos se esse, sed unum.

Conf. anima nostra habet cum corpore suo unionem plusquam meræ assistentiæ. nihil enim alteri assistens potest immediatè gaudere, aut tristari de bono, & malo ejus, cui assistit. nam quis homo insidense quo immediatè doleat de vulnere ei inflictio, ut dolet de inflectio corpori suo, &c.? non ergo corpori suo anima assistit, sed physicè unitur. Accedit

Fides,

Fides, quæ animam nostram formam esse corporis informantem definivit primum in Viennensi, iterum in Lateranensi tertio. Accedit & ratio à priori ex conceptu formæ, qui est, ut sit principium operandi communem materiæ operationem activum. Sic autem est anima in nobis; vegetare enim, ac sentire materia solum passivè potest, anima nostra passive non potest, sed solum activè.

Hinc habes, quàm perperam Atomistæ vitam animalium sentientem in solis spiritibus statuunt, aut enim istos formam corporis statuunt; atque ità ignorant veram formæ notationem: aut negant, & iisdem argumentis convincuntur, quibus animam nostram formam probavimus; similiter enim ut nos, animalia patiuntur à corpore: nec plura, sed unum sunt.

Dicitur deindè anima actus corporis physici organici. Quid veniat nomine corporis organici, lis est non exigua. Scotistæ enim intelligunt materiam forma corporeitatis affectam. Gregorius intelligit materiam organicis dispositionibus informatam: D. Thomas totum ipsum corpore, & anima compositum. prima interpretatio reiicienda ex alibi contrà talem formam disputatis. Secunda, & tertia subsistit utraque. Sed secunda ità, ut sola materia, quæ venit in recto, ea sit, cujus anima est actus. Tertia verò, quia ut lux est actus lucidi, & calor calidi, item anima est actus corporis, quod in esse corporis completi constituit. Definatur ergo utrovis ejusmodi termino anima; utrumque enim respicit, & totum, cujus est pars, & subjectum, cujus est compars. Sed congruentius fortasse definatur per totum, quod respicit ut finem, quam per materiam, quam respicit, ut medium, & instrumentum.

Dicitur demum, *potentia vitam habentis*. Vita duplex, ut mox dicam: una substantia-

lis per modum actus primi, altera accidentalis per modum actus secundi. Jam particulæ istæ duplicem habent sensum: si enim corpus organicum; cui apponuntur, est materia organizata, sensus est, quod est in proxima potentia ad vitam substantialem. Sin autem sit totum vivens, sensus est, quod est in potentia prima ad vitam accidentalem.

Iterum Philosophus animam definit id, quo vivimus (h. e. vegetamus; sæpè enim nomen generis sumitur pro specie imperfectissima) sentimus, movemur, & intelligimus. Non est sensus, quod quævis anima sit omnium istarum operationum principium; aliter sola rationalis anima definiretur: sed est sensus, quod anima est principium istarum operationum juxta diversos gradus animatorum; ita ut in homine omnes, in brutis tres tantum priores, in plantis primam exerceat; quæ acceptio particulæ copulativæ dicitur à Dialecticis sumptio secundum distributionem accommodam.

Altera hæc definitio traditur à Philosopho ad primæ probationem. sic enim arguit. Principium, quo vivimus, sentimus, &c est actus primus, seu forma corporis. anima est tale principium. ergo. prob. major. quod est in re principium operandi est actus, seu forma dans esse rei, eamque in sua natura constituens; operari enim sequitur esse. prob. min. hoc est, quod viventia à non viventibus fecerunt, quod illa habent in se principium vitæ, non ista.

C A P U T II

Quid sit Vita,

UT teneatur animæ notio, explicanda est notio vitæ, per quam anima definitur.
est

est autem controversia ista multum & utilis, & agitata. quapropter accuratè, sed paucis de more versanda.

§. I.

Propria Vita ratio declaratur.

QUæ ad vitæ rationem involvendam potius, quam explicandam Atomistæ nonnulli congerunt, nihilequidem pensi habeo. Satis erit eam juxta Aristotelis, & D. Thomæ, imò & omnium hominum, ut constabit, sensum exponere, & firmare. Philos. 8. phys. t. 29. *Animalis*, inquit, *hoc est, & animatorum proprium ipsa à se ipsis moveri*. Idem habet Div. Thomas 1. p. quæst. 18. art. 1. ubi ex iis, in quibus vita est manifesta, qualia sunt animalia, venatur vitæ conceptum viventibus omnibus communem. Vulgo autem dicitur animal primò vivere, dum incipit se movere motu aliquo dilatationis; ac restrictionis in respirando, aut alio hujusmodi; qui quidem motus quamdiù durat, dicitur animal vivere; dum cessat omninò, animal mortuum judicatur. Sed quia aliqua etiam inanimata se movent, ut gravia, & levia; aliquid addendum motui ab intrinseco, ut vitæ conceptus perficiatur.

Attendendum igitur, quod non viventia tunc solum se movent, cum sunt extra naturalem dispositionem, & ut reparent perfectionem sibi naturaliter debitam, ad quam determinantur à generante. Sic lapis non se movet, nisi dum est extra proprium locum; nec aqua se alterat, nisi dum caret naturali frigiditate. hinc talis motus non lapidi, & aquæ, sed generanti tribuitur; quia dispositiones, ad quas moventur, sunt ipsis primò debitæ à generante, cuius est dare naturam, & proprietates vel

immediatè per se, vel mediante natura tanquam instrumento. At viventia se movent etiam, dum sunt in statu maximè naturali, h. e. dum habent omnem perfectionem ad naturam, seu operandi principium pertinentem. sic planta dum est omnibus suis potentiis instructa, tunc potissimum motu nutritionis, & augmenti se movet. Sic animal movet se motu tum progressivo, tum sensitivo, & quidem tunc magis, cum melius, & perfectius est dispositum secundum naturam, vim scilicet operativam.

Hinc est integer conceptus vitæ tum in actu primo, tum in actu secundo. Vita in actu primo est principium movendi se ab intrinseco ad suam perfectionem in statu secundum naturam jam perfectio. Vita in actu secundo est motus, quo res perfecta secundum naturam se perficit ulterius ab intrinseco. Notat ibi Div. Thomas, motum hic non accipi pro actu entis imperfecti, sed pro operatione, quæ potest esse actus entis etiam perfecti. quamvis autem operatio perfectio sit, adeoque natura antecedenter ad operationem omninò perfecta non videatur, est tamen in vivente perfecta secundum propriam perfectionem in esse naturæ, seu principii operativi. Tria igitur ad vitam faciunt. 1. ut principium modo dicto sit perfectum. 2. ut operatio sit immanens in ipso. 3. ut sit emanans ab ipso; unde & dicitur motus à se in se.

Ex his deciditur ea lis, an detur conceptus unus vitæ communis, & univocus Deo, & creaturis. dicendum enim dari conceptum unum communem, sed non univocum. nam, ut habet D. Thom. 1. p. q. 9. art. 1. ad 1. ex Augustino, Deus etiam movere se dicitur, in quantum intelligere, & velle motus quidam dicuntur, seu operationes, quas Deus à se habet. Movere igitur se, seu constituere se in ultima sua actualitate, ac perfectione, conceptus est com.

communis vitæ creatæ, & increatæ. Et cum vulgo dicitur vita in operatione consistere, nomine operationis in abstractissima vitæ notione non debet intelligi aliquid productum, sed ultima perfectio, & actualitas, quæ est in re ab ipsa re. quod innuit idem D. Thom. in 4. d. 8. q. 1. quæstiunc. 1. ad 1. ubi, *Ultimum*, inquit, *cujuslibet rei in se ipsa est ipsa rei operatio, propter quam res est.*

At quia in hac vitæ ratione inæqualitas est, & gradualitas, vita non univocè, sed analogicè ad Deum, & creaturas, imò & ad varios viventium creatorum gradus descendit. Perfectò cum vita fit motus à se in se, adeoque dicat intimam principii, & subjecti fit, ut, quo major est intimitas, perfectior sit vita. Vegetativa plantarum est infima: incipit enim, ab extrinseco alimento, & desinit in florem, ac fructum, qui tandem à planta separatur, adeoque minimum habet intimitatis. Sensitiva est media; incipit enim ab extrinseco objecto, sed tota productivè sistit intra se. Nobilissima est intellectiva, quæ cum sit reflexiva supra se, tum terminativè, tum productivè intra se sistere est nata.

Rursus in vita ipsa intelligente plures gradus perfectionis est distinguere juxta gradus diversos intimitatis. Imperfectissima est intellectiva humana, quæ pendet à phantasmate, adeoque à sensibili externo. Sublimior est Angelica à phantasmate independens: sed ipsa quoque est imperfecta; nam & pendet à Deo, ut ab extrinseco principio cooperante, & vitæ operationem non habet identificatam, adeoque non perfectè intimam. Solus Deus gaudet, ut loquitur Aristoteles, *optima vita*, in qua scilicet summa intimitas, cum idem sint in eo cognoscens, cognitio, & cognitum saltem primum, & solus ipse totus est à se, in se, ad se per operationem, quæ est ipse.

§. II.

Nonnulla inferuntur ex dictis.

Infero 1. omnia Dei prædicata realiter vitam esse in actu secundo, licet non omnia formaliter primum constat: quia omnia sunt à Deo in Deo. secundum declaratur. Perfectiones divinas nonnisi ad modum creaturarum concipimus, & per creata ænigmata explicamus. Cum ergo divinam intellectionem, & volitionem per modum vitalium nostrarum operationum concipiamus, actus formaliter vitales dicimus: non sic immensitatem, & æternitatem, quas concipimus ad modum ubicationis, & durationis creaturarum non vitalium.

Infero 2. nullam creaturam vivere posse per actum vitæ sibi identificatum. Prob. Nihil habens suum esse à se est creatura. omne habens actum vitæ sibi identificatum est habens suum esse à se. ergo nihil habens vitæ actum identificatum est creatura; unde per simplicem conversionem sequitur, nullam creaturam vivere per actum vitæ identificatum. Syllogismus est in *Celarent*. Major est evidens ex notione entis contingentis. Minor ex dictis; quia cum vita in actu secundo sit motus à se in se, si hæc ipsa sit esse viventis, esse viventis erit à se.

Neque est, quod confugas ad motum, ac vitam intentionalem, quam intellectus haberet ad objectum per identificatam intellectionem, quamvis non haberet vitam physicam, ut loquuntur Recentiores, consistentem in productione. Nam hæc distinctio vitæ physicæ, & intentionalis novitium est commentum inventum ad eum finem, ut salvetur, quo pacto Deus verè dicatur vivere. ad hoc autem, ut ostendi, opus tali distinctione non est. Et quidem

dem motus iste intentionalis, seu tendentia in obiectum non est, nisi actus ipse dicens habitudinem ad obiectum. hoc autem non sufficere ad vitam simpliciter dictam ex communi conceptu jam stabilitam, patet consideranti; & rursus ex eo, quod secus omnis habitudo posset dici vita in hoc sensu; atque ita tendentia lapidis ad centrum, materiae ad formam, & similes vitales erunt.

Infero 3. operationem vitalem connaturaliter petere, ut ipsa secundum substantiam non sit à principio adaequatè extrinseco; ceterum non implicare contradictionem, ut operatio vitalis sit totaliter ab extrinseco. Prob. primò secunda pars illationis. Ad perfectionem vitalem sufficit ex dictis, si eam habeat vivens à se, eamque proinde non alteri omnino, sed sibi quoque debeat, ad hoc autem non est opus, ut eam producat secundum esse, sed secundum inesse. Patet hoc ab exemplo, & à priori. si calor supponatur existens, & ignis sua activitate illum subjecto copulet, adhuc dicetur esse causa calidi, de facto licet homo non ponat, nisi meram unionem inter animam, & corpus, dicitur tamen generare hominem. universim dicitur causa denominationis, qui ponit ultimam actualitatem constitutivam denominationis; eo ipso enim est id, vicujus existit denominatio. Ut ergo vivens intelligatur esse à se, ut à causa, videns, intelligens, &c. satis est, si visionem, aut intellectionem ab extrinseco adaequatè productam sua sibi activitate conjungat; quia eo ipso sibi debet, suaeque activitati, quod sit videns, aut intelligens. Prob. jam prima illationis pars. Est essentialie viventi, ut saltem unionem suae secum vitalis operationis producat. unio autem in his, quae educuntur, ab educatione distincta non est, ut probavi tom. sup. ergo cum operatio vitalis petat uniri suae causae per virtutem ejusdem.

causæ, petit per eandem virtutem educi :

Infero 4. ad rationem actus vitalis non exigi, ut actus sit in eodem principio proximo, à quo est, sed satis esse, si sit in eodem composito, seu supposito. Ita Suarius lib. 1. de An. c. 4. num. 13. Prob. in eo stat ratio vitæ, in quo vivens à non vivente secernitur. at per hoc, quod vivens ab intrinseco, h. e. per suam formam det sibi suam perfectionem, ad quam à generante non determinatur, quamvis ea perfectio non in forma, à qua est, sed in materia recipiatur, per hoc, inquam, satis, ut patet, vivens à non vivente distinguitur. ergo.

Infero 5. qua ratione datus vitæ conceptus competat plantis. Profectò plantas propriissimè vivere communissimè asseritur. sed quia non vivunt, nisi vegetando, dandum est discrimen inter ipsas, & ignem, qui etiam nutrirī dicitur, non tamen vivere, nisi per metaphoram. Plantæ ergo sua vi se dilatant, moventque fibras, & organa, ut introsuscipiant alimentum, illudque introsusceptum sibi uniant. quare etiam dato, quod alimenti transmutatio vitalis non sit, quòd sit actio non immanens, sed transiens; adhuc tamen plantæ vivunt, dum in eam transmutationem suos motus ab intrinseco dilatationis, ac restrictionis impendunt. sic qui pingit, aut ædificat, vivit, non in quantum agit in exteriorem materiam, sed in quantum corporis membra sic agendo ab intrinseco movet. At ignis dum in se trahit oleum, aut ceram, non movet se dilatando poros, ut alimentum introsuscipiat; adeoque habet actionem merè transeuntem; totaque ipsius vis impenditur in generatione sibi similis, non verò ad perficiendum se ultimò. quamvis autem augeatur & ipse per novi ignis productionem, per accidens id est ad actionem ipsius, quæ perinde ignem producit in materia conjuncta, ac separata: quod in plantæ nutritione

tione non contingit. Præterea ignis organa ad alimentum accipiendum non habet. quare non alitur in certam partem, nec in determinata mensura, sed juxta applicationem materiæ augetur, eiusque augmentum procedit in infinitum. At plantæ partes habent organicas heterogeneas, quasdam quidem destinatas ad trahendum. alias ad concoquendum, alias ad dissipandum alimentum. Hinc in sua nutritione ordinem servant, ut alia alimenti pars in truncum, alia in ramos, alia in flores, aut fructus transeat: & in hoc ipso status certus, ac mensura servatur. quæ omnia manifestò indicant, esse in plantis modum essendi, & operandi altiore, ac perfectiore elementis. talis autem modus juxta datam notionem, & communem sensum vitalis est.

C A P U T III.

Num vita in actu secundo sit accidens distinctum à vita in actu primo.

A Libi disputans adversus Atomistas novam omnem productionem cum formæ, tum qualitatis inficientes, exemplo semper vitalis actus sum usus, quem de novo produci supposui certum ex probandis in præsentia. Superest nunc, ut fidem meam liberem, ac demonstrem distinctionem actus secundi vitæ à primo: quam ubi ostendero, consequens erit, tum quod talis actus sit accidens ex conceptu accidentis in Metaphysicis declarando; tum quod sit productus à principio vivente ex conceptu vitæ hic dato.

Jam verò indistinctionem vitalis actus Atomistæ, quos vidi, malunt supponere, quam in disputationem vocare. Unus est Magnanus, qui hanc rem ex professo disputat tum in *Philos. natura*, c. 31. tum latissimè in *Sacra* cap. 13. per

totum: ubi multa præfatus de animi sui synce-
ritate, qua Deo, & veritati servire se uni stu-
det, Lectorem monet, ut caveat à præiudicio,
seu anticepta consuetudine aliter concipiendi,
& judicandi, quæ nisi obstet, demonstraturum
se confidit in distinctionem vitalium operatio-
num à principio vivente.

Agit autem ibi præcipuè de libero voluntatis
actu, in quo maior videtur esse difficultas: &
putat rem totam sine nova ulla entitate expli-
cari sufficienter per analogiam motus localis.
Discurrit ergo (nisi me fallit prolixa, nec mi-
nus implexa tractatio, qua Lectorem ab una ad
aliam propositionem sæpè transmittit, & ve-
reor, ne quandoque per circulum) hoc fermè
pacto. Tota voluntatis nostræ æconomia expli-
catur abunde per analogiam ad motum loca-
lem; nam & amor dicitur pondus, deside-
rium motus, delectatio quies. Atqui motus
localis nihil importat entitatis novæ a mobili,
& loco distinctæ, ut ex physicis supponit. er-
gò nihil ejusmodi entitatis importat volitio.
Quis hoc arguendi genere præclarius quid-
quam audivit? Mitto quod minoris opposi-
tum sit à nobis alibi demonstratum; quid? quod
velle analogum est motui, inferes legitimè,
velle esse indistinctum, si indistinctus est
motus? quid ni materiale illud esse, quod
materialis est motus? Essentiæ explicantur
per analogiam ad numeros; nunquid in omni
essentia argues distinctionem partium, pro-
pterea, quod omnis numerus partibus distin-
ctis constat? Analogia dicit similitudinem, &
diversitatem. perperam igitur distinctio, aut
indistinctio ex analogia concluditur. Præte-
reà transitus à loco ad locum fit amittendo vi-
ciniam unius, & acquirendo viciniam alte-
rius. quid jam dicet de tràsitu à volitione unius
obiecti ad volitionem alterius? transit, in-
quit, voluntas per pedes, qui sunt affectus.

Sed

Sed quid est aliud dicere idem per idem, & per affectuum transitum volitionum, quæ affectus sunt, transitum explicare? Sed ista mittamus levioris momenti, & adversus hunc Demonstratorem (vix enim est propositio, in qua demonstrationem inflatis utrimque buccis non crepet hic author) demonstremus & nos aliquando. sic igitur universim actus vitalis à suo principio distinctionem ostendo.

Entitates realiter separabiles sunt entitates mutuò realiter distinctæ. actus secundus, & primus vitæ sunt entitates realiter separabiles. ergo sunt entitates realiter mutuò distinctæ. Maior est evidens, si loquamur præsertim separabilitatem secundum esse, & non esse; si enim ita separabilia non sint distincta, sed idem, idem poterit simul esse, & non esse. non minus est evidens minor; manet enim voluntas, non manet amor; adeoque voluntas ab amore separatur. idem est in intellectu, idem in sensu. quis enim neget me nunc carere notitia Angeli, aut Dei quidditativa, quam possum aliquando acquirere, & iterum ea carere? quis neget, me nunc non videre, non audire tam multa, quæ vidi olim, quæ audiavi) dividitur ergo potentia vivens ab actu suo.

Duo sunt, quæ potest respondere. i. philosophando de vitalibus tendentiis, ut Nominales de habitudinibus, adeoque negando minorem, eiusque suppositum, quod scilicet actus vitalis sit entitas, seu *quid*, cum sit potius mera habitudo, non entitas, sed entitatis, non hoc, sed huius.

Sed refellitur evidenter, testibus ipsis Nominalibus, omnis enim perfectio quæ talis est entitas, & quid, omnis actus vitæ quæ talis est perfectio. ergo omnis actus vitæ quæ talis est entitas, & quid. maior est evidens; entitas enim, & perfectio convertuntur, utens, & bo.

bonum absolutum. minor est etiam evidens ; nam quis inficietur , hominem cognoscendo , & amando perfici , cognoscendo , & amando melius perfici magis ? an non ad hoc destinati per creationem sumus , ut Deum cognoscamus , & amemus ? omnis autem finis habet rationem perfectionis , & boni . Beatitudo nostra nonnè in cognitione , & amore formaliter est sita ? num negas beatitudinem hominis esse hominis perfectionem ? Huc etiam facit naturale in nobis desiderium sciendi , cuius meminit Aristoteles initio Metaph. desiderium autem non est , nisi perfectionis , & boni . accedit , quod bonum cognitionis non est obiectum ipsum , ut accidit in voluntate , intellectus enim per actum non quærit obiectum , ut facit voluntas , sed è contrario ab obiecto non quærit , nisi actum , ut in ethicis ostendam . quare obiectum ad intellectum non se habet , ut finis , sed ut medium .

Potest respondere 2. quidquid est perfectionis in actu vitali , totum esse identificatum potentie : nec tamen inde fieri , potentiam semper vivere quolibet actu . Deus enim vivit per se , & actu identificato , nec tamen semper cognoscit , aut semper amat alia à se .

Hæc responsio reicitur adhuc evidentius . 1. quia si actus vitalis non sit per modum habitudinis , sed per modum perfectionis , & entitatis , non indistinctus solum , sed identificatus (inter quæ duo maximè distinguunt Nominales) cum suo principio , redit argumentum cap. superiori illat 2. propositum ad demonstrandam impossibilem identitatem inter vivens , & vitam in creatis . 2. quilibet intellectus adiutus saltem ab extrinseco natus est perfectius , & perfectius intelligere cum pro maiori obiecti intelligibilis perfectione , quæ in infinitum procedit , tum pro maiori , ac perfectiori specie , quæ ad idem intelligendum pro-

promovetur. Certè in visione Dei nullum Theologi terminum agnoscunt, ultra quem non possit intellectus creatus evahi maiori lumine adjunctus, Vel ergo aliquid eiusmodi perfectionis sibi intellectus noster non identificat: & jam aliquis actus cognoscendi statuendus est ab eo re distinctus. Vel omnem in sua linea possibilem sibi perfectionem identificat; & erit in linea intelligendi infinitè perfectus. 3. si intellectus noster nihil perfectionis ab obiecto expectat, ut non expectat Deus, nec poterit, perinde ut Deus, obiecto ad intelligendum indigere: hinc fiet, ut futura, ut absentia per se unum cognoscat: ut sit per se beatus, si habet totam suæ beatitudinis perfectionem, &c.

Plura in hanc rem occurrent vel leviter Philosophicis, ac Theologicis asperso. Mihi sufficit unum hoc attulisset, ne sit demonstratæ evidentiae à rationum copia præjudicium. Utrum verò hæc sententia, quam impugno, censuram aliquam Theologicam mereatur, quatenus contrà Theologorum torrentem negat omnem actum etiam supernaturalem distinctum, videant, quorum interest.

Obiicit Maganus. omnium consensu, paucis exceptis, determinatio voluntatis antecedit concursum Dei; si enim concursus Dei antecederet, prædeterminaret. Vel ergo illa determinatio antecedens est aliquid: & hoc non; aliter aliquid esset à voluntate, Deo non concurrente: vel nihil: & idem dici potest de quo libet actu voluntatis.

Si authores diligentius evoluiſſet Maganus, invenisset, paucissimos, qui cum Francisco de Lugo præviam illam determinationem voluntatis Nominalistico more concederent. Cæterum communiter, qui prædeterminationem negant, non aliam in voluntate determinationem agnoscunt, quàm actum ipsum

sum vitalem, ad quem omnino concurrat Deus. Sed de hac re multa ex professo in calce *Metaphysicæ*.

Obiicit 2. sententia actum vitalem distinctum negans tantum abest, ut debeat quasi nova à Scholis reiici, ut potius eam debeant Scholæ passis ulnis amplecti: cui uni referent acceptam tandiù expetitam concordiam circa Dei prævium, simultaneumve concursum in operationes præsertim liberas voluntatis. hæc enim tota lis cessat, sublata speciali entitate volitionis.

Quidquid sit, utrum Magnani sententia item istam evellat; potuisset certè hic author discere à P. Dola, ne istiusmodi ineptâ concordiam moliretur. nam is quoque censuit, componi de auxiliis controversiam, cogendo partes in sententiam Durandi, qui necessitatem divini concursus ad omnium creaturarum effectus, & operationes negavit. quid jam inde lucratus est? utriusque partis offensionem indignantium hominis impudentiam, qui eiuratis Theologis Corypheis, D. Thoma, Scoto, & similibus, fore speravit, ut autoritate sua Theologos aliò compingeret; & ut in unum consentirent, post Dolam discederent, Principumque Theologorum placita convellerent. Idem Magnani (divinor) fatum erit. Nec est, quod minetur nobis, vitari non posse physicam prædeterminationem, si retinenda sit entitas illa; id enim est ex vitro fulgur abunde à nostris relictum, restringendumque pro modulo etiam nostro à nobis in *Metaphysicis*.

C A P U T IV.

De distinctione Animarum.

Notum est Pythagoreorum dogma, qui animam nostram à nobis ad pecudes trans mittebant, & vicissim à pecudibus ad nos. quare par nefas ipsi erat hominem, ac belluam occidere. Negabant. ergo distingui specie humanam animam à belluina.

Relicte terrorem hunc egregiè Aristoteles 1. de Anim. t. 53. his verbis : *Tanquam possibile esset secundum Pythagoricas fabulas quamlibet animam quolibet corpus ingredi. Similiter itaque dicunt, atque si quis dicat testonicam in fistulas ingredi : oportet enim artem quidem uti instrumentis, animam autem corpore.* Sensus est ; quod quemadmodum si ars deberet ingredi, & informare sua instrumenta, ineptè ars fabrilis informaret fistulas, quæ nempe non sunt fabrilia, sed musica instrumenta ; item quia anima ingreditur corpus, quod habet pro instrumento, ineptè anima humana ingreditur corpus equinum, quo uti non potest ad operationes humanas. & sic de aliis. Conf. ut enim ars fabrilis, & musica non una, sed duplex secundum speciem est ars, adeoque non differt solum penes instrumenta ; item animæ non solum penes corpora. Et quidem aliter omnia licebit ad unam speciem redigere : quod repugnat communi hominum sensui, divinæque etiã perfectioni à creaturis infinita varietate participabili. Accedit, quod Pythagoreum hoc dogma censent communiter Patres errorem in fide.

Dices 1. animæ humanæ sunt unius omnes speciei, & homines tamen constituunt indole, ac moribus diversissimos propter corporum diversitatem. ergo ex hac una nasci potest
di.

diversitas inter hominem, & belluas. 2. anima nata audire, & videre ingredi potest corpus surdum, & cæcum. ergo nata intelligere potest ingredi corpus equi, rationali licet operationi non aptum.

Ad 1. quodlibet corpus humanum aptum humanis operationibus est, quanivis in hoc sit varietas. magis autem, & minus non variat speciem. sic est de citharædis varias citharas fortientibus, at corpus equinum est simpliciter ineptum operibus humanis; adeoque tam non potest anima nostra illud ingredi, quam non debet citharædo aratrum dari. Ad 2. disparitas est; quia corpus humanum per accidens est cæcum, aut surdum ex defectu agentis impediti ab operis sui perfectione. at corpus equinum per se est ineptum operationibus humanis; cum equus producens equum non intendat, nisi equinum corpus perficere.

Triplex ergo communiter, & meritò anima distinguitur; Vegetativa, Sensitiva, & Rationalis. Hæc divisio complectitur tres vivendi præcipuas rationes, non tamen oppositas, quæque non possint in una anima coadunari. Videatur de hac divisione Suarius l. 1. de Anim. c. 7. Unum noto, Aristotelem tria quidem dicta animarum genera, animatorum verò quatuor gradus, potentiarum denique vitalium quinque species distinxisse. Divisio animarum desumitur à modo operandi cum dependentia, vel secus à materia, ut vult D. Thom. 1. p. q. 78. art. 1. nam vegetativa tenet infimum locum; cum vivat per organa, & materiales qualitates: sensitiva medium, cum vivat per species, quæ sunt qualitates quodammodo immateriales: rationalis summum, cum vivat omnino independenter ab organo, tanquam à principio. Aliter alii divisionem istam faciunt. aut enim, inquit, vivens agit ad se perficiendum, conservandum; & propagandum in suo

suo esse naturali; & sic habetur vegetativum: aut se perficit recipiendo in se rerum aliarum imagines, ac formas, idque dupliciter, vel dependenter à materia: & hoc est sensitivum; vel independenter: & hoc est vivens rationale.

Potentia porro distinguuntur per objecta. Vel ergo viventis objectum est suum ipsius corpus; & ad hoc tendit unicè vegetativa potentia. Vel est aliquod extrinsecum; & ad hoc bifariam tendit vivens, vel illud ad se trahendo, accipiendoque ab ipso cognitionem, & intentionalem imaginem; atque ita si objectum sit ens dumtaxat materiale, habetur potentia Sensitiva: si omne ens, Intellectiva. Vel ita tendit ad extrinsecum, ut ab eo trahatur; atque hoc rursus bifariam contingit, vel enim trahitur per inclinationem; & habetur potentia Appetitiva; vel per operationem consequentem, quæ executivè movetur ad conjunctionem cum objecto concupito: & habetur Locomotiva, seu Progressiva. Noluit porro Philosoph. distinguere Appetitum sensitivum à rationali, ut distinxit Cognoscitivam sensitivam ab intellectiva, quia hæc secunda satis intelligitur in prima illa divisione.

Gradus verò animatorum quatuor habentur secundum gradus participandi potentias numeratas. primò enim sunt viventia, quæ habent solam potentiam vegetandi. Sunt secundò viventia, quæ habent potentiam vegetandi, ac sentiendi, sed non loco se movendi, seu progrediendi, qualia sunt animalia saxis affixa, quæ à Græcis Zoophita quasi Plantanimalia nuncupantur. Sunt tertio bruta perfecta, quibus inest vis vegetandi, sentiendi, & progrediendi. quarto loco est homo, cui præter istas vis est etiam intelligendi. Appetitivus non est specialis gradus viventis; omne enim sensitivum est simul appetitivum.

CAPUT V.

*Sit nè una in omnibus, aut multiplex in uno
vivente anima.*

§. I.

Non est una in omnibus anima.

HÆc propositio definita est in Lateranensi
3. sect. 8. contra Averroem, qui unum
numero in omnibus hominibus assistentem in-
tellectum constituit.

Prob. una forma non potest plura corpora,
quæ sunt plura adæquata subiecta subordina-
tionem invicem non habentia, informare.
Anima autem ex jam ostensis est forma corpo-
ris. ergo non potest in omnibus corporibus una
esse. maior prob. vel enim esset in pluribus re-
plicata; atque hoc est per naturam impossibi-
le. Vel esset tantæ perfectionis, ac *sphæræ*,
ut totum universum, per quod homines dis-
persi sunt, occuparet: atque hoc est inopi-
nabile. Urgetur adhuc id ipsum efficacius. im-
possibile est, ut eidem contraria insint. atqui
hominibus secundum animam consideratis in-
sunt contraria, assensus scilicet, ac dissensus,
amor, & odium circa idem, virtus, & vitium,
meritum, & demeritum, imperium, & servi-
tus, &c. ergo impossibile est, ut sint unum se-
cundum animam.

Duo opponit Averroes. 1. formæ non mul-
tiplicantur numero, nisi quæ sunt immerse
in materia. atqui anima intellectiva est for-
ma abstracta, & emersa à materia. ergo non
multiplicatur numero. 2. arguit ab authori-
tate Aristot. qui cum admiserit mundum æter-
num, intellectum immortalem, negaverit au-
tem Pythagoricam transmigrationem. si plu-
res

res essent intellectus pro hominum pluralitate, essent nunc intellectus infiniti, contra id, quod Philos. ipse asserit 3. phys.

Ad 1. videant, quid debeant respondere Thomistæ, à quibus principii illius, quod mihi falsissimum est, veritas adoptatur, & solemnis habetur in sua Schola. Et quamvis dicant animas distingui per habitudinem ad corpora tanquam ad subiecta receptionis, nescio, an plenè satisfaciant; cum enim juxta ipsos principium divisionis numericæ non sit sola materia, sed etiam quantitas, non videtur, quo pacto possit anima, nullatenus quantificabilis, dividi, individuari, & distingui.

Ad 2. propterea Avicennæ, & Algazelis fuit opinio animas hominum esse infinitas; nec inficiari Aristotelem infinitum, nisi in rebus materialibus. in hanc quoque Philos. mentem propendet D. Thomas 2. contr. Gent. cap. 83. Sed quidquid sentierit, aut sentire debuerit Philosophus in hac re nihil moror; supponit enim rem certò falsam, Mundi æternitatem.

§. I I.

*Non est multiplex simul in uno
vivente anima.*

HAEC propositio est primò contra Averroem, qui præter intellectum communem, & immortalem, animam statuit cuiusvis hominis propriam, & mortalem: quam sententiam docuit etiam Occam, Maironus, & Venetus tres animas in homine realiter distinctas, Vegetativam, Sensitivam, & Rationalem statuentes. Est secundò contra Platonem, & Galenum triplicem in nobis animam Discursivam, Concupiscibilem, & Irascibilem non entitate solùm, sed loco, & subiecto separant.

rantes, primamque in cerebro, secundam in hepate, tertiam in corde reponentes, quæ nimirum in humano microcosmo proportionaliter se habeant, ut tres præcipue in rep. partes, Consularis, Quæstiosa, & Militaris. Est tertio contra Manichæos duplicem hominis animam agnoscentes, utramque rationalem, sed bonam alteram à bono, alteram malam à malo Deo, quæ bellum invicem intestinum exerceant per oppositas inclinationes.

Prob. 1. autoritate 8. Synodi Oecumenicæ act. 10. can. 11. apud Toletum initio libr. de Anim. his verbis: *Apparet quosdam id temporis in tantum impietatis venisse, ut duas in homine animas impudenter dogmatizent: quos omnes, & similia sentientes cum veteris, & novum testamentum, & omnes Ecclesia Patrum unam animam rationalem in homine asseverent, sancta, & universalis Synodus anathematizat.* Et quamvis sint, qui dicant Concilium loqui solum adversus Manichæos; hæc tamen limitatio Cardinali Toletio non placet, cum universalius loquatur, & Patrum testimonia, quæ refert, talem glossam non patiantur. Certè Augustinus l. de Eccl. dogm. cap. 15. sic habet: *Neque duas animas dicimus in uno homine, unam animasam, qua animetur corpus, alteram spiritalem, qua rationem ministret: sed dicimus unam esse, eandemque animam in homine, qua & corpus sua societate vivificet, & semetipsam sua ratione disponat.* Audiant hæc Atomistæ, qui totam vim sensitivam in spiritibus reponentes, eam coguntur à rationali anima separare.

Prob. 2. ratione, quam alibi adversus eosdem Atomistas agens inculcavi, quæque mihi efficacissima est. si anima rationalis eadem sensitiva non esset, non esset corporis forma, atque opus est, ut indigeat subiecto tanquam compingit passivo ad communem ali-

quam

quam operationem, non potest autem subiecto suo sic indigere anima ad operationem rationalem, ut est certum, sed ad solam sensitivam. ergo ista etiam est operatio animæ rationalis. Conf. 1. quia multiplicitas formarum pugnat cum unitate viventis, ut alibi ostendi arguens adversus formam corporeitatis Scoticam. tam ergo erit homo unus per plures animas, ut esset equus, si ipsi jam constituto superadderetur rationalis anima. Conf. 2. à posteriori. una operatio in nobis, si sit valde intensa, impedit aliam; dum enim quis multum occupatur in operationibus sensus, distrahitur ab operationibus intelligendi. hoc autem non contingit, nisi anima sit una, quædum viribus omnibus in unam aliquam operationem incumbit, attendere ad alia non valet.

Efficacius adhuc rejicitur imaginatio Platonis, & Galeni. Nam primò facultas concupiscibilis necessario debet eadem esse cognoscitiva; aliter ferretur per appetitum in obiectum incognitum. Rursus irascibilis debet eadem esse concupiscibilis; nemo enim irascitur, ac pugnat pro acquisitione boni, quod ipse nullatenus appetit. non ergo istæ sunt tres, sed una facultas. Multò minùs statui possunt loco, & subiecto separatæ; perindè enim foret, ac eas statuere in tribus distinctis realiter individuis.

Obiic. 1. Anima sensitiva hominis est mortalis. ergo re distinguitur ab intellectiva immortali. ant. prob. nulla forma, quæ operari non potest extrà materiam, potest extrà materiam existere. atqui anima sensitiva non potest sentire extrà corpus. ergo non potest extrà illud existere, adeoque mortalis est.

Nego antec. ad prob. nego consequ. quæ ut bona sit, in minori non solùm debet dici, quod non potest sentire, sed nullam quoque aliam operationem exercere. anima verò

sensitiva hominis licet non possit sentire extra corpus, potest tamen intelligere.

Obiic. 2. Sensitivas dicit in suo formali conceptu materialitatem: nihil enim est sensitivum quod non idem sit materiale. Intellectivitas est formaliter immaterialis. ergo non possunt duæ istæ rationes in eadem anima adunari, aliter eadem esset materialis, & immaterialis.

Sensitivitas dicit in suo conceptu materialitatem in principio *quod*, non autem in principio *quo*, nisi præcisiivè, & permissivè. id enim quod sentit, sine dubio est corpus, cui uni proportionantur tanquam subjecto qualitates sensibiles; & materiales: sed id, quo sentit, potest non esse corpus, quatenus huic possunt proportionari tanquam comprincipio sensibiles qualitates, tanquam principio sensitivæ operationes.

Obiic. 3. est in homine bellum intestinum, ut in se quisque malo suo experitur, dicens cum Apostolo, sentio aliam legem in membris meis repugnantem legi mentis meæ. ergo dantur in nobis plures animæ; secus idem sibi pugnaret; quod est in terminis impossibile.

Ad evidentiam responsionis, noto, voluntatem ferri de se in bonum apparens. quare etiam dum fertur ad malum, & in honestum, fertur ad illud sub ratione boni vel utilis, vel delectabilis. Hinc est distinctio voluntatis in partem ejus superiorem, & inferiorem. prima est, quæ sequitur directionem superioris rationis judicantis secundum rationes æternas, & divinas, suadentisque electionem virtutis, & contemptum inferiorum bonorum, Altera est, quæ sequitur dictamen inferioris rationis judicantis secundum rationes temporales, & humanas, suadentisque amplexum boni commodi, aut merè jucundi. Huiusmodi distinctio non est potentiarum, sed inclinationum eiusdem.

dem potentiae, quae oriuntur ab oppositis objectis eandem potentiam in diversa trahentibus. cum enim omne bonum quia tale apparens natum sit voluntatem ad sui prosecutionem inclinare, fit ut etiam dum sequimur virtutem, trahamur à bono physico vitiorum: etiam dum amplectimur vitia, inclinemur à bono morali, & honestate virtutis. Tota igitur pugna in nobis non est à potentiis, sed ab objectis contrariis, quae quidem ita se habent, ut, dum efficaciter eligimus unum, inefficaciter moveamur ab altero, & è converso.

Obiic. 4. si anima rationalis ipsa per se corpus suum vegetaret, mori homo non posset: cum enim animae virtus perinde ut anima ipsa sit immortalis, nec possit debilitatem virium à materialibus qualitatibus pati, consequens est, ut nunquam possit à vegetando amoveri.

Resp. animam non discedere à corpore ob defectum virtutis suae vegetativae, quae nunquam scilicet, ut rectè in argumento dicitur, aut perit, aut veterascit: sed ex defectu organi, & instrumenti, quod debilitatur à contrariis, & tandem ineptum operationibus vitalibus redditur. hinc mors. Exemplum habes in tibicine, cuius arte omninò incolumi, si ex vetustate aptitudinem primam amittat tibia, sonus deterior evadit: dum verò tibia fractione, vel aliàs fit prorsus sonando inepta, abiicitur.

§. III.

Non est in uno vivente multiplex anima successivè.

Propositio hæc adversarios habet Peripateticos non paucos, qui Aristotelis auctoritate freti, animarum successionem in viventis,

veatis, præsertim humani, generatione tuentur; ajuntque ubi primum foetus incipit vitaliter nutrirî, tunc non accipere, nisi animam vegetativam, cujus ope paulatim promovetur ad sensitivam, à qua tandem redditur aptum susceptivum animæ rationalis; ità tamen, ut accedente forma perfectiore, recedat imperfectior, quæ scilicet à natura intenditur non ut terminus, sed ut via. Citantur pro hac sententia D. Thomas 1. p. q. 77. ar. 3. ad 3. quem sequuntur Thomistæ, Conimbricenses 2. de Anim. cap. 1. q. 4. art. 2. Maurus hic q. 10. alique.

Prob. tamen nostra conclusio sic. Anima nostra non rationalis solum est, sed etiam sensitiva, ac vegetativa. ergo dum primò foetus incipit vivere, aliam à rationali animam accipere non debet. conf. prob. quia non debet tunc introduci anima vegetativa, nisi quæ hominis sit propria; intenditur enim hominis, non arboris generatio. Vegetativa autem hominis propria simul est rationalis. Idque tantò magis est verum; quia organizationes, quæ tunc sensim introducuntur, ex sunt, quæ nulli plantæ possunt competere, quare vegetatio fieri tunc debet à principio non pure vegetativo, sed altiore, quod scilicet perfectione, virtuteque sua suum sibi corpus perficiat, ac præparet ad altiorum operationum genus.

Conf. animæ nostræ competit tota vis vegetandi, etiam illa, quæ initio in foetu exercetur; neque enim illa melior est, aut major, quàm quæ exercetur tempore consequente. non ergo est, cur initio anima rationalis non exigatur à foetu sufficienter ad vegetandum disposito, & ad reliquas operationes inchoatè. Accedit, quod in animali nulla est unquam sine tactu vita. ergo in brutis vivere incipientibus anima est non vegetativa solum, sed sensitiva & ex rationis paritate Rationalis in foetu humano. Neque valet, quod tunc non possit anima
in

in eo discursivas operationes ponere; si quid enim hoc probat, anima intellectiva nec debet in sortum recens natum induci; quia nec tunc potest discursum, aut libertatem exercere.

Obiic. 1. Philos. 2. degener. anim. c. 3. ubi loquens de anim. vegetativa: *Eam*, inquit, *primum haberi necesse esse apertum est: sensitivam etiam, qua animal est, tempore procedente, recipi. & rationalem, qua homo, certum est. nec enim simul & animal sit, & homo, nec animal, & equus.*

Sed si ita est, non trium modò, sed multò plurium animarum successio danda. ut enim in equo prius introducitur anima, qua fit animal, dein ea, qua fit equus, h. e. plures animæ sensitivæ: ita quia in homine vis sensitiva sensim quoque perficitur, plures sensitivæ animæ successivè introducentur; adeoque ad animam rationalem non nisi per longam seriem inferiorum animarum ibitur. quin etiam quia discursiva ipsa vis paulatim perficitur, admitenda erit rationalium animarum successiva, & gradualis introductio,

Duplex ergo esse potest aptior Philosophi sensus. 1. ut loquatur de vita in actu secundo; quatenus incipit homo ab operationibus vegetativis; tum ab his ad sensitivas, demum ad rationales progreditur. Neque opponas, loqui non de operatione, sed de principio; loquitur enim metaphysicè, & in sensu formali, ut de homine procul viso dicitur videri prius animal, quàm homo. 2. ut loquatur de vita in actu primo non substantiali, & remoto, sed proximo, & formali, qui involvit accidentalem organorum perfectionem, quæ tempore comparatur. Et quamvis organo non sit opus tanquam principio intelligendi, est tamen ad intelligendum etiam opus organo tanquam principio phantasmatis, quòd oportet intelligentem speculari.

Obiic. 2. cum P. Mauro. Non potest anima rationalis introduci, dum non est ipsi conveniens organizatio. at dum embryo incipit nutriri, nulla est talis organizatio; tunc enim non est caro, non ossa, non venæ, &c. sed lactea solum massa. ergo non introducitur tunc anima rationalis, sed solum vegetativa. Conf. 1. Anima rationalis manere non potest in corpore, cui sit caput abscissum. multò igitur minus induci potest in massam, cui & caput, & reliqua membra desint. plus enim requiritur ad introductionem, quam ad conservationem formæ. sic aqua conservari potest sine frigore intenso, sed sine eo produci non potest. Conf. 2. nulla forma introducitur in materiam dispositam indifferenter ad ipsam, & aliam. Sed massa illa lactea indifferens tunc est ad belluam, ac monstrum, in quod degeneret. ergo non est animæ humanæ capax. Conf. 3. si massa illa sit animæ capax, capax etiam erit animæ semen abscissum, quod non actu, sed virtute, & potentia est organizatum.

Ad arg. resp. Si nomine organizationis animæ convenientis veniat ea, in qua possit anima actu discurrere, argumentum probat nimis, non introduci scilicet, nisi post longum tempus rationalem animam. quod si veniat ea, in qua possit anima aliquam vitæ operationem sibi convenientem ponere, & ad reliquas materiam disponere, falsa est minor; omnium enim membrorum est in embryo rudimentum, dum inducitur anima, quæ ad suam perfectionem deinde promovet.

Ad 1. conf. anima non inducitur tunc in corpus nullis membris necessariis præditum, sed rudibus, & imperfectis. quare paritas non est ad rem. nec est ad rem paritas ducta à non viventibus; hoc enim habet sibi proprium vivens, ut perfectionem, ac magnitudinem suam à generante non acceptam sua sibi virtute tribuat.

hinc

hinc potest forma vivens in materiam imperfecte dispositam recipi: secus forma non vivens. Accedit, probari hoc argumento non posse vegetativam animam in embryonem induci, quæ scilicet ipsa in homine, cui caput sit abscissum, perseverare non potest.

Ad 2. conf. nego minorem; introducitur enim anima humana in corpus, quod est in via ad hominem, non ad belluam. dupliciter enim fœtus degenerare potest in monstrum, vel in monstrum, cui anima humana inesse possit; atque ita semper habetur dispositio ad hominem requisita; vel in monstrum omninò belluinum; atque hoc, cum careat à principio dispositionibus hominis, rationalem animam nunquam accipit.

Ad 3. conf. nego sequelam; neque enim ingreditur corpus anima, quod proximam aptitudinem non habeat ad aliquam vitæ operationem. at in semine nulla talis aptitudo: principium autem vitæ sine aliquo actu non est.

C A P U T VI.

Num omnis anima sit integraliter indivisibilis.

§. I.

Sola rationalis anima integraliter est indivisibilis.

HÆc propositio cum sit exclusiva, duas habet exponentes, scilicet anima rationalis est integraliter indivisibilis, &, non alia est præter ipsam anima indivisibilis integraliter. In præjacente conveniunt omnes. Ratio autem est ex triplici prædicato, quod animæ rationali competere supponimus; nam & est

spiritualis, & intellectiva, & libera. hinc autem quo pacto efficaciter deducatur integralis indivisibilitas secundum partes extensas (de qua una integritate est in præsentī sermo) latè in metaphysicis ostendam, ubi universim cuiusque spiritui extensionem repugnare ex his ipsi capitibus probabo. Accedit aliud ex animæ nostræ immortalitate inferiùs demonstranda argumentum. dum enim homini digitus abscinditur, pars animæ, quæ digitum informabat, vel manet, vel destruitur. non potest dici, quod manet; neque enim in digito, qui sanè post abscissionem, animatus non est, neque in alio subiecto; ad quod enim aliud subiectum migret? nec retrahi potest ad informandas alias ejusdem corporis partes; aliter plures partes animæ erunt in eadem parte corporis. Superest ergo, ut ea pars animæ destruat, adeoque anima rationalis immortalis non erit.

Altera propositionis pars, si loquatur de anima purè vegetativa, certissima est; aliter dubitare poterimus de formis etiam inanimatis. De sensitiva maior est dubitatio; nam D. Thom. cum suis censetur tenuisse perfecta animalia, qualis est canis, & equus, indivisibili anima prædita esse: imperfecta verò, qualia sunt insecta, divisibili. P. Maurus post Ripaldam in M. S. omnem animam sensitivam indiscriminatim facit indivisibilem. Nostra tamen resolutio, quam tuetur Scotus, Durandus, Saxonia, & Suarius in Metaphysicis retractans, quæ docuerat in lib. de Anim. probatur multipliciter.

Primò ex dicendis in Met. ubi latè ostendam conceptum proprium entis materialis esse divisibilitatem in partes extendi natas. quod si anima omnis brutorum materialis est, partibus confletur integrantibus oportet. Et quidem dicant adversarii, si possunt; in quodam

demum materialitas animarum eiusmodi indivisibilium sita sit. Dicunt, eas esse materiales per hoc, quod inesse, & operari pendent à materia. Sed contra est; quia nihil est in eodem genere cum alio, à quo pendet, per hoc præcisè, quod ab eo pendet, ut patet inducendo in aliis causis à materiali, & in ipsa materiali; neque enim accidens est in eodem genere cum substantia per hoc, quod pendeat à substantia materialiter: Ratio etiam id suadet; quod enim est unius generis pendere potest ab eo, quod est alterius; cum dependentia, quæ est prædicatum secundarium, fundari possit in mera contingentia, & indigentia, quæ prædicata sunt cum generis diversitate. Sic quamvis ponatur sensatio in sola rationali anima recepta, quod multi contendunt, non per hoc præcisè evadit spiritualis, si coextenditur materię, & quantitati.

Conf. ex actu vitæ dignoscitur viventis natura. hinc animam rationalem indivisibilem dicimus propterea, quod indivisibilis est eius operatio intellectiva. si ergo omnis operatio sensitiva sit divisibilis in partes, eodem pacto divisibilis statuenda est anima mere sensitiva. Atqui omnem operationem sensitivam esse divisibilem, ostendo; & incipio à sensationibus externis, præsertim visione, quæ inter externas est præcipua. species, sive lux, quæ ab objecto exteriori ad oculum transmittitur, divisibilis sanè est, & divisibiliter afficit. visio igitur ipsa partibilis est; nam species, quæ est in una parte retinæ, non producit, nisi sibi, visionem, & alia alibi, adeoque pars speciei partem visionis. Ad hæc si eadem sit indivisibilis in tota retiformi visio, videretur objectum constitutum extra eiectionem; nam etiam in ferior pars retinæ haberet visionem partis objecti sibi directè non oppositi: quod esse impossibile optici omnes, & experientia ipsa testatur.

Hinc fit, ut species quoque à visione ad cerebrum per nervos opticos transmissa sit divisibilis, cum producat à divisibili causa partibiliter operante in passum divisibile. Rursus species divisibilis in cerebro recepta, internam sensationem, seu phantasma non potest impartibile efficere ex eadem ratione, qua visualis species non potest indivisibilem visionem producere: tota ergo sentiendi æconomia per actus divisibiles perficitur; adeoque principium omne sentiens partibile est.

§. II.

*Occurritur argumentis animæ sensitivæ
perfectæ indivisibilitatem
probantibus.*

O Biic. 1. possibiles sunt formæ materiales omnino indivisibiles. ergo dantur de facto saltem in animalibus perfectis. conf. prob. 1. quia tales formæ constituunt novum genus entium ad universi perfectionem conducens: probabile ergo est, Deum operis sui perfectioni consulentem illas produxisse. 2 quia natura non procedit per saltus; & ab extremo non transit ad extremum, nisi per medium. Sed inter animam immaterialem indivisibilem, & materialem divisibilem mediat materialis indivisibilis. ergo à prima Deus non processit ad secundam, omittendo tertiam, quæ media est.

Argumentum est primò occupantis; similiter enim à possibilitate animæ sensitivæ perfectæ divisibilis possum ego eius existentiam inferre, ita saltem, ut aliquod perfectum animal divisibili, aliud indivisibili anima præditum sit ad varietatem, & pulchritudinem universi. imò & possem non viventes etiam formas nonnullas indivisibiles astruere. Nego
igi-

igitur antec. de cuius falsitate in Met. ex professo. tum eo transmissio. nego conf. ad 1. prob. certum est, hoc universum non esse in summo perfectionis secundum species, & genera entium, sed solum secundum gradus, & summa genera, ad quæ animal forma indivisibili constans non pertinet. Ad secundam, ea transfert proloquium certum in motu locali ad rerum productiones, ubi nulla ejus dicti certitudo, aut probabilitas. quid enim dum homo à cognitione muscæ ascendit immediatè ad Dei cognitionem; omissis cognitionibus infinitis mediis, num aliquam violat rerum exigentiam? Adde, quod saltus in productionibus conducit ad universi harmoniam: quemadmodum ad harmoniam conducit in Musicis (est exemplum Ægidii in quodlib.) saltus à primo ad tertium, aut quintum tonum, relictis mediis.

Obiic. 2. pars animalis perfecti à cæteris decisa protinus interit. ergo eadem est forma partis decisæ, ac remanentis. consequ. prob. si .n. essent distinctæ partes formæ; ut materiæ, possent illæ ut istæ conservari separatæ.

Conf. animalia non augentur per additionem partis formæ ad partem præexistentem. ergo eorum formæ carent partibus, antec. prob. quod crescit per additionem formæ, quo magis crescit, plus habet virtutis; crescit forma, quæ est virtus. sed animalia perfecta, quo plus habent molis, minus habent virtutis. ergo non crescit anima per additionem, sed per dilatationem perinde ut humana.

Argumentum instatur in parte minima insecti, quæ separata non vivit, & in parte etiam aliqua plantæ, quæ moritur sejuncta. Nego igitur conf. ad prob. dico non posse partes animæ divisas conservari propter connexionem unius cum alia, quæ nascitur exinde, quod una indiget alterius subsidio immittentis continenter spiritus vitales, & animales à corde, & à cere-

bro emanantes. hac enim immissione impedita, cum non possit ibi anima suas amplius vitæ functiones exercere. extinguitur.

Ad conf. nego antec. & minorem probationis; non enim video, in qua experientia nitatur: nunquid enim idem est virtutis momentum in magno, & parvo cane, in magno, & parvo equo, aut minus in illo, quam in isto? Quod si ea vera esset, nec probaret animæ indivisibilitatem; nasci enim posset ex distantia partium extremarum à mediis, ratione cuius spiritus immissi minus calidi, adeoque debiliores venirent.

Obiic. 3. Aristotelem l. de juvent. & senect. c. 1. ubi postquam dixerat. animalia imperfecta assimilari multis animalibus in unum condunatis, quod secta in plures partes, secundum omnes vivant, addit: *Optimè autem constituta animalia hoc non patiuntur, propterea quod natura ipsorum, ut possibile est, maximè una est.*

Forma indivisibilis Aristoteli ea est; quæ non suscipit divisionem quantitativam, ratione cuius possit plura composita, seu plura hæc aliqua constituere; in quo sensu nō negamus perfectorum animas brutorum indivisibiles asserere. Cæterum dum ait, *ut possibile est*, satis se explicat, quod non loquatur de indivisibilitate, & unitate omnimoda, sed solum de maxima possibili inter distincta, per unionem scilicet perfectissimam.

§. III.

Occurritur argumentis cujuscumque anima sensitiva indivisibilitatem probantibus.

○ Biic. 4. Bruta plurimas habent cum homine affinitates, ex quibus colligi potest, utroque

utrorumque animas esse pariter indivisibiles. Nam primò eadem penè est in utrisque varietas, & consonantia organorum, ratione cujus læsa manu, cor movetur; & apprehenso objecto noxio, appetitus è cerebro fugam imperat, quam pedes illicò exequuntur. talis consensus partium sine animæ indivisibilitate non constat. Constat animal exponit partes minùs præcipuas, ut præcipuas servet incolumes, quod est de serpente decantatum. at si aliæ essent partes animæ in aliis partibus corporis, contingere id non posset.

1. quia ut animal quodvis est de se magis, quàm de aliis sollicitum; ità quælibet ejus pars de se magis, quam de aliis partibus sollicita esse deberet. 2. quia una pars animæ non potest curare aliam, nisi quia est ea sibi conjuncta. ergo multò magis curat se, cui est identificata.

2. in brutis etiam operatio vehemens unius partis impedit operationem alterius, ut grandis dolor visionem, vel auditionem. Hoc autem non ità esset, si aliæ essent, & aliæ partes, ut contingit in plantis, & non viventibus, in quibus labefactata una parte, non idèò alia minus viget, & operatur.

3. supponimus bruta etiam cognoscitiva esse. hinc autem multipliciter deducitur indivisibilitas brutalis animæ. 1. vel plures partes singulæ sunt cognoscitivæ, vel una tantùm. hoc secundum est intentum; jam enim admittitur anima sensitiva cognoscitiva pluribus partibus non composita. Si plures, unam animam non constituunt; neque enim plura cognoscencia possunt unum cognoscens componere magis, quam plures animæ rationales unam.

2. Lupus videns ovem format ejus speciem; quam retinet etiam, dum ovem non videt; ex quo deinde movetur ad ovem ipsam quærendam. Sed fieri id non posset, nisi eadem esset anima oculi, & cerebri; aliter pars animæ existens

in cerebro imaginaretur obiectum non visum à se, sed ab alia parte distincta, & localiter separata: quod perinde est impossibile, ut me formare speciem obiecti non visi à me, sed ab alio.

3. Dum canis cognoscit, & appetit panem, fingi non potest, quod una pars animæ unam partem panis, & alia aliam cognoscat; sic enim nulla pars animæ, adeoque nec anima ipsa totum panem cognosceret, eo pacto, quo si duo intellectus singuli singulas unitates cognoscerent, non dicerentur cognoscere binarium.

Resp. ad singula. ad 1. consensus inter partes nascitur ex subordinatione omnium ad partem appetitivam in cerebro residentem, ubi est origo nervorum, per quos veluti per habenas partes reliquas, ac potentias appetitus regit. hinc apprehenso noxio, impelluntur, aut alio modo excitantur ab appetitu nervi, per quos fuga à pedibus arripitur. Sensus autem doloris est in ipso appetitu per immissionem speciei à parte læsa quantumvis dissita; dum enim percipit partem sibi coniunctam, ad suique integritatem facientem aliquid pati, ut doleat, necesse est. Ad conf. nego partem spontè se exponere, ut caput servet, cum potius quippè, non cognoscitiva, exponatur à capite, ubi residet appetitus, ut dictum est.

Ad 2. illud, si verum est, non ex indivisibilitate provenit, sed ex eo, quod dum una pars vehementer operationi incumbit, accurrit ad ipsam magna spirituum vis; adeoque his destitutæ reliquæ partes; aut valdè segniter, aut nullo modo sua exequi opera valent.

Ad 3. falsum est, ex ratione cognitionis ex genere inferri legitimè principii cognoscentis indivisibilitatem. Ad 1. in contrarium dico, plura cognoscentia inadæquata, si materialia sint, posse unum inadæquatum cognoscentem constituere. est enim vis cognoscitiva materialis quod.

quoddam veluti speculum referens obiecti expressam imaginem. à speculo autem uno obiectum refertur unum, quamvis referatur divisibiliter, & per partes. De animabus rationalibus non est par; sunt enim plura adæquata cognoscencia, ut de quolibet principio intellectivo probabitur in Metaphysicis.

Ad alterum dico, ad illud non requiri identitatem animæ oculi, & cerebri, sed satis esse, si animæ pars, quæ est in oculo, speciem immittat ad partem, quæ est in cerebro, ubi efficiat imaginationem, & phantasma. Quia verò species phantastica non potest per medium exterius, sed interius dumtaxat propagari, fit, ut visio non possit phantasma in supposito distincto progignere.

Ad ultimum. pars animæ canis existens in organo phantasiæ totum panem divisibiliter repræsentat, eundem divisibiliter appetit. Quod si nomine expressionis totius veniat cognitio indivisibiliter omnes partes attingens, & comparans, aut colligens, ut est in nostra cognitione formante numerum, admitto à brutis non cognosci hoc pacto obiectum totum, cum hoc sit proprium cognitionis humanæ comparantis, & enunciantis, sed cognosci obiectum totum, ut vulgò dicimus à speculo referri totum hominem, & à statua totum Cæsarem. Non negaverim sensitivæ facultati vim omnem comparandi, cum cognoscat bonum suum, adeoque illud comparet aliquo modo sibi: sed hoc ipsum divisibiliter fit, quatenus pars animæ partem obiecti sibi bonam existimat.

Obiic. ult. anima sensitiva nec habet partes homogeneas, nec heterogeneas. ergo nullas. prob. prima pars antec. sic enim singulæ partes essent visivæ, auditivæ, imaginativæ, &c. quod non rectè asseritur; cum enim una tantum pars debeat imaginari, & appetere, alia tantum videre, alia tantum audire, frustra in
reli.

reliquis ejusmodi perfectiones , & potentiz multiplicantur . Præterea in diversis partibus animalis diversæ operationes exercentur , diversæ dispositiones exiguntur . hæc autem diversitas est ab intrinseca animæ exigentia , adeoque partes ipsæ formæ viventis heterogeneæ substantialiter sunt ; non enim ex alia ratione forma equi à forma bovis substantialiter differt .

Prob. secunda pars ejusdem antec. sic enim partes non possent invicem continuari ; quæ enim diversæ sunt rationis non continuantur , teste Philof. 5. phys. Deinde esset una pars solum visiva , alia solum auditiva , &c. imò & pars solum vegetativa , & nullatenus sensitiva . ex quo fit , animæ partes non solum specie , sed genere differre ; adeoque animal non esse unum per se , sed per accidens .

Resp. neutram partem satis improbari . Nego igitur antec. & ad primæ partis improbationem dico , quamlibet animæ partem habere omnem potentiam toti animæ convenientem , nec propterea esse frustrà . frustrà enim est potentia , quæ per se loquendo nunquam reducitur in actum , non verò , quæ in actum non reducitur per accidens , ex defectu scilicet principii , vel applicationis ad agendum . sic est potentia motiva ad visionem in pluribus obiectis , quæ nunquam tamen ad sui visionem movebunt .

Dices , ergo pars animæ visiva ponitur , ubi non potest exercere visionem , & imaginativa , ubi non potest imaginari . hoc autem ita est impossibile , ut est impossibile ex ostensis superius statui animam humanam in corpore belluino , ubi non potest exercere operationes humanas .

Eadem hæc instantia fieri potuisset adversus animam ipsam rationalem , quæ ponitur in parte aliqua , v.g. ossē , ubi nullam hominis propriam operationem exercere potest . Com-
para-

paranda igitur est tota anima cum toto corpore; & quia est forma diversimodè operativa, exigit corpus ità dispositum, ut alicubi operari non possit juxtà meritum potentiae, virtutisque suae. oppositum enim quavis cederet in bonum partis, esset tamen malum totius, cui primò intendit natura prospicere. Quod si anima rationalis brutale corpus ingrederetur, cogeretur in organum omninò impropor-
tionatum.

Ad improbationes alterius partis, resp. ad 1. falsum universim esse, quæ diversæ sunt rationis, non posse continuari; nam Philos. idem 5. Met. cap. 4. dicit, *Contingere aliqua esse unum secundum continuationem, & secundum quantitatem, & non secundum qualitatem*, hoc est secundum formam, ut patet ex contextu, & omnes exponunt. Ad 2. fatendum est ex pluribus speciebus incompletis constitui posse unam speciem, ut ex corpore, & anima totum. Sicuti autem dantur species incompletæ naturaliter, ità & integraliter, invicem connexæ, ordinatæque ex connexione, & ordine operationum unius ad operationes alterius, totum autem ex his conflatum physicè integraliter est unum, estque unum præterea Metaphysicè secundum speciem, quatenus est ab eo abstrahibilis una ratio, quæ numero tantum multiplicabilis sit.

C A P U T VII.

An, & quas corporis partes anima informet.

ANimam etiam rationalem esse corporis formam definitum est in Lateran. & cap. 1. probatum. Superest evellendus scrupulus; sunt enim, qui rationalem animam formam corporis autumant, non tamen quæ rationalem.

lem. 1. quia sic habet operationem à corpore independentem, nec materiæ coniunctam. 2. quia sic est spiritualis, adeoque non dicens proportionem ad uniri cum materia. 3. quia sic non iuvatur, sed impeditur à corpore ad intelligendum saltem perfectè: nulla autem forma unitur subiecto per rationem, qua impeditur ab eo ad operandum.

Hæc limitatio; qua utitur Caietanus trahi potest ad bonum sensum, quatenus intellectivitas non est ratio unionis animæ cum corpore; aliter Angelus etiam materiæ uniretur. Cæterum non est usurpandus; 1. quia est falsa in sensu reali, ac physico; quidquid enim est in anima perfectionis, corpori coniungitur. 2. quia intellectivitas animæ propria, quæ dicitur rationalitas, exigit speciali titulo coniunctionem cum materia propter dependentiam à phantasmate; quæ est etiam animæ operatio, & per hæc patet ad primum in oppositum. Ad 2. nego spiritualitatem improprietate proportionare corpori animam; hic enim non attendenda proportio in genere entis, sed actus, & potentiæ, perfectivi, & perfectibilis. Ad 3. materia iuvat animam ad intelligendum, quatenus illi subministrat per sensus rerum species, quas intelligat, ut deinde in hac ipsa perfectione se anima in maius promoveat, donec à corpore seiuncta ad perfectum omnino intelligendi modum perveniat.

Videndum nunc, quæ sint viventis partes anima affectæ. Eiusmodi partes in quadruplici sunt classe. aliæ sunt perfectè solidæ, ut ossa, nervi, membranæ, cartilaginee, & similes. aliæ perfectè fluidæ, ut vulgati quatuor humores, quibus accedunt lac, & semen. aliæ inter has mediæ, ut caro, medullæ, adeps. aliæ demum excrementitiæ, ut urinæ, fæces, sudores, &c. quas quidem certum est animatas non esse, cum secernantur, eilcianturque tanquam

quam inutiles ad vitam. Præcipua hic est de humoribus, præsertim sanguine, controversia, tum de partibus semiexcrementitiis, unguibus, & capillis.

Dico 1. nec sanguis, nec humor alius animatur. Prob. 1. nulla est vitæ operatio à sanguine exercita. ergo non est in sanguine vita, conf. est certa; neque enim principium vitæ est in subjecto, nisi ut vivat; adeoque non est, ubi non vivit. ant. prob. non est apta sanguini alia vitæ operatio, quam vegetativa; evidens enim est, quod nec sentit, nec intelligit. at sanguinem non vegetare exinde constat, quod non crescit per introsusceptionem per organa proportionata ab intrinseco perfectam sed eo prorsus more, quo aqua in vase.

Prob. 2. sanguis est alimentum. ergo non vivit. antec. supponitur, ut communis Medicorum sententia. conf. prob. alimentum debet vi nutritiva mutari in aliti substantiam; sed quod jam vivit, non potest sic mutari, ut patet; cum mutatio ad vitam importet vitæ præviā privationem.

Prob. 3. anima non informat partes à corpore discontinuatas, ut est experientia certum. sanguis reliquo corpori continuus non est. ergo anima non informatur. min. patet; ita enim sanguis comparatur ad venas, ut aqua ad vas, in quo continetur; quis autem dicat, aquam continuari cum vase, aut universim fluidum cum solido? Nec sanguis ergo, nec alius quivis humor (etiam lac, & semen, quæ à sanguine non nisi accidentaliter distant) est animatus, præsertim cum idem in omnibus defectus vitalium organorum. Atque eadem est planè ratio de spiritibus, qui sanguinis ipsius tenuiores sunt partes, ac veluti flores.

Opponitur 1. sanguis est pars animalis, ut fert communis sensus suppositus etiam à Tri-

den

dentino fess. 13. c. 3. ex quo mutilum censetur animal sanguine privatum plusquam si manu, aut pede alterocareret. Omnis autem eiusdem compositi pars forma ipsa compositum constituente informatur.

Resp. ex D. Thom. 3. p. q. 31. art. 5. ad 1. sanguinem vocari partem non, quia est pars, sed quia est in proxima potentia ad esse partem. Cæterum ut non sit in rigore pars, ut pes, & manus, est tamen pars minus stricta, ut hæc sonat naturale complementum viventis ad exercenda opera vitæ, quæ solet à quibusdam dici pars integralis secundaria, quamquam quia sanguis mini strat continetur & nutritio- ni alimentum, & instrumenta sensationi, plus etiam quàm quædam partes primariæ necessa- rius viventi est.

Opponitur 2. motus ab intrinseco est vita- lis. sanguini competit motus ab intrinseco. ergo competit motus vitalis; adeoque vivit. min. prob. nam & intra venas assidue movetur, & fluit: ex affectu pudoris profilit in faciem; ex timore colligitur in cor; per iram efferve- scit, &c. ergo movetur ab intrinseco.

Nego min. quæ si vera esset, sanguis non mo- dò vegetaret, sed & sentiret; vita enim loco- motiva sensitivam sequitur. ad prob. dico, tales motus inesse sanguini ab extrinseco, vel ab influxu novi sanguinis denuò geniti, & prio- rem impellentis, vel à valis compressis, ac di- latatis, vel à spirituum agitatione.

Opponitur demum locus Levit. 17. *Anima carnis in sanguine est*. Sed sensus ex Augustino est, quod anima, seu vita animalium multi- pliciter pendet à sanguine, quia ab eo accipit vivens & alimentum ut nutriatur, & juvamen ut sentiat; eoque sublato nec nutrirî amplius, nec sentire potest.

Dico 2. Capilli, & ungues animantur, non anima totius, sed speciali vegetativa. Prob. 1. pars;

pars; nutriuntur enim per alimenti intro-
spectionem, ut constat ex eo, quod tenues
primùm in pueris, paulatim crescant in om-
nem partem, habentque certum magnitudinis
suae limitem. praesertim est in capillis certa
organorum conformatio, quae microscopio de-
prehenditur, cavitatibus, & canaliculis inter-
secta, qui sanguine etiam in Polonicae plicae
morbo replentur.

Prob. 2. pars. 1. quia isti habent rationem
excrementi non planè inutilis, sed facti quā
ad ornatum, quā ad tutelam. quare rescan-
tur, dum praeter modum succrescunt. non be-
nè autem natura comparatum esset, ut par-
tes animalis ab animali resectae proiiceren-
tur. Ad hæc, teste Philos. 3. de hist. Anim.
cap. 11. isti quandoque post animalis interi-
tum excrevere, quousque excrementitii hu-
mores ipsorum nutritioni deservientes perse-
verarunt. Non possunt ergo communem to-
tius animalis vitam vivere, sed propriam me-
re vegetantem, qua se habeant veluti plantæ
in reliquo corpore radicatae. Eadem porro est
ratio de squamis piscium, de aculeis herina-
ceorum, & à fortiori de plumis avium, quæ sa-
nè perindè moriuntur, & augentur, ut reliqua
vegetabilia.

C A P U T VIII.

*Num anima rationalis sit à corpore independens,
& immortalis.*

A Nimam nostram à corpore non pendere,
ac proinde immortalem esse, Catholica
est veritas, ut latè ostendit Suarez. l. 1. de Anim.
c. 9. & 10. De fide prætereà esse, quod ea demon-
stretur immortalis, censuit Melchior Canus
lib. 12. de locis Theol. cap. 15. prop. 3. ubi
nimis audacter loquitur adversus Scotum
de,

demonstrari veritatem e. m. negantem . Sed hoc alii viderint . mihi satis in præsenti erit ad rem ipsam accedere , & animæ immortalitatem multipliciter demonstrare .

S. I.

Anima immortalitas physicis rationibus demonstratur .

QUamquam authoribus, qui naturales pro hac veritate rationes elidere conantur omnes, nullam possim notare inurere, laudare tamen eos nequeo; melius enim multò operam locassent suam in hoc totius honestæ vitæ fundamento stabiliendo, quàm diluendo. Neque verò universim satis est Fides; quamvis enim ea certius aliquid scientia ipsa conficiat; non tamen conficit, nisi credentibus factæ jam revelationi; cum tamen animæ immortalitas ad honestam vitam in quovis ordine, etiam ubi facta revelatio nulla sit, veritas sit omninò necessaria. Fateor equidem, rationes, quas afferam, non eas esse, quæ protervum hominem, vitiisque, & erroribus occupatum valeant convincere omninò; sed essetamen eas, quæ possint sedatum, ac solius veritatis amore tactum ingenium in hanc sententiam ità pertrahere, ut nullam de opposita relinquant vel probabilem suspicionem.

Arguo igitur 1. Forma omninò independentes à corpore secundum esse, non potest separata perire, adeoque est immortalis. Anima intellectiva secundum esse est à corpore omninò independentes. ergo separata non perit, adeoque est immortalis.

Prob. maior. nulla forma perit, nisi per expulsionem à subiecto, sine quo existere naturaliter non possit. Sic pereunt accidentia, introductis contrariis. Sic perit impetus, natura

tura mobilis repugnante. A priori id ipsum est evidens ex eo, quòd nihil perit defectu ejus, à quo nullatenus pendet: Accedit, quod forma ejusmodi si periret, annihilaretur. nulla autem annihilatio est naturalis; aliter possemus dubitare, an materia quandoque annihiletur. id ipsum communiter probatur ex eo, quòd natura non potest destructionem intendere, ut certè intenderet, si annihilationem exigeret, quæ scilicet ad alterius bonum, productionemve conferre non potest.

Prob. minor. Quod habet operationem à materia independentem, esse pariter habet à materia independens. Sed intellectio, quæ est propria rationalis animæ operatio, à materia non pendet. ergo esse animæ est à materia independens. maior constat; non enim potest operatio habere perfectionem, qua principium suum excedat: ex quo vulgatum est illud, Modus operandi sequitur modum essendi, eique proportionatur. & hinc solemne omnibus Philosophis est, ex perfectione operationis, & effectus colligere perfectionem principii. non potest ergo operatio esse immaterialis, & inorganica, quin talis etiam sit anima, à qua procedit.

Minor autem secundi huius syllogismi prob. 1. vis intellectiva si ab organo in operando penderet, organo per ætatem debilitato, deberet in cognitionem imperfectiorem erumpere. Sed oppositum contingit in senibus, in quibus, debilitato organo, acrior est, & perfectior intellectiva virtus. ergo intellectio ab organo non pendet. 2. quod ab organo pendet ut à subiecto, læditur ab obiecto excellenti; ut patet in senibus. Sed tantum abest, ut vis intelligens ab intelligibili excellenti lædatur, ut perficiatur magis, & ab eo ad inferiora immediatè descendens, melius cognoscat; quare assuetus Metaphysicis de Deo specu-

cularionibus, reliqua expeditius apprehendit. 3. arguit D. Thomas. Organum mediat inter potentiam, & objectum. at nihil est medium inter virtutem, & ipsam virtutis essentiam. ergo nullum est organum virtutis reflectentis immediate supra se ipsam. at vis intellectiva in se immediate reflectit, ergo ad intelligendum organo opus non est. 4. demum. vis abstrahens à tota materia, ut ab objecto, non indiget materia ut subiecto. vis intellectiva hoc pacto abstrahit; ascendit enim ad rationes universalissimas Deo, & creaturis, intelligentiis, corporibusque communes. ergo ut operetur, subiecto materiali non eget. maior prob. subiectum materiale est necessarium, ut recipiat impressiones objecti materialis, ac sensibilis, easque ad potentiam transmittat. quod igitur à tali objecto abstrahit, eius impressionibus non eget, adeoque non eget materiali subiecto.

Dices, anima pendet à materiali phantasmate, ut ab objecto; non enim intelligimus, nisi per conversionem ad phantasmata. ergo juxta nostrum arguendi modum pendet à materia, ut à subiecto.

Dist. ant. pendet à phantasmate inchoative, concedo; perfective, nego ant. & conf. principium nostræ cognitionis est à sensibus, & phantasmate; sed perfectio phantasma omnino excedit, illudque non raro relinquit. id autem est certum in cognitionibus judicativis; judicamus enim Deum, & Angelos non ita esse, ut apprehenduntur ad modum entium materialium. Idipsum est verum non raro in ipsis apprehensionibus; & tota serie cognitio- num; fuere enim non pauci extasim naturaliter passi, ut testatur August. 14. de Civit. cap. 24. Præter hæc qui speculantur, novæque rationes inveniunt, quibus rem Philosophicam, ac Theologicam quotidie di-
tant,

tant, nunquid eas à phantasmatibus mutuantur.

Arguo 2. Si anima intellectiva esset corpori immersa, mutaretur, & necessario mutaretur ad corporis mutationem; unde animi mores necessario sequerentur corporis temperamentum. consequens evidenter est falsum. ergo & antecedens. prob. sequela tum exemplo. sensus, ac sensitivi appetitus, qui ex hoc, quod materiales sunt, necessario trahuntur à materiæ mutatione. tum à priori; quod enim ab organo pendet, materiale est: nullum autem materiale libertatem habet, qua possit sese supra corporis inclinationes elevare. Præterea quod ita pendet, non habet aliud bonum præter corporeum, & materiale; adeoque non potest per suum arbitrium materiale omne bonum sensibile contemnere, sed necessario debet se corporeis dumtaxat obiectis accommodare. Falsitas autem consequentis est evidens: sic enim omnes essemus natura boni, vel mali, adeoque præmii, ac pœnæ incapaces perinde ut belluæ. nemo posset præter naturam, aut contra consuetudinem operari, ac voluptates corporeas omnes despiciere; quas tamen de facto ii despiciunt, qui Christianæ legis præcepta ad amissim observant. nemo denique liber esset, sed ad omnia naturali impetu moveretur. quæ quidem si admittantur, non civilis modo, quanta est, Philosophia, sed & ipsa humanitas evertitur.

Arguo 3. Veritas ab omnibus gentibus, contrariis licet moribus, animisque concessa, est veritas evidens. talis est animæ rationalis immortalitas. ergo. Majorem in Metaphysicis latè ostendam, ubi *de Dei existentia, & de potentia creativa creatura incommunicabili.* Minor est certa; quia talis veritas non solum asseritur à Christiana, quæ vera est religio, sed etiam ab aliis omnibus, quoquot unquam fuerunt, religionibus, seu superstitionibus Græ-

cis, ac barbaris, & hoc etiam tempore seu Ethnicis apud Indos, seu Mahometanis apud nos: omnes denique cultæ, incultæque nationes animam usque immortalem asseruerunt. Non ergo animæ immortalitas figmentum est, neque enim potest falsitas apud omnes gentes universalis, & uniformis esse.

§. II.

Anima immortalitas ex moralibus principis demonstratur.

Arguo 4. Mundi huius gubernatio iustissimis Providentiæ legibus transigitur. ergo anima hominis est immortalis. antec. ab Epicureis licet negatum, merito assumitur ab Aristotele, ut naturaliter evidens ex ipsa rerum omnium exigentia, dum ait in fine 12. Met. *Entia nolunt male gubernari.* conf. prob. Iniqua est gubernatio, qua vitia præmiis, virtutes suppliciis plectuntur. Contingit autem in hac vita sæpissimè, ut scelus impiis feliciter cedat: piis verò virtus calamitosè. nisi ergo anima immortalis sit, & post mortem perseveret, ubi pœnas, ac præmia pro merito accipiat, non rectè Mundus hic gubernatur.

Tria sunt, quæ possunt huic argumento opponi. 1. non esse evidens, quod Deus pœnas, ac præmia retribuatur, cum possit ab utrisque pro sui domini plenitudine abstinere. 2. Iustos in ipso actu virtutis sufficiens præmium, scelestos in ipso scelere supplicium habere. 3. Argumento probari quidem animæ ab exitu perseverantiam, non tamen æternam, sed solum quousque pœnas luat, præmiisque debitis fruatur.

Prima responsio reiicitur. 1. unusquisque enim de Deo, ut de iustissimo Iudice, solo naturalis luminis ductu, præsumit non relictum

rum crimina sine vindicta, nec virtutes sine corona. Saltem ergo physicè est evidens, pœnas, & præmia ipsum de factò rependere. 2. quamvis nolit pro arbitrio Deus punire, aut præmiari, evidens tamen est, ita poscere ex natura rei universum; nulla enim est rectè instituta resp. in qua sceleris pœna, virtuti retributio constituta non sit. at petere aliquid naturaliter impossibile universum non potest, ut peteret, si anima per suam naturam immortalis non esset.

Altera responsio, quæ est de penu Stoicorum, manifestè convincitur inepta. præmium enim, & pœna à Legislatoribus additur, ut homines à sceleris turpitudine non deterritos, & à virtutis honestate non illectos, avertat à scelere, & ad virtutem trahat. præmium autem, & pœna à Stoicis proposita inepta ad hunc finem sunt, ut est per se evidens. magis ergo inepti ipsi, qui talia proponunt.

Nec stat tertia. Mitto enim, quæ à Theologis dicuntur de æternitate præmii, ac supplicii: Certè si anima petat per annum v. g. post mortem durare, peccare adhuc, aut honestè agere tunc potest. Jam verò non posset tunc præmium accipere, ut patet, nec supplicium; quia annihilatio naturaliter tunc debita pœnæ locum implere non potest. Accedit, quod §. superiore satis est ostensum, animam perseverantem in esse extra subiectum non posse naturaliter desinere; aliter dubitare possemus, an materia, quæ de factò est, post aliquot secula sit naturaliter annihilanda. Audiatur in hanc quoque sententiam Seneca epist. 58. ita philosophatus. *Hoc quidem, inquit, certum habet, si superstes (animus) est corpori propter hoc illum nullo genere posse perire, propter quod non perit. quoniam nulla immortalitas cum exceptione est: nec quicquam novum æterno est.*

Arguo §. ex duobus principiis apud Ethni-

cosevidentibus. 1. est. Fortitudo, quæ terribilia, mortemque contemnit, honestissima est. Atqui data animæ mortalitate, vitiosa, & scelestæ esset fortitudo. ergo anima non est mortalis. min. prob. Virtus est dispositio perfecti ad optimum, quia disponit potentiam, ut se perficiat per operationem, qua ad optimum finem, seu felicitatem perveniat. at si anima mortalis esset, aliam felicitatem non haberet; nisi eam, quæ potiri in hac vita potest. morsergo ut vitam, ita & felicitatem hominis interimeret. Sic igitur arguo. Quæ operatio felicitatem tollit, non est hominis quæ talis perfectiva, sed imperfectiva maxime, adeoque non virtuosa, sed scelestæ; atqui amplexus mortis pro patria, qui est Fortitudinis potissimus actus, aufert homini cum vita felicitatem; ergo non est virtutis, sed vitii actus, adeoque non virtus est, sed vitium fortitudo.

Alterum est. nullus potest esse actus virtutis, præsertim si sit virtutis maximæ, & difficillimæ, qui per se non sit præmiabilis; nam & virtus à natura habet, ut sit præmiabilis, & maior virtus præmiabilis magis. atqui habenti animam mortalem mors pro patria, qui maximæ virtutis est actus, præmium accipere non posset, ut patet. Accedit, quod in præmiabilitas redderet mortem honestiorem; crescit enim mortis difficultas, adeoque & actus honestæ ex hoc, quod mors sit totalis interitus, nullumque propterea speretur post fata præmium; absurdissimum autem ex terminis est, ut sit honestas, cui propria ex genere est præmiabilitas, in impræmiabilitate fundata: & quod ex eo capite, ex quo crescit honestas, decrescat, imò & tollatur omnino præmiabilitas.

Arguo demum 6. & comparo duo hæc iudicia, *Anima est mortalis, Anima est immortalis.* nunc sic. Non potest ex his illud esse falsum, quod totius honestæ vitæ est fundamentum, & illud verum,

verum, quod vitam deordinat, & honesti conscientiam labefactat. Sed primum iudicium honestatem morum evertit, & in omne scelus rapit: secundum contra, ergo non potest illud esse verum, hoc falsum. min. probatione non indiget: satis est istos inspicere, quibus animæ immortalitas fabulæ loco est. Major ostenditur. Falsitas non potest per se conducere ad honestatem; cum enim honestas ad felicitatem, falsitas etiam ad felicitatem conduceret. quod quidem ita est evidenter falsum, ut est falsum evidenter, posse malum hominis per se facere ad summum eius bonum. falsitas certè mala est homini, eiusque intellectus imperfectiva. Dixi *per se*; quia non inconvenit, errorem per accidens ad honestatem, felicitatemque conferre, ut cum ex errore, quo dives putatur pauper, movetur quis ad actum misericordiz. Cæterum in hoc ipso casu operatur homo ex principio vero, & evidenti, honestum scilicet esse actum, si putetur honestus; adeoque elicitur tunc actus ex veræ honestatis effectu.

§. III.

Occurritur argumentis in anima immortalitatem pugnantibus; & mens Aristotelis de hac re aperitur.

O Biic. 1. Anima rationalis non potest primò esse, nisi in subiecto: ergo pendet in fieri, & esse à subiecto, adeoque materialis est, & mortalis. conf. prob. aliter nihil esset, cur naturaliter etiam non posset, aut deberet esse ante, & extra corpus.

Nego consequ. & assumptum probationis. anima enim, ut ad sui creationem supponat corpus tanquam conditionem non tamen tanquam causam materiale. Ratio autem, cur ani-

ma licet immortalis corpus exigit, in quo creetur, est prima; quia modus efficiendi proportionatur modo operandi. ut ergo anima petit cognitionem suam inchoare ab objectis materialibus, ita & petit esse suam primò poni in materiali subiecto. secunda est; quia vel anima primò posita extra corpus intelligeret, vel non. si non; ergo nihil ageret; quod principio vitali ex alibi dictis repugnat. si sic; intelligeret sanè sine sensuum ministerio, adeoque ad immaterialia immediatè afflueret, & Angelico more omnia perciperet. hoc autem fieret, ut non posset amplius naturaliter corpus ingredi; transiret enim à perfectoad imperfectum statum, cum potius naturæ ordo postulet gradum ab imperfecto ad perfectum. Rursus cum in corpus ingressa nihil sciat, migraret à scientia ad ignorantiam, quod naturale, h. e. rerum exigentiis conforme esse non potest. Neque dicas, hoc illi contingere in poenam: Neque enim apta est peccanti poena, poni in statu, in quo p'scasse se nesciat, adeoque nec doleat, nec p'niteat; cum tamen maximè connaturale sit peccati supplicium conscientia, ac dolor.

Obiic. 2. Intellectus intelligendo defatigatur. est igitur organica, adeoque materialis, mortalisque potentia. antec. satis probat experientia. conf. prob. defatigatio exindè est uniçè, quod patitur organum, dum longo, intensoque labore à debita dispositione digreßetur. quod ergo defatigatur, ab organo pendet in operando.

Nego antec. experientia enim probat, hominem, intelligentem animis attentè, defatigari, non intellectum. id autem accidit, non quia intelligit, sed quia simul phantasiatur: quæ est materialis operatio organo indigens, & immersa. Itaque intellectus ad summum per accidens ratione operationis coniunctæ pendet

ad organo, non autem per se, & ratione sui. Et hæc quidem operationum intelligendi, & phantasiandi connexio in causa est, cur ab organi perfectione, aut læsione vis etiam intelligendi perficiatur in nobis, aut lædatur.

Obiic. 3. Quod est receptivum contrariorum, est alterabile, & corruptibile, anima recipit contraria; nam ex mala fit bona, ex errante sciens, aut è contrario. ergo alterabilis est, & corruptibilis.

Si omnis contrariorum susceptio alterationem strictam, & corruptionem faceret, materia prima corruptibilis esset. Requiritur ergo: ut ex contrariis alterum pugnet non solum cum altero, sed etiam cum subiecto: quod in anima non contingit; nam error, & peccatum licet aliquantulum disconveniant, aliquantulum tamen animæ conveniunt, eiusque naturæ consona sunt. nam etiam dum errat, aut peccat, fertur in veritatem, ac bonitatem apparentem, adeoque stat intra sphaeram objecti sui perfectivi. Requiritur præterea, ut contrarium inductum sit alterius naturæ proprietas, quam proinde in subiecto exigit, atque ita naturæ, quam reperit, interitum moliat. error autem, & culpa id certe non habet.

Obiic. 4. Philosophum pluribus in locis mortales animas docentem. 3. de An. 1. 20. duplicem intellectum distinguit activum, & passivum: passivum autem (is est, quo anima intelligit, imò anima ipsa) corruptibilem statuit. Docet præterea Mandum esse æternum: negat infinitum in actu, & animarum transmigrationem: quibus positis, necesse est animam esse mortalem. 1. phys. & alibi admittit, ut certum principium illud, *Ex nihilo nihil fit*, negat ergo possibilem creationem; adeoque animam censet eductam, & proinde mortalem: 2. de Cælo 1. 18. ait, nihil violentum esse perpetuum. status autem animæ separatæ violentus

est ; ergo anima non potest æternum vivere separata. 1. Eth. c. 10. Solonem reprehendit, qui dixerat, hominem in hac vita felicem esse non posse, sed posse post mortem. hoc autem absurdum reputat in sua sententia, quæ felicitatem in operatione constituit. Censet ergo animam corpori non superesse, quæ operetur, & sit felix.

Sed ut ut ista se habeant, indubitatum est melioribus Peripateticis, Aristotelem non docuisse modo, sed etiam demonstrasse animæ humanæ immortalitatem solidis rationibus, quas supra attuli, non fucatis, qualem Cartesius, ut aliquid de suo diceret, audiretque Magister, & inventor ab idea petitam protulit in medium probantibus suis, ridentibus doctis. Satis est legere tertium librum de Anim. à tex. 1. ubi emersionem intellectus à materia pluribus afferit. tex. 4. ait, necesse esse, ut, quoniã omnia intelligit, immixtus, h. e. immaterialis sit. quod probat tex. 5. aliter fieret calidus, & frigidus, & esset ei aliquod instrumentum, sicuti sensitivo : quod tamen nullum est. tex 7. id probat ; quia sensus læditur à vehementi sensibili ; sed intellectus perficitur à vehementi intelligibili : tum concludit, *Sensum esse non sine corpore, intellectum vero separabilem esse.* 3. de gen. Anim. c. 3. cum dixisset, animas omnes educi de seminis, & materiæ potentia, rationalem excipit his verbis : *Restat igitur, ut mens sola extrinsecus accedat, eaque sola divina sit ; nihil enim cum ejus actione communicat, actio corporalis.* Idem habet 10. Eth. c. 7. & 8. & alibi.

Ad primam autoritatem in contrarium resp. nomine intellectus passivi non venire ibi intellectum, sed phantasiam. Hæc interpretatio, quæ videtur extorta, est manifesta ex contextu, nam tex. 19. probat à fortiori, intellectum agentem esse immortalem, quia possibilis, seu passivus est immortalis. *Semper enim* inquit,

inquit, *honorabilius est agens patiente, & principium materia*. dum ergo tex. 20. concludit intellectum passivum corruptibilem esse, non potest aliud à phantasia intelligere, quæ, ut dicitur 1. Eth. participat aliquammodo rationem. Ad 2. Philosophus Mundi æternitatem, & animæ immortalitatem sine dubio asseruit: in aliis ambiguus fortasse fuit, ut superius lib. 1. est dictum. Cæterum argumentum non probat, quæ fuerit, sed quæ debuerit fuisse mens Aristotelis, quod non est præsentis indaginis. Ad 3. sensum illius dicti germanum dabimus in Methaphysicis; ubi de creatura quavis ad creandum insufficiente, & juxta eum sensum probabile est locutum esse Philosophum. Ad 4. nego, statum separationis esse animæ violentum: de qua re in Ethicis ex professo. Ad 5. non negat ibi Philosophus animam, quæ superest, sed hominem, qui non superest, post mortem esse felicem. Cæterum 10. Eth. cap. 8. ait, quod mens post mortem est felix felicitate quadam supra hominem divina, & separata.

C A P U T IX.

Nam sit, & quid sit in brutis anima cognoscitiva.

Post assertam animæ nostræ immortalitatem asserenda est cognoscitivitas belluinæ, quam illi scilicet per summam injuriam unus post homines natos eripere ausus est, tot novitatum adversus compertissimas veritates molitor ille, Cartesius. Sed nihil fortasse eius principiorum vanitatem evidentius demonstrat; quam quod ab iis factis testis servandis, ut in omnem naturam unice pervadentibus, & compulsus est homo, ut sensum etiam brutis adimeret. In quo est merito,

R. 5. quod

quod regeramus Cartesianis convicium vulgo in Peripateticos iactatum, quasi post Aristotelem pedibus more pecudum abeuntes.

Andiendum ergo prius est, quid Philosophus iste insignis, & jam suis per antonomasiam, si Superis placet, *Philosophus*, quid ejus sectatores, ut animalibus sensum excutiant, moliantur. Arguunt 1. si ulla sit in brutis cognitio, seu, ut dicere jam malunt, *Idea* (perperam quidem, quia idea non est quæcumque cognitio, sed quæ nata est dirigere ad opus) jam nihil est, cur anima rationalis immortalis asseratur. neque enim aliundè id evincimus, nisi ex eo, quod ista sit cognoscitiva, quare si brutis etiam cognitionem damus, aut eorum animam immortalem, aut nostram mortalem asserere cogemur.

2. Dato, quod bruta cognoscant, dabitur etiam, quod judicent, & discurrant. noxia enim ab innoxis distinguunt: imò & videntur unum ex alio colligere, dubitare, deliberare, atque in finem aptissima quæque media disponere, quæ omnia non cognoscentis modò sunt, sed etiam ratiocinantis. quod si ista tamen sine ratiocinio sunt, cur non etiam sine cognitione?

3. Potuit Deus O. M. machinam fabricare, quæ eisdem motus perageret, qui de facto ab animalibus oriuntur. Si enim homines ingenio suo automata moliti sunt mirabiles motus quodammodò ab intrinseco, latente sanè artificio, perficientia; non licet id ipsum de Deo infinitæ sapientiæ opifice dubitare. Conf. quia nos ipsi varios, ac difficilimos motus citra ullam cogitationem exerimus; dum enim loquimur, quam scitè movetur lingua per varios ad palatum, ac dentes appulsus, quos tamen ignoramus! loquimur etiam aliquando, pulsamus citharam, aliosque artificiosos motus efficimus distracti planè, & alia omnia cogitantes, quidni ergo

ergo. poterunt similia animantes nihil cognoscentes peragere.

4. Omnis anima cognoscitiva est à corpore secreta, adeoque spiritualis, & immortalis. Sed nulla talis anima est in brutis. ergo nulla est in brutis anima cognoscitiva, maior. prob. à Cartesio, quia distinctæ sunt corporis, & facultatis cognoscitivæ notiones; hæc enim est principium cogitandi: illud est principium trinx dimensionis, seu potius trinx ipsa dimensio. neque verò, aut dimensio cogitationem, aut hæc illam in sua ratione ullatenus comprehendit. Non est autem alia certior rerum distinctionis nota, quam distinctio rationum, præcipue cum has clarè percipimus.

Hæc quidem Cartesianorum argumenta, utut ab aliis magni fiant, nullius mihi videntur per se esse momenti; multò minus, si comparentur cum communissima omnium, quotquot usquam fuere, opinione, paucis iis exceptis, quos novitas, quos ambitio, quos Cartesii sui amor abripuit.

Prima itaque pro sensu, & cognitione brutorum, eademque efficacissima sit ratio, illa ipsa communis hominum persuasio. Ut enim alibi conficiam, gentium consensus naturæ ipsius sensus, & vox est; cui falsum subesse non potest. atqui omnes homines in hoc convenire, ne ipsi quidem Cartesiani negare poterunt: aut si negant, vel unum afferant non dico sapientem, sed hominem, qui bruta in automation numerum aliquando compegerit. Certè quicumque de brutorum sensu loquuti sunt, non tanquam de re dubia, sed certa, sed manifesta loquuti sunt. Unus sit omnium instar Augustinus in Dial. de quant. Animæ, ubi, *Bestia, inquit, sentiunt, ac penè omnes quinque illis sensibus vigent, quantum cuique naturæ tributum est. an tu id negabis? quid huic inter-*

rogationi reponeret Cartesius? *negabo*, diceret, *pernegabo*. Non sic, qui ibi Augustino responderet, *Nihil minus*. Præterea lib. 1. de Musica. *Putote negare non posse, bestias habere memoriam; nam & nidos post annum revisunt hirundines, & de capellis verissimè dictum est:*

Atque ipsæ memores redeunt in tecta capellæ.

Et canis dominum jam suis hominibus oblitum recognovisse prædicatur: & innumerabilia, si velimus, animadvertere possumus, quibus id, quod dico, manifestum est.

Quid? uni ergo innumerabilia isthæc, quibus hæc veritas sit manifesta, non animadvertunt Cartesiani? Equidem ut mittam, quæ de simiis, de elephantis, aliisque mirabilia referuntur; ac fieri sine cognitione nemo hætenus concipere potuit; quæ in canibus unis quotidie contingunt, & ob oculos cuiusque versantur, docere istos satis potuissent, nisi omnem veritatem, quæ elementis suis non congruit, in antecessum ejurassent. Canes profecto exteris, & ignotis allatrant: qui deinde ipsi, si sensim assuetudine noti fiant; si cibum iis porrigant, pacem ab iis primò, tum & blanditias extorquent. quid ergo? mutarunt ne lucidas impressiones, quibus oculos canum feriunt? an alius est hominis ejusdem ignoti, ac noti odor, qui nares aliter vellicat: quæ vis est à natura ignotæ, notæque vocis, ut illa fugam, vel iram, hæc patientiam, vel obsequium mereatur; si semper ea est canibus æque ignota?

Præter hæc quid sibi volunt gemitus illi doloris indices, dum verberantur, aut aliter patiuntur, quibus misericordiam sollicitant, si nihil re ipsa dolente, aut dolere possunt? Fefellit protectio nos natura, si doloris signa dedit, dolorem omnem abstulit. Quod si quia sumum ab igne procedere non semel experti sumus, ex fumo deinde, quem videmus, ignem,

quem

quem non videmus, arguimus; quidnò, quod gemitum naturaliter emittimus, dum ex noxiæ præsentia dolemus, bruta etiam, noxiæ urgente, gementia dolere arbitramur, adeoque sensu, sine quo dolor non est, prædita esse?

Quid dicam de artificiosis motibus, quos non per ullam organorum immutationem, sed objectu solo molesti, ac jucundi bruta docentur? an simile quidpiam in automato vel leviter adumbratum experti uspiam sunt Cartesiani? fatendum equidem varia partium dispositione, motivæque virtutis alia, & alia per artem applicatione diversos, insuetos, mirabiles motus elici ab automatis posse. at inauditum est id genus aliqua ab istis obtineri, jucundum, molestumve aliquid obiectando, quo spes, vel terror incutiatur. Nemocertè, nisi mentis planè impos, horologium non ritè motus suos exercens, voce, plausu, baculo impulit, aut deterruit, ut ità ad semitam, à qua deflexerat, revocaret: & hæc tamen cum brutis passim adhibemus.

Sed neque prætermittendum est illud, quod oculi, aures, nares, cerebrum sunt in nobis organa sentiendi. hæc eadem eodem prorsus, aut parum absimili opificio elaborata conspiciuntur in brutis. bruta ergo sentiunt perindè, ut homines. hanc consequentiam qui negat, naturam ineptam facit non aliter, atque illum, qui tubum opticum cæco, aut tibiam, vel cymbalum musices prorsus ignaro, aut librum itulito largiatur, h. e. instrumentum, cuius illi sit nullus usus. quid enim, si pedibus pariter instruxisset, nervis, ac musculis, sui progressio, motusque spontaneus possibilis non sit? quid, si nutritionis organa sine vi nutritiva donasset.

Verùm nimis multa hæc sunt, ut veritatem evidentissimam, suæque se luce ostendentem ulterius probem: quam equidem ne
 ipsis

ipsis quidem adversariis censeo, nisi verbo re-
 nus, negatam, tum ut aliquid novi apud ple-
 beculam jactent, tum ut Magistri sui honori con-
 sulant. Argumento est, quod a libi (ut est error
 plerumque sui immemor; ex quo vetus verbum
 mendacem memorem esse jubet) recurrente sci-
 licet per arcanum naturæ impetum veritatē,
 brutorum sensum doloris, voluptatisque capa-
 cem vel supponunt; vel afferunt. Testis. est
 Antonius. Le Grand, acerrimus Cartesii pro-
 pugnator, par. 10. Instit. Philos. cap. 4. pag.
 m. hi 746. editionis Norimberg. ubi eos rejicit,
 qui summum bonum in voluptate ponunt, &
 illud penes sensuum delectationem metiuntur.
*Sed tales, inquit, facile erroris convincuntur,
 si attendant, se pecoribus equiparare; & nihilo
 praestantiorum illis sortem contigisse, quam qua
 porcis, & ovibus assignatur.* Hoc argumento
 utuntur adversus. Epicurum, quicumque ho-
 minis beatitudinem tractant: sed illi volup-
 tatis capacia pecora supposuere: quod suppo-
 situm si tollatur, argumentum ineptissimè in-
 struitur. quid ergo voluit Cartesianus homo,
 dum illo est usus, neque arguere se ex aliorum
 sententia declaravit, nisi ostendere, quantus
 sit ad veritatem naturæ ductus, cujus confessio
 vel ab hostibus extorquetur?

Supereſt jam, ut propositis ante Cartesianorum
 obiectis faciam satis. Ad 1. diu nutasset
 in ambiguo animæ nostræ immortalitas, si ex-
 pectasset à Cartesio fundamentum. quid enim?
 nemo hactenus animam hominis immortalem
 demonstravit, qui bruti animam cognosciti-
 vam faceret? non, credo, invenient Cartesia-
 ni viros vel mediocriter doctos, quibus hoc
 persuadeant. quin etiam ipsi maximè verita-
 tem hanc, totius honestæ vitæ basim, ac fun-
 damentum, labefactant, dum principio tam
 erroneo eam unice niti mordicus asseverant, &
 dum omnem cognitionem non intellectivam,

& spiritualem ablegant, intellectum re ipsa faciant potentiam organicam, & corpori immersam. cum enim sit ab experientia certum, vim intelligentem in nobis ab organo pendere, cujus se perfectioni commensurat, & acutè, vel secus pro ejus varia dispositione operatur; si non pendet propter operationem sensitivam materialem præviā sapè, semper adjunctā, superest ut pendeat ratione operationis ipsius intellectivæ: ex quo fiet, intellectivam operationem organicam, atque adeò materialem, & corpoream esse. hoc autem astruere est, an destruere intelligentis animæ immortalitatem? At verò demonstrari immortalem nostram animam, data etiam cognitione merè sensitiva, quam esse materialem, & extensam cap. hujus quaestionis 6. probavi, ex proximo superiori capite apparet: neque enim adducta ibi argumenta in ratione cognitionis, aut cognoscitivi universim ullatenus nituntur.

Ad 2. à cognitione ad discursum est consequentia à minori ad majus, ut, si à cognitione, qua pollemus, arguas posse nos etiam intelligere Angelico more, aut divino. Cæterum bruta nec judicare posse, nec discurrere, certissimis argumentis à Fide divina, & naturali ratione ductis omnino constat: de quibus non nihil infra, latius alibi. hinc si quid est in brutis, quod judicium, aut ratiocinium indicet, recurrendum est ad instinctum, quo ab authore naturæ, velut sagittæ in scopum, beluæ diriguntur. non ita est de cognitione, quam esse posse materialem ex genere nihil pugnat; ut ex professo conficiam infra q. 4. c. 8. unde petendum præsentis materiæ complementum.

Ad 3. machinæ possunt à Deo perfectissimæ confici: quis hoc neget? sed machinas sensui destinatas sine sensu quis, nisi stultus, de Deo præsumat? aut quis machinas meras dicat, quæ
in

in metum, spem, dolorem, delectationem
 objectorum proportionatorum incurfu incitan-
 tur? Ad hæc argumentum est occupantis: di-
 cam enim pariter potuisse à Deo bruta effici
 non automata, sed sensitiva. sumus ergo in
 hoc pares, & aliunde videndum, quid re ipsa
 effectum sit.

Ad conf. non nego, motus etiam mirabiles
 confici posse sine ope cognitionis, ut sunt om-
 nes nutritivi, alique non pauci: non tamen
 illos, qui contingunt ab extrinseca motione
 molesti, ac jucundi, quæ sine cognitione non
 contingit, vel ab assuetudine iisdem modis in-
 ducta, quæ non est sine memoria. Quod addi-
 tur de pulsatione ciitharæ, ac motibus artis, ins-
 ne est; nam aliud est, eos perfici sine atten-
 tione, quæ specialis est conatus, atque intenta
 reflexio in nostros actus; quod est verum; aliud,
 perfici sine ulla prorsus cognitione; quod est
 falsum ex terminis; pendent enim ab arte, quæ
 nulla est sine cognitione, & idea motuum di-
 rectiva.

Ad 4. nego maiorem, cujus probatio instatur
 in conceptu motus, & vitæ, qui longè est alius
 conceptu corporis, imò est ab eo separabilis,
 nam est corpus sine motu, & vita, ut lapis
 quiescens; & est motus, ac vita in Angelis sine
 corpore. nec propterea repugnat corpori mo-
 tus, ac vita. Profectò quàm nihil valeat ad
 rerum distinctionem probandam distinctio ra-
 tionum, ostensum est in Logicis, ubi de di-
 stinctione Prædicamentorum; & ostendetur
 iterum in Metaphys. ubi de distinctionibus ge-
 neratim. Ex his manifestum fiet, qualis sit ea
 immortalis animæ probatio Cartesiana, inde
 unice ducta, quod alia sit rei cogitantis, alia
 corporis idea; unde infert animam, sem cogi-
 tantem, corpus non esse: quam Cartesii athe-
 iæ passim pro demonstratione venditant. Ita
 scilicet sunt, qui sua unice callent, Logicam,

ac Metaphysicam nostram odio, ac despectui habent. quid enim inde, nisi perpetua hallucinatio?

C O R O L L A R I U M.

Inferitur ex dictis, animam brutorum nec atomos, nec spiritus esse, sed formam substantialem.

R Edeo hic ad argumentum, quod tom. 2. l. 1. q. 1. proposui pro formæ substantialis existentia. Et principio, quod atomi materiales, utcumque disponantur, ad vim sentientem assurgere non possunt, satis ex eo ostenditur; quod atomi per se cognoscitivæ non sunt; aliter cum corpus sit nullum non ex atomis constans, sensitivum erit quodlibet corpus, Quod autem cognoscitivum non est, non potest cum aliis item non cognoscitivis compositum, evadere cognoscitivum; ut est evidens tum à priori; quia nulla est perfectio absoluta, maximè simpliciter simplex, in toto, quæ non sit antecederet in partibus saltem ex parte; cum enim totum non sit, nisi partes, pugnat esse talem perfectionem in ipso, qua careant omnes partes, tum ab incommodo; aliter poterit esse totum ens, & singulæ partes non entia: totum immateriale, & singulæ partes materiales, &c. quod si ista fieri non possunt ex terminis, nec poterit totum esse sensitivum, & singulæ partes non sensitivæ. Idem argumentum probat, vim sensitivam non inesse spiritibus: spiritus seorsim ab animali sensitivos non esse, evidens est ex eo, quod cum sensim deperdantur, & reparentur ex alimento, si sensitivi forent, dicendum esset vim etiam sensitivam in quovis alimento latere: adeoque plantas etiam, quibus animalia nutriuntur, esse sensitivas.

Huic

Huic argumento multa opponi ab Atomistis solent, 1. ut in machina novæ rotæ additione vires crescunt, sic in natura, quò res est magis composita, eò plures, & nobiliores actiones exercet. poterunt ergo atomi, vel spiritus, si pauci sint, non sentire: sentire, si multi, 2. negari potest, spiritus in plantis existentes, sensitivos non esse remotè saltem, & radicaliter. neque hinc sequitur, plantas esse sensitivas; quia spiritus sunt sensitivi, sed non in plantis, sive ex defectu multitudinis sufficientis, sive ex defectu organi proportionati. 3. dici potest, atomis, & spiritibus secedere aliunde vim sensitivam, non quidem à forma substantiali, sed vel à contextu eorundem, vel à vi quadam energetica, & actiosa ab auctore naturæ ipsi impressa.

Sed non juvat primum; nam ut in machina si nova rota accedat sine ulla vi vel impeditiva, vel accelerativa motus, nihil sit ea accessione: ita in animalibus nihil aptum erit ad vim sentiendi additio spirituum nullatenus per se sensitivorum.

Nec juvat alterum. Si enim potest naturaliter contingere, ut vis sensitiva statuatur, ubi sentire non potest; quid ni vis etiam intellectiva poterit ad corpus accedere, ubi non potest intelligere? atque adeò cur non poterit sustineri Pythagorica Metempsychosis animam rationalem in belluina corpora compingens? Præter hæc non video, si spiritus sensitivi re ipsa sunt, cur nihil prorsus dicantur sentire in plantis saltem per tactum, qui est sensus toto corpore diffusus, & organi specialis non egeat?

Non est hîc omittendum, vim sensitivam esse inchoativè in unoquoque exinde ab Atomistis quibusdam probari, quòd res quælibet ex naturali instinctu, & appetitu ad motum se determinat, ut videre est in motu gravium ad centrum, magnetis ad ferrum, &c. Hæc ubi
legi,

legi, miratus sum valde homines naves, qui istiusmodi innato, ut dicimus, appetitu hic utantur, alibi tamen ad convicium usque reiecto. hinc enim maximè Peripateticos carpunt, quòd appetitum, timorem, fugam in rebus naturalibus agnoscant, quæ menti nostræ conveniunt, & in naturam non sine philosophandi ratione perturbata, & inversa transferuntur. Quid hic ergo iam ipsis cum appetitu isto naturali? qui sanè aut nullus est ipsis, aut si quis est nobis, innatus est, non elicitus; adeoque in elicitum vertit tam non potest, quam non potest, quod cognitionem omnem propriam prævertit, à propria cognitione pendere.

Nec juvat tertium. si enim aliunde accedit vis sensitiva spiritibus, & atomis, habeo manifeste substantialem formam. nam talis vis, & est in ipsis animalibus (quis hoc neget, nisi qui ea neget esse animalia?) & est nova vis substantialis (quis hoc neget, nisi qui non intelligat notionem substantiæ, quæ apud physicos est primum motus principium?) & est non completum, sed incompletum substantiale ens; aliter posset per se seorsim existere, adeoque esset animal seiunctum à corpore, immortale, &c. Atqui hoc est esse substantialem formam, ut ut aliis nominibus donatam. ergo.

C A P U T X.

Sit ne animarum intra speciem eandem entitativa inæqualitas.

SI hanc quæstionem Metaphysicè agitemus, quærendo, an inæqualitas ista possibilis Metaphysicè sit, affirmativè respondeo; si enim possibiles sunt differentiæ contractivæ eiusdem generis inæquales, cur possibiles non sint individuationes inæquales, quæ contrahant eandem speciem? Sin autem eam agitemus physicè,

sic, querendo, utrum ista inæqualitas erui possit ex operationibus sensibilibus, & inæqualibus, respondendum censeo negativè. Ratio est, quia si operationum inæqualitas, quæ alius alio aptius ad virtutem, ac sapientiam promovetur, satis esset, ut animas etiam substantialiter inæquales argueremus; consequens foret, ut in multis fatuam animam, & moralitatis incapacem asserere deberemus. Quod si in his fatuitas per accidens contingit ex organorum prava dispositione; quidnò per accidens in aliis ex organorum perfectione contingere diceretur ingenii vis acrior, aptiorque virtuti indoles?

Conf. qui nunc valet ingenio, ac memoria, deinde ex morbo, vel ætate nimis confecta excidit ab utroque. Mutantur etiam in eodem homine inclinationes, & mores; atque aliud pueri, aliud viri, aliud senes concupiscimus. quæ si constant cum animæ identitate, quidnò cum æqualitate?

Conf. iterum: ex eadem ratione, qua homo homini entitativè inæqualis statuitur propter organorum stabilem inæqualitatem, statui debet entitativa inæqualitas inter marem, & feminam, ut patet ex rationis identitate. Atqui absurdum hoc esse, constat primò; quia diversitas sexus daretur inchoativè saltem inter animas. 2. quia vitari hinc non potest specifica marem inter, & feminam distinctio; quod enim prædicatum marem femina inæqualem facit, in omnibus maribus est, adeoque est prædicatum multiplicabile, & consequenter specificum. 3. quia hinc ulteriùs admittenda esset tertia rationalis animæ species in Androgynis sexum utrumque participantibus: imò & alia in aliis prout prævalet alteruter sexus. quid tum verò dum femina in virum abit? quod sanè non solum fabulæ, sed & historiarum veteres, tum recentes à pluribus, fideque di.

dignissimis recentitæ confirmant, ut habes latè apud Gasparè à Reies in suo jucundarum quæstionum Elysio, q. 57. quid tum, inquam? an fiet animarum quoque mutatio?

Nullum ergo est pro animarum inæqualitate ab operationibus sufficiens argumentum; atque adeò physicè non possumus eas inæquales astruere. Accedit, quod fortassè nec potest operationum inæqualitas ab inæqualitate animarum provenire; sicut enim inæqualitas non esset præcisè in individuationibus, sed in ipsa specifica differentia, cui uni naturæ ratio potest competere. & hinc fortassè fieret, ut omnes homines eiusdem speciei atomæ non essent, cum ad easdem operationum species non omnes assurgant.

Opponitur in contrarium primò Philof. 2. de gen. animal. cap. 3. ubi ait, pro inæquali animarum nobilitate, ac perfectione corpus inæqualiter perfectum aptari. 2. cum anima sit corporis finis, inæquale corpus inæquali animæ aptetur oportet. 3. de rei substantia nonnisi ex operationibus judicamus. Sed magna est inæqualitas in operationibus humanis. eadem ergo inæqualitas in humanis animis. 4. aliter anima Christi æqualis esset animæ Judæ: quæ tamen propositio censuram Parisiensem meruit:

Ad 1. Aristot. loquitur ibi de inæqualitate animarum non numero, sed specie distinctarum. Ad 2. Natura semper æquale cuivis animæ instrumentum parare intendit: sed ex concursu causarum aliarum sæpè deficit, & ad propositum non pertingit. Ad 3. Operatio inæqualis arguit temper inæqualitatem principii, non tamen inadæquati, sed adæquati & quia ad discursum concurrir organum, ut principium phantasmatis, potest accidere discursus imperfectior ex imperfectione organi, sicut peritæ cæteroqui manus character est pravus ex ineptitudine calami.

Ad

Ad 4. Illud est absurdum, quod inculcari potest ad deterrendos pusillos. in entitativa perfectione fatemur animam Christi æqualem animæ Judæ, quemadmodum Christum hominem fatemur, ut Judam, quod attinet præcisè ad naturam assumptam. in reliquis sive naturalibus, sive supernaturalibus donis infinitus est Christi animæ excessus. Ad censuram Parisiensem respondet Toletus, eam non transire ultrà Sequanam.

C A P U T. XL.

Sint ne anima facultates ab anima ipsa secundum rem distinctæ.

Negativam sententiam amplector, & paucis ita probo. Ex una parte anima debet ipsa per se, suamque substantiam in operationes suas influere; principium enim quod appetit, debet ipsum per se cognoscere; aliter appetit, quod non cognoscit. tale autem principium unum non est, nisi anima. ergo anima ipsa per se & appetit, & cognoscit. eiusmodi autem denominationes vitales important motum ab anima in anima. ergo anima & subiectum est, & causa operationum suarum. Ex altera parte, si ipsa debet influere immediate, nihil est, cur ista vis dividatur inter ipsam, & accidens superadditum; quandoquidem nulla est in actu vitæ perfectio, quæ in anima abundè ut in principio non reperiatur. Nec militat in præsentī finalis ea ratio, ob quam tom. sup. accidentale instrumentum substantiæ datum à natura dixi, ut scilicet causa extrà se operans agere etiam per virtutem suam superstitentem possit, ubi, & quando non est. Vitalis enim facultas nulla extrà se operatur. Ut ergo accidentali virtute substantiarum viventium amplitudini, & perfectioni activitatis consultum est;

est: ita viventium soli imperfectioni provisum
esset pervirtutis distinctionem. quod quidem
naturæ instituto non congruit operum suorum
perfectiōni consulenti, quantum potest.

Obiic.1. Omnia agunt per potentias, & fa-
cultates distinctas, Cælum per influentias, ignis
per calorem, &c. idem ergo dicendum de
anima.

Paritas ab operantibus transeunter ex modò
dictis nulla est. Cæterum contraria inductio-
ne constat, ignem, aquam, aliaque seu ele-
menta, seu mixta, dum in se agunt, & qualita-
tes deperditas reparant, non per accidens, sed
per se agere; ut alibi probatum est, potiori er-
go ratione id asserendum de anima.

Obiic.2. Potentiæ materiales distinguuntur
inter se, & ab anima. inter se; quis enim dicat
eundem esse visum auditui? ab anima; quia
vivente adhuc animali, potentiæ corrumpun-
tur, ut videre est in cæcis, &c.

Si quid ita probatur, in infantibus non di-
scurrentibus nondum erit intellectus: in insa-
niserit destructus. Solum ergo probatur orga-
ni debilitatio, vel destructio, non item po-
tentia, nisi solum secundum rationem pro-
ximè potentis.

Obiic.3. Si intellectus, & voluntas realiter
idem sint, anima per intellectum etiam ama-
bit, per voluntatem etiam intelliget. quod ta-
men concedi sine absurdo non potest.

Resp. Eiusmodi locutionem posse, & debere
concedi in sensu reali, & materiali: non sic in
sensu formali, & metaphysico. Vide, quæ de
hac re dicam in Metaphys. ubi de Distinctioni-
bus; simile enim imò idem ibi est argumen-
tum pro distinctione animalis à rationali; ali-
ter homo, inquit, per rationale sentiret, per
animal discurreret.

Obiic.4. Actus diversi, si sint adequati,
ponunt diversitatem, ac distinctionem realem

potentiarum. hinc illud vulgò usurpatum, proprius actus correspondet propriæ potentie. atqui alius est actus intelligere, alius velle. ergo alia est potentia intellectiva, alia volitiva.

Nego maiorem. tum quia si potest eadem anima esse radix immediata plurium potentiarum, cur non etiam immediata causa plurium operationum? tum quia universim potentie per actus non re, sed ratione distinguuntur; aliter esset distinguere in ipso intellectu vim apprehensivam à judicativa, & in ipsa voluntate vim amativam ab oditiva.

Obiic. 5. Vis extendens se extrà rem non est rei ipsius essentia. at voluntas inclinatur naturaliter in bonum extrà animam. ergo voluntas non est animæ essentia: atque eadem est ratio de intellectu. Maior prob. omnis inclinatio ad extrinsecum est per aliquid ab essentia distinctum, ut videre est in gravibus, quæ ad locum extrinsecum inclinantur per superadditam accidentalem gravitatem.

Major ad summum est vera, cum extensio ad extrinsecum est per actionem omnino extrinsecam, & transeuntem: non verò, ubi est per actionem vitalem intrinsecam, & immanentem. Cæterum si illud principium in tota sua universalitate admittitur, non videt, quo pacto non sit abire in infinitum. non solum enim anima, sed & voluntas ipsa inclinatur in bonum. quare ut anima per distinctam voluntatem, ita & voluntas per distinctam facultatem est inclinanda. Distinctio gravitatis non est ad rem præsentem; quia non probatur ex principio, quod hic contendunt stabilire adversarii, sed ex aliis, quæ suprâ attuli lib. 2. & in rem nostram non cadunt.

QUÆSTIO SECUNDA

De Anima vegetativa Facultatibus :

CAPUT I.

Vegetativa facultates numerantur , earumque materialis objecti , alimenti , natura discutitur .

VEGETANS anima in corpore , quod informat , tota occupatur . vel enim illud jam primogenitum ad justam magnitudinem sensum promovet , vel jam promotum in statu servat , vel demum ita servat , ut à magnitudine accepta , viribusque deliciatur . hæc omnia sola nutritione perficiuntur , cuius est reddere corpori , quod est vi caloris imminutum . ejusmodi autem restitutio vel ita fit , ut tantundem addatur , quantum fuit detractum : atque ea dicitur mera nutritio : vel ut additum detractum sit majus ; atque ea dicitur augmentatio ; non quævis tamen additio augmentatio est , sed ea tantum , quæ corporis solidas partes in maius evehit . Velut additum detractum sit minus ; atque ea dicitur diminutio , quæ nunquam , aut certè non sensibilibiter in solidis partibus contingit . Ex quibus apparet duas esse facultates primas vegetantis animæ . Augmentativam , & Nutritivam , quæ non species , sed secundum magis , & minus invicem secernuntur ; tertia verò , quæ Diminutiva dici debet , facultatibus non annumeratur ; est enim impotentia , & defectus .

Qui huiusce discriminis causam quærit , eam facileprehendet in calore ipso nativo , præcipuo , ut dicam , nutritionis instrumento . quia enim in infantibus , & pueris calor est mitior , partes humore abundant ; atque ita fa-

cile deduci possunt, plusque sanguinis admittere, quam opus habeant, ut præcisè nutriantur. At in juvenibus, & viris à fortiori calore partes exsiccantur, ac durefcunt magis. quare deductio per poros minor fit, succusque nutritivus, qui apponitur, vi caloris ita subigitur, ut non plus materiæ adgenerari possit, quàm fuerit distractum. atque hinc est corporis status, lucro æquante jacturam. Postremò in senibus à longa caloris actione partes penè ex integro arefcunt, ut vix deduci ad attrahendum sanguinem possint. Accedit, quod ex caloris debilitate sanguis non ita concoquitur, ac perficitur, ut affinis partibus evadat. ex quo fit, ut à virtute partium nutritiva in suam substantiam trahi, ni modicus, non possit; cum reliquus, utpotè indispositus, & degenerans, reiciatur.

Facultate nutritiva nobilior est in vegetantibus generativa. quare hæc non convenit, nisi viventibus perfectis; & ad suam magnitudinem jam promotis, & præterea licèt vis generandi vitalis in proprio corpore tota exerceatur, in quo semen elaborat; extenditur tamen ad aliud extra se, adeoque accedit quodammodo perfectionem sensitivæ virtutis, quæ circa exteriora versatur. Duplex est porrò generativa vis, altera principalis in anima, præparante semen, illique vivificam qualitatem imprimente: altera instrumentalis in semine, quod vi animæ motricis decisum, receptumque in vase proportionato, aliud vivens nomine, ac virtute generantis efficit immediate.

Omnes istæ virtutes alimentum respiciunt pro materia; nam & nutritio fit mutando alimentum in viventis substantiam; & generatio fit secernendo ex alimento puriores partes, genitalium virium susceptivas. Alimentum verò duplex, alterum remotum, quod exterius per

per os, aut aliud proportionale organum assumitur; alterum proximum, quod intra vivens vitali virtute ex assumpto exterius elaboratur, & proximè disponitur, ut in viventis substantiam transeat. illud cibus, hoc sanguis est. De utroque in præsentia pauca.

Cibus debet universim cum viventi comparari ut passivum proportionatum cum activo suo, ut possit scilicet à vivente pati, & in eius substantiam migrare. debet proinde illi esse quodammodo affinis; aliter propter contrarietatem plus justo reaget, nec sinet se ita immutari, ut animæ capax evadat. Hinc est notum vulgò discrimen inter alimentum, venenum, & medicamentum. illud viventi subiicitur, ab eoque in se trahitur, ac transmutatur. alterum sibi subiicit vivens, eiusque substantiam in se trahit, & corrumpit. tertium nec subiicit omnino, nec subiicitur, sed agit, & alterat vivens, ab eoque extrahit humores alteratos. Potest & addi quartum genus eorum, à quibus nihil patitur vivens, & ipsa vicissim nihil à vivente patiuntur, quales equidem reor lapides omnes, aliaque permulta, quæ sumpta licet, secernuntur postmodum inalterata.

Præter hæc puris elementis negatur meritò alimenti ratio. tum quia nulla experientia docet, vivens nutriri satis ab elemento puro: imò oppositum; aliter cum aer, & aqua nulli unquam desint, ubique suppeteret alimenti copia. quæ verò de chamæleonte narrantur, fabulosa peritioribus sunt. tum quia elementum purum propter qualitatum excessum, & partium homogeneitatem non se habet ad vivens ut passivum ad activum, sed potius è contrario.

Quod attinet porò ad alimenti congruitatem, quod scilicet potissimum viventi conveniat; primò certum est aliis viventibus alia esse nutrimenta naturæ cuiusque accommodata.

deinde quoad hominem relatu digna est Antoni Le grand Cartesiani sententia, qui nos omnes ad olera, fructusque compingit tanquam ad maximè omnium naturale alimentum. cuius rei ratio evidens primùm est, inquit, in pueris, in quibus nondum corrupta per assuetudinem pravam natura, quid sit nutriendo aptissimum, appetitu suo docet. pueri autem fructuum sunt maximè appetentes. 2. primi homines vitam solis fructibus sustentarunt, carnes animalium aspernati. putabant enim præter naturam esse aliis cibis, quam è terra natis vesci. 3. quibus natura dedit carniū usum, instrumenta etiam dedit, quibus eas discerperent, ungues scilicet, dentesque anteriores oblongos, acutos, & à se mutuo sejunctos. hæc verò omnia nobis denegavit, qui propterea ferro indigemus, instrumento non naturæ, sed artis. negavit ergo nobis natura carniū usum.

Hanc sententiam, nescio, an ipse sibi author persuaserit: hoc scio, aliis non facile persuasurum. quis enim susque deque ferat compelli se citra fabulam ad quercus, glandesque Dodoneas? Profectò ex iisdem capitibus pane etiam, vinoque interdici mur, herbasque, & olera cruda comedere cogimur, ne sit ullum ab arte, ingenioque vitæ subsidium. Nec probat puerorum exemplum; ostendit enim in iis natura, quid pueris, non quid viris congruat; aliter bellaria quoque, & melimela, quin & pueriles omnes lusus ad viros pertinerent. Primi verò homines in Paradiso fructibus quidem vescebantur; sed ad se redeunte per culpam natura, eiectaque ab illo immortalitatis seminario, cibum suo sibi sudore coacti quærere homines, nec satis Dei opera arbores contingere valentes amplius, non mirum, si ad carnes dilapsi porrò sunt. quare si istis arcere nos vult Legrandius, feremus sanè libenter, dum primos eos fructus reddat, quibus vitæ dispen-

dia

dia poterunt ex integro reparari. Postremum, quod addit, ineptum est; quis enim est, qui ignoret, solo ingenio satis homini à natura consultum, ut valeat vitæ necessitatibus providere.

Sanguis deinde alimentum est in animali proximum, in plantis verò, & animantibus exsanguibus succusaliquis sanguini proportionalis. De sanguinis formatione, atque officina dicam capite sequenti. Nunc pauca libabo breviter de eius natura.

Sanguis etiam per se spectatus, & à reliquis humoribus sejunctus corpus est heterogeneum sive actu, sive virtute, ac triplici parte potissima constat, oleosa, salsa, serosa. partem oleosam satis indicant cum elementa, ex quibus generatur, tum partes pingues, quæ ex eo generantur in corpore. salsam ostendunt etiam alimenta, tum etiam sal, & qui ex eo per artem educitur, & qui urinæ una cum sero superfluo ab eo per naturam separatur. serosa demum pars oculis ipsis sese perhibet manifestam. Ex parte oleosa, & salsa spiritus generantur, vi caloris attenuati, & exaltati. his sanguis arteriosus maximè abundat; propterea purior est, actuosiorque venoso. Salsis partibus aliquid inest aciditatis, ut probat color sanguinis ruber; constat enim apud Chymistas, rubicundum in liquoribus colorem ex affusione acidi in oleosum, seu sulfureum generari.

Sunt, qui sanguini copiosum aerem misceri, ad eiusque integritatem, ac perfectionem spectare censent: hanc verò aeris mixtionem multipliciter fieri. 1. per alimentum exterius assumptum. 2. per cutis poros. 3. per inspirationem, qua aer vel ad sinistrum cordis sinum per pulmonem, vel ad cerebri ventriculos properat. Sed ista divinando dicuntur. non enim est, unde aer tantam vim possit sanguis haurire; quia non per alimentum, quod corpus

est per se compactum, & saliva dilutum, adeoque aeris vix quidquam admiscens. non per poros, per quos quidem aer commeat, sed tenuis, & modicus: utrum verò venas, & arterias, membranas scilicet densas, valeat penetrare, incertum est. non demum per inspirationem; quia aer inspiratus ad pulmonem fertur, eiusque substantiam pervadit continenti accessu, recessuque, tantundemque remittitur, quantum accipitur; nec alio ibi munere fungitur, quam refrigerandi & pulmonem ipsum, & sanguinem in eo contentum, perinde ut frigida, aut nix vinum phialis inclusum. nec alio modo malignam, aut salubrem qualitatem sanguini imprimit, per quem deinde cordi communicatur. Quod confirmatur ex nutritione infantis in utero conclusi, ubi certè non respirat, ac proinde aerem alimento non admiscet; nec propterea optimū in se sanguinem non generat.

C A P U T II.

De Vitali Nutritione.

EXplicandi jam sunt præcipui istarum facultatum actus, quorum primus est nutritio. ad hanc tria sunt opus; primum, ut cibus exterius assumatur; alterum, ut intra vivens præparetur: tertium, ut per corpus digeratur, & in aliti substantiam transmutetur. de primò nihil occurrit philosophica discussione dignum nisi illud, quod ad eam assumptionem ordinatur à natura fames; quæ definitur appetitus calidi, & sicci, h. e. cibi, qui ut à potu discernitur, has duas habet proprietates. quid verò eiusmodi appetitum inducat, non modica est inter physicos dissensio. probabilius est, eam cieri ab humore acido, & valdè acri, tunicæ ventriculi adhærente, eamque molestius velli.

vellicante : qua vellicatione per nervos cerebro communicata, imaginatio primum, tum cibi appetitio excitatur. acrimonia autem humori illi accidit à calore occupante vim suam in succi illius falsedine, atque acciditate acueda, impellendaque per quandam effervescentiam ad os ventriculi. Quia verò cibus dilui debet, & eliquari, potus præterea opus est: in quo dissolvatur; & ad hunc ordinatur sitis, quæ definitur appetitus humidi, & frigidi: cui excitandæ falsedo præcipuè destinatur, quæ satis non diluta mordicat ventriculum, & humoris indigentia cerebrum monet.

Superest jam, ut alimenti in sanguinem, sanguinis in vivens transitus declaretur; quo totus absolvitur nutritionis progressus. Quoad primum illud principio occurrit inquirendum, quo ordine, qua vi alimentum in chylum, tum chylus in sanguinem migret. Cibus ergo dentibus mansus, & in saliva aliquatenus dissolutus, ventriculum ingressus, incipit plenus dissolvi, ac misceri, coloremque induit plerumque cinereum, à quo sensim transit in lacteum; sed ita ut, ubi primum per partes lactescere cœpit, è ventriculo per pylorum in intestina exoneretur. atque hæc est ipsa ratio, cur chylus in stomacho nunquam occurrat, non quod ibi non generetur, sed quia vix genitus illic dilabitur; cum cæteroqui intestina ad chylicandum apta non videantur. quod & ostendit experientia; si quando enim ex ventriculi intemperie alimenta non immutantur, cruda ex alvo defluunt: quod non contingeret, si vis aliqua chylicandi intestinis inesset, à qua nonnulla saltem ad chylum vergentia cibis imprimeretur. accedit, quod bilis succo pancreatico mixta continenter influit in intestina. à bile autem coctio chylica impediri nata est, non juvari, non ergo intestina chylicant; aliter quibus data est virtus, ei-

dem à natura datum fuisset virtutis impedimentum : quod absolum videtur .

Illud jam considerandum , an tota actio chylica uni ventriculi calori adscribenda. Negant communiter jam Recentiores tum ii , qui calorem agere quidem , sed ab humore alio acido , ac fermentaceo à glandulis ventriculi , & saliva profecto adjutum : tum ii , qui vim chylificandi omninò calori auferunt ex eo ducti , quòd modicus sit ventriculi calor , in quo tamen , ut in canino , ossa digeruntur , quæ in lebe , potentissimo etiam igne per multos menses solvi non possunt. Præterea sunt , inquiunt , pisces in nova Francia , voracissimi , quorum ventriculis tantum frigoris inest , quantum manus admota pati vix queat ; & ii tamen omnia digerunt . Hinc Aristotelicis insultant quasi animalis œconomix ignaris , dum contumaciter asserunt , ventriculum culinæ instar habere , cujus calore cibus ingestus coquitur , & liquatur .

Sed nec rationes istæ , nec convicia Aristotelicos terrent , quò minùs calori etiam uni vim tribuant chylicandi . Et quidem spiritus calidos ad digestionem facere docet evidens , eaque quotidiana experientia . Si quis enim à prandio studiis incumbat , depravatur chylicatio . quod non contingit , nisi quia spiritus à ventriculo copiosi avocantur ad cerebrum (anae enim ad cerebrum acidi humores concurrant , quibus ad studia promoveamur ?) iisque destitutus ventriculus , amissa scilicet digestionis causa , cibos non plenè concoquit . Rursus quid certiùs , quàm ad digestionem stomachum calidis extrinsecus fomentis , intrinsecus cibus , aliisque adjumentis promoveri ? id equidem malo meo doctus quotidie experior . Sed & quamvis probabile sit humorem acidum digestionem una cum calidis spiritibus efficere , non est tamen , cur probabiliùs istis unius vim integram

tegram digerendi denegemus, assumpto eo humore in concausam non efficientem, sed materialem. Exemplum habes obvium è culina, ad quam nos compellunt cunicachinno adversarii. Videmus quidem in ea ab eodem calore diversissima fercula parari pro materiæ diversitate, & majori, minori, aut nulla humoris affusi copia. quidnè ergo unus ventriculi calor aptam chylicationi materiæ miscelam inveniens, chylum inde producat? accedit, quod calor in nobis agit, ut animæ instrumentum, anima ipsa coagente. & elevante quare multa, quæ extrà vivens non potest, in vivente potest.

Neque obstant, quæ in contrarium urgentur, calorem enim etiam intensissimus. extrà ventriculum non potest, quæ potest in ventriculo, quod extrà non reperit materiam aptam, acidis scilicet humoribus aspersam. quos equidem humores, ut aliquid aliquando Atomistis ad imaginationis subsidium demus, considerent cûneolis quibusdam innumeris refertos, adigendosque vi caloris in cibum, quo penitus dissolvatur, & fluat. Ad illam verò de pisce novæ Franciæ narrationem, videant, quid dicendum, ipsi adversarii, qui animam aliam à calore non agnoscunt, cui uni motum omnem animalis, & vitam adscribunt. quò igitur hic se vertent? negabunt ne ventriculum illum vivere? an vitam vitæque motus à calore non profuere? quid autem ipse dicam ad ejusmodi experimentum, ignoro, nisi id unum, trahendum non esse ab uno in reliqua omnia exemplum. Cæterùm res est diligentiori inquisitione digna; fortassè enim ex accidenti, concursu factò spirituum frigidorum, ingens illud frigus excitatum in dissecto ventriculo est.

Perlegendum est porrò hinc in nutritionis historia. Exceptus intestinis tenui, & jejuno chylus, perque ea permeans, gemino alio hu-

more perfunditur, bile nimirum, ac succo pancreatico. bilis iuxta veriorē sententiā in hepate generatur; atque inde per porum biliarium mitior eius pars fluit ad intestina. succus alius in pancreate paratur, sublimpidus, subacidus, & salivæ affinis. ab his humoribus chylus novam accipit fermentationem, ut facilius purior eius pars ab impura segregetur. Pars impura, fœculenta, & inutilis unā cum acriori bilis admixtæ parte secernitur, & eiicitur. Pars purior à vasis lacteis venarum similitudinem præferentibus exsugitur in transitu. quæ exsuctio fit præcipuè ab intestinorum pulsione, dum per suas fibras se contrahunt motu, quem peristalticum dicunt, & rursus à pulsione musculorum abdominis sursum deorsum per respirationem agitati. hinc enim facta in Lacteorum oscula chyli impressione, pars solum tenuior, ac purior ingreditur, crassiore ob oris angustias non admissa.

E vasis lacteis per mesenterium transeuntibus in quoddam receptaculum, veluti è rivis in communem alveum, chylus deferitur. huiusmodi receptaculum propè lumbos est situm, partemque habet capaciorē, quam alii chyli itagnum, alii lacteum saccum, alii ab inventore Pecqueto conceptaculum Pecquetianum appellant. partem aliam habet arctiorem canalis in modum, quem ductum chyli ferum nuncupant. per hanc in venam subclaviam sinistram chylus immittitur, raro etiam in dexteram. inde in cavam influit, ex qua in dextrum cordis sinum perfertur, indeque cum sanguine in gyrum sæpè actus naturam tandem sanguinis induit.

Ex his sententiā Aristotelis, Hippocratis, aliogumque antiquiorum de corde sanguinis fonte, & officina, à Galeno, ipsumque consecutis deinceps per multa secula Medicis, ac Philosophis reiecta, nostro hoc tandem seculo

revixit, & pro comperta apud Anatomicos iam habetur. quin etiam hepar, in quod Gale nus sanguificandi vim reiecerat, usque adeò ab ista laude deiectum est, ut inter glandulas, partes scilicet corporis emunctorias excretionibus excipiendis natas, à quibusdam numeretur; quatenus in eo sanguis bilem, aut succum saltem bili proximum deponit. Sed quidquid de hoc sit, quod à plerisque meritò negatur, à quibus hepar inter partes corporis præcipuas habetur, quod bilem non excipit, sed generat, sanguinemque fermentat, & ad maiorem spirituositatem adducit; certum est, cordis primas esse in sanguificando partes, quia vasa lactea chylum deferentia non ad hepar, sed ad cor tendunt; & quidem ità, ut album colorem, quem usque ad cor chylus detulerat, in corde statim deponat, & rubrum assumat. in corde igitur, non in hepate è chylo sanguis efficitur, neque verò probabile est, quod chyli pars aliqua per meseraicas venas ad hepar ascendat; cum enim per easdem descendat sanguis pro intestinorum nutritione, non est intelligibile, quod duo illi humores impermixti in angustissimis tubulis contrario motu ferantur. Ad hæc sanguinis circulatio nostro hoc seculo tot rationibus, tot experimentis probata, manifestum facit, sanguificandi munus cordi competere; & ex hoc pulsus ei à natura perpetuum datum, ut commune nutrimentum à se perpetim pellendo partibus reliquis communicaret.

Quoad transitum sanguinis in vivens, quæ est ultima præsentis indaginis pars, nihil speciale circa modum occurrit præter dicta superiore cap. dispersito enim sanguine non per venas (venosus enim sanguis non à corde ad partes, sed à partibus ad cor remeat, ut eius vi spiritosior evadat, & nutritioni aptior. excipe fortassè hepar, quod venoso nutritur sanguine,

ut constat ex venarum multitudine, & arteriarum in ipsum influentium paucitate) sed per arterias, quæ ad nullas partes corporis non excurrunt, virtus partium ingenita attractum ad se sanguinem in se transmutat, quamquam non omnis nutritio ex sanguine immediatè fiat; ut enim ossa nutriantur, priùs sanguis in medullam transit, ex qua deinde aluntur ossa.

C A P U T III.

Sit ne nutritio motus in vivente nunquam interruptus.

ARistoteles, quem sequitur D. Thomas videtur aperte partem affirmantem deruisse. nam cap. 1. de somno, & vigilia expressè ait, facultatem altricem non suscipere somnum, h. e. cessationem ab opere nutritionis. 9. Eth. c. 7. asserit, vitam nunquam esse sine actu. li operatione: *Universis, inquit, est expetibile, atque amabile esse: sumus autem operatione, & actu; vivendo enim, atque agendo sumus.* Ex quibus aperta videtur Philosophi mens; si enim animal semper agit, & actu vivit, nec est operatio alia, quam continenter exerceat, præter nutritionem, consequens est, ut animal perpetim nutriatur. hinc alibi idem testatur, cessante penitus nutritione, cessare vitam; quia cessat illa operatio, per quam animal habet, ut semper vivat. Hoc idem ex Philosopho sumpsit, ut certum D. Thomas 2. contr. Gent. cap. 97. his verbis: *Omnis substantia vivens habet aliquam operationem vita in actu ex sua natura, qua inest ei semper, licet alia quandoque insit in potentia: sicut animalia semper nutriuntur, licet non semper sentiant.*

Hujus rei potest aliqua assignari congruentia

tia à priori ; quemadmodum enim calor vitalis sine ulla cessatione agit in humidum radicale, substantiam scilicet humidam jam animatam, illam attenuando primum, mox etiam absumendo ; ita conveniens est, ut virtus nutritiva sine intermissione agat in humidum nutritimentale, sanguinem scilicet, aliosque humores nondum animatos, illos paulatim concoquendo, & convertendo in suam substantiam. Idem hoc videtur conficere cordis motus, qui nunquam desinit sanguinem præparare, eumque ad venas, arteriasque, & per has ad membra omnia propellere, ut nunquam scilicet desit nutritioni apposita, dispositaque materies. quamvis autem inter systolen, ac diastolen cordis quies aliqua intercedat, hoc ideò factum, ut impetus sanguini impressus pergat interim movere per ductuum angustias. Signum ergo est, vitam à nutritione nunquam abstinere, cui propterea continenter fuerit pabulum sufficiens. Postremò ut lychni flamma adiectam materiam disponere perpetuò, ac depasci non cessat ; ita nutritiva facultas, cui alimentum ultimò dispositum nunquam deest, nunquam poterit in illud non agere, & in se paulatim non convertere ; eadem enim utriusque est ratio, quod scilicet non potest naturalis causa subiecto proportio nato semper applicata vel minimùm ab actione cessare.

Duo sunt, quæ possunt oppositam huic sententiam suadere. i. impossibilitas continuatæ nutritionis. est enim nutritio substantialis actio : substantia autem omnis incipit in instanti. quare si nutritio sit continuata, una instantanea actio alteri esset immediata ; adeoque haberetur instans post instans.

Sed hoc nihil est : universim enim successio ex divisibilitate oritur. ut ergo qualitas, quæ habet latitudinem intensivam, potest se-

cundum intensiorem successive produci ; ita & substantia quælibet materialis, cui extensiva est divisibilitas, poterit successive produci secundum extensionem. neque in hoc unquam repugnantia video, quæ non adversus successionem alterativæ actionis pariter pugnet. Quod autem dicitur de substantiæ productione in instanti, falsum alibi ostensum est. Verius productio substantiæ dicitur simultanea : quod quidem de immateriali substantia est simpliciter verum. de materiali solum secundum quid, quatenus secundum intensiorem, qua caret, successionem non patitur.

Alterum, quod potest opponi, est experientia. videtur enim aliquando cessare nutritio, quædam certè animalia diu vivunt sine cibo, ut de Ursa dies quadraginta latente sine ulla esca refert Aristot. lib. 8. de histor. Anim. cap. 17. idem de Stellione, Crocodilo fluviatili, multisque Serpentibus dicitur eiusdem lib. cap. 7. Glires quoque diu dormiunt impasti. de hominibus, qui à cibo abstinuerunt, multa exempla mirabilia vide apud Jonstonum de Admirandis Hominis c. 2. ar. 7. Galenus etiam refert morbum, quem vocat Atropejam, h. e. nutritionis privationem, cuius ea est vis, ut ægro nutritionem impediat. Huc etiam faciunt exempla eorum, qui sine ulla respiratione, ac motu cordis pro mortuis habiti, vivere tandem post biduum, aut triduum sunt deprehensi. isti verò eo tempore non nutriebantur.

Resp. animalia, & homines, qui diu sine cibo vixisse narrantur, adhuc fuisse tunc, lentissimè licet, nutritos. lenta illa nutritio à lento processit calore paulatim absumente, quod fuerat residuum alimenti, fuit præterea in iisdem corporibus longè minor alimenti indigentia, quæ quidem, ut putat Sennertus, ex eo profecta est, quòd partes corporis adeò tenaces; & compactas habuerint,

rint, ut caloris actioni maximè resisterint . sed quia ea partium constitutio satis habet paradoxo ; constat enim quò sunt solidiora , sicciora , & compactiora corpora , eò magis alimento indigere ; melius res ista rejicitur in humoris copiam , & caloris defectum . quod quidem ex eo constat , quia serpentes , & glires sine cibo diù viventes , animalium frigidissima sunt , & humidissima . ex qua etiam ratione oritur , ut semina frigidiores , & humidiores diutius possint cibo abstinere , quam viri . Atropeia porro non est omnimoda cessatio à nutritione , sed tardissimè procedens nutritio . Idem dicendum de motu cordis , qui non ad totalem quietem redigi unquam in vivente aliquo potest , sed bene ad motum adeò tenuem , ut sentiri exterius non valeat .

C A P U T I V.

De motu cordis , & respiratione ad nutritionem necessariis.

DUorum viscerum motus , cordis , & pulmonis , ad nutritionem in animalibus ordinatur ; nam cordis motus , ut dictum est , propellit alimentum ad partes ; pulmonis verò motus , qui respirationem efficit , sanguinem , ut dicetur , eoque medio cor refrigerat , atque ità nutritioni animalis & ipse servit . Post nutritionem ergo isti etiam motus sunt considerandi .

Duo sunt cordis motus , quibus alternatim intumescit , ac detumescit . dilatio diastole , contractio systole Græcis nominibus appellatur . Jam vero qua vi motus isti contingant , gravis est inter Recentiores controversia , alijs in alias sententias abeuntibus , quæ referendæ , ac refutandæ paucis sunt , ut verior stabilietur .

Sunt

Sunt primò ; qui cor musculis adnumerant , eiusque motum perinde , ut in cæteris musculis , fieri censent à cerebro influente animales spiritus per nervos à sexto pari ad cordis usque basim , & ventriculorum orificia propagatos .

Sed reliciendi 1. quia motus à cerebro manantes sunt in animalis potestate , ut videre est in musculis . at motus cordis est naturalis , ac prævertit imperium appetitus . 2. quia in fœtus conceptu observatum est cor pulsare ante cerebri perfectionem . 3. quia nervi ad cor propagati tenuissimi sunt , & vix sensibiles , adeoque non sufficientes eam spirituum copiam , quæ opus est ad tantum motum .

Alii motum cordis sanguini tribuunt ; qui influens in cor copiosus , illud impetu suo ultrà æquilibrium distendit ; atq; ita fit diastole . cor verò dum se restituit , systolen parit .

Sed oppositum ab experientia satis constat , docente multorum animalium corda è pectore avulsa , & sanguinis affluxu privata adhuc per aliquid temporis dilatare , & constringi . Præter hæc si motus sit à sanguine , aut motus sanguinis est vicissim à corde , aut ab ipso sanguine non à sanguine ; tum quia sic non cor , sed sanguis viveret , cui uni insitum esset scilicet motus principium intimum ; cuius oppositum suprà probatum est . non à corde ; si enim ista mutuò se movent , deveniendum certè est ad alterum ex his , quod primò movere cæperit . hoc autem primum movens si fuit cor , habet cor principium in se motus antecederet ad sanguinem . si verò fuit sanguis , jam sanguis , non cor erit vitæ principium ; cum tamen probatum sit sanguinem esse vitæ non principium , sed alimentum .

Fuit , qui cor moveri dixerit à pulmone respirante , ac simul pulmonem à corde , duasque istas partes invicem se ad motum juvare .

Sed

Sed omnino perperam; nam ut cætera omit-
tam, in fœtu utero adhuc incluso cor pulsat,
pulmone otiante. pulsat etiam in piscibus pul-
mone carentibus. pulsat, ut dictum est, avul-
sum à corpore, ubi nullam excipit pulmonis
motricem actionem.

Propria sententia est, motum vitæ ab intrin-
seco malè inquire extrà vitæ principium, quod
est anima. Scio ad hæc elaturos cachinnum
adversarios; inter quos Legrandius audacter
ignarum vulgus Peripateticos appellat, quod
motus eiusmodi animæ tribuimus. Sed convi-
cia non moramur, dum rationibus non urge-
mur. Anima certè corpori inest, ut illud vi-
vificet non rationali solum, sed & sentiente,
ac vegetante vita, ut in superioribus ostensum
est. quid est ergo, cur motus suos animam pe-
ragere non sinamus? quid est, cur ad mecha-
nicas vires recurramus, quasi non de viventi-
bus, sed de automatis loqueremur? an sede-
bit in corpore anima spectatrix, non actrix?
Profecto ut motus arbitrarios anima ciet medio
appetitu; ità & poterit vitales elicere per pro-
portionatam potentiam; idque non aliter de
facto contingere, satis ostendit causarum alia-
rum insufficientia. Neque est, quod spiritum
nescio quem à semine partibus insitum, vivi-
ficum, totiusque motus authorem communi-
scaris. frustra enim ad occultam causam recur-
ritur, ubi occurrit manifesta. quis aptior, quis
actuosior anima spiritus, quæ verè spiritus,
corpori intimè præsens, & intimus? Adde,
quod spiritus ille non potest esse corporis for-
ma, à qua sit primum motus principium, ut
est evidens intelligenti formæ notionem, quam
certè adversarii intelligere nolunt, quamvis
animam esse corporis formam, & quidem in-
formantem, non assistentem, ex Fide tueri co-
gimur. Non negaverim, eum motum probabi-
lius ab anima cieri per spiritus, vel per quali-
tatem

tatem tanquam per instrumentum : cuius rei argumento est motus aliquandiù in corde perseverans etiam post animæ discessum.

Hinc porro liquet , qua vi pulmones moveantur ad attrahendum , reddendumque aerem per thracheam , seu asperam arteriam acceptum vicissim , ac remissum ; qua media contingit respiratio in inspirationem , expirationemque divisa . quamquam hunc motum ab anima procedere , aliunde etiam pateat ; quia scilicet est motus ab arbitrio dirigibilis , ac prohibito accelerabilis , & retardabilis . Utrum verò in pulmone immediatè sit , an in thorace , pulmonem secum contrahente , ac dilatante , lis est , in qua qui thoracem primò moveri dicunt , probabilius loquuntur ; motus enim animalis per musculos fit , qui in thorace , non in pulmone existunt .

Sed hic alia suboritur quæstio , quem potissimum finem statuerit respirationi natura . Hactenus creditum bona fide fuerat , aerem inspiratione attrahi ad sanguinem , & cor refrigerandum . Verùm quia nihil est antiquitùs traditum , quod à Neotericis ex hoc ipso non rejiciatur , non desunt , qui respirationem aliò traducunt , vel scilicet , ut simul cum aere effluvijs corporum gravido spiritus vividi ad cor trahantur , vel ut aer ipse sanguini misceatur , eumque spirituosiorem efficiat .

Ista tamen abs re dicuntur ex sola ambitione novandi . nam mixtionem aeris cum sanguine suprà reieci . necessitas verò spirituum aeri commixtorum tanta esse non potest ; ut respirationem reddat vitæ omninò necessariam , cum & spiritus ab alimento copiosi educantur : & spirituum aliquis defectus non illicò vitam tollat , ut tollit interclusa respiratio .

Necessitas ergo respirandi ex eo proficiscitur , quod cum sanguis è dextero cordis ventriculo fervidus admodum , & quasi ebullitione qua-

dam

dam rarefactus in pulmonem immittatur, debet in eo aliquantulum refrigerari, ac densari; tum ut serosos, fuliginososque halitus deponat, atque ita purior ad perfectionem maiorem acquirendam ad sinistram cordis ventriculum pergat, tum ut densior, adeoque gravior citius eò descendat, & propter minorem molem facilius ingrediatur.

Hinc jam apparet primò, quid sit suffocatio, respiratione nimirum impedita, sanguis fervidus in pulmonem impulsus, & refrigeratione nihil densatus, plus justo pulmonem replet, ac distendit, in eoque diutius hæret, ut non possit novus sanguis è corde excipi; proindeque parum, aut nihil sanguinis è pulmone ad sinistram cordis ventriculum defluit: quo sistitur sanguinis, & cordis motus, adeoque animal deficit. Ex hoc etiam sunt animi deliquia, dum aer externus plus debito calidus fervet.

Hanc esse germanam respirandi necessitatis causam, liquet primum ex eo, quod quæ animalia pulmonibus carent, altero etiam cordis sinu privata sunt. eadem præterea frigidior seu succo, seu sanguine utuntur; ex quo etiam capite fetus in utero respiratione non eget: & dum egere incipit propter caloris incrementum, & sanguinis effervescentiam, tum demum calcitrare simul incipit, & exitum quærere: ex quo partus consequitur. 2. quia cum sanguis ex motu vehementi fortius incalescit, tunc multò sæpius, citiusque aerem recipimus, ut ex iterata corporis refrigerantis admissione, sanguis validius temperetur.

De modo demum, quo sanguis refrigerationem ab aere mutuetur, dictum est in calce capitis 1.

CAPUT V.

De Vitali Generatione.

Viventium generationem tom. sup. declaratam, ac definitam habes. in præsentī duo sunt præstanda. exponendus primò modus, ac series generationis præsertim humanæ in materno utero perfectæ: tum causæ ejusdem inquirendæ.

§. I.

Generationis humana series describitur.

Historia generationis hæc est. Utriusque parentis semine intrà uterum excepto, uterus ipse non modò arctissimè concluditur, ne spiritus seminalis sæcundus evanescat, verùm etiam circà semen se contrahit totum, ut meliùs illud amplectatur, ac foveat. Post hæc duabus membranīs (secundæ, & secundinæ appellantur) quasi ovo quodam semen includitur, ibique ab uteri calore sensim alteratum, atque ità genitali virtute excitata, tenuem principiò bullam efformat candido liquore oppletam. hæc hominis totius est delineatio, magnique operis exiguum rudimentum, in quo, si tantum oculis liceret, nullam non corporis partem non leviter adumbratam conspiceret esset. Hinc porrò à sua cuiusque membri formatrice virtute sensim augentur, ac perficiuntur singulæ partes, donec vitæ capaces animam accipiant. Id totum, quod animationem præcedit, ut ex sola feminis virtute, ità ex sola feminis materia præstat; nullus enim eatenus sanguis à matre. hinc necessitas mulieris etiam seminis, ut maior sit scilicet copia
nu.

nutrimenti ; quamquam nutrimentum illud in rigore non sit , sit enim tota illa fœtus formatio per partis ad partem appositionem , donec corde ad justam magnitudinem perducto , & animato , nutritio per introsusceptionem incipit , sanguine matris suppeditante alimentum .

Quæstio nunc est , quænam ex partibus prima vivificetur , aliis pro corde , pro cerebro aliis pugnantis ? nec sui desunt hepatis atroni . Sed cum res ista coniecturis agenda sit , censeo probabilius omnes partes simul tempore animari . cum enim omnes mutuò se juvent ad operandum , & vivendum , nec minori tempore sit opus ad membri , aut visceris unius præ alio formationem ; quin etiam si difficultas , & magnitudo operis sit attendenda , principes potius partes ultimo loco forent perficiendæ ; nihil est , cur anima debeat uni primum parti , & non toti potius corpori insidere , quod ipsa sibi è proximo perficiat . Atque hæc est Principis Medicorum Hippocratis sententia lib. I. de diæta , ubi , *Discernuntur* , inquit , *& augentur omnia membra simul , non alterum altero prius , nec posterius quæ tamen natura sunt maiora , minoribus priora conspiciuntur , licet non prius genita sint .*

Redeo ad fœtum in utero jam formatum , animatumque . Huius nutritioni carneam massam utero adhærentem ex semine ipso præsertim femineo confectam ; quam alii placentam , alii hepar uterinum appellant , natura providit . hæc quidem unica est , etiam dum gemellus est fœtus ; quamquam contingat aliquando , ut sua cuique respondeat . Usus autem est triplex . 1. ut per eam fœtus in utero firmitus contineatur , & hinc inde impulsus molli , cedenteque materia innoxius excipiat . sic vitra bombycino , aliove simili tomento fulcimus . 2. ut sanguinem , & alium

nescio quem humorem lacteum ab uteri poris, venulisque in ipsam hiantibus accipiat, ac servet, ne per uterum diffugiant, perque vasa umbilicalia ad fœtum paulatim transmittat; atque ita sit quoddam infantis veluti penu. 3. principaliter, ut, cum calor in fœtu sit valde debilis, succus nutritius per eam coquatur melius, ac præparetur; atque ita sit quædam infantis veluti coquina.

Ex fœtus umbilico, superatis secundis, ductus quidam producitur intestini instar, qui venam unam, arteriam geminam, urachum, & vasa lactea continet. Vena ad placentam uterinam usque pertinet, in eamque innumeris radicibus inseritur, perinde ut arbor terræ. utrum verò utero etiam implantetur, lis est inter Anatomicos. per hanc à placenta ad fœtum sanguis jam præparatus descendit. Per arterias verò purior sanguinis pars ab ipso fœtu ad placentam emittitur, ut sanguinis præparationem ibi promoveat. Per vasa lactea candidus humor ab utero profluit in cavitatem interioris secundæ, cui proinde humori fœtus aliquantulum innarat. Per urachum urina secernitur in alantoidem inter primam, alteramque secundam; ibique usque ad partum servatur. Atque ex his probabile est valde, fœtum in utero non per umbilicum modò, sed etiam per os materiam suæ nutritionis assumere. huc enim videtur spectare lacteus ille humor, cui innarat. Et quidem fœtum ventriculi, & ora nunquam non candido eo liquore madentia deprehenduntur. præterea in intestinis fœces inveniuntur, quas vis primùm nati secernunt, quæque non possunt esse ex solo sanguine.

De tempore demum animationis, situque fœtus in utero nihil est certum. certum est fœtum ibi animari: quod evidenter indicant motus, & nutritio. communior ex Aristotele opi.

opinio docet quadragesimo mares, octogesimo die fœnellas: alii mares trigesimo, fœmellas quadragesimo animari putant. alii brevius multò spatium constituunt, diem scilicet septimum. res est, ut dixi, incomperta, putaverim tamen ea tempora non excedi. Situs denique non est idem in omnibus. frequentior hic est. caput summam uteri partem occupat; sed corpore ita convoluto, ut faciem genua excipiant, nasusque inter ea recundatur. manus porrò genua complectuntur, & firmant. tibiæ ita contractæ sunt, ut natibus calcanea adhaerescant.

Hæc habui, quæ de hominis generatione narrarem? in quibus omnibus, ut & in plerisque antecedentibus, sequentibusque non paucis unicè profeci ex Isbrando de Diemberbroeck, cuius est accuratissimum opus integram Anatomem complectens, & quidquid est à veteribus, aut Neotericis dictum, aut inventum bona fide in medium proferens, & non minore diligentia discutiens.

§. I I.

Seminis, proxima generationis causa, confectio, & natura examinatur.

Primò inquirendum, ex qua materia conficiatur semen. Nulla est veritas ab Antiquioribus accepta, quam Recentes in dubium non revocaverint. quid certius habitum olim fuerat, quàm semen confici ex ultimi alimenti puriore, ac spirituosiore parte, superflua quidem nutritioni individui, sed necessaria conservationi speciei: ex quo semen à Galeno dictum eleganter est *Superfluum necessarium*? Neoterici tamen plures hoc mordicus negarunt: & alii semen non ex sanguine, sed ex sero generari omnium ineptissimè tradiderunt.

alii

alii ex liquore lymphatico, seu aqueo, alii ex chyloso crudiore humore è mesenterio in cerebrum, è cerebro ad testes per nervos delato conficiunt.

Sed recedendum non esse à veterum opinione multa satis apertè docent. 1. Lympham non esse feminis materiam evidens illud facit, quod nulla vasa lymphatica ad testes progrediantur. sunt quidem in testibus ipsis eiusmodi vasa, quæ lympham à sanguine jam confecto separatam excipiunt. 2. nec semen è chyloso illo humore fit, qui quidem per exiles admodum, ac penè invisibiles nervos à cerebro ad testes descendere non potest. nervi sanè spiritibus, non humori advehendo sunt destinati.

3. Semen ex sanguine gigni, ostendunt arteriæ spermaticæ insignes ad testes usque pertinentes, quæ profectò maiores sunt, & plus sanguinis conferunt, quam ad meram eorundem nutritionem sit opus. 4. id ipsum confirmat experientia, qua scimus loco feminis ex immoderato Veneris usu sanguinem quandoq; excretum: qui quidem ex virtutis debilitate ad debitam coctionem non perductus, crudus, adeoque sanguineus eiectus est.

Sed quia certum est, cerebrum specialiter ad feminis confectionem concurrere propterea, quod ex nimia Venere cerebrum præcipuè patitur, & hinc dorsalis tabes ab Hippocrate lib. 2. de morb. descripta ortum habet; consequens est, ut spiritus in semen copiosi immitantur non quicumque, sed animales. hi scilicet per nervos ad testes lapsi, sanguinem fermentant, vimque illi prolificam fortassè imprimunt. Hinc est tantus phantasie in semen, eiusque vasa dominatus, & arbitrium. quid verò sit in semine virtus prolis effectiva, satis dixi tom. sup. ubi eam ostendi specialem qualitatem nomine generantis unice operativam. Quod autem nonnulli ideas omnium

nium partium in fœtu formandarum à partibus generantis singulis decifas, & impressas agnoscunt, equidem non intelligo, nisi velint, singulas seminis partes singularum fœtus partium formatricem virtutem à singulis generantis partibus accipere: cui non repugno. Cæterum ideam aliam in semine recognoscere est semen facere cognoscitivum.

Videndum nunc, à quo principio semen conficiatur. Aristoteles 1. de gen. anim. cap. 19. & 20. solis viris semen concedit, negat omnino fœminis, quibus menstrua censet vice seminis data.

Verum mulieribus etiam semen aliquod esse, evidens jam est; nam & testes ipsis sunt, & vasa spermatica deferentia, quæ si frustra non sunt data, seminificationi serviant, oportet. In earum testibus liquor albus reperitur seminis nomine non planè indignus, qui quidem cum voluptate excluditur, exclususque eadem, quæ maribus, symptomata relinquit, Conceptio fœtus nulla sine tali voluptuosa excretionem contingit. Si castrantur, ut fit sæpè cum brutis, steriles evadunt mulieres. Postremò liquor intrà secundas contentus tantæ molis est, ut ex solo virili semine manifestò non constet. Hæc omnia compertum faciunt, semen non à viris solum, sed & à fœminis fabrefieri, & excerni ad fœtus formationem. Fateor, muliebne semen nomen seminis non mereri, quod efficienter generationem non promoveat, ut mox probabo. atque ita possumus Aristotelem non abs re interpretari; negavit enim mulieri non humorem alium à menstruo semini virili analogum, sed propriè dictum semen, cuius est scilicet generationem sua vi activa perficere, & prolificum esse.

Jam quæ sit eius necessitas, hoc est scilicet inquisitione dignum. Philosophi etiam Peripatetici Galeni autoritate ducti utriusque

que semini tum virili, tum muliebri vim pro-
lis effectricem concesserunt. Aristoteles contra
solum marem ad generationem activè concu-
rere opinatus est; in quo quidem ad rei veri-
tatem propiùs accessisse, ostendere jam ag-
gredior.

§. III.

*Solus pater ad generationem prolis per semen
suum activè concurrat.*

DUæ fuerant circa hoc veterum sententiæ.
altera Aristotelis uni genitori effectivam
vim fetus tribuentis; altera Galeni utrumque
parentem ad prolem generandam advocantis.
tertiã novissimè addit Thomas Cornelius
Prog. 5. qui unius muliebris seminis opera gene-
rationem perfici autumat.

Tertia hæc opinio longissimè aberrat à scopo.
certum enim est fœmineum semen imbecillius
esse virili. perperam ergo actuositas huic adem-
pta, illi conceditur. *Masculinum semen*, inquit
Medicinæ Parens lib. 1. de genit. *fœmineo robur-
stius est: generationem autem à robustiore fieri ne-
cessè est.* Manifestius porro huius dicti absurdi-
tas apparet in plantis: in quibus planta ipsa
vicem patris, terra verò matris implet. quid
ergo? terrænè pariter tota vis prolifica planta-
rum effectiva tribuetur? Huc etiam trahi om-
nia poterunt, quæ adversus Galeni sententiam
afferentur.

Adversus hanc duo præstabo. 1. ostendam,
nihil ab ea adduci ad efficaciter concludendam
fœminæ virtutis generativæ necessitatem. 2.
aliquid addam, quod illam etiam excludat.

Arguitur igitur primò, & præcipuè pro Galeni
sententia ex verè seminis formatione mulie-
ribus concessa. semen autem est generantis in-
strumentum, mulieres ergo vim obtinent ge-
nerandi.

nerandi. Et quidem aliter non apparet, quem alium finem spectaverit natura, dum semen mulieribus est largita, si illud generationem non efficit. 2. Quod habet vim substantialiter assimilandi, habet vim generandi; ut pater ex terminis. sed mater per suum semen sibi substantialiter filium assimilatur, ut videre est in generatione muli, qui ex parte asino, ex parte etiam equæ assimilatur. ergo habet mater vim per semen generandi. 3. à pr. Formas eiusdem speciei consequuntur eiusdem speciei facultates. Mas, & femina sunt intra eandem speciem, facultas ergo generativa est utrique communis.

Resp. ad 1. Mulierem non excernere semen, ut generet. necessitas ergo eius seminis aliunde potest provenire, ex eo scilicet ipso, ex quo ad plantæ generationem terræ quoque fecunditas debito calore, atque humiditate impregnata necessaria est. Neque enim quis hætenus somniavit terram effectivè ad plantam concurrere; & tamen pinguedo aliqua in ea est opus, quæ stercoreatione, vel aliàs promovetur; idque ut seminis virtus in ea dispositam, aptamque materiam inveniat, ac præterea sufficientem calorem, quo virtus seminalis excitetur, sibi-que terreum liquorem adiungendo intumescat, & in germen tandem erumpat. Ita prorsus res se habet in re præsentī. uterus enim semen ex-cepturus fecundandus proportionaliter est à semine muliebri, cuius humiditas, & calor excitat virile, illudque in actum promover. Quod si verò fiat vis in voce seminis, quasi semen dicatur, cui virtus seminalis prolifica inest, negabo muliebri in hęc sensu stricto esse semen, sed solum per quandam similitudinem, & rur-
sus quia habet ad generationem aliquo pacto concurrere non generando, sed excitando, actuandoque spiritus, quibus inest vis generativa.

Ad 2. nego inesse matri vim substantialiter assimilandi sibi filium. si qua verò similitudo

contingit in mulo relatè ad equam, ea non est substantialis in forma, sed accidentalis in organis, & partium conformatione: quæ quidem tota reduci potest in determinationem à dispositione materiæ semini a sinino ab equa suppositæ, præstantisque fœtui nimis copiosum, ac validum primum alimentum, ex quo maior, & fortior pater filius evadit, & ad matrem aliquantulum accedit. Sic contingit, ut ex iisdem seminibus in aliis terris plantæ, olera, fructus secundum magnitudinem, saporem, aliasque qualitates diversissimi oriantur. Sunt, qui hanc ipsam similitudinem filii cum matre, huius imaginationi adscribant: quæ certè magnam vim habet ad fœtum adhuc tenerum valide immutandum, ut docent innumera, & mirabilia exempla. Sed non est opus ad ista recurrere.

Ad 3. est instantia in virtute multiplici matri concessa in ordine ad fœtum in utero promovendum, & ad conficiendum lac pro nutritione infantis: quæ virtus viro eiusdem licet cum muliere speciei negata est, maior igitur est vera, si cætera sint paria, h. e. si organa, & instrumenta virtuti apta communicentur. at fœminis organum generativæ virtutis non est, nisi debile, ac diminutum, quo proinde non potest anima semen perficere, illique generandi vim inferere.

Superest jam ut probem, matri per semen suum vim generandi non competere: quod equidem ita conficio. Inauditum est, quod semen verè prolificum, habensque in se principium activum, & passivum generationis, exceptum in vase proportionato, quo satis possit & foveri, & excitari non germinet, ac proliferet. Si ergo muliebri semini vis prolifica esset, immissum sine viri opera, ut non rarò contingit, in uterum, deberet in eo fœtum formare; adeoque posset mulier se sola concipere: quod certè

certè impossibile est per naturam; & in Beatissima Virgine Deipara, ut ingens miraculum jure suspicatur. antec. prob. inductione generali in plantis facta, in quibus res est magis perspicua, & extra dubium, ut scilicet inde doceamur, quid in animalibus contingat, ubi res est obscurior, quippè uteri latebris involuta. Neque dicas, semini muliebri esse quidem vim prolificam, sed nonnisi inadæquatam, quæque egeat virilis complemento. Hoc enim est, quod improbat inductio facta in plantis, in quibus nullum est semen, quod non sit adæquatè prolificum, ubi accedat sufficiens terræ, in quam coniicitur, sœcunditas. Rursus in causis eiuldem rationis, si altera sit imperfecta, & alterius indiga, potest ad ulteriorem perfectionem, viriumque incrementum ita promoveri, ut se sola valeat, quod prius sine alterius accessione non poterat: ut videre est in vi impulsiva gravium. Si minus ergo: omnis, aliqua saltem mater reliquis robustior, & melius constituta, debuisset aliquando sua unius ope concipere. Quod si hîc ad naturæ legem, & experientiam recurras, perperam facis; istæ enim solum docent sine patre prolem non generari, ut & docent sine femine non generari plantam. quare huc te cogit argumentum, ut asseras aduersus experientiam prolem sine patre posse generari, si sit in matre vis generandi paternæ omninò similis; ut & probaret, posse plantam sine femine educi, eo ipso, quod terræ vis plantæ generativa concederetur. non rectè igitur ad hanc experientiam confugis, quam sustineri in tua sententia non posse contendendo; præsertim cum ratione non constet, matrem ad prolem effectivè se habere.

Q U Æ S T I O T E R T I A

De Speciebus, & Habitibus.

ANtequam ad potentias cognoscitivas tum sensitivas, tum rationales, quæ proximè vegetativas sequuntur, accedo, agendum prius est de speciebus, & habitibus; illæ enim comprincipia potentiis omnibus cognoscitivis necessaria, isti verò comprincipia iisdem potentiis ad suavius, faciliusque agendum utilia reputantur.

C A P U T I.

Quid sit, & an sit species intentionalis impressa.

SPecies idem est Peripateticis, ac qualitas rem aliquam potentie cognoscitivæ obiciens, ac repræsentans, perinde ut pictura Cæsaris oculo Cæsarem exhibet. Duplex est: alia expressa, h. e. cognitio ipsa formaliter per se obiectum exprimens: alia impressa, qualitas scilicet ab obiecto ad potentiam emissa (una hæc speciei simpliciter nomen obtinet) ad eum finem, ut illam compleat in ratione potentis proximè cognitionem circa ipsum elicere. hæc etiam similitudo aliqua obiecti est, non quidem formalis, & expressa, ut cognitio, sed merè virtualis, quatenus est virtus obiecti potentiam facundans, & complens, ut possit formaliter obiecto suo assimilari. Quæ ab obiecto materiali ad sensum immittitur, *Species sensibilis*, quæ ad intellectum, *intelligibilis*, dicitur: utraque vero communi nomine, *Species intentionalis*; est enim principium cognitionis, quæ *intentio* h. e. in obiectum tendentia nuncupatur. Est rursus talis species obiecti vicaria, eius.

eiusque quodammodo semen, quo scilicet secundata facultas concipit in se, paritque notitiam. cum enim certum sit, notitiam creatam ex obiecto gigni, & potentia: hæc autem se ipsa concurret semper, utpote semper præsens, non item obiectum, quod sæpè est absens; debuit huic proinde virtus accidentalis à natura concedi; quæ ipsius præsentiam in potentia cognoscitiva suppleret; & hanc dicimus Peripatetici speciem.

Est autem hæc species alterius omninò rationis ab obiecto, cuius est. nam & ipsa est qualitas, cum obiectum sæpè sit substantia; & recipitur in potentia, in qua obiectum nec recipitur, nec recipi potest. quamobrem nescio quid sibi velint Thomistæ nonnulli, dum speciem ab obiecto ipso autumant non distingui, nisi secundum diversum essendi modum realem, & intentionalem, quare speciem dicunt ipsum obiectum in esse intentionali. Sed hic modus loquendi manifeste est metaphoricus; secus evidenter est falsus. Sic dicere possumus, calorem esse ignem inesse non rei, sed virtutis; statuum Cæsaris Cæsarem ipsum appellamus, & similia: quæ quidem cum Philosopho digna non sint, abstinendum ab iis omninò, ne ludibrio Atomistis simus.

Quod attinet deinde ad eiusmodi speciei existentiam, cuius nominis notionem hactenus dedi, his est tum Peripateticis cum exteris, tum inter Peripateticos ipsos agitata, præsertim in sensibus exterioribus, à quibus omnem speciem excludunt Nominales, plerique, Dandinus, & Recentes non pauci.

Incipio ab iis, quæ mihi certiora videntur; & primò in sensibus internis speciei eiusmodi saltem rememorativæ existentiam, ut indubitabilem, assero. Ratio est ab experientia docente, dari in his memoriam obiectorum absentium, ac præteritorum, adeoque & loco, &

tempore diffitorum, ut certum est in brutis ad loca sibi olim nota redeuntibus, &c. at memoria sine tali specie nulla esse potest. Si enim generanda est denuò notitia, qualitas scilicet specialis, ut quæst. I. est demonstratum; eaque perens influxum objecti (sola enim potentia si viribus satis instructa per se foret ad cognoscendum, nunquam certe ad arbitrium non cognosceret) consequens est, ut hoc absente, aliud vices ipsius expleat: nec aliud à specie commodè potest assignari. Idem probant imaginationes, quas dormientes exercemus, dum exterior sensus omnis otatur: quod ipsum brutis quoque animantibus contingit, præsertim canibus medio in somno latrantibus. Itaque ut idem in præsentia, quod sequi, quæst. latius improbabatur, sensibile per solum motum insinuare se sensui, adhuc præter motum perceptio motus evidenter est admittenda, hanc autem esse qualitatem de novo genitam loco cit. demonstravi. hujus ergo causa objectiva est danda, dum abest obiectum. hæc causa non est assignabilis, nisi ad speciem recurratur. datur ergo species.

Præter hæc non rememorativa solum, quæ reflexa est species, verum etiam directa, quæ fit, præsentia sensibus externis obiecto, est admittenda. Ratio est; quia interior sensus organum habet, in quo percipit, à sensibus externis distans, in quibus unis fit impressio præsentis obiecti. debet autem organum ipsum intimè instrui comprincipio obiectivo, quod aliud à specie ex modo dictis esse non potest.

Ex his etiam colligitur, proportionales species intelligibiles impressas haberi in intellectu. Nam & habemus obiectorum memoriam, quæ repræsentari non possunt per materiale phantasma, nostrarum scilicet intellectuum circa Deum, Angelos, rationesque universales corpori, spirituique communes. ergo

præter phantasma, speciesque phantastice
datur in intellectu intelligibilis species. Ad
hæc si anima in corpore intelligens solo utere-
tur phantasmate tanquam obiecti virtute, se-
parata à corpore amitteret omnem omnino no-
titiam in corpore acquisitam; ut amittit omne
phantasma, quod supponitur unicum reme-
morandi principium, sine quo memoria
non est. hoc autem ex alibi probatis, ubi de
animæ immortalitate; naturale esse non po-
test. Præterea ut phantasma relinquit post se
speciem sui, ita & intellectio. Species autem
ab intellectu relicta, materialis non est;
quia agens immateriale in subiecto item im-
materiali non potest ponere materialem effe-
ctum.

Relatè porrò ad intellectiones directas, &
non rememorativas licet non appareat tam ma-
nifestè necessitas speciei propter phantasmatum
præsentiam, quod potest obiecti vices implere,
adhuc tamen haberi tunc speciem apparebit ex
ratione, qua species intentionalis in exteriori
sensu suadebitur.

Hanc quidem ut probent, multa multo-
nantur, quæ vereor ut concludant intentum.
Displicet illud in primis, quod quidam autho-
res, rejectis à tactu, & gustu speciebus ejusmo-
di propterea, quod isti sensus non sunt ad ob-
jectum, nisi præsens, in reliquis species agno-
scunt ex eo, quod ad illos obiectum per se non
pertingit; adeoque pertingere debet per spe-
ciem sui vicariam. Sed perpèram; nam exha-
latio odora ipsa per se nates pervadit: sonus
cum motu aeris usque ad aures propagatur: lux
verò, quæ una colores actuat, imò & color est,
ut quæst. seq. probabitur, manifestè oculum
ingreditur. nullum ergo est sensibile, quod,
dum sentitur, sensui non sit immediatum,
ac præsens. Et quidem aliter fatendum esset,
exteriorem sensum, cujus omnis notitia exper-

rimentalisest, & intuitiva, moveri posse ab obiecto nec præsente, nec existente. quod non sit præsens, patet in colorato distante: quod non sit existens, constat in sono, qui successivè per medium diffunditur; adeoque si ultra sonum progredieretur species, hæc soni perceptionem efficeret, dum nullus est in medio sonus. quod sanè pugnat cum ratione intuitionis & experimentalis notitiæ.

Melius ergo universim probabiliter suadetur existentia speciei in quolibet sensu ex modo uniformi operandi, quem servat natura in omnibus, ut in plerisque. Si enim sensus interior speciebus semper utitur, si utitur speciebus intellectus, dum reminiscitur; *Ex his utique, concludam cum Philosopho 8. phys. t. 63. fides alii sit; physicum est enim similiter se habere in omnibus.* Neque obstat, quod hic semper habeatur obiecti præsentia, adeoque non sit opus alio supplente vices. Etenim virtus accidentalis non semper datur, ut suppleat vices præsentiæ, sed virtutis deficientis. Virtutem autem deficere ut arguimus in substantia ex eo, quod agit plerumque per accidens, & hinc ab accidente dicimus profluere actionem, etiam dum adest principale agens, substantia; ita & in re nostra, quia sæpè obiectum influit per speciem, nec aliundè constat influxus immediatus obiecti, dicendum probabiliter, semper obiectum concurrere per speciem. Accedit, quod ita magis consulitur perfectioni potentiz, quæ instruitur intimo, ac specialiter pertinente ad vim cognoscitivam qua talem comprincipio. quibus omnibus si addatur Aristotelis; *D. Th. & Peripateticorum communiter autoritas, species impressa in omni cognoscitiva potentia manebit apud non protegros sufficienter probata.*

Adverto tamen, me non admittere species ullas in medio extra potentiam productas. has qui.

quidem concedunt, qui sensuum objecta per se potentia non fieri præsentia credunt; præsertim id contingere censent in oculo, & aure. Sed quia id falsum esse ex dicendis palam fiet; & cæteroqui propagatio illa speciei intentionalis per subiectum reale incapax cognitionis, difficultate non caret; intentionalem speciem in sola potentia cognoscitiva ab objecto præsentigenitam agnosco.

Plura porrò sunt, quæ ab Atomistis in has species universim conijciuntur. 1. quia earum naturam cogitando, ac disputando assequi nemo potest. 2. quia nec sunt indivisibiles; aliter essent immateriales: nec divisibiles, cum in minima subiecti, vel medii parte totæ reperiuntur. 3. non est assignabilis earum idonea causa, cum corpora plerumque inertia, & otiosa tam excellentes formas fundere ex se non possint. Jam quibus vehiculis ad nos illæ perveniunt? &c.

Ad 1. illa est crambe toties ab Atomistis in totam nostram philosophandi methodum repetita: cui non aliud juvat in præsentia reponere, nisi, quod miseret me eorum, qui non alias vires intelligunt præter mechanicas. Ad 2. species sensibiles divisibiles sunt & ab objecto materiali præsentia in potentia materiali divisibiliter impressæ. Ad 3. causa est objectum ipsum, quod utcumque iners realiter, & otiosum, intentionaliter tamen, ut est citra dubium cognoscibile, ita debet esse actuosum, ut possit potentiam fecundare. ut enim fecundum realiter hominem dicimus, cuius filium scimus; ita & secundum intentionaliter omne objectum cuius partem, cognitionem ipsum referentem, in nobis experimur. neque opus est vehiculis, nisi forte ut pervadant intellectum Atomistarum, ad quem nihil pervenit, nisi mechanica vi adducatur.

CAPUT II.

*Quod sit proprium munus impressa
speciei.*

QUære, quod sit speciei munus, est quæ-
rere speciei necessitatem ; adeoque hic
dicenda confirmabunt dicta sup. cap. Sunt
ergo primò, qui docent, speciem ad hoc esse
necessariam, ut in ipsa prius cognita obiectum,
à quo emanavit, percipiatur. Sed non rectè ;
tum quia sic nullum obiectum immediatè co-
gnosceretur in se : quod repugnat communi
opinionì. tum quia experimur obtutum no-
strum non sistere intra nos ad contemplandam
speciem, sed hac ignorata, vel in dubium re-
vocata, ad obiecta ipsa exteriora ferri.

Alii censent speciem impressam se ipsa for-
maliter potentia obiectum repræsentare. Sed
perperam ; quia confundunt impressam cum
expressa specie nullatenus confundendam ; hæc
enim est cognitio, illa cognitionis principium.
hæc ab obiecto, & potentia gignitur, estque
partus utrumque assimilans ; illa à solo manat
obiecto, estque eiusdem semen, ac virtus. hæc
dum cum sit actus secundus, non est, nisi
potentia cognoscat : illa esse potest in potentia
etiam actu non cognoscente, ut patet in specie-
bus memorativis.

Id unum nonnulli munus speciei tribuunt,
ut potentiam per se indifferentem determinet
ad hanc potius, quam ad illam cognitionem.
Sed non satis speciei naturam explicant. nam
potentia ante speciem non tam est indifferens,
quam impotens : post speciem verò satis deter-
minata non est, ut patet in memorativis spe-
ciebus, quæ indigent ulteriori determinatio-
ne. Deinde si species nihil aliud afferreret,
quàm

quàm potentia determinationem , necessaria non esset ; cum posset determinari aliunde ab eo ipso , à quo de facto determinatur memoria.

Recentiores apud Arriagam censent speciem requiri , ut influxu suo cognitioni tribuat esse imaginem obiecti . hoc enim est de ratione imaginis , ut procedat ab eo , cuius est imago . hinc Verbum divinum solius Patris imago est , quia à solo Patre procedit : & divina cognitio ut sit creaturarum expressio , non tamen imago , quia non trahit ab iis originem . atqui omnis creata cognitio obiecti sui imago est . ergo omnis debet ab obiecto procedere vel immediate , vel mediante specie . Sed in hoc discursu habetur principii petitio ; si enim imago supra expressionem addit originem , assumere , quod cognitio sit imago , est assumere , quod originatur ab obiecto vel per se , vel per speciem . quod ipsum est in præsentì probandum .

In hoc ergo stat speciei proprium munus , ut compleat potentiam cognoscitivam in ordine ad producendam cognitionem obiecti ; atque hinc provenit consequenter , ut tribuat cognitioni species rationem imaginis . Ratio est ; quia principium adæquatum cognitionis productivum debet in actu primo continere intentionaliter perfectiones obiecti representati , quæ sunt in cognitionem transfundendæ . atqui noster animus cum sit limitatæ perfectionis , non potest in se sic continere perfectiones omnium obiectorum , quæ aliquando potest exprimere . neque enim intentionaliter formaliter ; quia hoc est proprium solius cognitionis : neque intentionaliter eminenter ; quia hoc est proprium solius obiecti , aut causæ continentis eminenter obiectum , cum esse hominem sit esse eminenter cognitionem hominis . Conf. quia si potentia non indigeret
obie.

objecti sui concursu, & motione, posset se nunc extendere pro libito ad omnia, quæ sub objecti sui sphaera continentur. adeoque ad præterita, ad futura, ad longinqua, ad merè possibilea, quæ cum existentibus connexionem non habent. quid enim illi desit, cur id non possit, si expectanda non est objecti motio? Ad hoc igitur species in potentiam emittitur ab objecto, ut potentiam per se ad intelligendum non sufficientem, ea, tanquam semine, & virtute objectiva, fecundet, & compleat, reddatque intelligendo parem.

Hinc apparet speciei, & objectivi concursus necessitatem solius intellectus creati esse propriam. divinus enim infinitæ perfectionis intellectus eminenter in se habet omnes omnium objectorum perfectiones, adeoque ut intelligat, eorum concursu opus habere non potest.

Ob. 1. operatio vitalis non potest effici à principio non vitali. cognitio vitalis est, objectum non vitale; quandoquidem etiam dum vivens est, vitaliter non concurrit. ergo cognitio non est ab objecto. Conf. 1. cognitio est actio adæquatè immanens. ergo non potest procedere à specie, vel objecto, cui non immanet. Conf. 2. intellectus producendo cognitionem cognoscit. nec species; nec objectum cognoscit. ergo nec species, nec objectum cognoscit. ergo nec species, nec objectum producit cognitionem.

Resp. operationem vitalem debere procedere ab uno, non ab omni principio vitaliter operante, ut est certum ex eo, quod ad ipsam concurrit etiam Deus, & non vitaliter. Ad 1. conf. dico similiter actionem dici immanentem, quòd in uno, non quòd in omni suo principio maneat; aliter à coefficientia operationis immanentis Deus excluderetur. Ad 2. conf. non qui producit utcumque cognitionem, cognoscit; aliter Deus per nostras cognitiones

cognosceret: sed qui producit simul, & recipit.

Ob. 2. obiecti concursus ponitur cognitioni necessarius, quia est obiecti expressio. Vel ergo ad hanc ipsam expressionem concurrat intellectus, vel non. Si primum; ergo hanc ipsam perfectionem accipit ab intellectu cognitio; adeoque frustraneus hinc est concursus obiecti. Si secundum; ergo in cognitione realiter distinguetur ratio vitalitatis ab intellectu, non ab obiecto accepta à ratione expressionis accepta ab obiecto, non ab intellectu: quod est absurdum.

Resp. & ad vitalitatem actus materialiter concurrere obiectum, & ad expressionem materialiter intellectum. formaliter verò solum obiectum conferre cognitioni rationem talis imaginis: intellectum solum conferre formaliter rationem intellectivæ vitalitatis. quid ista sibi velint, vide latius explicatum tom. sup. lib. 2. q. 4.

C A P U T III.

De Productione, Conservatione, Corruptione specierum.

FAcilè est ex dictis inferre, quæ sit causa specierum productiva. ubi enim exterius sensibile exteriori sensui sese impressit, ad hunc pertinet id ipsum interiori nunciare, quare sensationis externæ est speciem & sui, & obiecti ad phantasiam immittere, ut servetur scilicet ordo, & prima operatio ad secundam sit via. sic alibi dixi apprehensionem à specie, iudicium ab apprehensione, ab hoc verò discursum pendere. De modo autem, quo species ab organo exteriori ad imaginationem propagetur, res est obscura. Missis equidem, quæ de motu nervorum, veluti fidium, comminiscuntur
Ato.

Atomistæ nonnulli infrà improbandi, censeo propagationem istam fieri per nervos, per quos irradiatio, ut ità loquar, specierum in instanti (neque enim ullum esse potest actionis impedimentum in medio ad hoc ipsum à natura destinato) ad cerebrum usque emittitur, ibique demum sistit, ubi species animalibus spiritibus ultimè excipiuntur, quicerebri substantiæ immixti, ac præsentès imaginem obiecti in phantasia efformant. quæ quidem omnia melius ex dicendis constabunt.

Speciem porrò intelligibilem spiritualem à phantasmate uno produci adæquate non posse, satis ostendit hujus materialitas. quare juvatur ab intellectu ipso, qui proptereà secundum id muneris, quod exerget, intellectus Agens ab Aristotele nuncupatur.

Species in nullo exteriori sensu conservantur, sed in interiori solùm, & in intellectu propter duplicem memoriam, sensitivam, & rationalem. non conservantur autem à phantasia ipsa, vel intellectu saltem ut à causa particulari adæquata; ut enim potentiæ istæ non possunt se solis species primò efficere, ità nec deinde conservare. siquidem conservatio eadem vires requirit, quas productio. restat ergo, ut species à Deo particulariter concurrente conserventur ad exigentiam potentiarum.

Difficilius est causam asserre, cur ad certum tempus species præsertim phantasticæ perseverent, & tandem per oblivionem deleantur, ac pereant. P. Suar. disp. 44. Met. sect. 2. alique post ipsum revocant interitum specierum in defectum potentiæ non valentis tot simul species sustentare. Sed contra 1. quia species, ut modò dixi, solùm materialiter ab organo sustentantur: concursus autem materialis non exercitium est virtutis, ac perfectionis, neque adeò plus requiritur ad plura susten.

stentanda , ut saepe alias inculcatum est. 2. nulla hinc est ratio , cur potius debeant destrui antiquae species , quam recentes ; ex incapacitate enim subiecti non magis illarum , quam istarum destructio determinatur. 3. in aliis , & aliis hominibus species inaequaliter durant ; quidam enim infirma , quidam tenaci utuntur memoria ; adeoque species quibusdam statim excidunt ; in quibusdam firmitus radican- tur . at vis sustentativa tum materiae , tum animae in omnibus est par . ergo interitus specierum in vim sustentativam deficientem reduci non potest.

Improbabilior est eorum sententia , qui qualitatem nescio quam occultam , speciebus contrariam ; ex otio in nobis genitam , & specierum destructivam comminiscuntur . Primum enim quis non videt , qualitatem istam gratis esse confictam ad fugam difficultatis ? naturam porro illi apponunt contrariam speciebus , quibus tamen contrarium nihil esse , illud ostendit , quod in eadem potentia contrariam omnino rerum species amico sedere sociantur : demum quid ineptius , quam statuere qualitatem otio parente genitam , h. e. ens à non ente productum ?

Arriaga disp. 6. de Anim. sect. 6. Oviedus , alique Recentiores ex Nostreis naturae ipsi specierum hoc tribuunt ; quatenus ipsae per se petunt conservari ad certum tempus , ultra quod perseverare naturaliter non possunt . Probant ; quia ex una parte non est alia probabilior ratio intereuntium specierum ; ex altera non pugnat exigentia certae durationis , quae quidem de facto etiam datur in impetu , & sono .

Dicendi hic modus displicet vehementer ; assumit enim falsissimum principium , quo admissio ; difficultas adhuc integra perseverat ; Nam primum contra communem , ac certum

Philosophorum sensum eam naturam tribuit qualitati absolutæ, qua exigit sui destructionem, non conservationem: quod sanè pugnat naturali lumini dictanti, malum suum à nullo exigi posse, bonum suum à nullo posse non exigi. Nec valet instantia impulsus, & soni. Nam impulsus est qualitas aut violenta, aut præternaturalis: quare exigitur eius destructio non à contrario, sed à subiecto, cuius naturæ non congruit. sonus autem aut est motus, aut propagatur cum motu, eiusque naturam sequitur: motus autem una pars destruitur ad introductionem alterius incompossibilis: quia verò sonus hunc sequitur vel ut causam, vel ut conditionem, consequens est, ut eius durationem, destructionemque sequatur.

Sed neque principio hoc admissio, difficultas solvitur. docet enim experientia, ex duobus æquè attentè obiectum idem cogitantibus, alterum citissimè, alterum post longum tempus speciem amittere, & oblivisci. hic aut recurri non potest ad naturam specierum per se deficientem. in utroque enim ponitur species eiusdem naturæ, & intensiōis; adeoque non possunt durationem inæqualem exigere. Adde, quod qui minùs firmæ memoriæ conscii sibi sunt, attentius obiecta considerant, adeoque intensiorem, vivacioremque speciem in se producant; & citius tamen adhuc obliviscuntur. Demum nihil est, quod exigit in specie durationem maiorem, nisi maior intensio. atqui ab ista non potest is effectus induci; intensio enim maior solum potest longius qualitatem servare, quia propter activitatem majorem fortius defendit à contrario destructivo. Cæterum si ab hoc præscindatur, intelligi non potest, quo pacto gradus unus, qui petat non durare ultrà mensem, additus alteri eandem durationem petenti, possit ultrà mensem perseverare. Junge duplicem du-

rationem horariam ; nunquid singulæ ultra horem durabunt ?

Alii postremò advertentes , durationem specierum manifestè ab organo pendere, hinc petunt, quidquid in ea varietatis contingit . Profectò species aut sensum , & per tempus debilitantur primò , tum intereunt , aut simul morbo, vel percussione destruuntur . Primum ex eo , inquiunt , accidit ; quia cerebri materia per caloris actionem attenuatur , & evanescit, aliaque per nutritionem succedit . Species ergo ad partialem subiecti defectum principiò minuuntur, ac veluti rarescunt, tum ad ità exiguam quantitatem rediguntur , ut vigere non possint ; sicuti enim in obiecto exteriori requiritur certa quantitas , ut possit percipi, ità in interiori sensu , ut possit percipere . Corruptuntur ergo species vel ad totalem defectum subiecti , vel ob impotentiam operandi ; quæ ubi adsit, à subiecto ut inutiles reiciuntur . Quia verò in ejusmodi defectu non æqualiter omnes procedunt, inæqualis est specierum duratio . Alterum contingit ex eo, quòd ad introductionem, conservationemque specierum certa primarum qualitatum temperies requiratur ; adeòque ea seriùs, citiùs, aut etiam subito immutata, species vel imminuuntur, vel evanescunt .

Hæc sententia longè probabiliùs præcedentibus discurrit, sed adhuc non videtur rem ipsam tangere, præsertim dum fumus in subita amissione sive ex toto, sive ex parte specierum: cuius sane exempla non pauca suppetunt, satis sit illud unum. *Franciscus Barbarus*, inquit *Jonstonus* in calce naturalis *Thaumato-graphiæ*, *literarum græcarum Athenis vir eruditissimus*, cum ietum lapidis capite excepisset, cetera omnia tenacissima memoria retinens ; literarum tantummodò, quibus præcipuè injervierat oblitus est .

Fluius verò experimenti rationem in temperantiè immutationem refundere non placet; fieret enim, ut dum per febrim, gravemque cephalicum morbum cerebri temperies mutationem saltem notabilem accipit, ut sæpè accipit, deberent species omnes phantasticæ interire: quod repugnat experientiæ. Præterea difficile intelligitur, quo pacto qualitas intentionalis pendeat ab organi temperie. Certè species visuales, quæ communiter dicuntur per medium diaphanum productivè traduci, ita non pendent à medii temperie, ut natæ sint existere in aere, in quo nulla temperies; & hac utcumque frigore, vel calore nimio variata in vitrò, vel alio perspicuo, non idcirco vel minimū speciei productio; vel conservatio variatur. Demum cum qualitates materiales universim à sola materia sustententur, & idcirco multæ veteris compositi in novo perseverent, mutato non solum temperamento, sed substantia; quidni perseverabunt species, mutato cerebri temperamento, perseverante potentia, cuius sunt perfectiones, & ad cuius exigentiam nihil est, cur non debeant conservari?

Propterea consultius videtur species phantasticas non in substantia organi, quod est cerebrum, sed spirituum potius animalium, qui cerebro, sive, ut vulgò malunt, cerebello immiscentur, reponere. hinc enim & facilius datur ratio eorum, quæ in memoria contingunt, ut patebit in seq. & in præsentì oblivionis, quæ accidit ex amissione specierum unà cum spiritibus evolantium. Subitam ergo oblivionem totalem, aut partialem fieri crediderim ex percussione, aut morbo, quòd pars certa cerebri, ubi spiritus ii delitescunt, agitur, aut alteratur ita, ut spiritus libertatem à materiæ tenacitate, qua involvebantur, nacti, dissipentur, ac pereant. Hinc rursus tenacitas in aliis magna, in aliis exigua, aut nullæ specierum, pro-

prout cerebrum habent viscosum magis, aut minus, ut spiritus per se volatiles, & stare loco nescientes valeant inæqualiter retinere. Fortassè etiam cerebri interior substantia in quibusdam solidior est, adeòq; spiritus respuit, qui coacti residere in parte exteriori, faciliùs agitantur, & abeunt, & ex hoc reat contingere, quod de impio Beya refert loc. cit. Jonstonus, ut sint senes, qui præsentium faciliè obliviscuntur; præterita verò se pueris acta tenacissimè teneant; duratur enim ex longa caloris actione pars cerebri interna; ex quo species, & spiritus olim accepti perseverant: sed ex eodem capite non possunt alii de novo ingredi, qui nullo proinde negotio evanescent.

Dices. licet species materiales ex hac causa perire possint, non tamen species intelligibiles spirituales, quæ non spiritibus animalibus, sed uni animæ rationali inesse possunt.

Resp. ità esse, nulla enim ratio, nulla experientia nos cogit ad asserendum interitum etiã specierum intelligibiliũ. quod enim memoriam omnem amittimus aliquorum aliquandò obiectorum, potest commodè reiici in solum defectum memoriæ sensitivæ; amissis enim speciebus phantasticis, intelligibiles, quæ ab iis pro hoc statu pendent, vix, & ne vix quidem possunt operari. Cæterum ad naturalem perfectionem animæ immortalis pertinet, ut separata nullam non habere possit cognitionem eorum, quæ corpori coniuncta experta est, ut a libi iterum dixi.

C A P U T IV.

*An sit, quid sit, & in quo subiecto sit
Habitns.*

Quidquid de habitu à Philosophis dicitur; totum ab experientia sumptum est, quæ docet, usum, & consuetudinem actuum. sæpiùs
ite.

iteratorum acquiri inclinationem, facilitatemque ad operandum. Quamquam non omnis potentia vitalis hoc pacto disponi sit nata. nulla certe vegetatrix facultas, nullus exterior sensus inclinatur, & habilitatur ad actus similes in posterum eliciendos. At verò intellectus, & voluntas suis se actibus ita promovent, ut facillimè, & delectabiliter operentur, quæ prius non sine mærore, ac difficultate tractabant. sic instruitur intellectus scientia, aut errore: sic voluntas virtute, aut vitio.

Profecto, ut Aristot. 3. Eth. c. 5. philosophatur, ad multa nos ita paravit natura, ut propter indifferentiam, & arduum operandi indigeamus aliquo ulterius ad unam partem inclinante, & molestiam minuente, quò promptius, & intensius operemur. Ad hoc autem exterius impellit Legislator præmiis, ac pœnis: ad hoc interius nos ipsi urgemur usu, & exercitio.

Eiusmodi facilitas, ac propensio sensim nostris actibus acquisita stabilis est, & perseverans etiam diù post actus; proindeque non potest in alio, quam in qualitate absoluta, & operativa ab actibus ipsis relictâ consistere, ut patebit. Quare probabilis non est cuiusdam apud Arriagam disp. 11. de An. sect. 2. assertio opinio, facilitatem istam oriri immediate, ac formaliter ab actibus præteritis. Ut enim non potest pondus hesternum, si sit penitus sublatum, nec physicum quidquam sui vice reliquerit, hodie inclinare lancem: ita nec præteritus actus potentiam. Accedit, quod cum mera præteritio actuum sit immobilis, atque indelebilis denominatio, habitus quilibet ex ea unice constans amitti non posset.

Solet habitus definiri, qualitas absoluta difficilè mobilis ex actibus cognoscitivæ potentæ genita, & ad similes actus potentiam facilitans, & inclinans. Omnia patent ex modo dictis.

dictis; nisi quod dum dicitur habitus genitus exactibus potentia cognoscitiva, non est sensus, quod sola cognoscitiva potentia formaliter accepta sit habitus capax, sed est sensus, quod quæcumque potentia capax habitus debet esse cognoscitiva seu formaliter, seu realiter; nullus enim est actus habitum gignere natus, qui vel non sit cognitio, vel cognitionem necessario non supponat, ut est omnis appetitio.

Videndum nunc, in quo subiecto habitus reperitur. Primum communiter censent, sensus externos habitum non suscipere. Ratio est tum ab experientia, tum à priori. sunt enim potentia omnino naturales, ac determinatæ ad unum, internoque appetitui subordinatæ. quare si quæ est difficultas, non ab ipsis, sed ab appetitu superanda est; atque adeo non in ipsis, sed in appetitu residere habitus debet arduitatis superativus. Verum hæc ratio debilis est; quia probat similiter, nullum esse in sensitivo appetitu habitum; hic enim phantasia ita subordinatur, ut quodcumque ea proponat, ipse illico amplectatur. quare satis esset habitus in sola phantasia. Germana igitur ratio desumitur ex dicendis de habitu in solis speciebus memorativis constituto, quarum scilicet capaces non sunt sensus externi.

Ex hoc ipso fit, multò minùs capacem habitus esse locomotivam, quæ nihil ipsa cognoscit, & despoticè appetitui subordinatur, & servit. acquiritur quidem per usum artis facilitas, & determinatio quædam non in mente solum, sed & in materialibus organis, ut videre in iis est, qui citharizandi, saltandi vè artem exercent. habitus tamen in mente est, eiusque potentiis motum imperantibus, ac dirigentibus. in corpore acquiritur dispositio quædam, & aptitudo maior ad obediendum animæ motus artificiosos imperanti. Sed hæc dispositio pertinet ad qualitates primas, vel secundas, & que ita

ita in membris, ut in exterioribus instrumentis, quæ exercitatione ipsa aptiora redduntur.

De Phantasia, & Appetitu non hominis modo, sed bruti dicendum, quod capaces sunt habitus, bruta enim consuetudine sensim ad artificiosos motus disponuntur; iisque affuescunt, ad quos solo naturæ ductu ire non possunt. hinc Augustinus lib. 83. qq. q. 16. *Animalia*; inquit, *bruta consuetudine fiunt domita, & mansueta*. quid est autem fieri domita consuetudine, nisi habitu? Et D. Thomas l. 2. q. 50. ar. 3. ait, bruta posse considerari, ut operantur ex mero naturæ instinctu; atque ita in ipsis nullos habitus esse, & ut operantur ex imperio rationis, quatenus ab hominibus per quandam consuetudinem disponuntur ad aliquid operandum sit, vel aliter; atque ita in brutis habitus poni posse. Propterea Philosoph. 1. Met. c. 1. brutis disciplinabilitatem, & aliqualem prudentiam tribuit.

Denique in intellectu, & voluntate esse habitum, nemo dubitat. in voluntate quidem; quia hæc est potentia libera, adeoque indifferens ad opposita; & in multis indigens conatu difficultatis superativo. opus ergo habet principio inclinante, ac determinante ad unam partem, talis est virtus, tale vitium; à quibus disponitur homo ad rectè, vel secus cum facilitate operandum. in intellectu verò; quia substat arbitrio in omnibus veritatibus inevidentibus, & indifferentiam proinde habet: in evidentibus verò difficultatem patitur, tum sæpè in penetratione veritatis, tum semper in continenti studiorum exercitio. propterea debuit suis actibus facilitatem, & inclinationem acquirere, quam habitum appellamus. Tales sunt quinque illi in Logicæ q. proëm. recensiti, Intellectus, Scientia, Sapientia, Prudentia, & Ars.

C A P U T V.

*Num Habitus sit Qualitas specialis à
speciebus distincta.*

P Suarez disp. 44. Met. sect. 4. contendit, facilitatem, quam in intellectu, & voluntate experimur, non à speciebus, sed à speciali qualitate provenire. etenim, inquit, ea facilitas tenet se ex parte potentiae, cum species teneat se ex parte objecti, cuius est vicaria. Idem sentit Aversa qu. 49. sect. 2. asserens, hanc esse communem sententiam, & doctrinam; pro qua citat Aristotelem, D. Thomam, Capreolum, &c. Hurtadus, Arriaga, & jam Recentiores passim habitus à speciebus distinctos in intellectu non agnoscunt, & D. Thom. Soncinnatem, aliosque Thomistas pro se afferunt. quod attinet ad voluntatem, Hurtadus est testis, Doctorum omnium, excepto nemine, sententiam esse, dari in ea habitus inclinantes à speciebus planè distinctos. Sed non desunt tamen Recentiores ingeniosi, cum quibus sentio, hos ipsos nullos esse asserentes.

§. I.

*Nullus est Habitus à memorativis spe-
ciebus distinctus.*

P Robanda est præsens assertio seorsim de intellectu, & de voluntate; de phantasia enim, & de appetitu eadem est ratio. Incipio ab intellectu, & primùm huc traho D. Th. qui 1. 2. qu. 53. ar. 1. quærens de habitus corruptione, ponit rationem dubitandi; quia nihil corrumpitur, nisi per adventum contrarii; speciebus autem intelligibilibus nihil est contrarium, hanc ut solvat, non negat suppo-
Philos. de Bened. T. III. V situm,

situm, ut debuisset, si habitum à speciebus distingueret, sed aliò se vertit. admittit ergo suppositum de identitate habitus cum speciebus. Rursus q. 50. ar. 6. ut probet, in intellectu Angeli esse habitum, illud unum affert, quod eius intellectus cum sit finitus, & actui potentiam miscens, ut est in potentia, eget speciebus ipsum ad propriam operationem promoventibus. idem repetit in resp. ad 3. non aliam ergo à speciebus habitum agnoscit in intellectu S. Doctor.

Ratione idem ostenditur. 1. Omnis experientia, ex qua inductus est habitus, in solis memorativis speciebus causam sufficientissimam habet. ergo non alia ab istis qualitas querenda, cui habitus ratio tribuatur. antec. prob. duo sunt, ad quæ præstanda habitus inducitur, facilitas, & inclinatio per actus frequentatos in intellectu acquisita utraque per species habetur. Ad cuius evidentiam adverto, duo esse genera specierum, de quibus præsens sermo esse potest. alia est species directa, quæ obiectum unum, ut est in se, repræsentat. alia est species memorativa reflexa, quæ non obiectum modo, sed actum etiam priorem refert, quo aliàs obiectum est cognitum. Omnis porro actus vitæ præsertim nobilissimæ, qualis est, quæ intellectu traducitur, cum delectatione coniuncta est, ut testatur Philos. 12. Met. 1. c. 39. ubi, *Sensus*, inquit, *Vigilia*, & *Intellectus sunt maxime voluptuosa*, & 9. Eth. c. 9. *Vivere ex iis est, quæ bona, & iucunda sunt*: quod probat, & quia omnes id appetunt, & præcipuè boni viri, ac beati; & quia in vita cognoscitiva habetur reflexio quædam; nam qui videt, videre se sentit, & qui audit, audire, & qui intelligit, intelligit se intelligere. at sentire se vivere est per se iucundum, & delectabile; vita enim natura bonum est: bonum verò sibi inesse sentire iucundum. Hinc fit ulterius,

ut

ut memoria nostrorum actuum non actus solum, sed & delectationem in iis exercendis perceptam nobis exhibeat. atque ex hoc illa est inclinatio, quam ad similes actus repetendos in nobis experimur. sic qui recordatur delectationis, quam ex opiparo cibo aliàs cepit, naturaliter inclinatur ad eundem iterum comedendum.

Addo, quod inclinatio ista vix, & ne vix quidem proficisci aliunde, quam à speciebus potest. inclinatio enim, de qua loquimur non innata est, sed elicitæ, quæ causam habet, posita natura voluntatis, in bono cognito quæ tali. Maior ergo inclinatio est à maiori cognitione boni, aut à cognitione maiori boni. illa ergo qualitas habet inclinare magis, quæ facit cognoscere aut magis, aut maius. hoc autem proprium est speciei, & non alterius omnino mortuæ qualitatæ. Saltem difficile explicatur; quæ vi qualitas illa nullatenus cognitiva voluntatem inclinet. qui enim potentia per se non propensa, nisi ad bonum apparens, sine ulla maioriæ vel in bono, vel in boni appærentia, possit fortiùs ad bonum impelli per physicam qualitatem perinde, ut grave per gravitatem fertur ad centrum?

Deindè facilitatem potentia habituatæ ita per species expono. 1. quidem, quia maior inclinatio à speciebus, ut probavi, derivata non stat sine maiori facilitate in operando; quæ enim iucundius facilius etiam agimus. *Difficultatem*, inquit Philos. *metimur molestia, vel tempore*. quare qui tollit molestiam, tollit difficultatem. memoria ergo præteritorum actuum delectationem perceptam revocans, & futuram indicans, molestiam non præsentem solum, sed & præterita iucunditate, quam refert, aut minuit, aut abolet. 2. difficultas etiam tollitur, dum potentia minori conatu incumbere ad operandum debet; minus debet

conari, quo plures sunt causæ cooperantes. at species memorativæ coöperantur potentiz ad similes actus eliciendos. minuunt igitur, aut tollunt potentiz difficultatem.

Hoc totum confirmatur exemplo sensus interni brutorum, in quo adversarii plerique cum Suarez loc.cit. non alium à speciebus habitum agnoscunt. Nec juvat respondere, bruti phantasiam esse prorsus determinatā ad unum, cum intellectus ex imperio voluntatis moveri possit, ac determinari. Primò enim intellectus in omninò evidentibus à voluntate non pendet. ergo saltem in his non eget habitu. Deinde non semper intellectus à voluntate determinatur, sed sæpè prævertit omnem electionem. tunc ergo habitus speciali opus non habet. atqui ille est propriè habitus, vi cuius potentia libertatem antevertit: habitus enim ex repentinis cognoscitur, ut testatur Aristoteles 3 Eth. c. 8. ergo propriè habitus non est qualitas specialis, sed species.

Accedo ad voluntatem, & ex iisdem ostendo hic etiam munera habitus facilitantis species obire. Ut enim per actus intellectus, ita & per actus voluntatis species gignuntur memorativæ & actuum, & delectationis actibus adiunctæ, à quibus potest voluntas facilitari, & inclinari eo prorsus modo, quo dictum est de intellectu. Præter hæc à speciebus est alia ratio inclinans voluntatem ad similium prioribus actuum repetitionem; scimus enim per eas species actum v. g. temperantiæ, aut justitiæ sæpè alias nos eliciuisse. hoc autem validissimum est motivum ad eos actus iterum eliciendos impellens. difficile siquidem nos ipsi damnamus: abstinere autem ab iis actibus esset quodammodo damnare nos ipsos, quasi antea non rectè, nec consultò fuisset operati. Hinc est in nobis poenitentia difficilis, & in Angelis moraliter impossibilis. Sed de hac tota re iterum in Ethicis.

Ad

Ad idem nunc urgetur paritas ex appetitu brutorum, in quo si qua est facilitas, tota ab adversariis non paucis in species, & cognitiones reiiicitur, idem ergo dici de voluntate potest. Quæ verò affertur disparitas ex huius libertate, videtur omninò extrà rem; ex libertate enim fit quidem, ut facilitas, & inclinatio sit in manu voluntatis: non sic in appetitu, qui ab ea omninò determinatur, & rapitur. Cæterum hoc non tollit, quo minùs eadem, & ab iisdem causis possit esse in utroque facilitas. Finge esse in appetitu sensitivo, & rationali qualitatem illam specialem habituantem; nonne uterque ab ea eodem modo facilitabitur? quamvis voluntatem facilitabit sine determinatione ad unum, appetitum cum determinatione: quod non est ad rem habitus. idem ergo de facilitate inducta per species.

§. II.

Satisfit contrariis argumentis.

O Biic. 1. Species impressa tenet se ex parte obiecti, cuius est virtus, & est necessaria ad simpliciter operandum, habitus tenet se ex parte potentiae, cuius est perfectio, & est necessaria solum ad operandum faciliè. ergo habitus non est species.

Promovet huius argumenti vim P. Maurus q. 35. de Anim. pulchro hoc discursu. Duplìciter potentia facilitari potest ad suos motus. 1. quia in movente major est vis motiva. 2. quia in potentia ipsa, stante etiam æquali obiecti motione, maior est mobilitas. Sic navis faciliùs movetur, vel quia ventus est major, vel quia, eodem licet vento: aptior est ipsa ad motum. Species cum sit obiecti virtus, facit solum; ut obiectum sit efficacius motivum: quod non sufficit ad rationem habi-

tus, qui scilicet est potentiz perfectio, adeoque debet illam reddere, cæteris paribus, facilius mobilem ab objecto. sic navis non dicitur melior, quæ a majori vento, sed quæ a pari citius, faciliusque impellitur. sic non dicitur perfectior oculus, quod a perfectiori visibili efficacius, sed quod ab eodem; aut pari melius ad visionem movetur.

Resp. species, ut dixi, alias esse directas genitas ab objectis, alias memorativas reflexas derivatas ab actibus. in his autem, non in illis habitum constituo. Species verò memorativæ & requiruntur ad operandum circa objectum non simpliciter, sed facile: & non se tenent ex parte objecti, sed potentiz: sunt enim species non objecti, sed actuum, ac delectationis ab actibus olim perceptæ; adeoque speciali titulo sunt perfectiones potentiz suis sibi viribus illas comparantis.

Per hæc solvitur additum P. Mauri. ut enim si navis esset, quæ suo sibi motu vim talem acquireret, ut flante æquali vento, citius adhuc moveretur, perfecta navis esset: ita perfecta est potentia, quæ licet æqualem impressionem directam ab exteriori objecto accipiat, vi tamen impressionum, quas ipsa sibi per suos actus infert, delectabilius, adeoque facilius objectum amplectitur. Vis ergo maior motiva ex habitu non est, ut perperam adversarii putant, vis maior objecti, quasi objectum ipsum crearet in virtute motiva, sed est maior ipsius potentiz vis, quæ suis se operationibus ita instruit, ut, accedente impulsu non solum pari, sed etiam minore objecti, celerius ad illud, faciliusque feratur.

Obiic. 2. Facilitas, quam per actus repetitos voluntatis acquirimus, non potest refundi in meliorem objecti cognitionem, quam unice faciunt species. Etenim si quis in comestione cibi vetiti nullum aliud malum agnoscat, quàm

Dei

Dei offensam, si pergat illum comedere, acquirere facilitatem, & habitum. hic autem non habetur ex sola intensiori cognitione; quoties enim comedit, cognoscit & physicam bonitatem, & moralem malitiam comestionis; adeoque intenditur cognitio non solum bonitatis physice, sed etiam malitiæ moralis, deberet. ergo simul inclinari ad cibum capiendum, & ad vitandum peccatum.

Hoc argumentum sententiam statutam ne tangit quidem. habitus non est species efficiens meliorem obiecti notitiam, sed est species memorans nostros actus præteritos, delectationemque in iis exercendis perceptam, adeoque excitans complacentiam simplicem, & indeliberatam relatè ad illud exercitium, quod apparet experimentaliter ut jucundum. quia ergo in casu dato comestionem cibi homo frequentavit, non verò aversionem à peccato, ad illam, non ad hanc habitum acquisivit.

Obiic. 3. Voluntati Christi Domini infusi fuerunt omnes habitus naturales virtutum. Si ergo habitus essent species, fuissent pariter infusa vitia; quia infusæ fuerunt species perfectissimæ actuum vitiosorum.

Resp. 1. vitium non esse quamcumque speciem, qua obiectum, & actus vitiosus cognoscatur, sed illam, quæ est experimentalis, & nata tum elici ab actu pravo, tum excitare inclinationes ad similes actus eliciendos. hæc autem excitatio non habetur præcisè ex maiori repræsentatione voluptatis existentis in actu pravo, sed ex proprio modo repræsentandicam voluptatem experimentaliter, ut à se olim perceptam. Hæ species in Christo non fuerunt relatè ad actus vitiosos, adeoque habitus in eo vitiosus non fuit. Resp. 2. species actuum vitiosorum non induere rationem vitii, nisi quatenus sunt proximè potentes excitare pravæ inclinationes. quarum quia capax Christi volun-

tas non erat, species illæ rationem habitus non induebant.

Obiic. 4. Virtus vitio contrariatur, & in gradibus simul intensis esse non possunt. at species quæcumque possunt simul esse. ergo virtus, & vitium non sunt species. Conf. habitus corrumpuntur per actus oppositos. at species intelligibiles, quales acquiruntur per actus intellectus, & voluntatis nunquam corrumpuntur, ut supra dictum est. species ergo habitus non sunt.

Resp. Virtus, & vitium contrariantur non per exclusionem, sed per imminutionem virtutum, quatenus species inclinantes ad iustitiam v.g. non habent vim inclinandi, & excitandi complacentias in præsentia specierum recentium, & vividiorum inclinantium ad iniustitiam, quod si vis inclinandi sit iam minor, dicitur habitus iustitiæ imminutus: si nulla, dicitur habitus iustitiæ sublatus. ex quibus constat totam oppositionem habituum esse in hoc statu ratione specierum phantasticarum, quæ comitantur intelligibiles, & à quibus istæ habent, ut excitentur? & moveant. quid enim contingat circa oppositionem habituum in substantiis purè spiritualibus, non constat.

Per hæc patet ad conf. corrumpitur enim habitus voluntatis per actus oppositos non in ratione entitatis, sed habitus, h. e. in ratione potentis proximè inclinare ad actus: quam vim amittunt species intelligibiles ab actuum oppositorum vi inclinativa maiore, ut dictum est.

Obiic. 5. Nulla esset iuxta hanc doctrinam distinctio inter habitum intellectus, & voluntatis; omnes enim species pertinent ad intellectum, ad cuius scilicet operationes immediate ordinantur. sequela est contra communem sensum. ergo.

Resp.

Resp. habitus istos distingui non per subiecta (intellectus enim, & voluntas una est realiter potentia) sed per hoc, quod habitus intellectus geniti sunt à cognitionibus, & ad cognitiones inclinant: habitus voluntatis geniti sunt à volitionibus, & ad volitiones inclinant: quare distinguenda est ea propositio, *Omnes species pertinent ad intellectum*; vera enim est, si sumantur ut species, h. e. ut virtualiter representantes; falsa, si sumantur, ut habitus, h. e. ut facilitantes, & inclinantes.

Instabis, hinc fieri, ut etiam in sensibus externis admittendi in hoc sensu sint habitus. nam etiam istarum sensationes vitales sunt, delectationem afferunt, & speciem sui memorativam relinquunt.

Resp. species ab istis memorativas non relinquunt immediate, nec in ipsis externis sensibus, sed mediate, quatenus efficiunt sensationem internam, à qua species memorativa relinquatur. quare habitus in solo interposito sensu reflectente habetur; quamquam hic possit externas etiam sensationes respicere, sed tantummodo mediate,

C A P U T VI.

Inferitur ex dictis, habitum non esse unam simplicem qualitatem.

Repugnant huic illationi Thomistae passim. Sed Scotus, Aureolus, Gregor. aliiq; apud Suar. disp. 44. Met. sect. 11. quos sequuntur Rec. nostri ferè omnes etiam ii, qui habitum putant specialem qualitatem, consentiunt.

Probatur autem ex dictis. novus actus generat novam speciem sui memorativam. ergo ex frequentatis actibus non una, sed multae species generantur; adeoque habitus ex his constans non una est, sed multae qualitates.

anteq. prob. primus, & alter actus ejusdem sunt virtutis quoad efficaciam producendi suam speciem. non ergo probabile est, quod primus suam producat, alter non producat. Neque dicas, quod secundus actus non alteram producit speciem, sed priorem firmat, radicaturque magis. Contra enim est per ea omnia, quæ superiori tomo adversus Thomisticam radiationem dicta sunt. Et quidem species prior concurrir ad productionem secundi actus; inclinatur enim, & faciliat eius productionem: quod ex dictis fit minuendo conatum potentie per simultaneam causalitatem. manet ergo prima species, dum gignitur secundus actus; per consequens maior ista firmitas non habetur per productionem speciei perfectioris, sublata imperfectiore. Rursus nec fit novum aliquem modum speciei affigendo; cum enim crescat speciei activitas, necesse est, ut addatur qualitas, non modus, qui cum activus non sit, activitatem augere non potest.

Hoc totum à fortiori est verum, ubi actus sunt diversæ inter se rationis: in quibus & experientia notum est, facilitatem ab uno acquisitam non juvare productionem alterius; quis enim ex eo præcisè, quod se exercuit per temperantiam, expeditur ad exercendam fortitudinem? cum possit ceteroqui contingere, ut maximè temperans sit minimè fortis? & præterea recurri hic non potest ad vetus Thomistarum principium, quod nullum subiectum capax simul sit qualitatum ejusdem rationis; hic enim ut actus, ita & species substantialiter heterogeneæ gignerentur. Quod si actus licet diversi in unam omnes speciem conspicerent, aperiretur via unam in intellectu speciem obsectorum omnium agnoscendi, quæ quidem ab aliis, & aliis obiectis, modum aliquem de novo acciperet, quo ad eorum cognitionem concurrere posset.

Acce-

Accedit & ratio à priori; quia species producta ab actu non potest ab eo accipere, nisi perfectiones in ipso contentas: quæ cum differant à perfectionibus contentis in alio; non apparet, quo pacto possit ad alium effectivè concurrere. Hoc idem extendi potest ad actus eiusdem entitativè rationis; quia in his semper est distinguere actum ab actu saltem per extrinsecas circumstantias; adeoque species relicta ab uno non potest ad alium influere, qui sub iisdem circumstantiis experimentaliter non innotescit.

Unum est, quod solet obiici, futurum hinc, ut nulla scientia, nulla virtus esset simpliciter una. quare nec physica esset una scientia, nec iustitia una virtus, &c. quod videtur absurdum.

Sed absurdum non est, imò necessarium ex probatis, habitum non esse unam, sed multas qualitates. Num verò sit in habitu unitas compositionis, an solius aggregationis, disputatur ab authoribus. Equidem, si sermo sit de habitibus genitis ab actibus eiusdem rationis, censeo in iis esse unitatem compositionis intensivæ, qualis est in pluribus eiusdem qualitatis gradibus universim in superioribus asserta. Hanc unitatem in habitibus actus diversæ rationis spectantibus non agnosco; neque enim qualitates heterogeneæ natæ sunt intensiorem conflare. Cæterum in his, præcipuè in scientiis unitatem non aggregationis solum, sed etiam ordinis statuo; de qua re satis in q. totius philosophiæ præcæmiali. In virtutibus est unitas desumpta à motivo formali, quæ est unitas non rei, sed rationis; de qua in Ethicis.

Q U Æ S T I O Q U A R T A

De Facultatibus Anima sensitiva.

HUjus animæ facultates in cognoscitivas, & appetitivas dividuntur. Cognoscitivæ aliæ exteriores, quinque scilicet notissimi sensus, Visus, Auditus, Olfactus, Gustus, & Tactus, aliæ interiores in quinque etiam species distributæ, Sensum communem, Phantasiam, Imaginationem, Æstimatoriam, Memoriam. Appetitiva non nisi una in singulis. De his pauca, & præcipua; ad omnia enim excurre, quæ sensuum singulorum sunt propria, non est unius voluminis. Sed prius aliqua de sensu universim adversus Atomistas sunt disputanda.

C A P U T I.

An sensus omnis tactu uno absolvatur; & an omnis sensatio in cerebro fiat.

ANtequam ad sensus singulos accedo, aliqua omnibus communia primo loco tractanda sunt, ne sæpius deinde repetantur. Sed prius exponendum est paucis systema ab Atomistis cum Epicureis, tum Cartesianis circa sensuum, sensibilibumq; naturam conceptum; ut appareat, an jure sit illi præhabendum, quod hæcenus Peripatetici propugnaverunt.

Convenit ergo 1. inter Atomistas universim omnis distinctæ qualitatis otores, sensibilia non esse, nisi corpora ipsa per se impressionem in exteriora organa, & his mediis in cerebrum facientia. 2. impressionem istam nihil esse, nisi impetum, quo sensibilia aliter, & aliter movent localiter (aliud enim motum non agnoscunt) externi sensus sedem, pun-

gen.

gendo, vellicando, astringendo, laxando sensorium, quæ est saporum vis, velidem undulatum reciprocè agitando, quæ vis est soni, & sic de aliis. 3. hinc fieri, ut omnes sensus ad tactum reducantur, ejusque species sint. impulsus enim localem percipere ad tactum pertinet. juxtà diversum porro impulsus sensus distinguuntur; est enim impulsus adeò tenuis, qui percipi nisi ab oculo non possit; est undulatus, qui non potest percipi, nisi ab aure; & sic de aliis. quod totum nascitur à natura tum impulsus, tum organi ità fabricati à natura, ut huic non illi impressioni excipiente sit aptus. 4. impressionem exteriori sensui factam ab hoc ad cerebrum transmitti per nervos, ac spiritus animales ibi veluti ad vitæ fores in excubiis collocatos. qua autem ratione ea impressio cerebro communicetur, dissensio est. Cartesiani censent nervos fidium more intentos ità usque ad cerebrum esse, ut vel minimum in una extremitate tacti, impulsusque eundem momento motum in alteram extremitatem derivent. Alii, quo nervos viderent ità tenso non esse, ut possint ad omnem impulsus moveri velut fides in cithara, ad spiritus confugiant animales, qui irradiatione quadam ferunt ut radii luminis ad cerebrum afferunt obiecti exterioris impressiones. 5. consentiunt in eo, quod in exteriori sensu non nisi obiecti impressio excipitur; hæc autem non ibi, sed in cerebro sentitur: & hoc volunt, dum aiunt, sensationem exterius inchoari; interius perfici. 6. hinc inferunt Cartesiani. sonum, colorem, saporem, &c. non esse aliquid in re extrà animam (in hoc ait Legrandius *crasse decipi Aristotelicos*, dum putant sonum ex. g. qui aure excipitur, esse in aere, aut in corpore, quod vocant sonoro, &c.) sed animam ipsam in cerebro quasi in curuli sedentem pro variis obiectorum impulsibus variam sibi eorum ideam,

ideam, notionemque fingere, soni scilicet, coloris, &c.

Hæc sunt, nisi fallor, in quibus tota absolvitur, circa sensus Atomistarum doctrina. addam nunc, quæ mihi in istis falsa videntur, & improbanda.

Falsum est igitur primò, corpora ipsa sensibilia sola locali impressione in sensus externos incurrere; nec aliud iis, quam motum communicare; adeoque sensus omnes ad tactum redigi. Hoc multa ostendunt. 1. quia in hac sententia quinarium sensuum numerus communis gentium omnium consensione firmatus omnino concidit; non quia omnia reducuntur ad tactum (ab hoc enim se expedient Atomistæ, unum sensum tactus esse secundum genus, sed quinque ejus esse species asseverando, quarum infima generis nomen sibi vendicet) sed quia sub tactu innumeræ forent species pro innumera modificati aliter, & aliter motus varietate. Profectò si sensus non est nisi tactus motum unum percipere natus, & sensibile non est, nisi corpus motu uno natum percipi, ut coherenter quinque sensus afferantur. quinque sensibilia ostendenda forent, h. e. corpora quinque dumtaxat motus modificationes efficientia. At qui modificationes istæ innumeræ planè sunt pro corporum figura, mobilitate. & aliis cuiusque propriis qualitatibus. innumeri ergo statuendi sunt sensus.

2. Id ipsum demonstrat notabilis, ac specifica organorum diversitas ad quinque specialiter sensibilia percipienda instructorum: quæ quidem frustra sunt, si sensus non sit, nisi tactus. sic enim non aliud fuisset organum parandum, quam quod tactui, ut est nomen specialis sensus à cæteris distincti, & per totum corpus diffusum, de facto paratum est. Quandoquidem hoc unum est satis ad omnes motuum differentias dignoscendas. hoc si negas, da motum, qui tactu

tactu non percipiatur. certè percussio, titillatio, corrosio, constrictio, laxatio, undulatio, &c. nomina sunt à vulgaris tactus perceptionibus desumpta: nec ullus est inter istos, qui manu etiam iudice non dignoscatur. quod autem ex his alius sit alio tenuior, & minor solum probat debuisse tenuiora in cute organa perfici, sensusque delicati, & exquisiti magis; non verò organa situ, conformatione, naturaque tam multum diversa.

Confirmatur. quaecumque contingit in sensibilibus impressionibus diversitas, per nervos, aut spiritus ad cerebrum communicatur iuxta Atomistarum sententiam, atqui ubique corporis praesto sunt eiusdem rationis & nervi, & spiritus animales (in his quidem substantialem diversitatem asserere esset hominis naturam ad sua systemata reluctantem trahentis) ergo ubique habentur partes omnium sensibilibus motionem excipere natæ. in solo ergo vulgari tactu sensitiva vis absolvetur; & hoc uno lucem, sonum, saporem, odorem, si Superis placet, percipiemus. Accedit & illud, quod impressio per solidam nervorum substantiam propagata, non est, cur non possit a cute etiam excipi, quæ sensus non est hebetioris, quam nervi, cum nervis ipsa quoque partibus constet.

3. Si sensibilibus impressiones non sunt, nisi motus, organi, cuius est omnes discernere, deberet esse tactus exquisitissimus, ut quamlibet motionem posset excipere, & suam singulis objectis, à quibus provenit, tribuere. Atqui cerebrum, quod est commune discretivum tantum abest, ut tactum habeat exquisitum, ut potius obtusissimum sit, ac penè stupidum. non ergo impressiones sensibilibus meræ sunt locales motiones. Mirum est, quod hunc argumentum adversarii respondent apud authorem Philosoph. in Regia Burgundia pertractatæ phys. p. 3. tract. 1. dissert. 1. cap. 7. Non necesse est, inquit,

quiunt, ut organum anima præcipuum sit exquisiti sensus: imo id sincero iudicio obasset maximè: atque ut visus organum omnis coloris est expers, & gustus organum nullo sapore imbuti debet; sic commune sensorium exquisito sensu destitutum oportet. Mirum: inquam, est, quia ex hoc, quod visus careere debeat visibili, & gustus gustabili, arguitur, communem sensum debere non omni sensibili, sed omni sensu destitui: qua consecutione nihil ineptius.

Vis argumenti apparebit magis ex ratione, quæ ex nostra sententia datur carentiæ omnis sensus) intelligo externos] in cerebro. Supponimus enim sensus speciei diversos ad speciem diversa sensibilia ferri, ita ut visus ad audibile, auditus ad visibile, &c. extendi non possit. Si ergo communis sensus visus esset, aut auditus, &c. ad omnia sensibilia non ferretur. quare debuit his omnibus careere, & vires acquirere alterius ordinis eminenter illorum omnium contentivas, quibus si agula sensibilia novo, & altiori modo perciperet. At si omne sensibile est tactile; si omnis sensus est tactus; si sentire non est, nisi discernere motiones, & actiones exteriorum corporum; qui sensus est perfectissime tactivus, est perfectissime omnium tactilium perceptivus. Sensus ergo communis exquisitè tactivus statui debuisset.

4. Non alia superest Atomistis via, qua sensibilibus impressiones deriventur ad cerebrum, quam impressio item localiter motiva per medium, quo moto, commune etiam sensorium impellatur, & excitetur. Atqui nullum est tale medium. quod num? nervi, an spiritus? Non nervi, qui scilicet non, ut perperam commentus est Cartesius, velut fides in cithara, sed reliquæ corpori adnati, innexique ita sunt, ut cum eo planè continuentur. quare nullum possunt impulsu (præsertim minimum, qualis accipitur à luce, & sonu, qui quidem in ratione
motus

motus sensibilis non est) accipere, qui in molli, carneaque materia, quibus vestiuntur, non illic frangatur, ac pereat, Non spiritus, qui tanta celeritate non possunt ad cerebrum ferri, quanta opus est, ut pedis tactio momento percipiat. & quamvis possent, non apparet, quid valeant ad lucis, aut soni perceptionem spiritus influentes, quique perinde influunt, sive ab uno, sive ab altero corpore repellantur. Fingere autem, quod spiritus sigillentur ab obiecto, ut cera ab annulo, unum foret ex lepidis commentis, quibus plena est Atomistarum Philosophia.

5. Aut potest aliqua sensio sine motu perfici, aut non potest. si potest: ruat oportet Atomistica doctrina. si non potest; ruat oportet omnis memoria, omnisque sensatio à dormientibus peracta; quæ certè contingit, nulla locali impressione ab exterioribus absentibus facta. de hac re plura vide quaest. cap. 1. & 2.

Falsum est secundò in exteriori sensu nullam fieri obiecti perceptionem. Nam & anima ibi est ad sentiendū expedita, & plenè potens; & obiectum est præsens. quid ergo perceptionem impediet? Hoc etiam demonstrat communis hominum consensus; quotquot enim sumus, oculum videre dicimus, aurem audire, &c. hæc autem nomina sunt non impressionum, sed perceptionum. Postremò si sensus exterior non perciperet ipse, sensus nomine digni essent omnino nervi, per quos scilicet actio sensibilium propagatur; neque enim alia ratione sensus nomen meretur oculus, quàm quia accipit impressionem obiecti, eamque ad oculum transmittit. hoc autem totum peragunt nervi: imò quò magis accedunt ad principale sensoriū, eò magis sensuum munere fungi dicentur.

Jam videamus, quibus argumentis à præconcepta hac opinione delicere genus humanum

num tentent adversarii. Dum cessat, inquit, cerebrum apoplexia, vel alio morbo, sensus exteriores feriantur, solum ergo cerebrum percipit. 2. dum mens aliò intenditur, quæ coram sunt, apertis etiam oculis non videmus. Mens ergo in cerebro residens ea demum est, quæ unicè sentit, 3. qui manum habent, tibiamvè præcisam, de dolore in manu, aut tibia quandoque conqueruntur: quod non accidit, nisi quia perceptio non in partibus affectis, sed in cerebro fit.

Hæc quidem inania sunt. ad 1. & 2. dico in iis casibus impediri spirituum vitalium affluxum ad sensoria; vel quia meatus occluduntur, vel quia in cerebro ipso à nimia attentione detinentur, impeditis autem spiritibus, tollitur perceptio; quia non adsunt comprincipia ad agendum vitaliter materiale sensationem necessaria; & in mea sententia desunt, vehicula specierum, sine quibus sensatio non contingit. Et quidem si otium externorum sensuum ab otio cerebri unicè oriretur, profundè dormientes ac somniantes, adeoque phantasiam, & cerebrum exercentes, deberent sensus etiam externos exercere. Tertium non est ad rem, quia in his sensibus simplicem dumtaxat perceptionem agnoscimus; non item comparativam obiecti disconvenientis quàm talis, quæ necessaria est ad dolorem. quod si ab hac perceptione sensibus deficiente arguas nullam sensuum perceptionem perindè facis, ut Cartesiani, qui cognitionem brutis negant propterea, quòd discursum non habent: quæ dicitur à Summulistis fallacia consequentis.

Falsum est tertio sonum, lucem, aliasque sensibilibus differentias nihil esse extrà animam: in quo Aristotelicos crasse errantes arguit Legrandius. Sed age, acutus Cartesius crasso Peripatetico respondeat sic arguenti. Omnis perceptio est alicuius, & non sui unius per.

perceptio; qui enim cogitat, aliquid cogitat; & non solum cogitat se cogitare; quia de hoc ipso *cogitare* est verum, quod alicuius est *cogitare*, vel ergo ibitur in infinitum, vel devenietur ad obiectum à cogitatione distinctum, ergo perceptio soni, lucis, saporis, &c. est perceptio alicuius à se distincti. Sonus ergo, lux, sapor sunt aliquid à perceptione distinctum. Rursum vel aliquid in anima, vel aliquid extra animam. secundum est, quod intendimus. si dicatur primum; vel hoc aliquid in anima est cogitatio; atque ita redit, quod non sit, nisi cogitationis cogitatio, vel est impressio ipsa obiecti, seu motus localis ab obiecto in organo effectus; & hoc non dicit Legrandus, quin contradicat Philosopho suo par. 4. princip. Phil. ar. 197. ubi expressè negat haberi ullam istorum motuum in nobis ideam, h. e. notitiam. Quidam hæc Cartesianus? Non superest, nisi ut autumat, esse ideam alicuius fictitii, & chimerici, quales sunt omnes fere Cartesianorum ideæ phantasticis hypothesebus superstructæ.

C A P U T II.

De obiecto, & organo visus.

QUam hic sumo, eandem usque methodum in singulis sensibus scrutandis servabo, ut prius obiecti cuiusque naturam, à quo sensus movetur, tum organi, in quo movetur, indagem.

S. I.

Expenditur natura coloris.

Visibile duplex, Lucidum, & Coloratum.
De luce satis multa lib. 1. qu. 4. cap. 3.
exa.

examinandus nunc superest color, sit nè scilicet qualitas à luce distincta, an verò sit lux ipsa taliter ab opaco corpore terminata. Porro color dividitur vulgò in permanentem, & transeuntem. primus est in corporibus semper idem, & luce undecumque afficiente, mutationem non patitur. secundus transit cum luce à certo situ radiante, quæ si situm variet, cessat color, sic sunt Iridis colores.

Dio 1. Color permanens non est lux, seu ignis incorporatus, ac sepultus in colorato, qui per variam mixtionem opacitatis, & diaphaneitatis varias colorum apparentias efficiat. Est contra Keplerum, Vitellionem, aliosque Neotericos illud discrimen statuentes permanentis à transeunte coloris, quod ille sit lux ingenua, iste extranea, & adventitia.

Prob. 1. in opposita sententia contingeret, ut ubi plus est ignis, & lucis, plus esset candoris. hoc verò falsum esse docet nitratus pulvis niger, & igne tamen abundans. 2. Pura terra, cui nihil sit ignis admixtum, visibilis certè est, quia opaca, adeoque apta terminare visionem. aliunde ergo visibilitas est, & color, quam ab igne inexistente. 3. Hoc quodcumque corporibus infusum, & colorem constituens, deberet quandoque apparere sine luce adventitia, aut non posset statim post lucis extraneæ adventum apparere. Per calorem enim aeris magis excitatur, & crescit ignis inexistens, quam per lucem extraneam primò accedentem. ergo calor est satis, ut color istiusmodi videatur. Accedente porro luce ignis ingenuus non statim augetur; ergo quod primò videtur, non est talis ignis. 4. Non est, cur ad occultam istam, & invisibilem lucem recuratur, si omnia possunt per visibilem extrinsecus advenientem salvari. posse autem, dicenda ostendent.

Dico 2. Colores transeuntes in Iride, aut
nu.

nubibus non sunt speciales qualitates à luce Solariter terminata reflexa, & refracta distinctæ. In hoc omnes conveniunt ; & prob. facile 1. in nubibus, quæ manentes eadem per successivum Solis recessum incipiunt primò colorem mutare ; tum prorsus amittunt. Colores porro Iridis si quid essent in nubis roscedæ guttulis productum, tota nubes colorari deberet secundum omnem sui dimensionem ; neque enim est ratio, cur hæc potius, quàm illa gutta stabilem illum colorem acciperet. Ex quo rursus fieret, ut etiam decedentes coloratæ apparerent, alia rubra, alia viridis. Hoc idem manifestius est in vitreo prisma triangulari, per quod visa objecta Iridis colores induunt, quos in se non habere perspiciuntur. Neque verò fieri aliter ea coloratio potest, quàm per lucem diversimodis à vitro refractam.

Dico 3. Colores etiam permanentes distinguuntur non videntur à luce adventitia, à corporum opaca superficie ratione asperitatis, levitatis, porositatis, & opacitatis diversæ alio modo, alioque reflexa.

Ex plurimis, quæ adduci possent ad hanc sententiam confirmandam, seligo. pauca. 1. Nix alba est albedine permanenti ; undecumque enim aspiciatur, alba semper apparet. sed non est alba, nisi à luce reflexa, & nullo modo à qualitate alia. idem ergo dici potest, & debet de omnibus coloribus. Min. prob. statim, ac fit spuma in aqua, oritur candor, non alia de causa, nisi quia lux amplior ab aqua in bullas conformata reflectitur ; neque verò alia mutatio contingit in aere, vel aqua, ex quorum commixtione fit spuma. Nix autem nihil aliud videtur, quam spuma frigore concreta.

2. Sola admixtione corporis extranei, quo varietur dispositio superficiæ, variatur illi.

cò color, ut videre est in panno, qui madescat, alterius statim coloris apparet. Non ergo est aliud color, quam lux taliter à superficie corporum reverberata.

3. Colores apparentes nihil habent à luce modificata distinctum, ut probatum est, & conceditur, ergo idem dicendum de permanentibus, cons. prob. 1. Colores apparentes, & permanentes se invicem intendunt; ut videre est in vitro trigono, per quod visus color caeruleus, aut viridis densior apparet; & in radio Solis rubescente, qui si incidat in corpus rubrum, rubescit magis. Sunt ergo colores isti eiusdem planè rationis; aliter intensiorem non facerent. Deinde si transiens corporis dispositio, qua lux reflectitur, aut refringitur, nata est facere transeuntem in luce colorem; non video, cur si eadem sit in corpore permanens, efficere non possit colorem permanentem.

4. Alba ad maiorem lucem apparent magis alba: nigra non magis, sed minus nigra. oppositum autem contingeret, si nigredo esset qualitas à luce distincta inhærens corpori; quæ proinde, ut albedo, quò medium est magis illuminatum, vividiorum sui speciem, ac visionem deberet efficere, & apparere maior. Ratio autem huius experimenti in nostra sententia est facilis; albedo enim est lux in magna copia ad potentiam reflexa, quare quò lux est maior à corpore albo remissa, cò magis videtur album. at nigredo importat admixtionem umbræ, lucisque defectum; adeoque luce aucta, minuitur oportet nigredo.

Quæ colorem specialem qualitatem probant, pauca sunt, paucique momenti. 1. Colori color est contrarius. Ibi nihil est contrarium. color ergo non ex lux. 2. Si color non est, nisi lux, omnes colores erunt eiusdem speciei: quod est contra communem sensum.

sum. 3. Umbra est privatio lucis, sed non est privatio coloris: quis enim hoc dicat? Lux ergo à colore distinguitur. 4. Idem color videtur, sive corpus à Sole, sive à Luna, sive lucerna illuminetur, sed lux tamen non est eadem, alius igitur est à luce color.

Ad 1. dist. min. luci secundum se spectatz, concedo: spectatz ut coloris rationem subit per umbræ admixtionem, nego minorem. responsio patebit ex dicendis. & quamvis hic non intercedat rigorosa contrarietas, qualis est inter calorem, & frigus; est tamen minus rigorosa per exclusionem mutuam ab eodem medio. Ad 2. non sequitur omnes colores eiusdem fore speciei; quia cum lux in ratione coloris constituitur per mixtionem umbrarum, patet, quod hac variata, varietur lux in ratione, ac specie coloris, quæ tamen est illi accidentalis. Ad 3. Umbra est privatio lucis in esse lucis, sed non in esse coloris; hinc autem fit lucem à colore distingui, ut inclusum ab includente, quia color præter lucem involvit umbram. Ad 4. primò falsa est maior; apparet enim aliquo modo diversus color corporum ad diversi generis luminosa expositorum. 2. Si apparet idem, exinde est, quod lux eodem modo, h. e. cum eadem umbrarum admixtione ab opaco reflectitur, ut constabit ex dicendis.

Difficultas non est, ut explicetur, qua ratione lux possit tantam colorum varietatem subire. Primò est certum, lucem colorari sola refractione, ut videre est in prisma trigono. Secundò est certum colorari sola reflexione. apparet hoc, dum in auro, aliove corpore levi lineæ minutæ imprimuntur; ex iis enim exiit lux colorata: quod animadvertes, si in cubiculo undique clauso solarem radium per exiguum foramen exceptum lineis eiusmodi termines: nam tunc in proximum parietem album

album tractus insilient luminis colorati. 3. est certum in Iride fieri lucis colorationem refractione simul, & reflexione. Iam quo pacto id contingat, explicandum.

Dico 4. Nulla entitas nova in luce produci-
tur, dum coloratur. Nulla enim est probabi-
lis causa eiusmodi entitatis productiva, cum
eodem modo lux coloretur, sive per vitrum,
sive per aquam, sive per vinum transiens. Et
quidem si vitrum haberet vim producendi
eam entitatem, omne vitrum eam haberet,
adeoque per quodcumque vitrum lux tran-
seat, eodem debet pacto colorari. Demum,
quæ lux coloratur transiens per unum prisma,
colorem amittit transiendo per aliud. Jam qui
fieri potest, ut entitas illa producta ab uno
vitro destruat ab alio eiusdem rationis, &
figuræ?

Dico 5. Luminis coloratio non consistit in
determinata lucis intensiōe, quasi maxima
lucis intensio sit albedo, minima sit nigredo,
& mediæ intensiōes sint medii colores.
Etenim lumen propagatur per medium uni-
formiter difformiter. quare si varius color
existeret ex varia luminis intensiōe, deberet
decrescens lumen diversimode colorari, quod
apparebit manifeste falsum, si opacum lumi-
noso sensim admoveas, ac removeas. Acce-
dit, quod radii Solis, & Lunæ sive intensi,
sive remissi trigono vitreo excepti eodem mo-
do, & ordine colorantur, nisi quod vivacitate
differunt, non sunt ergo ii colores addicti cer-
tæ luminis intensiōi.

Dico 6. Albedo, & nigredo videntur pro-
babiliter modificationes lucis tantum reflexæ.
corpora enim superficie sua ita sunt dispo-
sita, ut plus minusve lucis ad oculum re-
mittant, seu id contingat ratione asperitatis,
dum prominentes particulæ sunt diversimodè
conformatae, seu ratione porositatis maioris, mi-

norisve, sive ratione utriusq; id sanè certum est, lucem à corporibus non omninò continuatè reflecti, sed aliquatenus umbrarum admixtione. Jam si eiusmodi interruptio minima sit, ac penè nulla, candidus color existit; hic enim videtur propriissimus lucis color, ubi à fumis extraneis non alteratur. si interruptio sit multa, color habetur niger. in nigris siquidem corporibus plurimi pori, & cavitates microscopio deprehenduntur, in quibus lux infoditur, nec nisi modicè reflectitur. Hinc nigra corpora æstivo Soli exposita citius, ac faciliùs incalescunt, caloremque diutiùs servant; cum alba & serius calefiant, & citius calorem amittant. Ratio est ea ipsa, quam dixi, quod nigra lucis, calorisque intra poros plurimum accipiunt; cum alba minus porosa plurimum à contrario remittant.

Dico 7. Colores medii non reflexione sola, sed etiam refractione aliqua contingunt. Constat ex coloribus in Iride, ac prismate apparentibus, in quibus lux sine refractione colores illos medios non accipit, Cæterùm solam reflexionem non sufficere, constat in auro quod quamvis plus lucis, quam argentum reflectat; est enim corpus argento compactius, atque adeo minus pororum plusque lucis proinde reverberans; argentum tamen albicat; aurum flavescit: quod oriri non potest, nisi quia aurum non reflectit modo lucem, verum etiam certò modo refringit. Et quãvis ad refractionem requiratur diaphaneitas, qua videtur carere aurum etiam in laminas tenuissimas expansum; non tamen est ita ut videtur. multa enim corpora, quæ apparent opaca, aliquid diaphaneitatis admiscet, sicuti diaphana, utcumque ex toto perspicua videantur, aliqualem habent opacitatem, ut constat in crystallo etiam purissima, quæ cum lucem reflectat, necesse est, ut aliquid opacitatis admittat.

Jam verò quid efficiat in luce refractione, ut illam tam variis coloribus pingat, hoc est expli-

catu nimis arduum, atque ut equidem puto; hæc ætenuſ omninò ignotum. Cabeus cenſet exindè eſſe, quod radius magis, aut minùs opacatur, h. e. ut eiuſ mentem interpretor, pluſ, minuſve umbrarum admisceſci; hoc probat in priſmate, in quo qui radius tranſit per minorem vitri craſſitiem, adèoque opacatur à medio minus, purpureuſ evadit; qui tranſiens per craſſitiem maiorem opacatur magis, fit viridis; qui per maximam, purpureuſ. P. Grimalduſ in opere poſthuma de Lumine totam colorum æconomiam ad lucis propagationem rectam quidem phiſicè, ſed mathematicè fluctuantem, & criſpata redigit; atque hinc perinde, ut ſonum in aurè, apparentiaſ, impreſſioneſque diverſaſ in oculo facere opinatur. Alii aliam viam ineunt; ſed nullam, quæ difficultate careat, atque intellectum quietet. Non eſt ergo, cur hiſ immorer ulteriuſ.

Coronidis loco ſupereſt, ut oſtendam, quæ de colorum natura hætenuſ dixi, ab Ariſtoteliſ doctrina non abhorrere. Et quidem Philoſ. duplicem coloris definitionem tradidit, alteram 2. de Anim. t. 67. alteram de ſenſu, & ſenſibili c. 3. prima ſic habet: *Color omniſ motivuſ eſt ejuſ, quod eſt perſpicuum in actu.* ſecunda ſic: *Color eſt extremitaſ perſpicui in corpore nominato.* Senſuſ primæ eſt, colorem eſſe eam corporiſ diſpoſitionem, qua poteſt per medium actu perſpicuum, ſeu illuminatum movere potentiã ad ſui viſionem. Senſuſ ſecundæ eſt, corpus terminatum, ſeu opacum in ſua extremitate, ſeu ſuperficie habere eam diſpoſitionem, qua taliter coloratum dicitur; quatenuſ eam lucem refleſcendo, refringendoque variaſ proportionem efficit lucis, & umbræ ratione quarum diverſimodè lux coloratur: quod ipſum videtur innuere idem Ariſtot. loc. cit. de ſenſu, & ſenſibili, ubi ait differentia colorum delectabiliuſ haberi ſecundum proportionem, & conſonantiã, ut in numeris, coloreſ verò oculiſ moleſtoſ in diſſonantiã, & impropor-tione conſiſtere.

§. II.

Organum visus, & locus visionis exponitur.

IN oculo triplicis generis partes sunt, alie nutritioni destinantur, ut venæ, & arteriæ: alie motui vel efficiendo, vel facilitando, ut muscoli, adeps, glandulæ, & lymphatica vasa: alie visioni perficiendæ, ut nervi optici, tunicæ, humores. Missis equidem primis duabus, quæ aut communes sunt cum aliis partibus, aut oculus non sunt, sed illum servilem in morem circumstant, ad tertias accedo, quæ oculum ipsum, seu, ut loquantur, oculi bulbum constituunt.

Incipio à tunicis exterioribus minus præcipuis, nec totum oculum ambientibus, quæ duæ sunt, altera omnium extrema dicitur *Adnata alba*, vulgo *album oculi*; estque coestensio pericranii (membrana hoc est cranium extrinsecus vestiens) crassior, sed exquisiti sensus, arteriolis, venulisque distincta. altera priori immediate supposita *Innominata* Columbo dicta *Tendinea* Plempio, est tendonum musculorum productio per tenuem expansionem: ex quo Anatomici plures hanc non tunicis, sed musculis accensent. Utraque hæc tunica totum oculum, ut dixi, non ambit, sed definit ad circulum illum coloratum circa pupillam, quem circulum *Idem* appellant. Præter has in bobus, aliisque brutis præsertim avibus, alia est exterior membrana per se mobilis, qua oculos claudant, palpebris aperiis.

Interiores, exque præcipue tunicæ tres numerantur, quæ omnes per nervum opticum tribus item partibus, veluti canalibus, constantem à cerebro producantur. Prima est *Cornea*, quæ simul cum extrema nervi optici parte à *dura matre* (meninges hæc est, seu tunica durior, & externa cerebrum amplectens) derivatur. duca est (hinc *Sclerotica* appellatur) ex posteriori parte opaca, ex anteriori diaphana, ubi potissimum

num *Cornea* nomen obtinet. hæc autem totum oculum, velut capsula, involvere habet. solida est, ut ab externis noxiarum incurfionibus muniatur: perspicua est, ut lucem, speciesque transmittat.

Altera tunica multo præcedente tenuior una cum media nervi optici parte à *pia matre* (tunica hæc est altera, seu meninges interior, molliorque cerebrum ambiens) ad oculum descendit; & ubi interius humores continet, *Choroides*; sed anteriore parte, ubi crassior est, & in medio ad radiorum transmissionem perspicua à *cornea* avulsa, & in sinum curvata, ut aqueum humorem excipiat, *Rhagoides*, sive *Vuca* nuncupatur. Hæc quidem interius in oculi fundo variis coloribus imbuatur (in homine plerumque obscurior est, quam in animantibus reliquis) & hinc varii etiam colores in Iride existunt.

Tertia tunica simul cum intima parte optici nervi à substantia ipsa cerebri creditur derivata. Verum *Diamerbroekus* antea citatus id negat, quod scilicet hæc tunica vix aliquam habeat cum cerebro similitudinem; cum recipiat vascula sanguifera, qualia in cerebro nulla sunt. quare potius eam putat peculiarem substantiam, præcipuam organi visorii partem. Quidquid de hoc sit, tunica hæc est ex substantia molli, ac mucosa, filamentis innumeris, nervulisque contexta (ex hoc *Ratine*, seu *Retiformis* nomenclationem accepit) tenuis; & candida. Desinit ad Iridis extremum in quosdam pilos; seu fibrillas, quæ aliis *Ligamentum ciliare*, seu *Processus ciliares* dicuntur, quarum ope oramen vuæ contrahitur ad arbitrium, ac dilatatur; & crystallinus humor leniter antrorsum, retrorsumque movetur pro visus necessitate.

Humores item tres in oculo sunt, *aqueus crystallinus*, & *vitreus*. *Aqueus* anterior spatium occupat, & corneæ ad motus, vuæ, ut dixi, continetur. fluidus est perinde, ut aqua. Usus eius est

est reliquos duos humores paulò densiores cum
 vuca ipsa, retinaque humectare: corneam di-
 stendere: radios refringere, ac dilatare. *Cry-*
stallinus, seu *Glacialis*, crytallo similis, ac gla-
 ciei, reliquis humoribus solidior, sed non ita
 ut crytallum, aut glaciem æquet, maximè per-
 spicue est. tunica obvolvitur speciali *Aranea*
 dicta, qua quidem non minus & ipsa pellucida
 à cæteris humoribus secernitur. Situs ipsius est
 è regione pupillæ, ubi intra araneam suspendi-
 tur proportionaliter ad aranei situm in suorum
 filamentorum centro. Speciem habet lentis, ex
 antica tamen parte circularis, ex postica hy-
 perbolica. Usus est, lucem è pupilla transfu-
 sam refringere ad perpendicularem, atque ita
 conjungere radios, ut in punctum ad retinam
 desinant, veluti ad focum; unde & distincta in ea
 fiat objectorum pictura. Hinc est, quod cum ex
 morbo, vel alio defectu non par est in omnibus
 crytallini figura, sed modò magis, modò minus
 justo globosus sit; contingit ea videntium varie-
 tas, ut quidam distantia confusè, propinqua di-
 stinctè videant, qui & *Myopes* dicuntur, crystal-
 lino globoso nimis utentes, adeoque cavo per-
 spicillo juvandi, quidam propinqua confusè,
 distantia distinctius perspiciant, qui dicuntur
Presbytæ, & crytallinum habent globosum mi-
 nus, ideoque convexo perspicillo muniendi. Sed
 hæc innuisse satis sit. latiore de his tractatio-
 nem opticis remitto. Tertius demum humor
Vitreus tenuissima pellucidaque tunica, *Vitreæ*
 etiam dicta, convestitus, fundum oculi ad reti-
 nam obtinet, & crytallino subternitur. Vitro
 fuso similis, aqueo minus, crytallino magis flui-
 dus, triplo vel quaduplo aqueum, quintuplo,
 vel sextuplo crytallinum mole superat. ad re-
 tinam convexus, ad crytallinum concavus est,
 ubi eundem excipit: cætera planus. Usus eius
 est radios à crytallino immissos aliquantulum
 dilatare, ac retinæ tradere.

Post hæc inquirendum, ex tot partibus quæ potissima sit, ubi visio perficiatur. Mitto antiquiorum opiniones, quorum alii crystallinum humorem, alii nervos opticos, præsertim ubi invicem nectuntur, visionem fieri opinantium; hæc enim apud opticos obsoletæ jam habentur, & ita evictæ, ut probabilitatis ne umbram quidem amplius retineant. Communis ergo sententia pro Retiformi pugnat, nisi quod nuperrimi Recentiores stare malunt pro Choroidæ: nec desunt, qui utrumque jungentes, retinam, & Choroidem per modum unius visionem efficere contendunt.

Equidem puto non recedendum à veteri, & communissima sententia Retiformi tribuente præcipuas, & primas in videndo partes. hoc quidem plura sunt, quæ mihi efficaciter probant.

1. quia retina specialis est substantia, qualem in alia corporis parte nullam aspicimus. jam quid congruentius, quàm videndi officium oculi proprium propriæ item, specialique substantiæ fuisse à natura delegatum? Sic in reliquis organis eiusmodi specialissimam partem in decursu ostendimus propriam cuiusq; sensorium.
2. Retina per intimam nervi optici partem cum cerebro continuatur, cum Choroides non sit, nisi productio meningis. quare probabilius est id muneris exequi Choroidem in oculo, quod meninges in cerebro: id Retinam, quod cerebri substantia. Meninges autem non ea est, quæ sentit; ergo nec Choroides ea est, quæ videt.
3. Quod Retina aliquatenus diaphana sit, tantùm abest, ut vim illius visivam infringat, ut confirmet potius; nam rerum imagines hoc pacto illi altius insidentes potest melius percipere: cum enim tenuissima sit, picturam objecti vertere, ac confundere non valet. Rursus diaphaneitas est propria corporis nullo colore præditi, qualis debet esse ea pars, quæ omnis coloris sentiendi sit capax. Choroides autem colorata est,

est, & ad nigredinem accedit: quod est proprium corporum valdè porosorum, quæ lucem non servant distinctam, sed cõfusam infodiunt.

Idem demum conficitur ex eo, quod nullum est sufficiens pro Choroide argumentum. Quod enim primò obiiciunt, quod Retina non sit membrana, nec nervis, sed venulis potius, & arteriis constans, probat oppositum; sic enim apparet, eam esse specialem substantiam oculi propriam. Neque verò, quod cerebrum nervis non constet, arguit quisquam, illud non esse commune sensorium.

Quod obiiciunt secundò, quod cum pupilla soleat dilatari, & alterari: hoc autem tantum à Choroide esse possit, quæ fibras cum vasa cõtinuatas adducere valet, ac relaxare; nihil est. Nam primò non desunt qui hoc munus tribuant Retinæ fibrillis, seu filamentis per ipsam dispersis hoc præstanti. Deinde ut Retina hoc non valeat, quid inde? non debet pars oculi princeps omnia per se efficere, quæ ad videndum sunt necessaria; ad hoc enim alia sunt partes datæ, ut cætera ministeria exequantur, atque ubi opus est, serviant.

Opponunt 3. facis accensæ lumen à Choroide, quæ una est perfectè opaca, sic regeritur, ut canis oculus de nocte lucidus appareat. quod si ita est, Retina Choroidei proxima ex illa forti luminis reflexione tam vehementer afficietur, ut ab obiecti multò minori lumine perfusi moveri non possit. Resp. facis lumen non à Choroide, sed à cornea, vel etiam crystallino regeri, à quibus scilicet obiectorum imagines ita reflectuntur, ut inde foramen Vucæ pupillæ nomen obtinuerit. Non ergo ex Choroide reflexione, quæ nulla est, tum propter eius obscuritatem, non propter luminis in aliis oculi partibus refractionem, periculum ullum Retinæ timendum, quo à visione impediatur.

Opponunt 4. experimentum, quo rem suam

visi sunt adversarii demonstrare. Sint tria obiecta A B C (res v. g. paginæ rotundæ) parieti ad oculi altitudinem affixa. Jam si proximus parieti oculum in A intendas, omnia obiecta videbis. Sed si sensim recedas, intendendo semper aciem in idem A, continget, ut videas A, & B, sed non C, quod est medium. Idque, inquit, accidet, etiamsi chartaceus orbis sit valdè amplus, & diametrum habeat unius pedis, si oculus ab eo per novem, aut decem pedes distet. Huius experimenti ratio est ex visione facta in Choroidæ, quæ scilicet cum sit perforata in oculi fundo, ubi desinit in nervum, consequens est, ut eò incidens obiecti imago non videatur. hoc idem de Retinæ afferi non potest, quæ per totum oculi fundum est æqualiter fusa, adeoque ubique apta ad imagines efficiendas, formandamque visionem.

Resp. me hoc experimentum, facile cæteroqui parabile, tentasse sæpius, semper tamen sine successu ab adversariis narrato. quin etiam utcumque à pariete recedo, nihil parietis me fugit; deberet autem, si vera sunt, quæ dicuntur, pro charta non visa, aliquid obscuritatis foveæ in morem in muro deprehendi: quod tamen nec mihi, nec aliis; quos in subsidium advocavi, contigit unquam, quare suspicio est, unum hoc esse ex tot præstigiis, quæ videre oculis ipsis videmur eo uno, quòd mente percepta sunt.

§. III.

Ratio elicienda visionis declaratur.

PRincipiò Platoniorum occurrit opinio, visionem fieri putantium per aliquid à potentia ad obiectum, non ab obiecto ad potentiam emissum. Probari potest 1. ex oculi figura convexa, dando scilicet, atque emittendo, non item accipiendo nata. 2. ex animalibus, quæ noctu vident, adeoque dum nihil ab obiectis recipiunt, sed solum emittunt. 3. quia obiectum debet fieri

potentiæ præsens; nec potest nisi per radios visuales ab ea emissos, & obiecta, ut solet baculus, præsentantes.

Verùm hæc sententia penitus obsolevit, nec est inter tot Novatores, qui eius patrocinium suscepit, cum facile tamen id fuisset Cartesio totam visionis œconomiam per contractiva tentamina explicanti. Cæterùm si expectanda non sit actio ulla obiecti in oculum, nihil est, cur de nocte etiam perfectè non videamus, in qua scilicet ita est ex parte sua expeditus oculus ad videndum, ut de die. Si verò expectanda sit motio obiecti, nihil est, cur per radios istos emissos visio sit explicanda; maximè cum visio, quæ vitalis est actus, non in obiecto, sed in oculo sit perficienda. Alia, quæ hanc sententiam improbabilem reddūt, videri possūt apud authores passim.

Neque valent, quæ pro ea adducta sunt. Nam primò oculi figura interior, in qua ultimatè radii excipiuntur, concava est: exterior verò debuit convexa esse, ut à pluribus simul obiectis lucidas impressiones exciperet. Quod verò animalia quædam noctu videant, contingit ex eo, quia spiritus lucidi copiosi ab oculi non intima (turbaretur enim visio) sed extrema parte, adnata nimirum alba, emittuntur, qui obiectum illuminantes, & ad retinam reflexi, visionem efficiunt. Demum obiectum sit potentiæ præsens per lucem ab ipso vel emissam, vel reverberatam qua pingitur in oculi fundo, ut dicetur?

Vera ergo, & genuina ratio visionem perficiendi sic se habet. Suppono 1. lucem ab obiecto ad oculum pervenire; aliter visio non perficitur: Supponit hoc ipsum Aristoteles, dum colorem definit, *Motivum perspicui in æth.* lumen verò, *actum perspicui, ut perspicuum est.* Sensus est: Lumen est illud visibile, quod actuat medium diaphanum, ita ut per illud obiecta perspicui possint. Coloratum verò est illud visibile, quod oculum movere non potest, nisi per medium redditum à

lumine actu perspicuum. Videant ergo, quantum à Philos. recedant ii, qui experimentis quibusdam decepti, lumen ad certum spatium prodigi, tum inde ad oculum solam speciem intentionalem propagari censent. Sic contingere putant, dum ignis noctu è longo intervallo, aut Stellæ in fundi puteo obscurissimo videntur. Sed perperam; nam etiam tunc tenuis lux, quanta satis est ad visionem, oculum accedit: unde enim habent oppositum? quia, inquirunt, deberent tunc alia etiam objecta videri. In hoc non est aptè illatum; quæ enim tenuis lux ad oculum delata sufficit emittentis objecti visioni, eadem si reflectatur ab alio (reflexione imminui lucem, constat ex dictis) ad illud videndum non sufficiet; quin etiam si tam modica sit, illa reflexione omnino interibit.

Suppono 2. Ex probatis, lucem varia objectorum reflexione, refractioneque colorari, adeoque colorem re ipsa in objecto non esse, nisi secundum actum primum, quo in lucem coloratio redundet. Rursus lux in colorata ab objecto remissa objectum ipsum suis radiis, quibusdam veluti penicillis, in retina depingit. Apparet hoc in celebri experimento, quod omnium primus advertisse fertur Joann. Baptista à Porta Neapolitanus. sit enim cubiculum undique obscuratum in quo solum pateat externo lumini via per fenestræ foramen, cui lens vitreæ sit opposita: his in debita distantia charta apponatur, in qua objecta exteriora pingentur illicò inverso situ. Ab hac experientia ad visionem explicandam manuducti optici sunt. tota enim oculi cavitas ab vitæ opacitate obscurata, & à solo pupillæ foramine lumini externo aditum præbens similis est obscurato cubiculo; in quo quidem utroque obscuratio est necessaria, ne lux aliunde influens retinæ picturam, aut chartæ obliteret. ChrySTALLINUS humor lentis officium, retina pagine subit. Hoc idem iidem optici ostendunt in oculo artificio-

ficiali. quemad naturalis similitudinem contrahunt.

Rursus, ut in paginam, sic in retinam inverso situ objecta insiliunt; ita ut quæ pars in objecto est sursum, in retina deorsum, & è contrario pingatur: quæ pars objecti est dextera, in retina sit sinistra, &c. Hoc autem necessarium, ut objectum in suo situ aspiciatur; cum enim ejus partes nonnisi per rectam lineam videantur, & linea recta non sit, nisi à parte objecti superiore ad inferiorem retinæ, & à parte objecti dextera ad retinæ sinistram, &c. consequens est, ut ita invertantur, ne appareant inversa. Hoc autem fieri equidem non puto sine cooperatione altioris potentia, nimirum phantasie in brutis, & intellectus etiam in nobis; cum enim visus non feratur perceptione sua, nisi in illam picturam sibi præsentem inversam, necesse est, ut judicium aliquod, aut quasi judicium accedat, quod picturam objecto conferat, ac veluti iterum invertat. Hoc idem dicendum de perceptione soni, & harmoniæ, quæ solo auditu non perficitur, sed indiget potentia unum alteri conferente.

C A P U T III.

De objecto, & organo auditus.

§. I.

Explicatur natura soni.

Sonus, qui est auditivæ facultatis objectum, à corporibus mutuo percussis gignitur, ac propagatur per medium usque ad aurem. Videntur ergo prius, quid sit opus ad sonum ex parte corporum percussorum. deinde quid sit, quod medio imprimatur, estque ipse sonus à percussione productus.

Corpora igitur sonum saltem sensibilia efficiant, dura esse debent, & consistentia, quæ quæ percussa tremant, & in se ipsis tota minutis cri-

ipationibus, vibrationibusque alternis concutiantur; cum enim solida etiam porosa sint, & tenuissima aeris parte pervadantur, possunt partibus minutissimis, perque poros invicem divulgatis ita quati, ut, accedentibus iis, recedentibusque à semetuo, motus idem aeri primum interno. tum etiam externo communicetur. Apparet hoc manifeste in ære campano, quod si post percussionem manu attrectetur, sentiatur in eo notabilis tremor. Idem contingit in fidibus, quæ in unam partem vibratæ, in contrariam, sibi relictæ, abeunt, redeuntque in penduli morem. idem contingere dicendum in reliquis corporibus sonoris; quamvis propter exiguitatem talis sæpè tremor sensibilis non sit. Ex hoc etiam fit, ut si corpora non permittantur tremere, libereque agitari, impeditur ex parte, aut tollitur sonus. quare campana si pendeat, maiorem longè sonitum edit, quam si jaceat; maiorem item fides libera, quam panno leniter pressa.

Hoc etiam in causa est, cur sonora corpora, dura, & solida esse debeant; non quod una isthæc sonum edant (ex aeris enim agitatione vehementi sonus etiam gignitur) sed quia isthæc, cæteris paribus, magis sonant; quatenus percussa, minùs secundùm se tota cedunt, proindeque maiorem impetum intra se concipiunt, magisque in partibus suis vi quadam elastica præditis concutiuntur. Hinc fit, ut, sparsis in orchestra palæis, vox minor auditur; & templi parietes aulaeis convestiti concionanti vocem frangant. Hinc fit, ut corpora læviora, ac politiora magis sonora sint; tum quia pluribus simul partibus æqualem motum aeri imprimunt quod ipsum meliùs præstant, si concava sint; vel quia reciprocante intrà ipsa aere, & aer, & ipsa maiorem motum concipiunt. vel quia perinde ut lux à concavo speculo, sic sonus à cavo corpore reflexus concurrit in unum; & intenditur. Manifestum ergo est, sonora corpora

pora ea esse, quæ ad tremendum sunt apta. sic autem sunt. quæ partes habent poris aliquatenus divulsa, & elasticam vim habentes, ut impulsæ valeant se restituere, & crispari. hinc plumbum, cui vis ista non inest, sonando minùs est aptum.

Porrò eiusmodi tremor non modò in corporibus sonoris esse debet, sed item ab iis debet per totum medium usque ad aurem propagari. Testatur hoc tum Philos. 2. de Anim. tex. 82. ubi *Sonativum*, inquit, *est motivum unius aeris continuitate usque ad auditum*. tum experientia; aeris enim vel medii alterius concussione, vel imminuta, vel omnino impedita, sonus vel nihil, vel parum admodum percipitur. Hinc contrarios ventus prohibet soni propagatione: secundus promovel. Explicant passim Authores motum hunc aeris sonorum exemplo lapilli in aquam proiecti, & aquam circa se ita deficientis, ut circulos maiores, maioresq; describat. sic aer in gyrum momento crispatur, sed crispationibus adeò minutis, ut sensibiles oculo non sint: quod apparet manifestè in flammis, aut pluma campanæ pulsatae admota, & parum, aut nihil ad vehementem illius impulsus agitatur.

Medium deinde, cui tremor iste communicatur, ut ad aurem perveniat, non est solus aer, sed ignis etiam, & aqua, imò & reliqua ferè omnia solida, ac dura corpora. De aere, & igne dubitatio esse non potest; uterque enim corpus est fluxile, ac tenue, quod propterea facile accipit à corporibus percussis impressionem. Idem de aqua non paucæ probant experientiae. etenim ranæ sub aquis coaxantes foris audiuntur. Urinatores sub aqua altè demersi grandiores sonitus in continenti editos accipiunt. Plinius de piscibus, qui in vivariis quibusdam alebantur, refert plausu congregari solitos ad cibum: quosdam etiam ad nomen venisse. Idem narrat, delphinum ad pueri vocem è fundo

quo vis accurrere solitum. Non minùs de solidis id corporibus constat. nam mugitus subterranei ab igne sepulto in Vulcanis excitati latè exaudiuntur. Sæpè intrà clausum cubiculū existens, & aurem proximi cubiculi parieti admoveus, voces ibi editas distinctè percepi, quas è fenestra, aut ostio proprii cubiculi non audiebam. Certum est igitur per solida quoq; corpora propagari sonum, quamquam non ità facillè, ut per liberum aerem. hinc voces propinquo licet editæ loco, si solidum mediet, distantes videntur, eòq; magis, quò crassius, solidiusq; est medium.

Venio nunc ad soni ipsius naturam. Hunc sanè non alium plures volunt à motu ipso, aut impetu aeris à sonoris corporibus impresso. Rationes duæ sunt præcipuæ. 1. est autoritas expressa Aristotelis 2. de Anim. t. c. 81. 82. & 83. ubi, *Aer, inquit, est faciens audire, cum movetur continuus, & unus. Sonativum verò, quod motivum est aeris continuitate usque ad auditum. Per se igitur in sonus aer est, propterea quòd facile dissipabilis est: cum verò prohibetur dissipari, huius motus sonus est.* tex. autem 90. *Percussio respirati aeris ab anima, quæ est in his partibus, ad vocatam arteriam, vox est.* 2. Sonus sine motu nullus est; aer enim ut sonum transmittat, movendus est motu impellente quidem ipsum, sed non dissipante. Rursus pro varia ratione aerem impellendi existunt soni acuti, vel graves; ut enim ibidem dicitur tex. 86. *Acutum movet sensum in paucis tempore multum: Grave autem in multo parum.* hinc omnes differentiæ, proportionalesque sonorum sunt juxta differentias, proportionalesque, vibrationum, & motuum, ut ostenditur in Musica. nihil est, cur sonum ab impulsu, & motu aeris distinctum asseramus, cum omnia facillè per illos salventur.

Verùm ego, qui motum localem speciale cuiuspiam sensus obiectum esse universim imptobavi, ex iisdem, quæ ibi attuli, censeo, sonum non

non motum esse, sed motus effectum, propriamque qualitatem à solo auditu perceptibilem; cum tremor sonorus solidis corporibus communicabilis tactu etiam percipiatur. Ad auctoritatem ergo Philos. resp. facile, loquutum ibi in sensu non formali, sed causali. Sic alibi, ut notat Petitus cit. mortem definit, *Caloris extinctionem*; sanitatem alibi *aequalitatem*. sic describi solet ira *sanguinis circa cor accensio*. [Univer-
sim enim ubi rei natura per se non liquet; ut eam notemus, ad causas, aut effectus confugi-
mus, quæ notior fiat: quo quidem nihil usita-
tius in tota Philosophia. quid mirum, si Philo-
sophus soni naturam explicare volens, quam non poterat per effectum auditionis sine circu-
lo exponere, per causam exposuit? & hoc sanè
manifestum est in secunda auctoritate allata,
ubi vocem per arteriæ percussione[m] descripsit:
vox autem, ut & quivis alius sonus, ne in sen-
tentia quidem adversariorum est percussio, sed
motus à percussione, collisioneque corporum
resultans. Certum ergo videtur sonum ab
Aristotele non formaliter, sed causaliter defi-
nitum. Quod ipsum satis inde constat, quia
motus quivis ab eo inter sensibilia non propria
sed communia reponitur.

Ad secundam dico nihil inde effici aliud,
quam sonum esse effectum ad amissum causæ
sux, motui, respondentem, seu verius esse mo-
tus coeffectum ab impulsu eodem, qui certum
& motum, & sonum simul, eodemque tenore,
& ordine producit.

§. I I.

*Organum auditus, & sedes auditionis
exhibetur.*

Auris structura, inquit Hoffmannus, non
minùs, imò fortasse magis, quam oculi, mi-
randa est. Maius certe artificum petit, ex soli-

do uno lapide domum affabrè in partes suas distinguere, qualis esse in Japonia regia plantè narratur, quam ex lignis, cémentisq; construere. Plurimum verò hic debemus recentibus Anatomicis, qui antiquis ignotas aurium partes tam diligenter venati sunt, ut ex iis nulla nos lateat; multarum licet lateat usus, & officium.

Organum igitur auditus in tres partes præcipuas distribuitur. Prima exterior, quæ propriè dicitur *Auricula*, ex solida cartilagine confecta est, ne, si molliore esset, sonos confunderet, aut frangeret. Exigua in homine est, & figuræ semicircularis, variis protuberantiis, & cavitatibus distincta, in quibus *helix*, *antihelix*, *tragus*, *antitragus* protuberantiæ sunt; *Concha*, & *alveola*, cavitates. Tota auricula tenaciter ossi affigitur post ipsam jacenti, quod à soliditate, ac duritie *petrosus* appellatur. Immobilis est in homine: mobilis in brutis, & ad omnem sonitum vertibilis. Differt etiam figura, quæ in brutis plerumque est parabolica, quo plures soni veluti radios in antrum tanquam in focus, seu punctum concursus dirigat.

Post hanc per angustum foramen, quod *Meatus Acusticus*: id. Auditorium dicunt, ascenditur itinere flexuoso ad antrum interius, quod alteram præcipuam partem auditorii organi facit. Canalis istius angustia, & flexus eò spectant, ut sonus in arctum coactus, impingensq; in ductus obliquitatem perinde ut in tubam inflexam, impetum novum concipiat, & auctior fiat. Ex hoc canali humor quidam effluit biliosus, ac tenax ad auris ostium: qui humor ex minimis quibusdam glandulis exsudat, in quibus sanguis amurcam illam deponit futuram pro visco animalculis in eum aditum irrupentibus. Totus hic canalis tenui membranula operitur ad sonum reflectendum, augendamque aptissima. ex quo fit, ut si digito auris obstruatur, sonitus sentiat: qui tantus non accideret,

si panno, aut tomento aurem occludas. Ratio est fortasse, quia spiritus intra digitum agitati impellunt pelliculam illam, à qua exceptus spirituum fragor augetur.

Per hunc canalem ad *tympanum* pervenitur. id verò tenue est membrana supra osseum circulum tensa, quæ pro sono magis, aut minus valido tenditur, aut laxatur. Mēbrana hæc productio est duræ Matris, ac proinde sicca, & ad sonandum apta: cui propterea si multa crassities, aut callus obducatur, omnimoda surditas fiet: si verò ita madescat, ut actio musculorum sit remissior, proximuserit ad surditatem accessus. Supra eam subtilis funiculus tenditur, quemadmodum nervus militari tympano, non quidem ut tympanum auditorium, cum quo continuatur, repercutiat, sed ut tendat magis, reddatque tremendo promptius. Post ipsam quædam est in conchæ morem cavitas eo aere plena, quem veteres *innatum*, seu *implantatum* nuncuparunt.

In hunc etiam usum tendendi tympanū tria ibidem ossicula miro artificio parata sunt, *Malleus*, *Incus*, & *Stapes*; quæ inter se ita cohærent, ut liberis suis motibus tympanum, ut opus fuerit, tensius, laxiusve efficiant. *Malleus* ita dicitur quod tympanum percutere vulgò, sed malè sit creditus; est enim ossiculum extrema sui acutiore parte, tympano affixum; ita, que cum muscoli auditorii tendine connexum, ut vi illius & ipsum, & tympanum adducatur, pars mallei obtusior incudi jungitur, est autem *Incus* ossiculum penè rotundum duplici crure instructum, quorum altero ossi petroso, altero Stapedi adhæret. *Stapes* ex figura dicitur, estq; ossiculum cavum membranam supra se tensam habens, perinde ut alterum tympanum. Ovali foramini, de quo mox, incumbit, & per motum aliorum ossium ita elevatur, ut aditum inde ulteriorem sono præbeat.

Post

Post hæc in tertiam præcipuam auditorii organi sedem veteribus planè ignotam devenitur. Intra ossis scilicet petrosi substantiam duas spirales cavitates natura effodit. Prima est *Labyrinthus* antro tympani minor semicirculos habet osseos excavatos tenui membranula convestitos. Altera est *Cochlea* nomen ex vero nata, labyrintho minor, sed tamen aperto conspicua, & similem, aut tenuiorem membranam induta, duplici, vel triplici flexu instar cochleæ in se circumducitur. In has cavitates itur per duo foramina, seu fenestras, quarum altera *Ovalis* ad labyrinthum, altera *Rotunda* ad Cochleam ducit. Sed à labyrintho ad Cochleam iter est pervium: quare hæc est ultima auditorii organi pars; unde & *Cavitas tæca* à quibusdam appellatur, quòd exitum non habet. Membranæ, quibus cavitates istæ vestiuntur, videntur expansiones quinti paris, aut aliæ potius speciales substantiæ cum eo continuatæ, & huius organi propriæ.

Stabiliendum nunc, in qua parte auditio perficiatur. Antiquiores aerem illum dictis cavitatibus præsertim tympani innatum formale auditionis sensorium statuere. Sed perperam. 1. quia is aer fluida est substantia, adeòq; incapax sensationis, & vitæ. 2. quia non differt à communi, quem spiramus, imò & cum hoc per meatum rotundum à tympano ad fauces omninò communicat.

Verior igitur sententia est, auditionem perfici igitur in mēbranæ Cochleæ, quæ se habet in aure perinde, ut in oculo retina, quatenus utraque à cerebri substantia derivatur, ab æoque vim sentiendi, & spiritus necessarios derivat. Præterea ea tunica est, in quam vehementiùs agunt sonora; sonus enim post tot revolutiones, & incrementa eò se tandem exonerat. ibi ergo fieri debet auditio; si enim fieret in parte anteriori, sonus ulteriùs non auge-

re-

retur; si in parte posteriori, sonus ibi non
sisteret.

C A P U T IV.

De obiecto, & organo olfactus.

Difficilius de hoc esse, quam de reliquis sen-
sibus, discernere, Aristoteles author est.
est enim in nobis hebetior odoratus; nec nisi
magnas, & excellentes odorum differentias per
eum distinguimus; cum canes, & prædam procul
sentiant, & formicæ, apesque dissitam escam per-
cipiant, quam nos ne proximam quidem odora-
mur. Causa est cerebri magnitudo, quod cum
sit substantiæ humidæ, & frigidæ vim odorati-
væ, à calido, & sicco affici natam, retundit. In
hoc tamen homo reliquis animantibus præstat,
quod odoribus per se delectatur, cum bruta non
odorentur nisi cibos; horum dumtaxat necessita-
ti, hominum etiam deliciis consulente natura.

Jam verò, ut ad rem veniam, olfactus obie-
ctum odor est, qualitas scilicet ex odoro corpo-
re manans. Est autem corpus odorum necessa-
riò mixtum; quis enim pura elementa odorem
ex se mittere deprehendit unquam? An verò
debeat præterea esse vivens, incertum est; quam-
quam enim id multi asserant, oppositum tamen
videntur probare bitumina, inter quæ nobilissi-
mum Ambar à plerisque censetur. Hoc certum,
corpora odora debere attenuabilia esse per calo-
ris actionem in subtiles halitus, qui aeri, vel
aquæ immixti, & sensorium proportionatum
ingressi, illud convenienter immutent. Ita-
que odorem quamvis omninò putem non sub-
stantia, aut substantiale effluvium formaliter
esse, solo motu olfactum impellens, quod ad ver-
sus Atomistas superius confeci; censeo tamen,
illum non propagari sine halitu odoro, qui us-
que ad odoratum & ipse perveniat.

Hoc quidem ex multis constat. nam 1. quali-
tas

tas odora in aere, vel aqua non videtur posse produci, cum non sint qualitatis eiusmodi subiecta capacia; requiritur enim certum temperamentum, quod nec accipiunt, nec præhabent elementa. 2. Corpora odora si aperta maneat Cælo, expirant, odoremque amittunt. Hoc non accidit præcisè ex actione agentis extrinseci immutantis temperiem; aliter in clausis etiam hermeticè vitris odoris iacturam facerent: quod est falsum. accidit ergo, quia attenuantur ii halitus, in quibus unis relidet odor: quare dum his libera patet via, evolat simul odor. Quod verò is halitus debeat ad organum pertingere, ut odoratio fiat, est ex eo manifestum, quod sine inspiratione nihil penitus odoramur. hinc quo fortior est inspiratio, melius odor percipitur: & dum volumus tetrum odorem avertere, inspirationem prohibemus. hinc impedita per nares inspiratione, odoratio nulla est: quod evidenter ostendit experimentum à Diamerbroeco commemoratum; quo præcisa in canis jugulo aspera arteria, & extrorsum versa, vulnere deinde sanato, cum respiratio non amplius per os, aut nares, sed per illam gutturis aperturam fieret, non vox modò, sed & olfactus ita illi periit, ut ne teterrimis quidem odoribus posset amplius excitari. Quorsum autem odorationi inspiratio necessaria, nisi ut aer attrahatur odoro halitu imprægnatus? Quod si qualitas odora per medium recta ad nares, proinde ut lux ad oculum, propagaretur, attractione opus non esset.

Dices. Si ex odorato corpore halitus perpetuò expirarent, corpus ipsum tandem absumeretur, & quidem brevi. Sed primò quædam corpora odora sensibilibiter expiratione imminuuntur. quod si tota non percunt, hoc ideo est, quia non omnes corporis partes idoneæ sunt, quæ in halitum attenuentur, & evolent. Deinde spiritus, qui exhalant, quantumvis in magna copia, adeò tenuis sunt entitatis, ut sæpè non augeant,
vel

vel minuunt sensibilibus pondus, ac molem rei.

Accedo nunc ad sensorium odoratus, quod ita se habet. In parte faciei prominente, nimirum naso, ubi ex os inferius est, & quinque cartilaginibus componitur, geminæ cavitates aperiuntur, *nares* vulgo appellatæ, quas *septum* cartilagineum ex osseo septo propendens, eique adnatum distinguit. in harum singulis binæ sunt viæ, quarum altera sursum ad os spongiosum ascenditur; altera supra palatum descenditur ad fauces, perque eam & porus quandoque in nares effluit, & cerebri mucosa excrementa fortiore auris per nares attractione ad palatum adducuntur, & scretu expuuntur.

Nares interius tunica vestit à dura matre per foramina ossium cribriformium orta, eademque est cum ea, quæ os, palatum, linguam, larynge, & œsophagum operit.

Sursum porro naribus si ascendas, invenies: primò os quoddam innumeris abundans foraminibus veluti cribrum, aut spongiam. inter hæc foramina duo sunt potissima ad medium usque superciliorum protensa. his sub cranii mole latentes *Processus papillares* imminet, ita dicti à figura, quam ex parte globosam, instar papillæ, obtinent. Duo sunt, albi, molles, ad finem bulbosi, intus cavi, ex cerebri medulla, ventriculisque anterioribus productis tenui meninge obvoluti, se junctique osseo quodam septo, quod *Cristam Galli* dicunt. Omnia tamen foramina, tum quæ os cribriforme, tum quæ mamillares processus distinguunt, ita sunt exilia versus imum, & crassis, mollibusque substantiis instructa, ut inspiratione spongiosa materies concidat, & aditum aeri externo neget: nec nisi violenter pituitosa cerebri excrementa excludat; præterquam dum ea ita abundant, ut suo sibi pondere, aut acrimoniam viam faciant, & sponte fluant.

Redeo

Redeo ad nares, sub quarum tunica, seu membrana latere carnem quandam tenuem, mollem, ac papillofam, quasi ex multis papillis coagmentatam, refert Diamerbroeckus sæpè laudatus: eam tamen difficile in hominibus, facilius in bobus deprehendi: quare à paucis observatas, à nonnullis pro exilibus glandulis habitas.

Ex his cui potissimum demandatum sic odorandi munus dubitatur. Galeno; Avicennæ, & plerisque post hos Anatomicis, ac Philosophis *Processus mamillares* præcipua sunt olfactus organa. Sed non rectè. 1. quia halitus odoratus ad eos processus non pervenit ab osse cribiformi impeditus, qui sane aeri externo aditum nullum præbet; ut jam peritioribus Anatomicis rem ipsam diligentius intuentibus constat. 2. quia in iis nulli sunt nervi, per quos exterius sensatum cerebro notum fiat. 3. excrementis pituitosis à cerebro defluentibus nunquam non scatent. Organum autem olfactus his perpetim abundare non potest, quia obtusissimum sit; eiusmodi enim humores odoratum retundere, patet in nobis dum catarrho laboramus. at verò in canibus, acutissimo odoratu præditis, docet experientia, nihil vim odorativam imminui ab ea humorum inertium in iis processibus abundantia. Non ergo in iis processibus fit odoratio. 4. sensus externos non interiùs ad cerebrum, sed exterius veluti pro foribus ad excubias natura constituit. at papillares processus intra cranii molem latent, et ipsamque meningem; & calvarie cavitationem non excedunt.

Probabilius ergo faciunt, qui tenui membranae interiores anfractus narium vestienti, odorandi partes præcipuas tribuunt; ut videre est penes Authorem Burgundicæ Philosophiæ multa in honorem de mirabili ejus membranæ texture ex Vernæo insigni Anatomico referentem. Sed adhuc superest Diamerbroecko scrupulus; nam 1. inquit, membranæ sunt aliis partibus

corporis communes, suntque tactus, non olfactus organa singulis autem sensibus propriae sunt partes tributae, ut proprii sensibilis perceptionem eliciant. 2. communis est, eiusdemque substantiae membrana, quae nares, & quae os, palatum, linguam, &c. operit, aut ergo membrana narium odorativa vi caret, aut eam habet etiam os, palatum, lingua, &c. Quare ipse censeat genuinum olfactus organum esse carnem illam papillosam sub dicta membrana lucentem. tum quia haec est specialis narium substantia. tum quia eius papillulae nervi odoratorii, tertii scilicet paris, fines ingrediuntur; atque ita facile odoris species possunt in cerebrum derivare. tum demum, quia non est alia pars aptior, in qua odorum perceptio eliciatur.

C A P U T V.

De obiecto, & organo gustus.

CORpus sapidum, quod est gustus obiectum, siccum esse debet, à calore concoctum, facile in humido resolubile, atque ita saporis diffusivum. Huius totam vim saporis feram ad suos sales Chymici referunt, qui uni per se habent, & ut sicci sint, & ut in humido solvantur. probant id experimento; ubi enim à corporibus per artem sales sunt separati, omnis illico sapor interit. Sic ex. gr. si è cinere cardui benedicti, qui amarus est, sal educatur, reliquus erit cinis sapore omni destitutus: cui, sale suo restituto, sapor etiam redditur. Quia vero experientia ipsa docet, sola salis restitutione priorem ex asse sorem non reparari, dum spiritus etiam sulfureus, ac mercurialis pars non additur, salem præcipuum quidem, sed non unicum saporis opificem statuunt. Sulfur ergo, & mercurium in operis partem advocant, quibus sal miscetur, & excoquatur; unde alias
&

& alias, maiores, minoresve asperitates acquirit, aculeatas, duras, pungentes, vel è contrario molles, flexiles, retusas: ex quarum varietate sapor varietur; quatenus linguam aliter ferientes, aut lenientes, alium excitent suavem, aut insuavem saporis sensum.

Verum equidem ut sales istos virtute saltem in corporibus existere non inficiet, iisque utcumque tribui possit saporum efficientia; non aliter tamen quàm asperitatibus variis gustus organum afficere, id sane commenti loco habeo. hoc non ex iis solum, quæ cap. I. universim probata sunt, sed ex propriis etiam liquet. Nam hinc fieret & quamlibet corporis nostri partem gustativam esse, & quodlibet corpus esse gustabile, & saporiferum, nullum verò insipidum; cum utrique tamen obvia refragetur experientia. Probo primum; quia cum inter gustus, tactusque sensoria exiguum sit discrimen, nec cutis minùs, quàm lingua asperitates eas sit nata percipere; quid est, cur saporum cutis etiam non sit iudex? Nec juvat ad cutis, seu cuticulæ conformationem, aut duriem recurrere; ratione cuius minimas eas asperitatum differentias sentire non potest, quas lingua potest; nam cuticula cum parte cutis abrasa, salis asperitas liquati sentitur; & tamen inauditum est, quod sapor ibi aliquis sentiatur. Probo secundum, dari corpora insipida certò est certius. sic est aqua, sic terra, sic corpora omnia apud Chymicos, in quibus spiritus à terra, & aqua obruuntur in statu, ut aiunt, fixationis. Atqui juxtà Atomistas per rerum principia, ut loquuntur, mechanica procedentes, nullum est corpus non ex Atomis certa configuratione præditis conflatum. ergo aqua etiam, & terra suas habent atomos, quibus organum gustus valeant afficere. de facto aqua linguam alterat; sed, inquires, ut tactivam, non ut gustativam. hoc peto ut explices per tuas mechanica.

chanicas qualitates; si enim suavis gustus sit mollibus atomis linguam lenientibus, hoc totum praestatur aqua, adeoque saporem habet suavem linguae non ut tactivè solum, sed etiam ut gustativè se insinuantem. Quod si ad asperitates, lenitatesve minores confugas, non alium omninò sensum, sed eundem delicatiorem efficies.

Est ergo sapor specialis qualitas in corpore sapido à varia caloris coctione procedens, ut videre est, tum in coctione artificiali carniū, pisciumque saporē in coquina variante; tum in naturali variante saporē fructuum, ut alius sit acerbi, alius maturi pomi gustus. Eiusmodi sapor, ut gustui se probet, eam requirit in corpore dispositionem, ut sit in humore aliquo resolutum. Ad hunc finem salivam ad os natura derivat. Est autem ex Diemerbroeko saliva liquor leviter fermentaceus, serosus, & limpidus, spumositatem ex aeris, & linguae motu acquirens aqua spissior, & viscidior, itaque constitutus, ut omnibus alimentis faciliè misceri possit, ex sanguine arterioso in parotidibus, orisq; & faucium glandulis depositus, ac per vasa salivalia in os effusus. Eius usus est, inquit, multiplex. 1. ut cibus admixta faciliem deglutitionem efficiat. 2. ut ex iisdem saporiferam qualitatem, sal scilicet sapidum educat. 3. ut sitim humectando extinguat. 4. ut fauces, & oesophagum leniat. 5. ut in ventriculo alimentorum fermentationem promoveat.

Explicandum nunc est organum gustus, quod juxta omnes primarium lingua est. Hanc quidem musculum esse nonnulli incautè pronunciant. Nam 1. musculi nomine intelligimus instrumentum arbitrarii motus, quod parti per se pro animalis libito non mobili insertum. ad eiusdem imperium propellat. atqui lingua nulli corporis parti inseritur, quam ad motum determinet. musculus ergo nō est. 2. musculus mu-

sculo non inseritur . at linguæ non unus , sed quinque inseruntur muscutorum paria , quibus ad varios motus non gustui solum , sed & maxime locutioni servientes determinatur . non igitur musculus ipsa est . Jam qui totam linguæ structuram volet , Anatomicos legat . Satis est referre , quod sub eius extima membrana , quæ locum epidermidis tenet , latent innumeræ papillulæ , nervorum scilicet propagines , interiori membranæ insidentes , & in exterioris poros insertæ . quin etiam inter utramque membranam crusta quædam carne deprehenditur , cui alia similis in toto corpore vix reperitur ; firmandis nerveis papillis ; excipiendisque , ac retinendis aliquantisper sapidis liquoribus destinata . Hic porro sensorii præcipuam sedem esse communis jam est sententia . ubi enim papillulæ istæ magis abundant , ut in apice , planitie , & lateribus linguæ , ibi citior , & acutior est gustus : ubi nullæ , ut sub lingua inter apicem , & frenulum , ibi gustus est nullus ; ubi aliquæ , ut in palato , aliquis etiam ibi gustus est .

C A P U T VI.

De objecto , & organo tactus .

DE tactu hoc primum ex Philosopho habemus , illum esse in homine præ cæteris animantibus perfectissimum . Rationem eam affert ; quia inter homines ipsos , qui tactu pollent perfectiore , ingeniosiores sunt , ac prudentiores . ex quo celebre est ipsius effatum : *Duritas tactu , inepti mente : molles autem tactu , bene apti* . Huius rei causam duplicem tradit D. Th. lect. 19. in tex. 94.2 de Anim. Prima est , qui habet vim meliorem sentiendi , habet meliorem vim intelligendi ; vis enim intellectiva pro hoc statu pendet à sensitiva , eique se accommodat ,

. . . atqui

atqui tactus perfectior indicat vim sensitivam meliorem; quia tactus est reliquorum sensuum fundamentum, diffunditur per totum corpus, & aliorum sensuum instrumenta sunt etiam instrumenta tactus. Secunda est. bonitas tactus. indicat bonitatem simpliciter complexionis, ac temperamenti, ad quam sequitur melior animæ operatio. Addi his potest, quod homo plus reliquis animalibus patitur à calore, & frigore, atque ab ambientis inclementia: quod indicat maiorem tactus perfectionem citius contrariorum impressiones sentientis, ac distinguentis. Ex his concluditur hominem, qui inter cætera obtinet virtutis cognoscitivæ principatum, perfectissimum habet præ cæteris tactum; adeoque & perfectissimum gustum, qui à Philosopho propter analogiam, & affinitatem, species quædam tactus nuncupatur.

Obiectum porrò tactus sunt primæ qualitates, ac nonnullæ aliæ secundæ ex iis ortæ, ut asperitas, mollities, &c. Sed primas tactus non discernit, nisi secundum excellentias. in hoc enim à sensibus reliquis differt, quod alii à natura obiectorum suorum sunt penitus denudati. non sic tactus, qui cum in mixto sit, non potest in se primarum qualitatatum mixtionem, ac temperiem non includere. Satis ergo est, si fit iis denudatus secundum excessum, neque earum ullam in summo obtineat. quia verò omne medium relatè ad extrema subit rationem contrarii, v. g. tepidum est frigidum calido, & calidum frigido; potest propterea tactus à tangibili excedente qua tali pati, atque ita eius excessum sentire. Hinc fit præterea, ut, quanto animal temperiem habet ad medium magis redactam, hoc polleat tactu perfectiore, quia melius discernit excessus etiam minimos tangibilium, perinde ut ponderum lances perfectè æquilibratæ. ex hoc est perfectior hominis tactus, quia temperamentum habet accedens ad pondus.

Organum denique tactus per omnes ferè animalis partes, si ossa excipias, est diffusus; neque inde, nisi cum vita, discedit. Est tamen inter reliquas præcipua, cum primo loco tactio conveniat. hæc quidem cutis ipsa vulgò existimatur; nec immeritò; nam pro toto corpore excubat, & nerveis undequaque papillulis distincta veluti, imo & contexta est, quæ sunt nervorum, tendonumq; productiones, alterius tamen ab iis substantiæ, naturæque. has verò aptissimas esse tactioni perficiendæ, patet; quia si non frustra dispositæ ibi sunt, sentiant oportet, ac tangant: cui muneri aptantur maximè, quod & derivantur per nervos à cerebro, à quo tanquam à fonte sentiendi tota vis manat; & per eisdem ad idem species citissimè possunt obiectorum transmittere.

C A P U T VII.

Alia nonnulla ad sensus externos universim pertinentia expediuntur.

QUæres 1. An & quomodo sensibilia communia ad sensus exteriores pertineant.

Resp. communia sensibilia quinque numerari, Motum, Quietem, Numerum, Figuram, Magnitudinem. hæc quidem externorum sensuum beneficio deprehendi certissimum est. Mihi tamen videntur ea percipi à solis vel phantasia, vel intellectu ex tali, vel tali modo operandi sensuum exteriorum, qui quidem se solis inepti apparent, ut ad ea percipienda assurgant; aliter extra obiecti sui sphaeram vagantur, & unus cum alio in communis obiecti perceptione confunderetur: quod esset ex proprio communem sensum efficere. Hinc est, quod experti, & magis reflexivi ista facilius animadvertunt, reflexio autem supra experientiam ad sensum externum non pertinet. Id ipsum manifestius

stius fiet discurrendo per singula,perque modos ea percipiendi.

Incipio à motu,quem sanè per oculum dupliciter cognoscimus 1. ex oculi ipsius motu,quo rê ipsam ex loco ad locum translatam sequimur. 2. ex motu imaginis in oculi fundo depictæ, dum scilicet remota, immotoque oculo, in una nunc deinde in alia successivè oculi parte fit visio. Addunt alii tertium motum, per collationem obiecti moti ad locum immotum; neque enim si omnia simul moveantur, & locus scilicet & obiectum, & potentia, motus tunc deprehenditur, ut videre est in navigantibus, qui si intra navim inspiciant, quiescere omnia sentient. Sed hic motus ad alterum ex positis reducitur; tunc enim nec rei idolum in retina, nec oculus locum mutat. Hoc totum ut ad motus cognitionem perducatur, ratiocinio aliquo opus habet, quo ex directione, sub qua una obiectum percipitur, intelligamus ex utrovis motu seu imaginis, seu retinæ motum obiecti. Similiter ex soni debilitate primùm, tum sensum incrementè validitate, varioque modo se insinuandi in aurem sonori accessum judicamus, & è contrario recessum. In tactu verò res est facilior (nam gustu, & olfactu motum percipi vix crediderim) motus enim eo pariter percipitur vel ex successiva tactione obiecti in alia, & alia parte potentia immotæ, vel ex potentia mota comitante obiectum.

Quies è contraria ratione sentitur; ubi enim nec picturæ in retina, nec oculi motio ulla est, aut si qua est, adeo est minima, ut non sentiat, tunc quies percipi dicitur. hinc Solem, Lunam, Sydera stare judicamus propterea, quod eorum celerissimus licet motus ex tanta distantia minimam facit in retina, aut oculo mutationem: nec tam ea moveri, quam mota esse intelligimus.

Numerum ex numero impressionum distinctarum colligimus. hic verò manifestè non

phantasia solum, sed etiam intellectus locum, & quidem præcipuum habet; redigere enim multitudinem in summam, eamque inter primam, & ultimam unitatem certo ordine claudere (quod est numerum percipiendo efficere) altioris est potentiz, quam ut ad id possit assurgere inferior intellectu facultas. quare vix intelligo, qua ratione numerus qua talis inter sensibilia numeretur.

Magnitudinem obiecti tactu sentimus ex commensuratione. sic palmo corpora metimur. Oculo autem magnitudinem rei non aliter, quam ex magnitudine picturæ in retina expressæ percipere possumus. & quia quo res est distita magis, eò minorem sui efficit imaginem, ut demonstratur ab opticis; hinc illæ ex oculis fallaciæ ab intellectu per ratiocinium corrigendæ, dum ingens Solis corpus exiguum apparet, &c. Jam verò huc etiam advocandam esse phantasiam, & intellectum ex eo constat, quod mensura, æqualitas, & inæqualitas habitudines sunt.

Hinc rursus colligitur, quo pacto distantia sensu judicetur; ex magnitudine scilicet interjecti corporis. quare ubi nullius corporis intercapedinem sentimus, nullam distantiam percipimus, ut videre est in horizonte, ubi terræ cum Cælo conjunctionem, concursumque videre nobis videmur. Sunt & fortassè aliæ distantiam percipiendi rationes; omnes tamen ex discursu, & collatione rerum ante perspectarum eliciuntur: de quibus Optici.

Figura demum rei ea censetur, quæ in retina exprimitur. Sed quia hæc in oculo variat pro sitis, ac distantiz varietate, intellectu indiget censore. sic rota directè visa rotunda, obliquè visa ovalis apparet. sic cava, & convexa corpora ex magna distantia, ut plana cernimus; quod licet mediæ, & extremæ partes eminus magis, aut cominus radios emittant, inæqualitas tamen illa cum minima sit, distantia totius corporis com-

para-

parata , nullatenus apprehendi per sensum potest .

Quæres 2. An sensus possit falli .

Resp. Philos. 2. de Anim. t. 63. falli non posse circa sensibile proprium , sed posse circa commune . Hujus ratio ex modo dictis est manifesta . nam circa sensibile proprium fertur per se exterior ipse sensus : sed circa commune operatur phantasia , & intellectus . Jam verò sensus exterior cum nihil judicet , sed merè simpliciter apprehendat , falsus esse non potest , ut constat ex probatis in Logica . quare dum percipit amaritiam v. g. in cibo dulci , non judicat illi cibo per se amaritiam convenire , sed illum sentit eo modo , quo hic , & nunc sentiri petit ex admixtione bilis palato inexistentis . Dicitur autem falli sensus circa sensibile commune ; quia circa hoc fertur immediatè phantasia , & intellectus per actus capaces erroris , aut quasi erroris , ut dum fallitur canis panis speciem intra aquam appetens ; vel avis dum fertur ad uvam pictam . Quamvis autem circa utrumque sensibile feratur ita sensus exterior , ut sit sæpè errandi occasio , adeoque circa utrumque dicatur falsus non passivè , sed activè ; asseritur tamen à Philosopho falsitas passiva circa communem , non circa proprium sensibile ; quia circa illud , non circa hoc habetur immediatè actus erroris capax .

Quæres 3. An , & quomodo excellens sensibile lædat sensum .

Resp. certum esse ab experientia , sensum sæpè lædi à sensibili excellenti , v. g. oculum à magna luce , aurem ab ingenti sono , &c. Certum rursus est , posse læsionem ejusmodi manare à sensibili , ut agente naturali alterante organum per qualitates contrarias , ac destructivas . Dubium est dumtaxat , an possit lædi sensus à sensibili , ut agente præcisè intentionali , id. in quantum productivo speciei sensibilibus , & sensitivæ cognitionis . ad quod dicendum non posse per se ,

sed posse per accidens. Non potest per se ; nam objectum in ea ratione non est productivum qualitatis alterativæ, sed solum perfectivæ sensus, speciei nimirum, ac sensationis, quæ perficere habent, alterare non habent. Potest per accidens. perfectius enim sensibile maiorem constant in melioris actus productione à sensu extorquet: hinc est maior spirituum concursus, qui nimio calore alterant organi temperamentum.

C A P U T VIII.

De sensu interiori, & appetitu.

§. I.

Existencia, & natura eiusmodi facultatum ostenditur.

IN confesso est apud omnes, quicumque brutis sensum non adimunt, præter externos quinque numeratos dari in animalibus omnibus internum aliquem sensum. tum quia, ut in superioribus confeci, est in brutis memoria, quæ quia de præteritis est, sensu externo perfici non potest, quia præsentia sola intuetur. tum quia bruta prosequuntur, & averfantur objecta sub rationibus externi sensus vim superantibus. v. g. ovis lupum fugit, non quia exterior lupi figura sit ovis oculo contraria, sed quia est ei lupus natura noxius: quæ est ratio sub oculum non cadens. Sic & avis paleas ad nidificandum colligit: in quo convenientiam aliquam apprehendit exteriori sensui planè ignotam.

Hic porro sensus in multas, diversasque operationes erumpit: non tamen multiplex ipse, aut diversus est: quod quidem satis liquet ex iis quæ de animæ potentiis inter se, & ab anima indistinctis sunt alibi disputata. Pro actuum igitur distinctione in sensu interiori vocabula, mune-

muneraque distinguimus. dicitur enim Sensus communis, dum percipit sensibilia, ut externis sensibus præsentia. dicitur Imaginativa, quatenus fertur ad sensibile vel absens, vel à præsentia, absentiaque præcisum. dicitur Phantasia, dum plura objecta, seiunctim alias cognita, exprimit per modum unius; ut cum ex monte, & auro montem aureum componit. dicitur Æstimatoria, dum sensibile ut sibi consonum, dissonumvè dignoscit, quo appetitus ad prosecutionem, vel fugam moveatur. dicitur Memorativa, in quantum servat species obiectorum, ex quarum excitatione præterita iterum cogitationi recurrunt.

Certum deinde mihi est, sensum eiusmodi non modo non discursivum, sed neque indicativum in rigore esse posse per veram, formalemque compositionem, ac divisionem. De discursu res est comperta; tum quia Fide sanctum est adversus Gnosticos bruta rationalia non esse. tum quia ubi discursus, ibi intellectus, & rationalis animus. quare vel in nobis anima erit mortalis perinde, ut in brutis, vel in his immortalis erit anima perinde, ut in nobis, si in discursivis, adeoque præcipuis operationibus cum iis convenimus. qui etiam hinc gradus erit ad libertatem, meritumque, & demeritum, & nihil supererit, quo, à belluis secernamur. De iudicio eadem videtur ratio; primum enim hoc admissio, non videtur negabilis discursus, qui scilicet nihil est aliud, quam iudicium ex iudicio, ignotum ex noto inferens. quare cui iudicium non abest, unius ex altero dependentia per se præcise repugnare non potest.

Accedit argumentum à priori. componere enim, & dividere extrema apprehensa explicat perfectionem, quæ lineam materialitatis, intra quam circumscribitur sensus, totam transcendit. neque enim asseri valet, hoc esse illud, vel non esse, quin præcurrat notitia aliqua identitatis,

tatis, ac distinctionis, adeoque entis, & non entis quàm talis; ut notum cuique est, & declarabitur in Metaphysicis. eiusmodi autem notitias habere non est, nisi potentia spiritualis universalissimæ, qualis est intellectus ad singula entia potens sua cognitione descendere, & quod universim percepit, in partes distinguere. Sensus autem ad materialia sensibilia determinatus, ne ab his quidem unam potest rationem abstrahere, ad quam feratur. quare ad sensibile quatale dicitur ferri, quia omnia sensibilia in singulari complectitur, à quibus non ipse, sed intellectus unam communem rationem præcidit, per quam sensum explicat, & definit.

A posteriori id quoque indicat defectus sermonis in brutis; cum enim loqui sit exterius dicere, supponit mentis dictionem (quæ quidem iudicium ipsissimum est) interius conceptam, quam oris verbo manifestet. quare ista reciprocantur, ut quod est interius, sit exterius etiam loquutivum. bruto igitur, quibus sermonis potestas negata est, dicere, & loqui cognitione sua non possunt.

Hinc autem infero, non in brutis solum, sed etiam in homine sensum internum iudicativum non esse. tum quia ratio allata probat generaliter, nullum actum à potentia sensitiva, quæ tali, manentem iudicium esse. tum quia si ratio iudicii cum cognitione materiali sensitiva coniungi potest, quid est in causa, cur brutis cognitio iudicativa denegetur? Neque enim videtur consultò dictum, quod ex quibusdam authoribus circumfertur, altiorē quandam vim humano sensui ab identitate cum intellectu refundi. nam primò poterit eidem vis etiam discursiva ab illa identitate communicari: poterit eadem vis iudicativa participari ab externo sensu, qui & ipse realiter in nobis est intellectus. Deinde argumentum procedit ab actibus sensitivis, qui sanè materiales sunt, adeoque
non

non excedunt potentiae materialis vim effectivam. quare si isti iudicativi esse possunt, vim brutorum sensitivam non superabunt. nihil ergo erit, cur bruta iudicare non valeant.

Jam verò explicare, quis sit proprius huiusmodi sensus in quantum aestimativi cognoscendi modus, fateor esse longè difficillimum. Illud tamen moneo, non esse ex hac difficultate aptum pro Cartesianis argumentum, quo belluas automata esse mera confirmant. plurima enim sunt, de quorum existentia certi, incertissimi sumus de natura. quare hac incertitudine si quis velit abuti, negabit, trahi à magnete ferrum, dari fluxum, & refluxum maris, Deum esse in volendo liberum, & similia, inde ductus, quòd ista difficillimè explicantur. An non autem ità procedunt Cartesiani, dum sensum brutis negant, quia sensus ab intellectu distinctio declarari commode non potest? Profectò sensum in nobis esse aliam ab intellectu facultatem est ità compertum, ut nemo de hoc dubitet, nisi Cartesianus, apud quem dictum Cartesii plus habet momenti, quàm sententia generis humani. Scire tamen ab eo velim, an sentire queat substantia purè immaterialis, qualis est Angelus, & Deus? Si ait, quid absurdus? Si negat, quid inconsequentius? nam si sentire est intelligere motionem sensibilis in organo, hoc certè potest & Angelus, & Deus, corpori intimè praesentes. Sensus igitur eum esse nisi in substantia materiali non possit, operatio ipsius esse nisi materialis non debet. distinguitur ergo ab intellectu, cuius est spiritualis operatio, & omninò à materia emersa, atque independens; utcumque sit arduum exponere, in quo maximè genera ista cognitionum secernantur.

Sed conandum pro modo est ad eiusmodi discrimen. P. Pardies in egregio libello *De animae belluarum* cognitiones istas inde seiungit, quod intellectio sit in se reflexiva, quatenus intel-

lectum non modo de obiecti, sed etiam de sui existentia certificat. contra sensatio in se non reddit, sed obiectum cognoscere facit ignota.

Est Cartesianus, qui hanc doctrinam reiicit; quia, inquit, cogitatio universim si alia cogitatione indigeret; ut innotescat, esset procedere in infinitum. Sed hoc processu manifestius premitur ipse, qui necessariam in omni cognitione statuit reflexionem involutam. nam si, qui Deum v. g. cognoscit, necessario cognoscit se cognoscere Deum, cum hoc ipsum reflectere sit cognoscere, debet cognosci per alteram reflexionem involutam, & hæc per tertiam sine termino. Resp. ergo, processum infinitum non sequi positionem P. Pardies; nam sensatio cognoscitur per intellectionem, intellectio per se ipsam.

Aliunde huic doctrinæ non acquiesco. quare primum inter istas facultates discrimen in eo repono; quod intellectus sit ad *ens*, & *verum* sub ratione formali *entis*, & *veri*; quod habet non solum, quia ad *ens*, & *verum* in communi ferri potest, eorum rationes à singulis abstrahendo; verum etiam, quia dum singula concipit, non aliter concipit, quam sub propria *entis*, & *veri* formalitate. Nam neque apprehendit nisi *ens*, *Cujus intellectus includitur in omnibus, quacumque quis apprehendit*; ut ait D. Th. 1. 2. q. 94. art. 2. o. neque judicat, nisi *verum*; iudicare liquidem non potest, nisi intelligat ita esse, ut dicit. At sensus non fertur ad sensibile, nisi materialiter, ad hoc scilicet, & illud, ex quibus neque rationem communem abstrahit, neque in iis rationem sensibilitatis quæ talem percipit. multò minùs in rationem *entis*, verique pervadit; ut enim egregie D. Th. in 1. d. 19. q. 1. art. 1. ad 6. *Quamvis esse sit in rebus sensibilibus, tamen rationem essendi, vel intentionem entis sensus non apprehendit . . . ita etiam quamvis veritas sit in rebus sensibilibus, prout dicitur esse veritas*

veritas in rebus, tamen intentio veritatis solo intellectu percipitur.

Atque hoc est discrimen, quod inter has facultates Arist. & D. Th. ubique constanter assignant, cum de reflexione alibi aliter loquantur. Certè Philos. 1. *de Anima* t. c. 136. velle videtur, sensum etiam in se redire; ait enim, visum v. g. quamvis non videat, percipere tamen visionem suam, quæ, ut non sit color, similitudo coloris est, & Th. de verit. q. 1. art. 9. o. concedit, sensum in se reflectere, sed non perfectè, & completè quod & repetit q. 10. ar. 9. o. Cæterum sensum esse dumtaxat singularium, quatenus *Sentire opus est hoc aliquid, & alicubi, & nunc*, mense est omnium Peripateticorum post Arist. 1. post t. c. 182. & alibi frequentissimè.

Hinc primò fit, sensum esse non posse, nisi materialium, cum omnis intellectus ad omnia possit assurgere, ut ex professo l. 2. Metaph. ostendam. quamvis enim intellectus materialia quoque cognoscat; quia tamen in iis entis rationem intelligit, sub qua omnia conveniunt, ad omnia, consequens est, ut sua vi sese valeat penetrare. at sensus cum non formet expressionem nisi rerum corporearum, quatenus ab individualibus circumstantiis arctatur ad hic, & nunc, ità materiæ immergitur, ut nulla vi ab ea extrahi possit.

Fit secundò, unius intellectus esse de vero quàm tali iudicare, quod est proprium, rigorosumque iudicium. Verum scilicet quàm tale importat signum identitatis quàm talis inter extrema: in quo est duplex habitudo, altera concepti ad præconcepum, altera rei ad actum iudicantem.

Fit tertio, aliquam reflexionem esse propriam intellectus, aliam communem etiam sensui. est propria intellectus reditio, ut ait D. Thom. in suam, sui que actus naturam, & essentiam, eiusque proportionem ad res sub ratione in omnibus reperta, est communis sensui reditio quædam

dam imperfecta, & incompleta: in quantum percipit quodammodò tum ipse se, dum cognoscit conveiens sibi, cum suam sensationem, quæ & ipsa materialis cadit sub ejus experientiam: sed neque pervadit in suam, neque in suæ cognitionis essentiam: quam quidem aliquatenus exprimit, sed non aliter, quàm secundùm meram, certamque materialitatem, individuanti-
bus conditionibus circumscriptam, neque verò ipse novit, quid sit actum suum esse verum per conformitatem cum obiecto.

Fit quartò, aliquam reflexionem inesse omni intellecti, quæ quidem sensationi repugnat, cum enim omnis intellectio sit ad entis rationem, à qua nullum obiectum præscindit, & sub hac includatur ipsa cognitio; manifestum est, omnem intellectionem esse in hoc sensu cognitionem sui: quod de sensatione ex dictis verificari non potest. Non videtur autem præterea necessarium, ut omnis intellectio; debeat esse sui quæ talis intellectio; quandoquidem hoc etiam negato, stat discrimen intellectus à sensu.

Fit quintò, intellectum differre à sensu non solum judicio, sed etiam simplici ipsa apprehensione, per utramque enim operationem habetur in intellectu quædam universalitas; quia & dum apprehendit, exprimit entis propriè dictam rationem, & dum judicat, procedit ex notione veri quæ talis, atque ex principiis abstractissimis, quibus formalis veritas aut constituitur, aut fundatur.

Venio nunc ad appetitum, qui altera est facultas ad sensum pertinens, non quia sensus est, sed quia sensum sequitur. Est ergo in brutis præter cognitionem appetitio non innata solum, qualis est etiam in lapide ad centrum, & in re quavis ad debitum bonum, sed etiam elicitæ, & fallibilis, ut dictum est. idque præter inductionem ostendit ratio. Elicita siquidem appetitio, ut arguit D. Thomas, est inclinatio sequens in-
sen.

sentionalem formam, & bonum apprehensum qua tale. atqui istam etiam in brutis esse, ex eo fit palam, quod universim in unoquoque relate ad suum bonum proportionatus est appetitus; bonum enim, quod omnia appetunt, sicut ergo ad bonum reale, cuius appetitio cognitione non eget, datur innata inclinatio alibi declarata: ita ad bonum cognitum, seu apprehensum, dari debet elicitum; innata siquidem ad apprehensum, seu apparens bonum esse non potest. quis enim unquam lapidem vidit ad centrum apparens ferri, aut ignem ad sphaeram pictam? Cum ergo in brutis sit sensus boni sui apprehensivus, erit in eis ad ejusmodi bonum elicitus appetitus.

De actibus appetitus istius, deque eius divisione in Irascibilem, & Concupiscibilem, agam, si Deus dabit, in Ethicis ex professo.

§. II.

Facultatum istarum sedes inquiritur, & describitur.

Sensus, & appetitus organum in corde statuit Aristoteles, his rationibus motus. Sensorium internum si cerebrum non est, cor est, at cerebrum non esse, liquet primò; quia est à reliquis partibus discontinuatum, quibus proinde non potest vim sentiendi communicare: quod pertinet maximè ad principem sensum. 2. quia humidum est, & frigidum, adeoque speciebus conservandis ineptum. Ex alia parte cor in totius corporis centro est situm, adeoque aptissimum, ut in omnem partem vires sensitivas insinuet, est etiam præcipua pars animalis, quæ omnium prima movetur, & vivit. in eo igitur reponenda est primaria sentiendi facultas, & principium omnis actus, motusque spontanei.

Sed iam opinio ista obsolevit: & Peripatetici

ci cum exteris, relicta cordi formatione sanguinis, vitaliumque functionum regimine, ac principatu, pro cerebro communis sensus sede conspirant. Nam primò sensus exteriores non à corde, sed à cerebro originem trahunt; nervi enim sensorii, qui sunt animalium spirituum vehicula, & sentiendi vim in reliquum corpus derivant, à medulla spinali oblongata, quæ pars est cerebri, oriuntur. ut docet Anatome. Deinde ex vehementi studio non cor, sed caput, & cerebrum laborat: quod est evidens signum, vires sensitivas, quæ intellectui cooperantur, in cerebro residere. Rursus, illæso corde, ex una cerebri læsione fit sæpè oblivio, stultitia. & amentia. Somnia demum, & imaginationes in capite experimur; quare dum caput fumis oppletur, perturbatis spiritibus, ac speciebus, tam varia, tamque absorta dormientes imaginamur. hinc Dan. 2 Nabuchodonosori Regi dictum est, *Somnia, & visiones capitis tui huiusmodi sunt.*

Ex hoc infero, cerebrum ipsum sedem appetitus esse. nam is locus appetitioni est aptus, ubi est notitia obiecti convenientis, ac disconvenientis; aliter in brutis una esset pars sentiens, quæ non appetit, & alia appetens, quod non sentit; & in homine cognitio, quæ est appetitionis causa, ab appetitione distaret. Deinde ibi est appetitus, ubi est origo nervorum motibus animalis spontaneis servientium; motus enim spontaneus ab appetitu incipit. in huius ergo potestate debent esse instrumenta motum perficientia. at nervi à cerebro prodeunt; ut dictum est: in cerebro igitur est appetitus.

Ad motiva in contrarium resp. cerebrum per nervos continuari cum sensibus, & toto corpore. Frigidam porro non ita est, ut multum etiam caloris non habeat à sanguine arterioso acceptum, humiditas aliqua prodest impressio-
nibus

nibus sensilium accipiendis, servandisque. totum temperamentum eò spectat, ut minimum participet de externis sensibus; atque ità singulorum motus dijudicare valeat. Quod additur de cordis dignitate, nihil est; neque enim negamus, cor esse præcipuum in animali, cum sit officina sanguinis, vitaliumque spirituum, quod demum ei vita primo loco tribuatur, & est falsum, & impertinens ad intentum.

Inquirendum ulterius nunc venit, in qua potissimum cerebri parte sensio perficiatur. Præmittenda ad hoc prius est cerebri Anatomica descriptio, non quidem integra, quæ longior est, nec tota utilis ad rem præsentem, sed præcipuarum dumtaxat partium.

Cerebri substantia laxo ambitu, ut moveri possit à duplici membrana, altera extima crassiore, sed exquisiti sensus, altera intima tenuiore, quæ à Græcis *Meninges*, à Nostreis *Martes dura*, & *Opia* nuncupantur, unde quaq; munitur, & à dura meninge in tres portiones distribuitur, dexteram, & sinistram versus anteriorem capitis partem, quæ utraque cerebri nomine designatur, & tertiam versus occiput, ubi *cerebelli* nomenclationem accipit. Substantiæ est specialis, mollis, & albæ; quamquam hic color toti huic visceri æqualis non est, quemadmodum nec mollities; nam extimæ partis mollior, & ad cinereum colorem accedens, intimæ solidior est, & omninò candida substantia. Ex his extimam vocant aliqui cerebrum; intimam verò cerebri medullam.

Quà dextera, & sinistra cerebri pars nectitur, corpus est callosum, seu *Pfalloides*, quod Anatomici vulgò tradunt esse cerebri portionem reliquis durior, cum tamen, ut refert Isbrandus mollitie, & albedine interiore cerebri partes adæquare videatur.

Quatuor in cerebro sunt cavitates, qui ventriculi, & sinus niminantur. horum tres in cere-

rebroy ipſo , duo ſuperiores ſeu anteriores ſepto invicem lucido diſtincti . tertius, ubi duo priores concurrunt veluti in centro medullæ, quartus communis eſt cerebello , & medullæ oblongatæ, ſeu ſpinali . Uſus iſtorum probabilior eſt , pituitoſos humores è cerebro expreſſos excipere .

In tertio ventriculo , ubi hic ad quartum vergit , glandula eſt, quæ à Græcis *Conarion* , à Latinis *Pinealis* eſt appellata, propterea quod Coni figuram , & Pineæ fructum imitetur. Hæc quidem in hominibus minima eſt : maior in ove , & vitulo . duriuſculæ eſt ſubſtantię , & tenui membrana ſublutei coloris involuitur : mucrone ſurſum , ſeu veriùs antroſum ſpectat : baſi cerebro imminet, & cohæret .

Cerebellum , quaſi exiguum cerebrum, utraque meninge teſtum à cerebro ſeiungitur . magnitudinem habet in homine, quàm in brutis , maiorem . à cerebri ſubſtantia vix diſſert, niſi quòd firmitus eſt , ac ſolidius .

A cerebello ſimul ; & cerebro medulla ea prorſum demittitur per ſpinæ liſtulam uſq; ad oſſis ſacri confinium , quæ *oblongata* , & *ſpinalis* dicitur ; gemina pariter meninge conveſtita, eiùdem eſt cum cerebro ſubſtantię , durior tamen , compacta , & alba ; à qua ſuam nervi omnes originem ducunt . Figuram habet tere-tem ; ſed circà inferiores cervicis vertebraſ , ac thoracis primas , itemque in lumbis plenior eſt, & craſſior , ſicuti opus eſt , ut magnis nervis ad brachia , & crura exitum præbeat . Sunt, qui non hanc medullam à cerebro , ſed cerebrum potiùs ex hac veluti è radice germinare contendunt . Sed cum è ſemine omnes ſimul partes ſuæ quæque vi formatrice educantur, ut ſuprà eſt dictū, nec cerebro medulla, nec medullæ cerebrū originem debet . Quod ſi ordo eiùſmodi in hiſ partibus ſervandus eſſet, à cerebro potiùs medullam oriri aſſererem , cum cerebrum , non

medulla sit sensus, & appetitus sedes.

Ut aliquid nunc addam de speciali cerebri parte, in qua sensio contingit, reiicienda prius est Cartesii imaginatio in solo Conario, seu pineali glandula totam sentiendi vim repONENTIS, ex triplici praesertim causa. 1. quod ea in medio sit cerebro, eiusque veluti cor. 2. quod pensilis est, & mobilis, adeoque excipiendis ob-
jectorum motionibus unice apta. 3. quod unica est, cum aliquae cerebri, imò & sensorii cu-
jusque partes sint omnes geminatae: hoc autem requiritur, ut plures imagines, seu motus in
unam partem concurrentes, unius esse sensibi-
lis ab anima judicentur. Sed primum ex his
eam vim habet, quam habet ad probandum cor
sentire locus, in quo est, corporis totius me-
dius. Alterum esse falsum, docet evidenter
Anatome; nam cerebro cohaeret, plexuque mem-
branoso, qui Choroides vocatur, ita cingitur
Conarion, & firmatur, ut motum per se nullum
edere valeat. Tertium probat, spinalem etiam
medullam, quae unica est, sentire. Sed neu-
trum re ipsa probat obiecti unius sensatio; quia
licet actus multiplicentur, dum omnes idem
sine ulla distinguente circumstantia repraesentant,
non potest obiectum apparere diversum.
quin etiam multitudo operationum ad meliorem
obiecti perceptionem conducit.

Reiicitur deinde haec sententia positivè: 1.
quia minor haec est in homine, quam in aliis
animalibus, cum tamen sentiendi organum
maius esse debeat in perfectius sentiente, praesertim,
quod ibi perficiendi sint spiritus ani-
males, qui in tanta copia in tam exigua parte
elaborari non possunt. 2. quod ex glandulae
operatione impedita, sive ex compressione per-
pus, & serum in proximis ventriculis abundè
collectum, sive ex arenis, & calculis plusquam
dimidiam eius partem occupantibus in ea saepe
genitis, animales tamen functiones nihil
pro-

prorsus sublatæ sunt, aut imminutæ; ut refert laudatus Isbrandus ex Sylvio, & aliis.

Alii sensus regiam meninges faciunt; sed perperam. nam & tunicæ videntur propter cerebrum intentæ, non cerebrum propter tunicas. & docet præterea experimentum, tunicis læsis, & cerebro denudato, vim sentiendi manere immunem: quod nō contingeret, si meninges sensorium interius essent.

Quæ ergo cerebri pars sentiendi vim obtinebit? puto equidem probabilius, nullam non obtinere; tum quia non est inter eas substantiale discrimen. tum quia, ut plurimi tum Medici, tum Anatomici peritissimi narrant, una vel altera indiscriminatim cerebri parte per vulnus, aut apostema læsa, corrupta, aut rescissa, principes adhuc functiones integræ permanserunt. Signum ergo est, in qualibet eas exerceri posse, ut, una deficiente, alia succedat. quare una præ alia designari non potest; nisi quòd communiter cerebellum memoriæ sedem faciunt præterea, quòd durius sit, & siccius, adeoque speciebus tenacius retinendis idoneum. hinc aiunt, occipite læso, lædi memoriam; & Benivenius historiam furis refert, qui antea actorum meminerat nunquam; cui post mortem occiput invenit adeò arctum, ut vix tantillam cerebelli portiunculam retineret.

Q U Æ S T I O Q U I N T A.

De Facultatibus Anima intellectiva.

HUJUS animæ facultates tres sunt; Intellectus, Voluntas, & Memoria, de Intellectu, & Memoria, (hæc ipsa pars quædam intellectus est, ut est cognoscitiva præteritorum; quamquam possit ab intellectu formaliter secerni, ut est specierum conserva-
ti.

tiva) tantummodò agam, de voluntate, eiusque actibus in Ethicis tractaturus.

C A P U T I.

*Sit ne Intellectus: nihil aliud, quàm res
intelligens.*

MEntis humanæ naturam expositurus Cartesianus, eam nihil aliud esse contendit, quam rem cogitantem. Cogitatio autem non est, nisi sensus ille interior, & conscientia, qua certi sumus eorum omnium, quæ agimus, aut patimur; adeò ut dicere, mentem humanam esse substantiam cogitantem, nihil aliud sit dicere, quam quòd in ipsa sit conscientia omniū cogitationum, voluntatum, appetituum, sensationum, quæ in illa reperiuntur: sive illamet eorum sit principium, sive ab aliis patiatur. his enim verbis magistri sui mentem exponit Legrandius. In quo dicendi modo mitto nunc in ea animadvertere, quæ perperam, sed extrà rem præsentem afferuntur; ut quòd cogitatio directà cum reflexa confunditur: quòd cogitatio solius cogitationis, & appetitus esse dicitur: quòd ad aliquem ex nostris actibus passivè solum animam habere se posse supponitur, &c. illud unum examino, an facultas intelligendi sit duntaxat substantia intelligens: quo innuunt, esse animam sine cogitatione non posse; quòd eius substantia sit ipsa intellectio, & cogitatio. & hoc quidem pluribus probant.

1. Inter materiam, & animam ea est differentia, ut illa potentia sit, hæc autem actus. ergo in omni re intellectuali sèper debet esse præsens cogitatio. 2. Si ab anima cogitationem sustuleris, nihil in ea positivi, & absoluti remanebit, per quod existere dicatur. 3. Si mens nostra sine cogitatione aliquando foret, vel id contingeret, quia non potest, vel quia
non

non vult: si, quia non potest, destruitur eius essentia; si, quia non vult; jam cogitaret, dum non cogitat; tum quia *Velle, & nolle sunt modi percipiendi*. tum quia nemo potest nolle, quin cogitet, quod non vult. 4. Non potest dari corpus. quod non sit actu extensum, & figuratum, ergo neque anima, quæ non sit actu cogitans. conf. prob. ut enim extensio est facultas recipiendi figuras in corpore; ita cogitandi facultas est ipsa cogitatio, quatenus ad res diversas applicabilis. 5. non potest dari lux, quæ semper non luceat, neq; calor, qui semper non sit calidus. ergo neq; anima, quæ non sit cogitans. Hæc sunt, quibus Cartesiani mentis essentiam in cogitatione positam esse probant: quæ quidam indignabuntur Peripatetici vel allata à me esse: usq; adeò puerilia sunt, & indigna, quæ vel referantur. Sed quia hæc ipsa sunt, quæ plerique tanti faciunt; & silentium nostrum à timore potius, quam à contemptu ortū interpretantur, afferenda fuerunt, & paucis diluenda.

Ad 1. materia est potentia: anima est actus, non tamen secundus, sed primus: in quo satis à materia secernitur. Ad 2. cogitatione sublata, manet in anima vis, & facultas cogitandi, quæ positiva, substantialis, & absoluta perfectio est. Ad 3. id urget utcumq; cessationem ab actu cogitandi; sed locum non habet in infantibus, qui nunquam cogitare cœperunt. Cæterum utrovis modo contingere potest, ut anima non cogitet: vel quia non potest, non quidem remotè, sed proximè, ex defectu scilicet non suo, sed comprincipii, nimirum speciei ad cogitandam requisitæ. vel quia non vult, non quidem actu positivo nolens, sed nullum actum voluntatis eliciens: atque ita & se, & facultatem sensiti-
vam annexam ligans, quæ otiante, quiescat etiam oportet intellectus, ut seq. c. ostendam. Sed age, quid sibi vult, quod ipsis Legrandii verbis retuli, *Velle, & nolle sunt modi percipiendi*.

piendi? Hoc certè erratum est ingens; dum enim intellectui voluntas miscetur, aut trahitur ad intellectum vera libertas, aut tollitur à voluntate. alterum verò hoc contendit à Cartesiano, satis mihi persuadent verba Cartesii Medit. 4. ubi pro Jansenianis ea scripsit: *Neque necesse est, me in utramque partem ferri posse, ne sim liber, &c.*

Instant. cui non potest deesse facultas cogitandi, & obiectum, non potest deesse facultas ad cogitandum expedita, adeoque nec cogitatio ipsa, quæ talem facultatem naturaliter sequitur, Sic autem se habet anima, quæ ipsa sibi semper præsens, utrumque munus obit, & potentiae, & obiecti.

Instantia supponit, corpori humano Angelum assidere à materia prorsus emersum, non animam, quæ cognitionem suam à corpore, & sensibus auspicetur. Vt cumque ergo anima intellectiva simul, & intelligibilis sibi adsit, cogitare ne se quidem potest, nisi manuducatur à corpore; adeoque pro neutro munere est satis expedita, ubi sensibilia, & sensum ducem nondum habet.

Ad 4. antec. est falsum: & eo dato, consequentia ita sequitur, ut si quis ex eo, quòd baculus sit in angulo, inferat me dormire. quamvis enim extensio sit figuræ capacitas, non inde nisi ineptè deducitur, cogitationem esse facultatem cogitandi; imò oppositum; sicut enim extensio non est facultas extensionis, sed figuræ; ita cogitatio poterit esse facultas veritatis v. g. non item cogitationis. Ad 4. hoc similiter concludit, ut præcedens. neque enim aliud sequitur ex antecedente utcumque transmissio, nisi quòd sicuti lux semper lucet, ita cogitatio semper cogitat. Atqui, inquires, cogitatio anima est. Cave, qui hoc addis, ne audiaris à Summulistis; ingerent enim non sine probro, & cachinno, quam dicunt *principii petitionem*, sub.

subsidium ſcilicet imperitorum, qui ubi neſciunt, quod urgeant amplius, ad caput redeunt; & quod probare debuerant, aſſumere jam malunt, & contumaciam pro ratione habere.

Supereſt, ut oſtendam intellectum ab intellectiōe ſeiuſgi, & poſſe mentem ſtare, quin intelligat. hoc quidem tam eſt ab experientia manifeſtum in profundè dormientibus, & nihil omninò ſomniantibus, ut Carteſiani, qui in his quoque cogitandi actum inveniunt, diuinaſe ad arbitrium, quod in plerisque conſueverunt, & ſomniare vigilantes videantur. quid? quod de infantibus materno adhuc utero incluſis idipſum cenſent; perinde quaſi aſſerere pariter quis non poſſit, eos non cogitare ſolùm ibi, ſed etiam philoſophari, ac diſciplinarum omnium fines, qua patent latiffimè, pervagari; ſed tamem ità, ut eorum, quæ intelligunt, nec ſibi, nec aliis poſſint reddere rationem. quid enim? hæc qui narret, reiiciatur ut ridiculus: audiat Philoſophus, qui paria temerè commentus eſt, Cartheſius?

Ad hæc doctrinam iſtam videtur hic homo vel à Lutherò hauſiſſe, vel ad Lutherum deſcendendum inueniſſe. hunc enim habent quaſi proprium errorem Lutherani, ait Celfarm. lib de Notis Eccleſ. c. 1. *quod infantes, dum baptizantur, utantur ratione, audiant verbum Dei, credant, diligant: quod in Synodo Vvittembergenſi anno 1536. publicè deſinierunt: quod tamen aperte repugnat veritati; ut Auguſtinus Epist. 57. ad Dardanum ſcribat, iniuriam facere humanis ſenſibus, qui hoc dicunt.*

Quòd verò intellectus ab intellectu, & univerſim quodlibet principium vitæ ab actu ſuo diſtingui in creatis debet, omninò, ut arbitror, demonſtravi libri huius q. 1. cap. 2. §. 2. illat. 2. & rurus cap. 3. diſputans contrà Magnanum: ex quibus conſtabit, planè abſe-

ani.

animæ essentiam in cogitationem constitui .
 Illud tamen non omittendum , quod ut probent animæ essentiam esse cogitationem , ea congerunt , quæ probant , animam esse sine cogitatione non posse ; perinde quasi duo ista idem sint aut illud ad hoc sit consequens .

C A P U T II.

*Intellectus possibilis ab agente distinctio ,
 ejusque à phantasmata dependencia declaratur .*

Celeberrima est intellectus divisio in possibilem , & agentem , quam sæpè Aristoteles , & Peripatetici passim inculcant . Agentis intellectus est illuminare phantasmata , ut loquitur Philosoph . Hoc quid sit , aliter alii explicant , seu potius involvunt ; genuinus enim is est sensus , ab intellectu agente phantasma elevari ad speciei intelligibilis productionem . elevari autem phantasma non est , nisi iuvari ab intellectu ad qualitatem spiritualem producendam , quæ se solo non potest . Intellectus verò possibilis , seu passivus is est , qui speciem recipit , & eius ope in cognitionem erumpit . At verò non sunt istæ duæ realiter potentie , sed ejusdē facultatis duo munera & rationes ; quemadmodū de intellectu , & voluntate in calce primæ quæstionis ostensum est .

Modus autem proprius cognoscendi conveniens intellectui , ut is à sensu secernitur , est attingendo rationes universalissimas , & transcendentes , præcipuè rationem entis , à qua nunquam in suis notitiis abstrahere posse , satis , puto , efficaciter in Logicis demonstravi , & hinc impossibilem esse intellectum materiale , aut limitatum ad certa intelligibilia in Metaphysicis ostendam . hinc etiam est emergso intellectus à materia , & organo , ut est confectum , ubi de animæ immortalitate .

Ex his difficultas oritur; undenam sit illa affixio, ac veluti dependentia intellectus à sensu, ut intelligere nihil possit, nisi per conversionem ad phantasmata, ut loquitur passim Aristoteles, h. e. nisi simul phantasia operetur, eiusque operationem veluti cogitandi substratum intellectus perpetuò speculetur,

Ejusmodi difficultatem non solvant, sed irrident Atomistæ nonnulli, hac etiam ex parte, ubi atomorum legiones mechanicis viribus instruere, & experimenta per machinas obiectare non licet, Peripateticos aggressi; persuasum enim habent, quod hic supponimus, è stolidi illa credulitate derivari, quæ in Aristotelis verba juramus. Cæterum nihil esse certius, quam intellectum à sensibus, dum cogitat, rerum imagines non semper haurire, adeoque non ita phantasmati affixum esse, ut cognoscere, nisi illud contemplando, non queat. quam enim multa sunt, quæ intellectu concipimus, ad quæ sensus non potest pervadere? Deum, Angelos, animam nostram, ejusque actus, & habitus, sapientiam, virtutem, universales rerum notiones, & essentias, habitudines, proportionem, differendi leges, Metaphysica principia, ac Geometrica mente quidem amplectimur; sed nunquid eadem sensu, & phantasmate representamus? Præter hæc si quidquid scimus, à sensu habemus non certius de iis quidquam pronuciare possemus unquam, quam de iis, quæ sensu docente cognoscimus. Hoc autem falsum esse, quis nescit? quæ per sensum experimentaliter nota sunt, physicam ad summum evidentiam habent. principia prima, conclusiones demonstratæ, aliæque veritates plurimæ, inter quas se existere, se vivere, se cogitare, cuique evidentes Metaphysicè sunt. non ergo omnis nostra notitia originem suam à sensibus trahit.

Hæc tamen omnia extrà remissata in Aristotelem esse, ut veritatem cæteròqui evidentem,

tem, sed eo nomine invisam, quod Peripatetica est, evertant. liquido constabit, si communis nostrorum mens ab adversariis non intellecta, aut aliò traducta, ut habeant, quod meritò improbent, suis expressa coloribus exhibeatur. Profectò intellectum nostrum nihil aliud intelligere, niuquod sensus capit, nemo Peripateticus somniavit: Atomistæ id quidem permulti docuere, ducem Epicurum sequuti. Quamobrem & quod universalia, & quod spiritualia intelligimus, & ultra sensuum fines longe intelligendo provehimur, non invenient inter nostros, qui negent: invenient inter suos. Evidentiam quoque astruimus summam in veritatibus, quas primas, & per se notas vocamus: in quas sensus nihil potest, nisi ad summum mera terminorum, quos non plenè capit, exhibitione: qua posita, ex lumine cuique à natura indito, quodque est divini luminis impressa participatio, in assensum erumpit; ac notitiam veritatis sensu non perceptibilis, ambiguitate omni semota, intra se concipit. Hæc quidem omnia Peripatetici, post Aristotelem ex his animæ immortalitatem venantem, non permittimus modo, sed pleno ore, ut minimè dubia, pronunciamus.

Cum his tamen stat dependentia intellectus à phantasmate, ac sensu; quamvis enim iudicando, ac discurrendo suprà hunc elevemur, qui discursivus, ac iudicativus non est; dum tamen cognoscimus, ità sensui affigimur, ut etiam Deum, Angelos, spiritualia, supernaturalia ad modum sensibilibum, & materialium repræsentemus, atque ut ità loquar, corporea quadam veste, lineamentis, figura induamus; quamvis hanc cognoscendi imperfectionem iudicio corrigamus. Non posse autem nos aliter pro hoc statu cognoscere si negant; ad experientiam provoco, quam D. Thomas, quam Scotus, quam Theologi, Philosophique innumeri, testes

luculentissimi, fatebuntur. quid enim? purior scilicet intelligendi modus Atomistis aut à natura, aut ab assuetudine datus est, quàm quem in se sint olim experti sanctissimi, doctissimi que homines, quorum industria in eo maximè laboravit, ut mentem, quoad fieri potest, à sensuum fallaciis avocarent? hoc qui credat, nihil est, me iudice, tam absònum, quod non sibi persuadere eodem iure possit.

Accedit, quod licet nostrarum cognitionum progressus ab intellectu ipso sit, origo tamen nonnisi à sensu, qui primas rerum species materialium excipiens, ac menti tradens. eam pro ingenta vi ad ulteriora propellit. Hinc in vitæ vestibulo ad sensibilia oculati, ad spiritualia, altioraque caligamus, donec sensim meliora edocti, ad divina etiam assurgimus. Hinc Fides ipsa, divinorum magistra, sensuum ministratio sese nobis insinuat; est enim, ut loquitur Apostolus. *ex auditu*. Atque hæc est ipsa ratio, cur speculando, quidquid conemur, phantasmata amoliri non possimus, sed ea necessario contemplemur. cum enim à principio complexas species formaverimus rei, & phantasmatis (quemadmodum in Logicis dixi, formari complexas species rei, & vocis, ut audita voce, rei, & re cognita, vocis notitia excitetur) consequens est, ut nihil liceat percipere sine phantasmate.

Verùm quamvis hoc probet, intelligentiam in decursu phantasmati necessario sociari; non satis tamen ostendit phantasmatis, ac sensus ad intelligendum præviam primò indigentiam. Verum hæc evinci non potest, nisi ex animæ nostræ natura à posteriori nobis nota. hinc enim ea habet, ut sit corporis forma; si enim ad intelligendum esset naturaliter sine corpore, & phantasmate expedita, corpus, à quo non iuvaretur, sed impediretur potius, ingredi nullatenus posset, ut forma, cuius est esse seminaturam, & indiges

read

A

foret
tota f
istur
deo:
cndo
p opri
i pac
Quo

re ad operandum intrinseco comprincipio.

Est & aliud pro hac veritate evidens argumentum. si enim ad intelligendum phantasia non est opus, nec sensui intellectus affixus est & colligatus; dicant, si possunt, unde sit, quod phantasiae organo laeso, adeoque phantasmate; aut omnino sublato; aut ex parte impedito, ne rite procedere valeat, intellectum etiam idem morbus inficiat, ut in ebriis, & amentibus videre quotidie est.

Fatendum igitur nihil à nobis intelligi, nisi duce, vel socia phantasia: quem modum cognoscendi conversionem ad phantasmata Aristoteles appellare consuevit. Quod autem Scotus hanc nobis inflictam in originali criminis poenam putaverit, improbable non est, si id dumtaxat voluit, aliam nobis meliorem cognoscendi rationem in statu innocentiae, gratiae loco, concessam, à qua per culpam excidimus. Ceterum si hanc naturalem, quam verò de facto habemus, merè poenalem esse censuit, & citra naturae nostrae meritum, & exigentiam, non probò. quae enim dicta sunt de anima corporis forma, adeoque corporis naturaliter indiga, ut intelligat, oppositum convincunt.

C A P U T III.

Quid sit formaliter intellectio, quid verbum mentis.

ANtequam actus intelligendi consideretur, obiecti intelligibilis natura tractanda foret. Sed quia de hoc, quod ens ipsum est in tota sua latitudine, nonnulla in Logicis, plura dicturus sum in Metaphysicis, ab eo nunc supersedeo: & ab intellectu ad intellectionem descendendo, de qua duo inquirō. 1. in quosita sit propria, & formalis intelligendi ratio. 2. quo illi pacto verbi notio conveniat.

Quoad primum; in actu intelligendi tria

Z ; sunt,

sunt, qualitas obiecti expressiva, quæ verbum etiam mentis, & expressa species appellatur, actio huius qualitatis productiva, receptio eiusdem in potentia. Thomistæ passim in sola actione intellectionis rationem adæquatè reponunt; alii in sola receptione. Recentiores communiter solam qualitatem expressivam appellare in intellectionem malunt. Sunt demum, qui his simul omnibus intellectionem constituunt. Sed quia in hac quæstione est aliqua lis de voce, aliqua de re, ut unam ab alia secernam, & sensum ita meum aperiam, sequentibus dictis rem definio.

Dico 1. Ad intelligendum non satis est mera actio, sed requiritur indispensabiliter qualitas obiecti expressiva.

Prob. vel nomine actionis venit mera causalitas physica, seu exercitium causæ producentis; & manifestum est, quod hæc requirit essentialiter productum à se terminum, qui quidem, fatentibus etiam Thomistis, non est, nisi qualitas expressiva. Vel nomine actionis venit entitas non modalis, sed absoluta quales sepe appellantur omnes vitæ actus, præsertim electiones; atque hæc produci debet per distinctam causalitatem, ut reliqua entia absoluta; neque ab ipsa procedet verbum ut à causalitate, sed ut à causa. At in tali qualitate non expressiva ratio intellectionis consistere non potest. intelligens enim est potentia, dum sibi repræsentat obiectum, & fit quodammodo illud non re, sed similitudine. Neque verò aliter cognitio à volitione differt, nisi quod illa, non hæc obtinet rationem imaginis: & quidem hac præcisa, vix, & ne vix quidem explicari poterit notio propria cognitionis. Præter hæc si qualitate non expressiva sit satis anima intelligens, non video, quid sit opus qualitas consequens expressiva. Neque enim ea est opus, ut habeatur obiecti similitudo; nam quid est opus ad intelligendum assimilatione, si intelligere non est assimilari? de in-

deinde nec requiritur, ut cognitioni sit terminus; nam si causalitas non est, non debet habere terminum productum: & quia cognitio est, jam habet terminum cognitum, obiectum scilicet ipsum. Neque rursus est necessaria, ut per eam obiectum fiat quodammodo praesens potentiae; cum enim eiusmodi praesentia debeat esse universim intentionalis, habetur abunde per speciem in actu primo, & per cognitionem in actu secundo. ipsum scilicet cognosci est representari.

Dico 2. Intellectio formaliter non consistit in sola receptione speciei expressae.

Prob. vel enim excluditur actio una qua expressiva qualitas ab intellectu manat, atque hoc esse falsum constat ex conceptu vitae a libi tradito, & probato. Vel excluditur etiam forma ipsa, & qualitas; atque hoc satis absone est dictum; quis enim formam calidi solam caloris cum subiecto unionem appellet? Profecto unio non ratione sui, sed termini communicat formalem effectum subiecto. hinc formae principalius, quam unioni denominatio tribuitur. Ad haec conceptus intellectionis ex dictis est conceptus similitudinis; Unio autem, quae est ordo formae ad potentiam, ut subiectum non est similitudo, quae est ordo potentiae ad obiectum.

Dico 3. Intellectio sumpta in abstracto consistit formaliter in sola qualitate expressiva: sumpta in concreto praeter intellectum ventientem in recto, actionem, passionem, & qualitatem constitutivè importat.

Prob. prima pars. primò authoritate D. Th. in 1. dist. 27. q. 2. ar. 2. ubi haec habet: *Unde oportet, quod verbum, vel dicatur ipsa operatio intelligendi, vel ipsa species, quae est similitudo rei intellecta: & sine utroque istorum non potest quis intelligere; utrumque enim istorum est id, quo quis intelligit formaliter.* Concedit ergo S. Doctor per qualitatem obiecti expressivam intelligi forma-

liter, adeoque eam esse formam intelligendi, quod verò addit, actionem quoque esse eiusmodi formam, non probatur; sic enim intellectio- nis nomen staret æquivocè, nec posset facile declarari, quod sit illud prædicatum in actione, quod intellectio constituitur, ut per ultimam differentiam. Si enim satis esset expressivitas, idest vis effectiva consequentis expressionis, impressa etiam species intellectio- nis nomen meretur.

Prob. altera pars. Ea omnia denominationem constituunt, quibus singulis ablatis, denominatio tollitur. atqui ablata forma, vel subiecto, vel formæ in subiecto receptione, denominatio non constat, ut patet inducendo in omni physica denominatione, qualis est denominatio intelligentis. hæc igitur ea omnia involvit; & præterea actionem; cum enim sit denominatio vitalis, quæ habet essentialiter, ut sit in principio, & à principio vivente; consequens est, ut actionem quoque, qua actum in se efficit, & in ultima sua perfectione se constituit, intelligens qua tale includat.

Post hæc explicanda propria notio verbi mentis, ut videatur, an, & quatenus intellectio- ni conveniat. Verbum univèrsim habetur per dictionem, seu locutionem. Est autem Locutio Productio, seu formatio signi manifestativi à principio Locutivo formaliter ut locutivo. Signum eiusmodi manifestativum derivatum ab intellectu qua tali verbum dicitur, estque duplex, mentale, & vocale. illud est cogitatio ipsa ab ore cordis, ut loquitur Augustinus, idest ab intellectu formata: hoc est sonans exterius vox prolata ab ore corporis, quæ ex eodem Augustino signum est potius verbi, quam verbum. pro duplici hoc verbo duplex est item locutio: altera, qua mens ipsa per se dicit: altera, qua dicit per potentiam aliam sibi subordinatam, in qua quidem nisi habetur specialis à mente depen-
den-

dentia, utcumque articulentur voces, ut sit à Pfitacco, locutio, & verbum formaliter non habetur.

Dividitur deinde locutio in externam, & internam: quæ divisio, ut coincidere videatur, non tamen re ipsa coincidit cum priorè. Interna est, qua mens ipsa sibi loquitur, dum cogitat; Sic enim impii Sap. 2. *Dixerunt apud se cogitantes non rectè*. Externa est, quæ loquitur alteri, ponendo signa manifestativa, vel sensibilia, ut voces, vel insensibilia, qualia sunt, quæ adhibentur ab Angelis. Hæc etiam est duplex: alia simpliciter talis, cum ponimus signum extra ab aliis cognoscibile: alia dicitur locutio ad alterum, cum voluntatis actu ad certum auditorem verba dirigimus, cui præ cæteris aliquid innotescere volumus, prout à nobis mente concipitur.

Ex his fit, verbum mentis esse actum ipsam intelligentiæ ab intellectu productum, ipsique obiectum manifestantem. hinc omnis intellectio est mentis verbum, & rursus omne mentis verbum est intellectio, prout hæc sonat non cognitionem tantum expressivam, sed quæcumque intellectus actum etiam non expressivum. Sed præcipue verbum iudicium est, in quo veritas propriissime continetur; ex hoc enim locutio non est, nisi intelligentis, ad quem pertinet unum iudicare, veritatemque percipere primum, tum verò alteri manifestare. Est etiam de ratione verbi emanatio à principio dicente, ut enim nemo loqui dicitur extra per voces ab alio prolatas, ita nemo loqui intra potest per cognitionem ab alio provenientem. Rursus non alia de causa cognitio essentialis divina Verbum non est, nisi quia est improducta: secunda verò Persona Verbum dicitur, quia est Sapientis genita, & à Patris intellecta qua tali originatur:

CAPUT IV.

*Cognitionum genera varia afferuntur,
& explicantur.*

PRima, eaque celeberrima actuum nostræ mentis divisio est in tres, ut ajunt, operationes; de quibus abundè in Logicis; ubi etiam de actu scientifico, & opinativo, deque eorum adjunctis, evidentia, certitudine, obscuritate, formidine, quodcumque est momenti alii cuius expensum est, & expositum. Superest, ut quatuor nunc notitiarum præcipua genera exhibeam, & declarem; quid sit scilicet Intuitiva, Quidditativa, Comprehensiva, & Abstractiva cognitio; existarum namque notionibus ritè explicatis innumera controversiarum seges præsertim Theologicarum præciditur, utpotè tota plerumque à vocibus istis perperam usurpatis erumpens.

§. I.

De Notitia Intuitiva.

Quid sit notitia intuitiva, & quatenus ab abstractiva secernitur, ita variant Doctores, ut Recapitus noster tr. 1. de Uno lib. 6. q. 32. cap. 3. octo ipsas enumeret sententias. Equidem servato, quoad licet, rigore loquendi communius à Doctoribus usurpato, Intuitivam notitiam judicativam (simplex enim intuitiva, qualis non reperitur nisi in sensu exteriore, estque ea, quæ intuitivam complexam determinat) eam dico, qua judicamus existentiam obiecti exercitam pro aliqua temporis differentia, ita ut motivum seu ratio ita judicandi non sit quid distinctum ab exercitio ipso existendi, quod est in obiecto, & experimentalis notitia, quæ est in potentia. quare si intuens interrogetur, cur judicet, obiectum esse, non aliud

aliud in rationem afferret, quam esse ipsum obiecti.

Veritas huius notionis constat primò ex ipsa oculari visione, unde in intellectum nomen intuitionis est derivatum, quæ non aliter se habet ad affirmandam obiecti existentiam, ac explicatum est. Et hoc est, quod vulgo dicunt, Intuitionem esse ad existens, ac præsens quæ tale: quod quidem intelligi non potest de quacumque notitia etiam evidenti existentia, ac præsentia; nam scimus evidenter Deum existere, ac præsentem nobis esse; nec tamen ipsum intuemur. Scit Astronomus ex nota combinatione motuum planetarum præsentem eclipsin, etiam cubiculo clausus; neque propterea eclipsin videre eatenus dicitur. Sensus ergo est, quod intuitio sit ad existens, ac præsens quæ tale; quia hæc ipsa existentia, & præsentia non est solum res iudicata; sed etiam ratio iudicandi. hinc differt à vidente sciens, quod hic aliunde ad iudicandum movetur, quàm à re ipsa quæ existente.

Sed hic notanda duo. 1. dum intuitio dicitur esse de obiecto præsentem, non esse sensum de præsentia simpliciter obiecti; quæ coexistat intuitioni, ex communi enim Theologorum usu scientia est in Deo Visionis etiam futurorum. præsentia ergo stat ampliativè pro existentia simpliciter exercita aliquando. quare visio esse potest præteriti etiam, & futuri: non autem purè possibilis; hoc enim existentiam dicit non exercitam, sed signatam, non absolutam, sed hypotheticam. 2. dum existentia obiecti dicitur esse iudicandi intuitivè motivum, non esse sermonem de motivo riguroso exercente physicam causalitatem in cognitionem. Sic enim nulla esset in Deo creati obiecti visio. Sed nomine motivi venit ratio affirmandi, quæ de suo conceptu causalitatem non importat. quare interroganti cur Deus affirmet Petri peccatum,

respondemus, quia Petrus peccat, quatenus peccati existentia est ultimum determinativum quo stante, divinus intellectus peccatum esse affirmat. Ex his

Infertur 1. intuitionem discursivam nullatenus esse. discursus enim est veritas una ex alia descendens. hic autem habetur unica veritas propter se affirmata.

Infertur 2. non omnem notitiam immediatam existentiae obiecti esse eiusdem intuitionem posset enim quis affirmare, quod Deus v. g. existat, ita ut affirmandi motivum non sit existentia, sed termini. atqui tunc est notitia Dei existentis immediata, sed non intuitiva, ut patet ex huius tradita notione. ergo. maior prob. potest quis divinæ naturæ habere immediatam quidditativam notitiam, ut seq. §. constabit, qua certificetur de sola *entis à se* possibilitate. hac autem posita, ex terminis patet, tale ens existere. hac enim propositio, *ens à se existit*, ex suis terminis rectè penetratis meretur assensum, si constet de compossibilitate terminorum renentiam se ex parte subiecti, de qua jam constat, ut dictum est, per quidditativam immediatam notitiam.

Infertur 3. falsum esse, quod multi asserunt minus cautè, omnem cognitionem non intuitivam necessario præsupponere intuitivam; quia, inquit, cognitio intuitiva est cognitio rei in alio, vel ergo illud aliud cognoscitur in alio, vel in se. si in alio, & illud etiam in alio, ibitur in infinitum, si in se, jam cognoscitur intuitivè, adeoque omnis cognitio ad intuitivam reducitur. Infertur, inquam, id falsum esse, non enim omnis cognitio immediata est intuitiva. hinc veritates per deductionem ad impossibile demonstratæ sistant in veritate primi principii, evidenter quidem, sed non intuitivè noti.

Infertur 4. notitiam intuitivam non excludere speciem intentionalem impressam, à qua

qua immediate ut à virtute obiecti procedat efficienter. Ratio est; quia species ista, ut superius probatum est, non concurrens ad notitiam ut medium præcognitum, sed merè ut causa cognitionis ignota. quare non tollit immediationem simpliciter inter cognitionem. & obiectum, ita ut hoc unum assignari non possit in rationem affirmandi præcisam. Hinc est, quod licet ex Philosopho sensatio exterior à specie immediata sit, non tamen idcirco à ratione intuitionis cadit.

Infertur 5. resolutio celebris controversiæ, qua quaeritur, utrum intuitiva cognitio possit esse præcisiva. Resolutio est autem affirmativa: pro qua noto non esse hanc hitem de præcisione, ut aiunt, obiectiva, quam universim in Metaphys. impossibilem probabo, sed de formaliter imperfectam, & inadæquatam eiusdem indivisibilis obiecti expressionem. Jam verò posse intuitionem esse inadæquatam, probabo 1. à post. multa enim cognoscimus intuitivè, quorum essentialia prædicata non omnia penetravimus: quod quidem non solum est manifestum in sensibus exterioribus intuitivè, sed imperfectissimè obiecta sua exhibentibus, sed etiam in intellectu experimentaliter cognoscente actus suos, nec tamen in illis prædicata omnia distinguente. Sic dum quis credit Deo, aut Deum amat, novit intuitivè eos actus, sed utrum supernaturales sint, an naturales, ignorat: atque ita de aliis pluribus prædicatis. hoc autem est formaliter præscindere. datur ergo præcisiva intuitio. Id ipsum prob. 2. ex iacta intuitionis notione, quæ est, ut sit affirmatio existentiae propter ipsam. hoc autem stat, quamvis non omnia rei prædicata exprimantur; qui enim animal procul videt, certus est de existentia, incertus de differentia, ergo esse potest intuitio præcisiva.

De Notitia Quidditativa.

Quidditativa ex vi vocis est notitia, quæ rei quidditas integra, usque ad ultimum prædicatum constitutivum, ac distinctivum, exprimitur, & quidem expressione obiecto proportionata, ita ut si differentiale potissimum rei prædicatum sit absolutum, aut respectivum, positivum, aut negativum, eodem prorsus modo, quo in se est, intellectui representetur. Ex quo.

Habes, non esse in rigore quidditativam omnem eam notitiam, quæ utcumque attingit prædicatum rei proprium, & convertibile. talis enim notitia multipliciter potest à quidditativa deficere. 1. si prædicatum sit proprium, sed non primum, ut si hominem cognoscas ut risivum, Deum ut immensum. 2. si sit proprium, & absolutum, sed non representetur, nisi sub habitudine. sic exprimitur Deus sub nomine primæ causæ. Fateor, appellari vulgo quidditativam notionem rei absolutæ per respectum, ut cum homo dicitur *rationalis*: sed hæc minis est propria acceptio, substantia enim ut suum esse, ita & definitionem habet in priori ad accidens, cuius est proprium definiti per additamentum. Verum quia pro hoc statu substantiam non nisi medio accidente cognoscimus, hæc iam appellatur quidditativa cognitio, non simpliciter, sed comparate ad nos, qui meliorem, prioremque notitiam non habemus. 3. si prædicatum sit positivum, & cognoscatur negativè. sic exprimitur Deus sub ratione entis à se: quæ licet sit positiva perfectio, nobis non sonat, nisi negationem ab alietatis, ac dependentiæ. 4. demum cadit cognitio à proprietate quidditativæ, si proprium, ac differentiale prædicatum, quod est in re unum, & simplex, à no.

a nobis complexione plurium significatur, quæ seorsim in aliis dissimili ratione reperiuntur. sic dicitur Deus identicè principium, & actus intelligendi; quod est quidem propriissimum ipsius; sed involvit tamen prædicata *principii*, & *operationis*, quæ sunt in creaturis distincta, adeoque longè distantia ab iisdem, ut habentibus identitatem, ac simplicitatem summam in Deo.

Habes 2. notitiam quidditativam obiecti creati cuiuscumque posse esse mediatam in alio, tanquam in medio. Illatio patet cum ex communi sensu Theologorum, creaturas in Deo cognosci non quidditative solum, sed etiam comprehensive afferentium: tum ex dictis; Deus enim continet sive formaliter, sive eminenter ultimam cuiusque creature perfectionem, adeoque sua uniusmotive potest determinare intellectum ad ejus perfectionis notitiam, quæ ex positivis quidditativa est.

Habes 3. in nullo obiecto creato, quod sit physica, & realis duntaxat divinæ causæ imago, posse eam quidditative cognosci. illud enim medium, quod valde diminutè, & imperfectè obiecti prædicata ostendere natum est; ita ut quæ in hoc sunt simplicia, absoluta, & positiva, in medio non possint nisi compositè, respectivè, & negativè exprimi, non potest facere notitiam obiecti quidditativam. sic autem certè se habent creature omnes ad Deum, quem proinde non notificant, nisi sub ratione primæ causæ, excludentis omnem ipsarum imperfectionem, & infinitè ipsas superantis, adeoque in ipsis non consenti secundum positivum, & infinitum illum excessum, quo ab iis contradistinguitur.

Habes 4. posse Deum quidditative cognosci in medio creato, quod sit ipsius similitudo, & imago non realis, sed intentionalis, v. g. in visione beata, quæ de facto datur. Potest siquidem visio ipsa beata cognosci tum quidditative,

tum etiam comprehensive. in ea autem sic cognita Deum ipsum quidditative cognosci necessesse est; cum enim ea exprimat ultimum Dei, ac differentiale prædicatum, quale in Deo reperitur, consequens est, ut qui eam tenet, hoc etiam teneat, quod sicuti est Dei realiter; ita intentionaliter sumptum est visionis ipsius propria differentia.

Habes 5. posse dari non creaturæ modò, sed Dei immediatam quidditativam notitiam, quæ intuitiva non sit. Primum est extrà dubium; cum enim prædicatum creaturæ differentiale non determinet intellectum ad affirmandam ejusdem exercitam existentiam, liquidò constat, posse illud sine hac judicari. atque ità de facto possibilia omnia à Deo cognoscuntur per scientiam, quam intelligentiam simplicem Theologi appellant. Alterum prob. Potest Deus ad arbitrium diversimodis creaturæ intellectui etiam immediatè manifestare. poterit ergo se per tale lumen ostendere, quo mens determinatur ad affirmandum præcisè prædicatum ipsius quidditativum per propositionem hypotheticam, absque eo, quod per eundem actum affirmetur absolutè existentia per categoricam.

Neque valet, quod obicitur, ipsum essendi exercitium aut esse Dei quidditatem, aut in ea imbibit; adeòque non posse Deum quidditatem suam sine sua existentia manifestare. Non, inquam, id valet. nam solum sit; affirmandam esse existentiam non per eundem; sed per alium actum; per illum enim affirmaretur hypotheticè sola v. g. aseitias, vel infinitas, secundum meram possibilitatem, quatenus his datis, contradictio non sequeretur. quamvis autem hinc evidenter inferatur existentia, si tamen inferatur per alium consequentem actum iudicatur: qui ipse actus intuitivus non est, cum nitatur in habitudine necessaria terminorum.

§. III.

De Notitia Comprehensiva.

NOmen comprehensionis sumitur aliquan-
dò latè pro cognitione quacumque præ-
sertim intuitiva obiecti. hinc visio beata in
Scripturis Comprehensio dicitur, & beati
Comprehensores. Strictiùs sumitur à Schola-
sticis pro cognitione, quæ intrinsecæ obiecti
cognoscibilitati omninò commensuratur, ita ut
tanta sit cognitionis perfectio, quanta est obie-
cti naturalis cognoscibilitas. hinc vulgò dici-
tur cōprehensio partus nobilissimus obiecti, in
quem tota eius cognoscibilitatis efficacia, vir-
tusq; se effundit. In hoc sensu comprehensio-
nem usurpant D. Thomas 1.p.qu. 12. art. 7. o. &
Scholastici passim apud P. Vasquez tom. 1.
in 1.p. disp. 53. c. 1. dum explicant Dei incom-
prehensibilitatem in sacris literis assertam.
Huc etiam facit celebre illud August. *Quidquid
scientia comprehenditur, scientis comprehensione
finitur.* est enim cōprehensio circūscriptio quæ-
dam obiecti, qua cognoscens ita illud ex toto
amplectitur, ut meliorem aliam cognitionem
obiectū nec possit naturaliter parere, nec exigat.

Verū obiectum unum non potest esse regu-
la certa quantitatis, ac perfectionis ad compre-
hensionē requisitæ; potest n. cum debiliore po-
tentia minorem, cum fortiore maiorem sui
cognitionem perficere, adeoque indifferens
per se est ad hunc, & illum notitiæ gradum, &
debet à viribus potentiae determinari. Censue-
rim proindè mensuram comprehensionis desu-
mendam principaliter quidem ab obiecto,
dum tamen hoc nanciscitur vim cognosciti-
vam cognoscibilitati suæ omnino parem. hoc
quidem complexo obiecti, ac potentiae obie-
ctum æquantis toto suo conatu operante, ne-
cessè est, ut cognitio consurgat obiecto par;

eaque ipsa, qua perfectiorem aliam obiectum non exigit. cum enim cognoscibilitas, v.g. ut quatuor non possit petere, nisi vim cognoscitivam ut quatuor (cum & maior sit supra, minor sit infra meritum) in quam vires suas integras experiatur; consequens est, ut expressio ab æquali facultate elicitæ ea sit una, quæ ad amissim cognoscibili congruit. Atque hic videtur communis etiam cum D. Th. Theologorum sensus; quamvis enim Angelus superior in intellectu inferioris agat omnibus viribus, ab eo comprehendendi non dicitur, & dicitur comprehendendi ab æquali. idque non nisi ob potentiam cum obiecto æqualitatem. Non tamen hinc rectè inferri putaverim, neutiquam posse ab inferiori superiorē comprehendere; si enim inferiori aliunde vires accedant defectum supplentes, non video, cur non possit superioris cognitionem concipere illi prorsus commensuratam, quæ ab æquali naturaliter agente conciperetur. Si enim potest creatura ad Dei visionem assurgere tantò viribus suis maiorem, cur non possit inferior ad superioris comprehensionem tantò visione illa minorem, si indebita, ut ibi, ac proportionata notitiæ facultate augeatur.

Sequitur autem hinc 1. cognitionem comprehensivam non esse optimam possibilem, sed optimam ab obiecto exigitam, ultra cuius fines si excurrat potentia, non dicitur amplius comprehendere, sed supercomprehendere obiectum. Hinc quævis creatura à Deo supercomprehenditur; quamvis enim quævis petat divinam cognitionem, tanquam adæquativam causæ agentis à proposito, à qua petit essentialiter esse; non tamen eam petit, ut partem cognoscibilitatis, ac motionis suæ unā cum potentia æquali à se secundata natum generari.

Sequitur 2. ad comprehensionem non esse opus, ut omnes omnino termini, cum quibus obiectum utcumque connectitur, distinctè, & mul.

multò minùs comprehensivè exprimentur. Sic enim nulla creatura aliam naturaliter comprehenderet, cum termini isti sint infiniti, & aliqui supernaturales, ad quos proinde non potest naturalis cognitio pervenire. hoc autem communi sententiae adversatur. Rursus si comprehensio est, quam potest obiectum in potentia sibi æquali per se, suasque vires efficere, certum est non debere usque adeò extendi, cum ad omnes eos terminos non possit obiectum finita, ac naturali motione potentiam promoveri.

Sequitur 3. Deum infinita sua cognitione comprehendere, sed non supercomprehendere seipsum, cum enim in eo commensuretur omnino cum cognoscitivitate cognoscibilitas (utraque scilicet infinita est) cognitio inde confurgat oportet par, non excedens, adeoque comprehensiva, non supercomprehensiva.

Sequitur 4. Deum à nullo intellectu creato comprehensibilem esse. Constat evidenter ex dictis; si enim divina cognitio est Deo par, adeoque mera comprehensio, si qua detur creatura etiam Dei comprehensio, debet esse cognitio par divinæ; si enim minor est, & imperfectior, recedit à commensuratione cum obiecto, & consequenter cadit à comprehensionis ratione. at verò quæ sit possibilis creata cognitio divinæ par, & non potius ab ea infinito excessu elongata, si divinus intellectus infinitè creatum quemcumque etiam elevatum, & viribus indebitis auctum excedit?

§. I V.

De Notitia Abstractiva.

EX hætenus declaratis facile patet, quid sit abstractiva notitia. hæc quidem cum ab authoribus diversimodè usurpetur, ut scilicet opponitur vel intuitivæ, vel quidditativæ, vel comprehensivæ (hinc est sæpè in hujus

ius nominis acceptione æquivocatio, quæ si distinguatur, multa corrueunt, quæ sæpè obijciuntur ex vano, qui harum notiones tenet, nullo negotio abstractivam exponet.

Igitur ex vi vocis abstractiva dicitur notitia, quæ abstrahit, ac præscindit. Vel ergo rem considerat abstrahendo ab existentia rei exercitæ tanquam à re affirmata simul, & motivo affirmandi; atque ità opponitur intuitivæ. Sic notitia de creatura possibili quæ tali abstractiva dicitur. Hoc autem pacto abstractiva, & potest esse immediata, & nullam in suo conceptu imperfectionem involvit; est enim in Deo relatæ ad possibilia.

Vel considerat prædicata cõmunia, non differentiale, aut hoc etiã, non tamen modo rei existentie proportionato. atq; ità opponitur quidditativæ. Sic dicitur abstractivè cognosci homo *ut animal*, & Deus pro hoc statu *ut ens à se*.

Vel res imperfectè ità exprimitur, ut unum sine alio eiusdem rei prædicato, aut omnia rei prædicata non ità perfectè, ut exigit objectum, represententur. & sic abstractiva comprehensivæ contrariatur. in quo sensu visio etiã beata abstractiva dici potest.

Sumitur demum non rarò abstractiva cognitio pro mediata; atque ità non solum opponitur intuitivæ, quæ indispensabiliter immediata est, sed etiã quidditativæ, & comprehensivæ, dum istæ scilicet immediatæ sunt. Certe, rùm vulgò abstractiva appellari non solet quævis mediata notitia, sed ea dumtaxat, quæ est per medium ignobilius. Sic Deus in creaturis dicitur ænigmaticè, & abstractivè cognosci; sed non similiter creaturæ in Deo.

C A P U T V.

De Memoria, & Reminiscentiâ.

IN libello, quem hoc ipso titulo inscripsit Aristoteles cap. 1. memoriam cum sensu, & spe

& ipse ita comparat, ut memoria sit facti; sensus (exterior) praesentis, spes futuri. unde concludit, recordari formaliter non posse, nisi ea animalia, quae sentiunt tempus, quaeque possunt in suos actus reflectere; est enim memoria cognitio obiecti aliàs cogniti quàm talis, adeoque coniuncta cum reflexione supra cognitionem priorem. nemo siquidem dicet, recordari se rei cuiusquam, nisi simul affirmet eam olim cognovisse. Reminiscencia verò quaedam est memoriae species, cui addit, ut sit rei iam cognitae, quae tamen è memoria penè exciderat, per discursum reparata cognitio. dixi *penè exciderat*, non omninò. dum enim memini, me in foro vidisse hominem, & ignoro, quis ille potissimum fuerit, non simpliciter, sed aliquo qualiter tamen teneo, quis fuerit; aliter occurrente, quod fuerit Paulus, non statim negatè; occurrente, quod fuerit Petrus, non statim concederem. ex parte igitur teneo, & ex parte quaero, ut loquitur in Conf. August. hoc quare ratione contingat, satis, opinor, q. 7. c. 3. exposui. Ex hoc porrò discrimine Memoriam inter, & Reminiscencia, quòd illa sit per se obvia, & sine discursu, hæc discursu medio teneatur, nascitur, quod Aristoteles docet cit. lib. initio; ut tardiori licet ingenio praediti memoria, ingeniosiores tamen reminiscencia magis valeant.

Verùm in hac animae nostrae potentia, quae communis est sensui cum mente, duo sunt, quae negotium facessunt. 1. quia species obiectorum debent in anima perseverare ad memorandum. hinc autem fieret, ut deberet facultas semper esse ea omnia actu cogitans, esset enim ad ea omnia per species in potentia proxima, & secunda, inter quam, & actum nihil mediat. 2. si in anima sunt species innumerabilium obiectorum, quid est, quod huius potius, quàm illius recordamur? Neque verò possumus in causam arbitrium asserere? sæpè enim ro-

cordamur inviti. & præterea si hoc potius, quam illud volumus recordari, cum non sit ulla sine præcognitione volitio, hoc potius, quam illud cognoscimus, adeoque recordamur, antequam recordemur.

Hæc quidem tanti sunt, ut, si vera referunt, moverint Avicennam ad memoriam in parte intellectiva negandam. Sed perperam; quia eadem argumenta sensitivam memoriam urgent, adeoque utraque fuerat neganda, aut utraque concedenda. Communis ergo responsio ad primam difficultatem est, non sufficere in animam vim cognitionis productivam, sed opus insuper esse, ut ea impedita non sit. jam verò impediri mens potest à quocumque impediante phantasiā; hæc autem rursus vel à somno ligante potentias per oclusum spiritibus aditum, vel ab attentione ad alia objecta: vel demum quia species sunt adeò debiles, ut se solis movere potentiam non valeant, sed egeant nova specie adjuvante, atque ita excitante priorem.

Quod attinet deinde ad specierum excitationem (quæ erat altera difficultas) & ad rationē, cur una potius, quam aliam revocetur, & moveat, dicunt Peripatetici communiter ex multiplici capite id contingere. 1. à Deo, vel bono, aut malo Angelo: qui est recursus ad machinā. 2. quia species excitata est valdè præceteris intensā, adeoque præ iis movens ad objecti sui notitiam. Sic experimur, species quasdam vehementer molestas, aut jucundas semper easdem recurrere, nec facile posse excuti. 3. quia species una sæpè excitatur ab alia propter objectorum connexionem, aut complexionem ipsarum specierum, cum scilicet vel objecta ita se habent, ut unum ducat in alterius cognitionem: vel quia simul sunt cognita per complexam speciem, ut accidere in vocibus significativis in Logica dixi. Sed ista tamen ut huius, vel illius memoriz effectus rationem dent, rem totam penitus

non

non evolvunt, unde omnia probari possint.

Utergo rem istam enucleem, prius memoriā sensitivam; tum verò intellectivam aggrediar. Recolendum verò ex dictis citato c. 3. q. 3. species memorativas non in cerebri substantia, sed in spiritibus animalibus residere, hi autem, tenuissimæ, & insensibiles penè substantiæ, è sanguinis purgata pro viribus parte, ut censetur communiter, erutæ; à cerebro perfectæ, magnam habent inter se diversitatem pro sanguinis, unde erumpunt heterogeneitate; adeoque in aliis sanguis ipse abundat, in aliis pituita, in aliis bilis, &c. in his spiritibus species imprimi cit. loco probatum est. Jam verò nihil dixerim improbabile; nisi juxta spirituum varietatem varias in iis signari species assevero, ita ut lætæ in sanguineis, cholericæ in biliosis, tristes in melancholicis, &c. inexistant: quæ verò passionibus excitandis aptæ non sunt, ut scientificæ, aliæque sexcentæ, aut in pituitosis, aut in purioribus quibusdam, & quintæ naturæ spiritibus locentur.

His positis excitatio specierum contingat oportet juxta motionem spirituum à loco, ubi servantur, ad organum phantasie, quod idem omnino fortasse non est. Motus autem spirituum accidere multipliciter potest. primum fortuitò, dum novus eo spiritus incidit, ac priorem impellit. deinde ex connexionione obiectorum, ut dictum est, quatenus phantasia obiectum unum attingens, connexi speciem advocat. deum ex affinitate temperamenti; ut contingit, dum irati, aut tristes eorum facile meminimus, quæ iram, aut tristitiam olim provocarunt.

Neque verò male est, via, quam memoriæ munit P. Fabri per spiritus in fibris, quasi in avium penna, in cerebro dispositis, & ordine quodam sese excipientibus; modo spiritus statuuntur impressa specie graves, non verò præcisè ad impressionem localem revocandam idonei;

nei; atque hæc ordinata in fibris spirituum dispositio maximè juvat ad intelligendum ordinem ipsum, quem exactè servat memoria; ut sæpè una specie perturbata, quidquid porro sequitur, totum excidat. Fatendum tamen ab omnibus, quidvis in re ista dicatur, tentando dici potius, quàm sciendo; ut intelligamus scilicet homunculi, quid à mente nostra in aliorum contemplatione sperare debeamus, quæ, quod intra se agitur, ita percipit, ut ignoret.

Quod demum pertinet ad intellectivam memoriam, vel eam loqui volumus, quæ in hoc statu unà cum phantasia operatur; atque ista quidem species suas habet à phantasticis excitationes. Si verò de memoria sit sermo, quæ ab Angelis, & ab anima separata exercetur, est sermo de re dubia. Sunt enim, qui in his memoriam, de qua lis præsens, non agnoscant; non quasi verò iis præterita non sint nota, sed quia semper sunt nota, & nihil oblitum. quare non est opus excitationis specierum causam in iis quærere. Quod si cum aliis sentias, qui eos oblivionis capaces asserunt, contenduntque ex limitatione potentia id habere, ut non possint omnia, quorum habent species, simul intelligere; tunc verò arbitraria statui potest in iis memoria. Utenim (exemplum est *Ægidii*) qui unico intuitu paginam pluribus characteribus notatam aspicit, potest pro libito in hanc potius quàm aliam partem oculi aciem specialiter figere, eamque distinctius legere: ita Angelus omnes rerum species præteritarum in sua mente uno aspectu indistinctim, confusèque intuens, ex arbitrio suo deinde potest unam præ alia seligere, quæ ad clariorem cognitionem utatur.



Finis Tomi Tertii.



